


Yus Papí: Shuarjai  
Yus Yamaram Chicham  
Najanamu



New Testament in Shuar (ECjiv:Shuar)

# **Yus Papi: Shuarjai Yus Yamaram Chicham Najanamu New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

## **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

fb10d1f0-e2d5-5d8e-8a74-10846708c857

## Contents

MATEU . . . . .	1
MÁRKUS . . . . .	74
RÚKAS . . . . .	121
JUAN . . . . .	200
TÚRAMU . . . . .	255
RÚMANAM . . . . .	333
1 KURINTIUNAM . . . . .	363
2 KURINTIUNAM . . . . .	394
KARASEANAM . . . . .	415
IPISIUNAM . . . . .	427
JIRIPIUSNUM . . . . .	438
KURUSENAM . . . . .	446
1 TISARÚNIKIANAM . . . . .	454
2 TISARÚNIKIANAM . . . . .	461
1 TIMIUTÉUN . . . . .	465
2 TIMIUTÉUN . . . . .	474
TITIUN . . . . .	480
JIRIMIÚNKAN . . . . .	484
ISRAERNUM . . . . .	486
SÁNTIAK . . . . .	509
1 PÍTIUR . . . . .	517
2 PÍTIUR . . . . .	527
1 JUAN . . . . .	533
2 JUAN . . . . .	541
3 JUAN . . . . .	543
JÚTAS . . . . .	545
APUKARÍPSIS . . . . .	548

## Yúsan Shiir Chichamen MATEU aarmia nu

*Jesukrístu weat̃ri*  
(Rúkas 3.23-38)

<sup>1</sup> Jesukrístu weat̃ri ju ániawai. Tura ashí nañkaamas ti uunt weat̃ Tawitcha Apraámsha ániawai.

<sup>2</sup> Apraáma uchirí Isak. Tura Isaka uchirí Jakup. Jakupa uchirísha Jutá ni yachij̃aj̃.

<sup>3</sup> Tura Jutá uchirín Páresan tura Sarañcha Tamar jurermiayi. Páresa uchirísha Esrum, nuna uchirísha Aram.

<sup>4</sup> Nuna uchirísha Aminiatáp. Nuna uchirísha Nasuñ. Nuna uchirísha Sarmuñ.

<sup>5</sup> Sarmuñka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí.

<sup>6</sup> Nuna uchirísha uunt akupin Tawit. Uunt akupin Tawitia uchiríncha Sarumúñkan Patsepa jurermiayi. Patsepasha emka Uríasa nuweeyayi.

<sup>7</sup> Sarumúñka uchirí Rupuam. Nuna uchirísha Apías. Nuna uchirísha Asa.

<sup>8</sup> Asa uchirísha Jusapát. Nuna uchirísha Juram. Nuna uchirí Usías.

<sup>9</sup> Usías uchirí Jutam. Nuna uchirí Akas. Nuna uchirí Esekías.

<sup>10</sup> Esekías uchirí Manasés. Nuna uchirí Amuñ. Nuna uchirí Jusías.

<sup>11</sup> Jusías uchirí Jekunías ni yach̃i armia nuj̃aj̃. Nũj̃ Papirúnianmaỹa shuar Israer shuaran mesetj̃aj̃ nupetkar Papirúnia nuñkanam achirar júkiarmiayi.

<sup>12</sup> Nu ukunmañka Jekunías uchirí Saratiár akiiniamiayi. Tura nuna uchirí Surupapír.

<sup>13</sup> Surupapíra uchirí Awiut. Nuna uchirí Iriakím. Nuna uchirí Asur.

<sup>14</sup> Asura uchirí Satuk. Nuna uchirí Akim. Nuna uchirí Eriut.

<sup>15</sup> Eriuta uchirí Ereasár. Nuna uchirí Matañ. Nuna uchirí Jakup.

<sup>16</sup> Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

<sup>17</sup> Tuma asamtai Apraámnumiã Tawitnium Jesusa weat̃ri katurse (14) ániawai. Tawitniumiãsha Papirúnianam jukimiunma nũisha katurse weat̃ ániawai. Papirúnianam jukimiunmayãsha Krístunam ataksha katurse ániawai.

*Jesukrístu akiiniamu*  
(Rúkas 2.1-7)

<sup>18</sup> Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniátsain̄ Yusa Wakaní ajaprumtiki-amiayi.

<sup>19</sup> Ajaprukmetaisha Jusé Marin iniatsaátsuk nin ajapatniun enentáimpramiayi. Tura ti péñker asa aya iniaisatniun wakerimiayi aents nékainiatsain̄.

<sup>20</sup> Nuna tu enentáimia pujái, mesekranam Yusa suntarī tarī chicharuk tímiayi “Juséá, ame weátrum Tawitchakait. Tuma asam Marijiāi nuatnaikiatin ashamkaip. Uchin jurertatna nuka Yusa Wakaníniuiti.

<sup>21</sup> Uchin áishmañkan takustatui tura nuna naarī *JESUS* anaikiattame. Ashí ni shuarín ni tunaariyā uwentikkiartin asa Jesus anaikiatniuiti” tímiayi.

<sup>22</sup> Yus ni etserniurijiāi yaunchu timia nu uminkiatu tusa nu túrunamiayi. Juna áamtikramiayi:

<sup>23</sup> “Nuwā natsa ajapruktatui tura uchin takustatui. Nuna náarisha Emanuér anainiaktatui.” Tu áarmaiti. Emanuérsha nu chichamnum “Yus iijiāi pujuwiti” tawai.

<sup>24</sup> Jusesha mesekranmayā shintiar Yusa suntarī timia núnisan̄ Marin nuatkamiayi.

<sup>25</sup> Tura uchin júreatsain̄ tsaniñchamiayi. Tura jurermatai uchin Jesus anaikiamiayi.

## 2

*Ti neka apach Jesusan eakarmiania nu*

<sup>1</sup> Jutía nuñkanam Piriñ pépru ana nūi Jesus akiiniamiyai. Nūisha nú nuñka akupniurí Irutisauyayi. Akiiniamtai ti neka apach nantu tátainmaaniyā Jerusaréñ péprunam táarmiyai.

<sup>2</sup> Taar inintruiniak “¿Israer shuara úunt akupniurí tūi akiini-ait? tiarmiayi. Nantu tátainmaani pujaati ni yaarī wáinkiamji. Tura tikishmatratatai tusar winiaji” tiarmiayi.

<sup>3</sup> Irutis nuna antuk nusháa enentáimpramiayi. Tuma asamtai ashí Jerusaréñnumiā shuarsha antukar nusháa enentáimprarmiyai.

<sup>4</sup> Irutis nuikia ashí Israer-patri uuntrincha tura yaunchu akupkamun jintinniuncha untsukarmiyai. Tura Kristu aki- iniatniurín inintrusmiayi.

<sup>5</sup> Tutai chichainiak “Jutía nuñkanam Piriñ pepru ana nūi akiiniatniuiti, tiarmiayi. Yaunchu Yúsnan etserin tu áaruiti:

<sup>6</sup> “Jutía nuñkanam, Piriñ pepru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar ásarmatai, péñker wáinkiatwawai,” tawai Yus.” Tu tiarmiayi.

7 Nuna tuñiakui Irutis ti neka apachin úusan, urutía yaa emka wáinkiamarum tusa aniasarmiayi.

8 Nuyá Pirinnum akupeak “Nui werum uchi péñker inintrusum wáinkiatarum. Tura wáinkiarum ujatkataram. Wisha werin tikishmátuutaj” tímiayi.

9-10 Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nui ejeniarmiayi.

11 Jeá wayawar uchincha ni nukurí Marijiaí wáinkiararmiayi. Tura uchin tikishmatrarmiayi. Nuyá ni kajuntriyañ kurincha, mirá kunkuinniasha, chíkich kunkuinniasha súsarmiayi.

12 Nuyá mesekranam Yus “Irutisaini weerap” tutai chíkich jintianam wakеткиarmiayi.

### *Ejiptunam pisaamu*

13 Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjiaí Ejiptu nunkanam jukim nui pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

14 Tutai Jusé kurat shintiar nú káshik uchincha nukuríjiaí Ejiptunam jukimiayi.

15 Irutis jáatsain nui pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnañ etserin aak tímiayi:

“Ejiptunmayañ winia Uchirun untsukmajai.”

Tu áarmiayi.

### *Irutis uchin máawarat tusa akupkamu*

16 Irutissha ti neka apach nin ananka yajá waketrán nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawarat tusa akupkamiayi. Ti neka apach ujakmia nuna enentáimias ashí jimiaraí uwín takakun tura nú uchichin máawarat tusa akupkamiayi.

17 Nuka Yusnañ etserin Jeremías aarmia nu uminkiamiayi. Juna áarmiayi:

18 “Ramá nunkanam ti úutainiak uur ajainiawai. Raker ti uutu asa atsañkrachminiaiti ni uchirí jákarmatai.” Tu áarmiayi.

19 Tura Irutis jakamtai Yusa suntari mesekranam Jusen ujakmiayi.

20 “Uchin máataj tiarmia nuka jákarai. Yamaikia ataksha uchi ni nukuríjiaí jukim Israer nunkanam wakеткиtia” tímiayi.

21 Tutai Jusé nantaki uchincha nukuríjiaí jukin Ejiptunmayá Israer nunkanam wakеткиmiayi.

22 Túrasha Irutisa uchirí Arkiráu Jutía nunkanam uunt akupin ajasun nekáa nuí wétinian aránkámiayi. Mesekran-masha ujakma asa nuí pujutsuk Kariréa nunkanam wémiayi.

23 Nuí jeá Nasarét péprunam pujusmiayi. “Nasarénumiá átatui” Yusnan etserin yaunchu tu etserkamu nujai uminki-amiai.

### 3

*Imiakratin Juan atsamunam etserkamiania nu  
(Márkus 1.1-8; Rúkas 3.1-9, 15-17; Juan 1.19-28)*

1 Nuyá imiakratin Juan Jutía nunkanam aents atsamunam etserki támiayi.

2 “Enentáim yapajjatarum. Tsawant ishichik ajasai Yus juí akupin ajastin.” Tu etserkamiayi.

3 Nú Juan kan yaunchu Yúsnan etserin Isayas juna áarmiayi: “Shuar atsamunam aents untsumui. Untsumuk “Atumí enentái Uunta jinti iwiarturtarum tura naka awajsatarum” tawai.” Tu áarmiayi.

4 Nu Juan sha kamiyu ure najantramun entsauyayi. Emenmamkesha nuapeyayi. Tura yutai-titikriátsnasha chinijjai yúuyayi.

5 Tura Jerusarén péprunmaya shuarsha tura ashí Jutía nunkanmaya shuarsha Jurtan entsanam matsamiarmia nú shuarsha mash Juan kan tariarmiayi ni chichamen anturkatai tusar.

6 Tura ni tunaarin paant etserkarmatai Juan Jurtan entsanam imiainiarmiayi.

7 Juan sha Pariséuncha Satuséuncha imiatti tusa wininian wániak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujatmakmarum? tímiayi. Asutiátin tsawant ishichik ajasai.

8 Tuma asamtai enentáim yapajjámuítkiuinikia pénker wekaamurmijjai paant iniakmatarum.

9 Atumsha “Iikia Apraám weeitji” tu enentáimtumasairap. Nujai uwemprashtatrome. Yus wakerakka ju kayan Apraáman tiran ki najankainti, tímiayi.

10 Numi ajaktinia áintsan kampuwarin jacha atuttsamuiti. Tura numi pénker nereatsna nuka tsupikia jinium apeamu ártatui.

11 Wikia aya entsajain imiajrume atumi enentái yapajjáwakrumin. Antsu winia ukuruí winiana nuka pénker awajtamsataj tusa imiantinia áanis tura jía áanis Yusa Wakanin enketramprattarme. Wijjai nan kaamantu asamtai wikia tsuntsumpruan ni sapatrínkisha atitrachminiaitjai.

<sup>12</sup> Aruusa nerejaj̄i túruinia áintsan̄ átatui. Awaj̄tiutair̄in achik-iuiti tura nujaj̄i saepen̄ awaj̄tittiwai. Tura neren̄ pé<sup>n</sup>ker̄ ikiustatui, antsu saepen̄ka jin̄ium apeattawai. Nu j̄isha tuke kaj̄inchaiti.” Tu tímiayi Juan̄.

*Juan̄ Jesusan̄ imiaimiu amia nu*

*(Márkus 1.9-11; Rúkas 3.21-22)*

<sup>13</sup> Nuyá Jesus Kariréa nun̄kanmayā winis Jurtan̄ entsanam támiayi Juan̄ imiatti tusa.

<sup>14</sup> Juan̄sha emka nakitiak Jesusan̄ tímiayi “Ame winia imi-atminiaitme. Túrutamniaiatmesha çurukamtai winia tarut-nium?” tímiayi.

<sup>15</sup> Tura Jesus tímiayi “Ántsan̄ asati yamaikia. Núnisrik ashí Yus akupkamu umirkatniuitj̄i.” Tutai Juan̄ iniaisamiayi.

<sup>16</sup> Tura Jesus imiani entsayā jíinkímtai nayaimp̄i uranmiayi. Tura Yusa Wakan̄í yámpitsa áintsan̄ Jesusan̄ tarimiayi. Niisha wáinkíamiayi.

<sup>17</sup> Túramtai nayaimpinmayā Yus chichaak “Jũka winia Uchiruiti. Ti aneamuiti. Ti shiir enentáimtajai” tímiayi.

## 4

*Uunt iwianch Jesusan̄ anan̄kataj̄ tímiania nu*

*(Márkus 1.12-13; Rúkas 4.1-13)*

<sup>1</sup> Nu túrunamtai Yusa Wakan̄í Jesusan̄ iwianchjaj̄i nekap-mamtiksatts aents atsamunam jukimiayi.

<sup>2</sup> Nūj kuarenta (40) tsawant, káshisha tsawaish̄a yurumtsuk pujak tsukarmiayi.

<sup>3</sup> Nūj uunt iwianch Jesusan̄ nekapsataj̄ tusa tarí tímiayi “Nekas Yusa Uchir̄inkiumka jū kaya apatuk najanata.”

<sup>4</sup> Tutai Jesus tímiayi “Yus-Papinium áarmaiti: “Aents aya apatkuj̄aj̄in̄ iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

<sup>5</sup> Tutai uunt iwianch Jerusarén̄ péprunam jukí Yusa Uunt Jee cháik̄in̄ iwiak

<sup>6</sup> tímiayi “Nekas Yusa Uchir̄inkiumka jūyā akaikim iniaata. Kame Yus-Papinium áarmaiti:

“Yus ni suntar̄in̄ akatar akúptúrmaktatui. Nawemin kayanam ajiintsun̄niñ wen̄kurmaktatui” tawai” tímiayi.

<sup>7</sup> Tutai Jesus tímiayi “Núnisan̄ Yus-Papinium áarmaiti: “Ame Úntrum Yus “Nekapsataj̄” tiip” tawai” tímiayi.

<sup>8</sup> Ataksha uunt iwianch naint yakí wájakmanum iwiakmiayi tura nuyá ashí nun̄kanmayā péprun shiira nuna iniaktusmi-ayi.



9 Tura tímiayi “Winia tikishmatrurakminkia juna mash amastatjai.”

10 Tutai Jesus tímiayi “Werumta, uunt iwianchi. Yus-Papinium aarma awai:

“Ame Úuntrum Yúsak tikishmatrata tura Niñki shiir awajsata” tawai” tímiayi.

11 Tutai uunt iwianch Jesusan ikiuak wémiayi. Túramtai Yusa suntari tariar atsumamurin súsarmiayi.

*Jesus Kariréa nunkanam etserkamiania nu  
(Márkus 1.14-15; Rúkas 4.14-15)*

12 Juan sepunam enketui taman antuk Jesus Kariréa nunkanam wémiayi.

13 Tura Nasarét péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarin pujumiayi. Ti yaunchusha Jakupu uchiri Sapurúnsha tura Niptarísha nu nunkanak nu pujustaitsar achikiaruyayi.

14 Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

15 “Sapurúnsha Niptarísha nayaantsanam tíjiuch Jurtañ entsa amainini nunkan achikiarmiayi. Nuka Kariréaiti Israer-shuarsha matsatainia nu.

16 Nu aents kiritniunam pujuiniyatañ ti tsáapninan wáinkiamiayi. Jákatniunam pujuiniañ tsáapin tsáapnirmiayi.” Tu áarmaiti.

17 Nuyá Jesus étseruk tímiayi “Tunaarum enentáimturum enentáim yapajiátarum. Ju nunkanam Yus akupkatin tsawant ishichik ajasai.”

*Jesus kuaru aents namakan achinian ni unuiniamuri  
ajasarat tusa achikmiania nu*

*(Márkus 1.16-20; Rúkas 5.1-11)*

18 Jesus Kariréa antumianka kánmatkarin wesa jimiará áentsun nuámtak yáchinniun wáinkiamiai. Chikichik Antre-sauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai nankiak yujaarmiayi.

19 Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisan shuaran-əəu awajsatjarne.”

20 Tutai ni nekarin ikiukiar Nin nemariarmiayi.

21 Nuyá ishichik wésan ataksha nuámtak yachinniun wáinkiamiai. Jakupu Juanjai mai Sepetéu uchiri áarmiayi. Niisha kanunam enkemsar ni nekarin ni aparijjai iwiarainiak pujuriarmiayi. Tura Jesus “Nemartusta” tutai

22 nu chichamaik kanuncha tura aparíncha ikiukiar Jesu-  
san nemariarmiayi.

*Jesus untsurí shuaran jintintiamiania nu*  
(Rúkas 6.17-19)

23 Ashí Kariréa nuñkanam Jesus Israer-shuar iruntainiam  
etserki wémiayi. Yus ju nuñkanam akupkatin chichaman  
etserkamiayi. Tura untsurí sunkurjai jáinian ashí tsuármiai.

24 Ashí Siria nuñkanam Jesus tsuákratman nekaawar  
ashí nánkamas sunkurjai wáitin armia nuna Jesusan  
tsuarti tusa itiararmiayi. Ashí jaancha, najaimiancha,  
yajauch wakantrukuncha, wáuruncha, tampemaruncha Jesus  
tsuármiai.

25 Tura untsurí shuar Jesusan nemariarmiayi.  
Kariréa nuñkanmayasha, Tekapurisnumiasha, Jerusarén  
péprunmayasha, Jutía nuñkanmayasha, Jurtan entsa  
amainiyasha Jesusan nemariarmiayi.

## 5

*Náinnium Jesus etserkamu*

1 Jesus untsurí shuar káunkarun wáiniak náinnium waka nuj  
pujusmiayi. Tura ni unuiniamurísha taar pujusarmiayi.

2 Nuyá Jesus júnis unuiniamiayi.

*Warastin ainia nu*  
(Rúkas 6.20-23)

3 “Ame wakanim atsumamu nekamarum kakaram ajas-  
rum warastarum. Tuma asarum Yus akupeamunam pachi-  
inniuitrume.

4 Kúntuts pujarum nu warastarum. Yus at-  
santamprattarme.

5 Péejchach enentáimtumarmena nu warastarum. Yus ashí  
nuñkan amastatrume.

6 Eseer wekasataj tusa aya kitiamarum nu warastarum.  
Yus imiktamprattarme.

7 Waitneñkratniutiram warastarum. Yus waitnentrám-  
prattarme.

8 Péñker enentáimniutiram warastarum. Yus wáinkiáttarme.

9 Chicham iwiarin árum nu warastarum. Yusa uchirí tura-  
martatui.

10 Péñker túrakrumin yajauch awajtamainiakui  
warastarum. Yus akupeamunam pachiinniuitrume.

11 Wíi shuar asakrumin katsekramainiakui, itit awaj-  
tamainiakui, tura ashí tsanumprutmainiakui waras-  
tarum.

12 Núnisan yaunchu Yúsnan etserin armia nunasha  
túrawarmiayi. Túramtai shiir enentáimkiuram warastarum.  
Nayaimpiniam ti péñker akinkiáttarme' tímiayi.

*Ju nunkanam átum tsáapninia áintsarum tura weeya áintsarum árumé*

*(Márkus 9.50; Rúkas 14.34-35)*

13 'Átumka ju nunkanam wee ana áintsan<sub>u</sub>ketrumé. Tura wééaitiat jeakchaitkiun<sub>u</sub>ka míchuiti. ¿Nusha itiur yuámniak ati? Antsu ántraití. Tuma asamtai aa najatai tepet tusar ajapashtinkiait' tímiayi.

14 'Átumka ju nunkanam shiripkia áintsan<sub>u</sub>ketrumé. Náinniumka pepru úumkachminiaiti.

15 Núnisan<sub>u</sub> shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam.

16 Núnisan<sub>u</sub> atumsha Yusjái pénker túramu paant atí. Tura ashí aents nuna iisar niisha Yus Apan shiir awajsartatui' tímiayi.

*Yaunchu akupkamun pachis Jesus unuiniamiania nu*

17 'Muisais akupkamuncha tura yaunchu Yúsnan etserin etserkarmia nuna ántar awajsattawai" turutiirap. Antsu nuna Wikia umiktaj tusan táwitjai.

18 Nekasan tájarme. Ashí túrunatniua nu amúatsain<sub>u</sub> nu akupkamu ishichkisha yapajniáshtatui. Nayaimpisha tura nun<sub>u</sub>kasha tuke amúatsain<sub>u</sub> nu akupkamusha amuukashtatui.

19 Nu asamtai shuar chikichik akupkamun, yúpichuch ana nunaksha, umirchakka tura chíkich shuaran umirkashtinian unuiniakka Yus nekas akupin paant ajastatna nu<sub>i</sub> nú shuar uunt áchattawai. Antsu ashí shuar akupkamun umiana nu tura chíkich shuaran umirkatniun unuiniiana nusha Yus nekas akupin paant ajastatna nu<sub>i</sub>, nu shuarka uunt átatui.

20 Tuma asamtai Yus akupeamunam pachiinkiataj takumka Pariséujai nan<sub>u</sub>kaamas tura akupkamu jintinniu<sub>u</sub>jai nan<sub>u</sub>kaamas eseera wekasatniuitrumé' tímiayi.

*Kajeamun pachis Jesus unuiniamiania nu*

*(Rúkas 12.57-59)*

21 'Yaunchu tiniu armia nu ántichukaitrum: "Ma<sub>u</sub>nkartuawairap. Ma<sub>u</sub>nkartana nuka asutniátniuiti" tiniu ármiayi.

22 Tura Wisha tájarme: Shuar ni yach<sub>u</sub>in aya kajerakka nusha asutniátniuiti. Ni yach<sub>u</sub>in kátsekea nuka akupniunam junaktiniaiti. Tura ni yach<sub>u</sub>in "netsé" takun<sub>u</sub>ka jinium akupnakminiaiti.'

23 'Tuma asamtai Yus susataj tusam wakerakum tura ame yatsum ámin itit enentáimturman enentáimpramka,

24 suamu nu<sub>i</sub> ikiuakum emka ame yatsum werim niijjai iwiarata. Turam waketkim Yus suam nu susata.'

25 'Shuar úuntnum júramkuinkia jintian<sub>u</sub> wesam niijjai iwiarata úuntnum ejetamtsain<sub>u</sub>. Túrachakminkia úuntnum

surutmaktatui tura niisha suntarnum surutmaktatui tura sepunam enketmattawai.

<sup>26</sup> Tura nekas tajai, nuĭ enkemamka ashí rearchisha akik-machkumka jíinkishtatme' tímiayi.

*Tsanirmatniun pachis Jesus unuiniamiania nu*

<sup>27</sup> Yaunchu tiniu armia nu ántichukaitrum: "Tsanirmawaip."

<sup>28</sup> Tura Wissha tájarme: Shuar nuwān tsanirmataj tu iiska nuĭkia ni enentáin tsanirmayi.'

<sup>29</sup> 'Tuma asamtai ame jíimi tunaanum yajauch awaj-tamkuinĭkia ukuinĭkiam yajá ajapata. Ashí ame ayāshim jinium esaatsain̄ aya chikichik ayāshmi muchitmari emes-ratin péñkeraiti.

<sup>30</sup> Ame ewejmesha untsuurmetiat tunaanum ajunmakuinĭkia tsupikiam yajá ajapata. Ashí ame ayāshim jinium esaatsain̄ aya chikichik ayāshmi muchitmari emesratin péñkeraiti.'

*Nuwa ajapatniun pachis Jesus unuiniamiania nu*

(Mateu 19.9; Márkus 10.11-12; Rúkas 16.18)

<sup>31</sup> 'Núnisan̄ yaunchu tiniu ármiai: "Shuar ni nuar̄in ajapat-niun wakera nuka papí najana susati."

<sup>32</sup> Tura Wissha tájarme: Shuar ni nuar̄in tsanirmachun ájapeakka nuwān tsanirmamtikiaiti. Tura ajapamujai nuat-naiyakka nuka tsanirmaiti.'

*Jesus aya nekasa nu titinian unuiniamiania nu*

<sup>33</sup> 'Núnisan̄ yaunchu tiniu ármiai: "Yusa naari pachisan turattajai" tákumka nekas takamtsuk umiktiniaitme."

<sup>34-37</sup> Tura Wissha tájarme: Áyatik "Ee" tákumka tura "Atsá" tákumka wáitruksuk nuke titiá. Támena nu nekas umiktaj takum ame nú arant pachistiniaitkiunka nuka yajauchiiti, iwianchnumiaiti. Ti nekas tajai tusam nayaim pachischatniuitme. Nuka Uunt Yus pujutainti. Nuñkasha pachischatniuiti Yusa tarimtaīri asamtai. Jerusaren̄ péprusha pachischatniuiti Uunt Akupin pujutai nuĭ asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.'

*Iikkiatniun pachis Jesus unuiniamiania nu*

(Rúkas 6.29-30)

<sup>38</sup> Yaunchu tiniu armia nu ántichukaitrum: "Shuar máanikiar jíi apujtukka niisha apujtuktiniaiti. Tura naj akarkasha ni najsha akarkatniuiti."

<sup>39</sup> Tura Wissha tájarme: Yajauch shuar taritraitrap. Antsu ame yapimin ijiutmamtai áatú yapimsha tsañkatkata.

40 Tura pushirmin jurutramkitiaj tákuisha sakurmesha susata.

41 Tura káarkancha chikichik kirumitruk jurutkitia túramkui ámeka jimiará kirumitru ejeeta.

42 Seatmana nu susata. Ikiatmakuisha páchitsuk ikiasta.'

*Nemasri aneetniun Jesus unuiniamiania nu*  
(Rúkas 6.27-28, 32-36)

43 'Núnisañ tiniu armia nu ántichukaitrum: "Ame shuarum aneeta tura nemasrumka kajerkata."

44 Tura Wisha tájarne: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awaj-tamainiana nusha Yus áujtusarta.

45 Atumsha nu túrakrum atumí Aparí nayaimpiniam pu-jana nu túrana áitkiasrumek túrarme. Iista, Yus yajauch shuarnumsha péñker shuarnumsha tsáapin awajmatkiatsuk. Núnisañ yumincha yajauch shuar pujuiniamunmasha péñker shuar pujuiniamunmasha yútumtiktsuk.

46 Aya atumin anenmainia nuke aneakmesha ¿yaki akir-makat? Yajauch shuarsha nuna túrin áiniawai.

47 Aya ame yatsumek shiir chichaakmeka ¿warí péñkerak túram? Yus-shuarchasha nuna túrin áiniawai.

48 Nu asamtai atumí Aparí Yus nayaimpiniam pujana nujai métek ti péñker átiniaitrume.'

## 6

*Péñker túratniun Jesus unuiniamiania nu*

1 'Ashí íimiainiañ aya shuar iirsarti tusarum Yusna nu taka-sairap. Tu takaakrumniñkia Yus Apa nayaimpiniam pujana nu penké akirmakchattarme.

2 Nu asamtai shuar atsuma nu yaiyakmeka ashí shuar ujakairap. Anañkartin ainia nuka iruntainmasha tura pepru jintí wekasasha ashí íimiainiañ shiir túrajai tusar nuna túrin áiniawai. Junasha "péñker túrawai" tu enentáimturarti tiniu ásar Yus akíatsañ aya tu enentáimturmajañ akinkiaruiti, nekas tajai.

3 Antsu átumka atsumainia nu yaiyakmeka penké úukam túrata. Chikichkisha nu yáinman nekaashti.

4 Úukam túrakminkia ame Apa Yus uukman wainia nu, nuna akirmaktatui.'

*Yus áujsatniun Jesus unuiniamiania nu*  
(Rúkas 11.2-4)

5 'Atumsha Yus áujeakrumsha ántar chichamtin ainia núnis áujtsairap. Nu shuarka iruntainmasha tura pepru jintísha

shuar iirsarti tusa wajakiar Yúsan áujin áiniawai. Nekasan tájarme, Yus akíatsain̄ aya nu iismajain̄ akinkiaruti.

<sup>6</sup> Tura ame Yus áujeakmeke ame kuárturmin wayam waiti epenim nūi amek ame Apa Yus áujсата. Nuna ame Apa Yus uūka túramu waitma asa akirmaktatui.'

<sup>7</sup> 'Yus áujeakmesha ántram esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai.

<sup>8</sup> Niijjaī métek ajasairap. Átumka seatsrumniñ̄ Yus Apa átum atsumamun nékawai.

<sup>9</sup> Nu asamtai Yus áujkuram júnis títiniaitrome: 'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti.

<sup>10</sup> Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisañ̄ ju nuñkanmasha uminkiatí.

<sup>11</sup> Aparu, ii yurumkarí ashí tsawant amasta.

<sup>12</sup> Tura winia nemasrun tsañkurajna núnismek, Aparu, winia tunaaru tumashrīsha tsañkurturta.

<sup>13</sup> Tunáa wakeruktin tsañkatrukaip. Antsu ashí tunaanumiã uwentikurrta. Tuke ashí aents akupkamniaitme. Núnisam Amesha tuke ti kakarmaitme. Tura ti shíiraitme. Tuma asakmin seajme. Nuke atí.'

<sup>14</sup> 'Amesha chíkich shuar yajauch awajtamka nu tsañkureakminkia Yus Apa nayaimpiniam pujana nu amincha tsañkurtamprattawai.

<sup>15</sup> Tura chíkich tsañkureachkumniñ̄kia Yus Apasha ame tunaarmincha tsañkurtamprashtatui.'

### *Ijiarmatniun pachis Jesus unuiniamiania nu*

<sup>16</sup> 'Ijiarmarum Yus áujkurmesha wake mesekrum susun-trairap. Anañkartin shuar chíkich shuar "ijiarmaiti" tu enentáimtursarti tusa tuma áiniawai. Nekasan tájame, Yúska akíatsain̄ aya nujaī akikma áiniawai.

<sup>17</sup> Antsu ámeke ijiarmamsha péñker temashmaram péñker jaupmitia.

<sup>18</sup> Shuar ijiarmaiti tu enentáimturmasarain̄. Aya Yus Apak nekaattawai. Tura asa akirmaktatui.'

### *Kuítian pachis Jesus unuiniamiania nu*

*(Rúkas 12.33-34)*

<sup>19-20</sup> 'Ju nuñkanmayā kuit ikiaun̄katniujaī nan̄kaamas nayaimpiniam kuit ikiaun̄kata. Juñ̄kia kayaã̄ yúchakait tura mash meseatsuk. Tura kasasha wayá kasamtsuk. Antsu nayaimpinman̄ka kayaã̄sha yuatsui tura mash meseatsui tura kasasha wayá kasamtsui.

21 Kuítrum ana nuí enentáimtustatme. Tuma asam nayaimpiniam ikiaun̄kata.'

*Ayashí tsáapnintrí*  
(Rúkas 11.34-36)

22 'Ame jímijíají tsáapin amiin wayamniaiti. Tuma asamtai ame jíimi péñkeraitkiuñkia amiin tsáapin wayá tuke tsáapniiti.

23 Antsu ame jíimi yajauchitkiuñkia tsáapin amiin wayachmin asamtai tuke kiritin átatui. Núnisañ yajauchia nu wakerakmeka péñkera nu ame enentáimíin wayachmin asamtai tuke kirit cha ajastatui. Nu kiritcha imiá yajauchiti.'

*Yussha kuitsha máimtek enentáimtuschamniaiti*  
(Rúkas 16.13)

24 'Shuar jimiará úntrín umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisañ átumka Yussha kuitcha máimtek enentáimtustin tujinkiattarme.'

*Yus ni uchirín péñker wáinkiaiti*  
(Rúkas 12.22-31)

25 'Tuma asamtai tájarme: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait.

26 Chínkisha enentáimpratarum. Yaki nanamainiak yurumkan arakmainiatsui. Tura juuk yurumkan ikiuniatsui. Tuma aiñ Yus Apa nayaimpiniam pujana nú Yusak áyureatsuk. Atumsha chínkia nú nankaamaschakaitrum.

27 Nu arantcha ti enentáimkiumsha ¿nujají tsakartatmek?'

28 'Nuikia ¿urukamtai entsartincha timiá enentáimprum? Iistá, kukujsha takachuitiat tura najanchaitiat

29 ti shíirmach ániawai. Yaunchu uunt akupin Sarumún ti shiir iwiarmamniuitiat kukujia tímianchayayi.

30 Iis, nupa yamá tsakaawai tura kashin aents tsupikiar jinium epeenawai. Tuma aiñ Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtai Yus nekas enentáimtatsrum?'

31-32 Ju nunkanam ana nu pachikiairap. Chíkich shuar, Yúsan nékainiatsna nu, warín yuattají warín umartatají warín entsartatají nuna ti pachiiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai.

33 Tuma asamtai Yusjají shiir wekasatin tura Yus akupkamu ana nu umiktin emka enentáimsatarum. Túrakrumñkia atsumamurmin Yus suramsattawai.

<sup>34</sup> Kashin átatna nujai itiu<sup>r</sup>chat enentáimsairap. Kashinkia nusháa itiu<sup>r</sup>chatrijjai tsawarchattawak. Yamái tsawanta jujai máakchakait.'

## 7

*Chíkich sumamtikiawairap*

(Rúkas 6.37-38, 41-42)

<sup>1</sup> 'Chikicha tunaari ti enentáimtusairap. Núnisañ Yus atumí tunaari iirtamsashtatui.

<sup>2</sup> Chíkich wárik sumamtikiatin enentáimkiumniñkia Yus núnisañ sumamtikramattawai. Tura ame chikicha túramuri nekapmarmena nú nekapkajain amincha nekapmarmattawai.

<sup>3</sup> Tuma asamtai çitiurtsuk atumi jijn numi enketna auk íitskesha atumi yachí jijn tsuat enketusha iyarum?

<sup>4</sup> Ame jijmjin numi tuke enketajsha çitiurtsuk ame yatsumi jiiya tsuátan jurustajme tame?

<sup>5</sup> Antar shuará, ame yáintaj tákumka emka ame jijmjin numi enketna nu jusata. Nuyá paant iistatme yatsumi jijn tsuat enketna nu jurustin.'

<sup>6</sup> 'Ti shiira nuka yawá súsashtiniaiti. Nuna nakitrar amincha esatmichartimpiash. Kuítrumsha kuchi súsashtiniaiti. Aya najatrachartatuak.'

*Yus seakmin suramsattawai*

(Rúkas 11.9-13; 6.31)

<sup>7</sup> 'Yus seakrumin suramsattawai. Eakrumka wainkiatarme. "Winiajai" tákurmin awaintiamattarme.

<sup>8</sup> Seana núnaka suíniawai. Eana nuka wáiniui. "Winiajai" tuinia núnaka awainiawai.'

<sup>9</sup> 'Ame uchiram apatkun seatmakui çkayaash súsaintiam?

<sup>10</sup> Tura namakan seatmakui çnapíash súsaintiam?

<sup>11</sup> Nuikia átum yajauchitirmesha atumi uchirí péñker ana nu tuke súuchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.'

<sup>12</sup> 'Júnaka Muisaishsha Yúsnan etserniusha akupenawai: "Chíkich ámin túrutatí tusa wakerakmeka amesha núnismek túratá." Tu akupenawai.'

*Wankaram jintiasha tura yupikiach jintiasha*

(Rúkas 13.24)

<sup>13-14</sup> 'Wankaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatniunam jeawai. Túrasha chíkich jintia awai. Nusha yupikiach asa itiu<sup>r</sup>chataiti. Wayatniurisha yupikchiiti. Nuí ishichik wáiniawai.



Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.'

*Nerejai numi nekaatainti*

*(Rúkas 6.43-44)*

15 'Aneartarum. Wáitruiniak "Wi Yúsnan étserjai" tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawá áinis áiniawai. Pátatek shiir chichainiawai tura ni enentáin yajauch piakuiti.

16 Atumsha túramujai nin nekaatniuitrume. Naranmaya shujya júukchamniaiti. ¿Tsachiksha kushin\_kiapen nerektatuak?

17 Núnisañ péñker numia nu tuke péñkeran nereatsuk. Tura yajauch numia nu yajauchin nereatsuk.

18 Péñker numi yajauchin nereatsui. Núnisañ yajauch numi péñkeran nereatsui.

19 Yajauch numi ajakar tsupirar jinium apeashtinkiait.

20 Tuma asamtai wáittrin ainia nuka túramujai nekanat-tawai.'

*Ashikia Yus akupeana nui jeachartatui*

*(Rúkas 13.25-27)*

21 'Aya winia Apar nayaimpiniam pujana nuna wakera-murin umirin ainia nuke Yus akupeamunam pachiinkiar-tui. Chíkichka "Uuntá, Uuntá" turutainiyat nayaimpiniam jeachartatui.

22 Amuukatin tsawant jeamtai untsurí turutiartatui "Uuntá, Uuntá, ame náaram pachisar ashí nun\_kanam etserkachmakaji. Ame náarmesha pachisar yajauch wakancha jiki akupkamji. Tura ame náaram pachisar aentsti tujintiamu túramji" turutiartatui.

23 Nui chichainiakui "Werumtarum. Penke nékachuitjarme. Aya yajauchitrume" títiatjai.'

*Péñker ukurma tura yajauch ukurma*

*(Rúkas 6.47-49; Márkus 1.22)*

24 'Shuar winia chichamprun antuk umirkañka nu shuar ti péñker enentáimniuiti. Niisha ju shuarjai méteketete. Jeá jeamuk kayanam ukurmai.

25 Tura yumi ti yutuk entsa nujan\_kruamai tura nase ti kakaram umpuimiai. Túmaiñ pukukachmai ni ukurmarí kayanam ukuamu asamtai.

26 Tura shuar winia chichamprun antuk umirtukchañka ju shuara núnisañ enentáimchaiti. Jeá jeamuk náikminiam ukurmai.

27 Tura yumi yutuk entsa nujan\_kruamai tura nase ti kakaram umpuimiai. Túmakui jeá mash saanaki iniaamai" tímiayi Jesus.

28 Jesus nuna tinia amukmatai ashí shuar ti enentáimprarmiayi.

29 “Yusa kakarmarijijai unuitiamtsujik. Israer-shuara jintinniurinkia núnis unuiniainiatsui” tiarmiayi.

## 8

*Jesus tunamarun tsuarmiania nu*

*(Márkus 1.40-45; Rúkas 5.12-16)*

1 Jesus muraya támatai untsurí shuar Nin nemariarmiayi.

2 Nui shuar tunamaru Jesusan jearin tikishmatramiayi. Tura tímiayi “Uuntá, wakerakmeká tsuáramniaitme.”

3 Tutai Jesus uwejéjai antiñ “Wakerajai. Péñker ajasta” tímiayi. Tutai tunamaru ni tunamarmari péñker ajasmiai.

4 Tura Jesus tímiayi “Pai, peñké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam.”

*Jesus suntara uchirín tsuarmiania nu*

*(Rúkas 7.1-10)*

5 Jesus Kapernáum péprunam wayamtai apachi suntara kapitíantri Nin tarimiayi.

6 “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

7 Jesussha “Ayu, winin tsuartajai” tímiayi.

8 Tutai kapitíán tímiayi “Uuntá, Ame ti nankaamaku asam winia jearuí wayachminiaitme. Áyatik “Péñker ajástí” tákumin winia uchir péñker ajatrustatui.

9 Iista, winiasha akuptuiniatsuk tura wisha suntaran aku-penatsjak. Juna “Wetá” takui wéawai. Tura chikichnasha “Winitia” tutai winiawai. Tura takartinian “Ju túratá” tutai umíawai.”

10 Kapitíán nuna tutai Jesus ti enentáimiuk Nin nemarainian tímiayi “Nekasan tájarne, Israer-shuar Yúsan tímatrus enentáimtin atsawai.

11 Maa, yajaya untsurí shuar Yus akupeana nui jeawar Apraámjaisha Isakjaisha Jakupjaisha iruntrar yurumáwartatui.

12 Tura Israer-shuar Yúsnum jeamnia áiniayat aa kiritniu-nam ajapnawartatui. Nui ti úutin tura ti wáitsatin átatui.”

13 Nuyá Jesus kapitíáin chicharuk “Jeemiin waketkitia. Nekas enentáimtusú asakmin uchiram péñker ajatramsattawai” tímiayi. Túramtai ni uchirí nu chichamtaik péñker ajatsamiayi.

*Jesus Pitru tsatsarín tsuármiania nu*

*(Márkus 1.29-31; Rúkas 4.38-39)*

14 Jesus Pitru jēen we Pitru tsatsarīn tsuemujai jaa tepan wáinkiamiayi.

15 Tura ni uwejēn antiñmatai tsuemun michatramiayi. Tura nuwā nantakīn ashí ajamsarmiayi.

*Jesus untsurí jáinian tsuármiania nu*  
(Márkus 1.32-34; Rúkas 4.40-41)

16 Kashi ajasmatai yajauch wakantrukarun Jesusan itiararmiayi. Tura nu yajauch wakanin chikichík chichamjai chicharas jiki akupiarmiayi. Ashí jáiniancha tsuáramiayi.

17 Yúsnan etserin Isayas “Ii pimpirmarīncha ii sunkurīncha jurutramkimiaji” yaunchu timia nu uminkiatī tusa nu túrunamiayi.

*Jesus nemarsatin*  
(Rúkas 9.57-62)

18 Shuar untsurí Jesusan káutkarmatai “Entsa amain katīntai” tímiayi.

19 Nuī Israer-shuara jintinniurī Jesusan tarí tímiayi “Uuntá, Ámin páchitsuk nemarsatniun wakerajme.”

20 Tutai Jesus tímiayi “Kujanchmasha ni waarīn takaktsuk. Chīnkisha pasunken takaktsuk. Tura Wi Yúsnumiāitiatan tepestiniur atsawai.”

21 Nin nemarniusha tímiayi “Uunta, emka winia aparun iwiarsan ikiuuttajai.”

22 Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

*Nasesha entsasha Jesusan umirkarmiania nu*  
(Márkus 4.35-41; Rúkas 8.22-25)

23 Nuyá Jesus ni unuiniamurijjai uunt kanunam enkemámiayi.

24 Nuī nase ti kakaram umpuimtai antumian ti tamparintin ajasmiai. Tura entsa kanunam yaráná piákmiayi. Tuma ain Jesus kanunam kanar tepemiayi.

25 Nuyá ni unuiniamurī kurashim Jesusan ishintiarar tiarmiayi “Uuntá, wayaji. Kakaram ajachkumniñkia jakat-taji.”

26 Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki naseñcha entsancho chicharkamiayi. Tutai mash miaaku ajasmiai.

27 Nuna ísar ni unuiniamurī ti enentáimsarmiayi. Tura tiarmiayi “Jusha ¿warí áentsuit? Nasesha entsasha Nin umi-rainiatsuk” tiarmiayi.

*Jatara nunkanam Jesus yajauch wakantrukun tsuármiania nu*  
(Márkus 5.1-20; Rúkas 8.26-39)

28 Nuyá Jesus entsá amaini katiñ Jatara nuñkanam jeamiayi. Nuñ jimiara shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nankaamachu ármiai.

29 Niisha Jesusan wáinkiar kakantar tiarmiayi “¿Warí pu-juram iijiai, Jesús, Yusa Uchiría. Tsawant jeatsain in amukratkataj tusamek taum?” tiarmiayi.

30 Nuñ arant kuchi untsurí shushunmak yujaarmiayi.

31 Yajauch wancha Jesusan seainiak “Jiiki akupkartak-meka kuchiniam wayatin tsankatkartukta” tiarmiayi.

32 Tutai Jesus “Pai, wetarum’ tímiayi. Yajauch wancha shuara enentáiyá jíinkiar kuchiniam enkemáwarmiai. Túramtai kuchi wáurkiar arau utsanamiayi. Nuyá entsá iniankar jakerarmiayi.

33 Kuchí wáinniusha nuna ashamkar péprunam tseke wéarmiayi. Nuñ jeawar ashí túrunamun etserkarmiayi. Yajauch wakantrukun péñker ajasmancha etserkarmiayi.

34 Nuyá ashí nú peprunmaya shuar Jesusan inkiuntai tusar ashinkiararmiayi. Tura inkiunkar ni nuñkeyá waketkiti tusar seawarmiayi.

## 9

*Jesus emearun tsuármiania nu  
(Márkus 2.1-12; Rúkas 5.17-26)*

1 Nuyá Jesus kanunam enkemar antumian amaini katiñmiayi. Tura nuñ ni péprurin Kapernáumnum jeamiayi.

2 Nuñ jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsankuramuiti.”

3 Takui Israer-shuara jintinniuri yajauch enentáimprar “Juka Yúsán ti yajauch chicharui” tiarmiayi.

4 Tu enentáimainian Jesus nekáa tiarmiayi “¿Urukamtai imiá yajauch enentáimprum.

5 Tua imiá yúpichuchit. Shuara tunaarin tsankuratin yúpichuchikiai. Tura emearun “Nantakim wekasata” títin yúpichuchikiai?

6 Wi Aents Ajasua núchakaitiaj. Ju nuñkanam Wi tunaan asakátratnuiitjai. Wátsek, nu nekaatarum tusan juna iniak-mastatjai.” Nuna tinia emearun “Wajaktia, tepetairam jukim jeemiin wetá” tímiayi.

7 Tutai emearu tsuámar nantaki ni jeen wémiayi.

8 Tura nuna ashí aents wáinkiar Yus kakarman shuáran susa asamtai ashamkar Yúsán shiir enentáimtusarmiayi.

*Jesus nemartusat tusa Mateun achíawai*  
(*Márkus 2.13-17; Rúkas 5.27-32*)

<sup>9</sup> Nuyá Jesus wémiayi. Nuĵ wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

<sup>10</sup> Nú ukunmasha Mateu jeen yurumuk pujai yajauch armia nu Israer-shuar untsurĵ káunkar Jesusa unuiniamurĵĵai irunar yurumiarmiayi.

<sup>11</sup> Pariséusha nuna íisar Jesusa unuiniamurĵin aniasarmi-ayi “¿Urukamtia atumĵ Uuntriĵ kuitia achinĵaĵsha tunaarinni-ujĵaĵsha irunar yuruma?”

<sup>12</sup> Tura Jesus nuna antuk tímiayi “Pénker ainia nuka tsuákratniun atsumainiatsui. Antsu jainia nu tsuákratniun atsumainiawai.

<sup>13</sup> Werum jú aarma unuimiutarum:

“Murik maam Winia surusum nujai “máakete” tátsujai. Antsu waitneĵkartutain wakerajai,” Yus-Papinium tu áarmaiti.

Wikia “pénkeraitjai” tuńian untsuktaj tusan táchaitjai. Antsu tunáa shuar ni enentáin yapajĵáwarat tusan táwitjai” tímiayi.

*Ijiarmatniun Jesusan aniasarmiania nu*  
(*Márkus 2.18-22; Rúkas 5.33-39*)

<sup>14</sup> Nuyá imiakratin Juanka unuiniamurĵ Jesusan tariar aniasarmiayi. “¿Urukamtai iikia tura Pariséusha ijiarmajĵ tura ame unuiniamurmeka ijiarmainiatsu?” tiarmiayi.

<sup>15</sup> Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakuĵ úutchamin áiniawai. Núnisan Wi pujakuĵ ijiarmashtin áiniawai. Tura tsawant jeattawai nuatua áintsan Wi junaktatjai. Antsu nuĵkia ijiarmawartatui’ tímiayi.

<sup>16</sup> ‘Mamuru pushĵ jaanakmatai yamaram tarach anuj-tukchatniuiti. Túramka nijiam yamaram tarach sumpeak mamushan chinĵkiá nuna nanĵkaamas jaaktatui.

<sup>17</sup> Nijiamanch yamáĵ nawar nuap najanamun arutnum yaraachminiaiti. Túramka karĵak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniaiti. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénker ártatui.”

*Jesus Jairu nawantrincha tura chíkich nuwancha tsuármiania nu*  
(*Márkus 5.21-43; Rúkas 8.40-56*)

<sup>18</sup> Jesus nuna taj Israer-shuara uuntriĵ Jesusan tarĵ tikish-matar tímiayi “Winia nawantur jarutkayĵ, tura Ame winim ewejmĵĵai antinrukakminkia ataksha nantaktiatui.”

19 Tutai Jesus ni unuiniamurijjaj wajakiar niijjaj wearmi-  
ayi.

20 Tura jintiá weenaj nuwā tuse (12) uwitin numpá  
ájapeak wáitias pujú asa Jesusa ukurinj amainianj ni pushirinj  
antiñmiayi.

21 “Áyatik ni pushirinj antiñnaka péñker ajastatjai” tu enen-  
taimpramiayi.

22 Nuna nekáa Jesus ayantar nuwan tímiayi “Shiir  
enentáimprata, nawantru. Yus shiir enentáimtususu asam  
péñker ajasume.” Nu chichamtaik ni jáamuri péñker  
ajasmiai.

23 Nuyá Jesus uunta jeen jeamiayi. Tura nuj charaatum  
ajainiancha tura jakan iwiarsatai tusar péeman umpuinian-  
cha wáiniak

24 tímiayi “Aa jíintratarum. Nuwāchikia jákachai antsu aya  
kanarai.” Penké jakan nékayat túratta nuna neka asa “aya  
kanarai” tímiayi. Takui aents Nin wishikrarmiayi.

25 Tura nuna ashí jjiir Jesus jeá wayá nuwāchin uwejnum  
achik iniantkimiayi. Túram nantakmiayi.

26 Nu túramu ashí nu nunñkanam etsernarmiayi.

*Jesus kusurun jímiaran tsuármiania nu*

27 Nuyá Jesus wéakui jímiará shuar jji kusuru untsunki  
weriarmiayi. “Uuntá, ii Uuntri Tawit ame weatrum asamtai  
in waitnenkarturta” tiarmiayi.

28 Jesus jeá wayamtai jji kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

29 Tuíniakui Jesus ni jjiin antinkiar tímiayi “Átum nekas  
enentáimtarmena núnisanj túrunati.”

30 Nujaj jji péñker ajasarmiayi. Nuyá Jesus “Etserkairap.  
Shuar penké nekáwarainj” tímiayi.

31 Támaitiat jíinkiar Jesus túramun ashí nu nunñkanam et-  
serkarmiayi.

*Jesus chichachun péñker awajsamiania nu*

32 Nuyá wenaj shuar yajauch wakantruku chichachun Je-  
susan itiarmiayi.

33 Tura Jesus yajauch wakanin jjiiki awemamtai nu  
chichachu chichakmiayi. Ashí nuna íisar ti enentáimprarmiayi.  
Tura tiarmiayi “Yáunchusha Israer nunñkanam jujaj métek  
túramu penké atsuwiti.”

34 Antsu Pariséuka yajauch enentáimtuiniak tiarmiayi “Nu  
shuar iwianchi uuntri kakarmarjijaj yajauch wakanin jjiiki  
akupeawai.”

*Jesus shuaran waitnentawai*

<sup>35</sup> Jesus ashí péprunam we ni iruntairin wayá “Yus aku-peana nuĵi enĵkemátarum” tu etsermiayi. Tura ashí nánĵkamas sunĵkurĵajĵi jáiniancha tsuármiayi.

<sup>36</sup> Shuaran íisar murik wáinchatia núnis pimpikiar tura kúntuts pujuinia asamtai waitnentrarmiayi.

<sup>37-38</sup> Nuyá ni unuiniaturin tímiayi “Ĵu aents Yus-Chicham ujaktiniaitji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsanĵkete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

## 10

*Jesus tuse (12) unuiniaturin achikmiayi tuke nemarsat-niun*

(Márkus 3.13-19; Rúkas 6.12-16)

<sup>1</sup> Nuyá Jesus tuse (12) unuiniaturin achik Yusa kakarmarin súsarimiayi yajauch wakanin shuara enentáiyá ĵiiki akupkatniun. Núnisanĵ ashí sunĵkurĵajĵi jáinian tsuárartinian susamiayi.

<sup>2</sup> Ĵu áiniawai Jesus tuse (12) unuiniaturin achikarmiia nu: Emka Semunĵ núnisanĵ Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu uchirí armia nu.

<sup>3</sup> Nuyá Jiripi, Parturumi, Tumas, Mateu. Mateusha kuítian achiniuyayi. Arpeu uchirí Jakupusha. Ripíu núnisanĵ Tateu náartiniuyayi.

<sup>4</sup> Ásumpí Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiayi.

*Jesus ni unuiniaturin etserkarti tusa akupkarmiania nu*

(Márkus 6.7-13; Rúkas 9.1-6)

<sup>5</sup> Nu tuse (12) unuiniaturin Jesus júnis chicharak akupkarmiayi. “Israer-shuarcha matsatmanum weerap. Samaria nunĵkanam péprunam weerap.

<sup>6</sup> Antsu Israer-shuar murikiua áinis Yusaiyá wáakaru ainia nu weritiarum.

<sup>7</sup> “Tsawant ishichik ajasai Yus jú nunĵkanam akupin ajastin” tu etserki wetarum.

<sup>8</sup> Tunamarusha chíkich sunĵkurĵajĵi jainia nusha tsuatarum. Jakasha iniantkitiarum. Yajauch wakancha shuara enentáiyá ĵiiki awematarum. Nu túratin kuítchajajĵi kakaram susamuitume, tuma asamtai atumsha ashí ántrarmek túrtatarum.

<sup>9</sup> Kurisha ashí kuitcha jukiirap.

10 Uyuncha jukiirap. Sapatcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.'

11 'Péprunam jearmesha péñker shuar wáinkiarum nuí wayarum tuke nuin pujustarum.

12 Nu jeanam wayamsha "Ju jea shiir atí" titiá.

13 Nekas péñker shuaraitkiunka shiir ajasarti. Antsu nu shuar péñker itiarmachkuñka shiir ajascharti.

14 Tura nánkamsan atumin awaintiamainiachkuñkia anurtamainiachkuñkia nuyá jíinkitiarum. Nu shuar yajauch ásarmatai jíinkirum atumí naweya nunka japimiarum ikiuktiarum. Ni tunaari aents nekaawarat tusarum túratarum.

15 Nu shuaran nekapsatin tsawant jeamtai Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran' tímiayi.

*Yajauch awajsatniun ujakmiania nu*

16 'Aneartarum. Wisha murik yawanum akupkatniua áintsanak akupeajrume. Tuma asamtai shiir nawamkartin áyatrums aneartarum.

17 Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui.

18 Wíi shuar asakrumin uuntnumsha tura nuyá akupniunmasha juramkiartatui. Núnisrum akupniuncha tura Israer-shuarchancha winia chichamur ujaktatrume.

19 Tura akupniunam surutmakakrumnisha wariniak títiáj tu enentáimprairap. Nuí uuntjai chichaakrumin Yus títinian jintintramattarme.

20 Nuñkia átum enentáimmijai chichaschattarme antsu atumí Apari Yusa Wakaní atumin chichamtikramsattarme.'

21 'Shuar ni yachincha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui.

22 Tura Wíi shuar asakrumin mash muíjramkartatui. Tura tuke katsuntea nu uwemprattawai.

23 Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashi ujatsrumnin wantinkiattajai.'

24 'Unuiniamuka nin unuiniana nuna nankaamaschaiti. Takarniusha ni uuntri nankaamaschaiti.

25 Unuiniamuka nin unuinia nujai métek ajaska maak. Takarniusha ni úuntriñjai métek ajaska maak. Wátsek, Winia atumí úuntrin "Iwianchi uuntri" túrutainiakui atumniasha nuna nankaamas yajauch turamtatui.'



*Yúsak ashamkatniuiti*  
(Rúkas 12.2-9)

26 'Tuma asamtai aentska ashamkairap. Ashí uukma nu paant nekanattawai.

27 Ishishmasan kiritniunam ujaajrumna nu, tsawái kakantrarum etserkatarum.

28 Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asamtai Yus ashamkatarum.'

29 'Jimiará chin̄ki pen̄ké ishichik kuitjaj surukmin áiniawai. Túmaitiat Yus tsankateachkuinkia nun̄ká jaka iniainiatsui.

30 Ame intiashmisha mash nekapmarmaiti.

31 Nu asamtai jákatin ashamkairap. Yusjaj átumka ti untsurj chin̄kijaj nan̄kaamas péñkerchakaitrum.'

*Jesus natsantrashtiniaiti*  
(Rúkas 12.8-9)

32 'Ashí shuar ashí íimiainiañ Winia natsantruiniatsna núnaka Winia Apar yakí nayaimpiniam pujana nuñ natsantrashtajai.

33 Antsu shuar íimiainiañ Winia natsantra núnaka Wisha yakí nayaimpiniam winia Apar pujana nuñ natsantrattajai.'

*Jesusa chichamejaj shuar akannartatui*  
(Rúkas 12.51-53; 14.26-27)

34 'Ashí shuar nawamnaikiar shiir pujusarat tusan ju nun̄kanam táchaitjai. Nuna túrat tusarum enentáimturairap. Antsu wi tamaajaj shuar péñker ajasarmatai yajauch shuar nin nakitrartatui.

35 Shuar ni aparín nakitrattawai. Nuwasha nukurín naktirrattawai. Najatísha tsatsarín nakitrattawai.

36 Tuma asa shuar ni shuarjjaj nemasrintin ártatui.'

37 'Shuar ni aparíncha nukuríncha Wijjaj nan̄kaamas aneakka Wíi shuar áchamniaiti. Núnisan̄ ni uchiríncha nawantríncha nan̄kaamas aneakka Wíi shuar áchamniaiti.

38 Tura ashí wáitsatniun surimiatsuk ni krúsrin yanaki jukí nemartachkun̄ka Wíi shuar áchamniaiti.

39 Aya jú nun̄kanam péñker pujustaj tana nu ni iwiaakmarin emesrattawai. Tura Winia anentu asa ju nun̄kanam péñker pujustinian páchiatsna nu tuke shiir pujustatui.'

*Akinkiatin*  
(Márkus 9.41)

40 'Atumin itiaarma nuka Winia itiaarui. Tura itiaarea nuka Winia akuptukmia nunasha itiaawai.

41 Yúsnan etserniuncha Yúsnumiá winiá asamtai itiaakka etserin akínkiáttana nujaj métek akínkiáttawai. Péñker

shuárnasha pé<sub>n</sub>ker asamtai itiaakka pé<sub>n</sub>ker shuar akínkiáttana nujai métek akínkiáttawai niisha.

<sup>42</sup> Uchincha Wíi shuar asamtai entsá michan shikirak súsan<sub>k</sub>a imiá nekas nusha akínkiáttawai.” Tu tímiayi Jesus.

## 11

*Imiakratin Juan Jesusai shuaran akupkamiania nu (Rúkas 7.18-35)*

<sup>1</sup> Tura tuse (12) unuiniamur<sub>n</sub> Jesus tinia akupkar Niisha nú nu<sub>n</sub>ka péprunam we Yus-Chichaman jintiák etserkamiayi.

<sup>2</sup> Tura Juan sepunam e<sub>n</sub>kemas Kristu túramun antukmiayi. Antuk ni unuiniamur<sub>n</sub> jímiaran Jesusai akupkamiayi.

<sup>3</sup> Tura Jesusan aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataji?”

<sup>4</sup> Tutai Jesus tímiayi “Waketkirum ashí ántarmena nusha wáintrumna nusha Juan ujaktarum.

<sup>5</sup> Kusurusha wáinmainiawai. Shutuapsha wekainiawai. Tumarusha pé<sub>n</sub>ker ajainiawai. Empekarusha ántuiniawai. Jákarusha nantainiawai. Tura kuítrinchanmasha uwempratin chicham ujakmaiti. Nu ujaktarum.

<sup>6</sup> Túrusha yawetsuk Winia tuke shiir enentáimturna nú shuar shiir átatuí.” Jesus nuna tutai waketkiarmiayi.

<sup>7</sup> Waketkiarmatai shuar káunkarun Jesus Juán<sub>k</sub>an pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juan<sub>k</sub>ka nú shuarchaiti.

<sup>8</sup> Nuikia ¿warí werimiarum. Shuar pé<sub>n</sub>ker iwiarmampra ístai tusarmek wémarum? Warí, pé<sub>n</sub>ker iwiarmampraka uunta jeen pujuiniatsuk.

<sup>9</sup> Nuikia ¿warí werimiarum. Yúsnan etserniuk werimiarum? Maa, túrachmashiuram. Túrusha Juan<sub>k</sub>ka yaunchu etserniu nan<sub>k</sub>aamas enentáimtustiniaiti.

<sup>10</sup> Yaunchu Yus-Papinium áarmaiti:

“Winia akatramurun ami<sub>n</sub>i emka akupeajai ame jintimin iwiarat tusa.”

Juan nu akatramuiti.

<sup>11</sup> Nekasan tájarme, shuar imiakratin Juan<sub>j</sub>ai nan<sub>k</sub>aamas uunt atsuwiti. Tuma ai<sub>n</sub> Yus akupeamunam pachiinia nu shuarnaka, nekasmianchancha, Juan<sub>j</sub>ai nan<sub>k</sub>aamas shiir enentáimtustiniaiti. Tuma asamtai nu<sub>j</sub> pachiinkiatin enentáimpratarum.’

<sup>12</sup> ‘Kakaram shuarka imiakratin Juan támia nú tsawantumiá Yus akupeamunam ti pachiinkiatniun wakeruiniak kakarmajai pachiinkiatniun enentáimiainiawai.

13 Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi.

14 Yaunchu Yúsnan etserin “Kristu táatsain Erías tátiniaiti” tímiayi. Tura nekaatin wakerakrumka Juan nu Eríasaiti.

15 Antuktin jeakrumka nekaatarum.’

16 ‘Ju áentsnasha ¿warijiaí métek nakumkataj? Uchijiaí métek áiniawai. Ni ajiiaí iruntrar nakurustaj táyatañ tuíniawai

17 “Námpera áinis nakurustaitsar peem umpuarji túrasha jantsemáchure. Nuyá iwiarsatniua áinis nakurustaitsar íwiareakur kantamtai kantamáji túrasha átum úutcharme.”

18 Atumsha núnisaitrume. Kame Juan núkap yurumtsuk nijiamchinha úmutsuk wekaimiayi. Túmakui átumka “Yajauch wakantrukuiti” tímiarme.

19 Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujai Yus nekas nékamu nekanattawai.”

*Yajauch péprunmaya shuaran chicharkamiania nu  
(Rúkas 10.13-15)*

20 Nuyá tujintiamun túramiania nú peprunmaya shuaran pachis Jesus chicharkamiayi. Tuma ain nuyá shuar ni enentáin yapajiácharu asamtai juna chicharkamiayi.

21 “Wáinkiatá, Kurasín péprunmayaṭiram, Petsaitia péprunmayaṭirmesha. Nuí aents tujintiamun ti túraitjai. Tiru péprunmasha Setuñ péprunmasha nu tujintiamu túramuitkiuinṭkia yaunchu ni enentáin yapajiáwaraṭayi. Túrawar kúntuts pujutai pushín entsarar yunṭkunim ajakiaṭayi.

22 Tura Wisha tájarme, nekapsatin tsawant jeamtai Yus atumin tí asuttiamattarme. Tirunmaya shuaran nañkaamas tura Setuñnumiṭ shuaran nañkaamas asuttiamattarme.’

23 “Tura atumsha Kapernáum péprunmayaṭirmesha, ashí nañkaamas nañkaamantu ajastin enentáimtumarme. Antsu ashí emestamprartatui. Atumiñ aents tujintiamun ti túraitjai. Sutuma péprunam nu tujintiamu túramuitkiuinṭkia nu pepru yamaisha tuke ṭayi.

24 Tura Wisha tájarme, nekapsatin tsawant jeamtai Yus Sutowanmaya shuar nañkaamas atumin asuttiamattarme.”

*“Winin ayampratarum” tímiania nu  
(Rúkas 10.21-22)*

25 Nuyá Jesus tímiayi “Shiir enentáimtajme, Aparu, ashí nayaimpisha nuñkasha Úntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nañkaamantu enentáimtumainiatsna nú shuar paant awajtusuitme.

<sup>26</sup> Ame, Aparu, núnis wakera asam túraitme.’

<sup>27</sup> ‘Winia Apar ashí surusuiti. Wisha ni Uchirí asantai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai.

<sup>28</sup> Ashí pimpikniutirmesha itieurchat pujarmena nusha Winí winitiarum. Túrakrumniñkia ayamtikrattajrume.

<sup>29</sup> Wi kajechu asan tura péejchach enentáimin asantai Winí winirum unuimiartarum. Winia chichamur ántakrum umiakrumniñka atumí wakaní ayamprattawai.

<sup>30</sup> Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

## 12

*Jesusa unuiniamurí ayampratin tsawantaj trikiu neren pakaarmiania nu*

(Márkus 2.23-28; Rúkas 6.1-5)

<sup>1</sup> Nuyá Jesus ayampratin tsawantaj ajanman ajapenin nankaamamiayi. Ni unuiniamurísha tsukarar trikiu neren majusar yukí wekasarmiayi.

<sup>2</sup> Pariséu shuarsha nuna wáinkiar Jesusan aniasarmiayi “Ista, ame unuiniamuram ayampratin tsawantaj túratin surinkiamua nuna túruiniawai.”

<sup>3</sup> Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

<sup>4</sup> Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asantai Tawitniasha tura ni nemanin ana nunasha suritkiamuyayi. Túmain yúawarmiayi.

<sup>5</sup> Muisais akupkamunam aarma nu áujkachukaitrum. Israer-patrikia ayampratin tsawantaj takainiayatan nusha tunaachuiti.

<sup>6</sup> Nekas tájarne, yamá Yusa Jeen enentáimtustinia nuna nankaamas Wíniaka Aents Ajasuitjiana nu, nekas enentáimtursatniuitrume.

<sup>7</sup> Yus-Papinium tawai:

“Murik maam Winia surusum nujaj “maakete” tátsujai. Antsu waitnenkartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ántarum súmantikiachaintrume.

<sup>8</sup> Wi Aents Ajasu asan ayampratin tsawantan Úuntrintjai.”

*Shuara uweje jakan Jesus tsuármiania nu*

(Márkus 3.1-6; Rúkas 6.6-11)

<sup>9</sup> Jesus nuyá wé Israer-shuar iruntainiam wayamiayi.

10 Nui shuar ámiayi ni uwejé jaka. Tura Jesusan ántar nekap-satai tusa wakeruinia ásar aniiniak “¿Ayampratin tsawantaj jaa shuar tsuarminkiait?” tiarmiayi.

11 Tutai Jesus tímiayi “Atumsha atumí murikrí ayampratin tsawantaj wañnam akaiki iniamtai jusatai tusarum wéchaintrupash.

12 Antsu shuarka murikjai nankaamaschakait. Tuma asamtai ayampratin tsawantajsha péñker ana nu túramniaiti.”

13 Tinia iniaais áishmankan uwejé jakan tímiayi “Uwejém takuitia.” Tutai uwejé takuí chíkich uwejéjai métek péñker ajasmiai.

14 Nuna túramtai Pariséu shuarsha aa jíinkiar Jesus itiurak máawaintiaji tusar chichaman najatiarmiayi.

### *Isayas Jesusnan tímia nu uminkiamiayi*

15 Jesus nin máatniun nekaama nuyá jíinkimiayi tura wéakuí untsurí shuar nemariarmiayi. Untsurí jáiniancha tsuámiai.

16 Tsuar “etserkairap” tinia akupiarmiayi.

17 Yaunchu Yúsnan etserin Isayas tímia nu uminkiaiti tusa túrunamiayi. Niisha juna áarmiayi:

18 “Júiti Wi achikmaj nu. Niisha Wi tájana nuna umin asamtai ti aneakun Niijjai waraajai. Winia Wakantru kakarmarín takamtsuk susattajai. Túramtai winia uwempratin chichamprun ashí Israercha nunkanmasha etserkattawai.

19 Jiakchattawai tura kakaram chichaschattawai. Winia anturtukarat tusa péprunam weak untsukchartatui.

20 Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisan shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui.

21 Tura Israer-shuarchasha Nin nekas enentáimtusartatui.”

*Jesusan “iwianchi uuntri kakarmarijiai túrawai” tiarmiania nu*

*(Márkus 3.19-30; Rúkas 11.14-23; 12.10)*

22 Nuyá Jesusan shuar yajauch wakantrukun itiariarmiayi. Nu shuar jii kusurusha chichachusha ámiayi. Tura Jesus tsuármatai paant íimsamiayi tura chichakmiayi.

23 Nuna wáinkiar shuar shiir enentáimprar tiarmiayi “¿Tawitia uchirí pampanku iniañnamu uwemtikkiartin tátinia nuáshit?”

24 Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitiantrin Pirsepún umirniuiti. Tuma asa nuna kakarmarijiai yajauch wakanin jiki akupeawai.”

<sup>25</sup> Jesus tu enentáimainian neka asa tímiayi “Nú nun<sub>kan</sub>maya shuar nuamtak kajernaiyakuin<sub>ka</sub> nú nun<sub>ka</sub> wari meserchattawak. Núnis<sub>an</sub> nuamtak shuar ní shuar<sub>jai</sub> mánainiakka amunaikchartatuak.

<sup>26</sup> Núnis<sub>an</sub> íwianch nuamtak jiiki akupnainiakka máanaikiar wárik amuukashtatuak.

<sup>27</sup> Kame Wi Pirsepú iwianchi kakarmar<sub>jijai</sub> iwianchin jiiki akupeakuin<sub>ka</sub> atumí uchir<sub>isha</sub> ¿yana kakarmar<sub>jijai</sub>n jiiki akupena? Ni túramur<sub>jijai</sub> átum awajirma nekamatarum.

<sup>28</sup> Wi Yusa Wakaní kakarmar<sub>jijai</sub> yajauch wakanin jiiki akupea asamtai atumsha Yusa akupeamur<sub>i</sub> atum<sub>jin</sub> jeartarmena nu nekaatniuitrume.”

<sup>29</sup> ‘Iista. Shuar kakaram shuara kuítr<sub>in</sub> kasarkatin wak-erakka emka kakarman jin<sub>kiá</sub> aya túra<sub>n</sub> ni jeen wayá kasarkamniaiti. Wi iwianchin jiikmiajai uunt iwianch nu-petkamua nu nekaamniaiti.’

<sup>30</sup> ‘Wij<sub>jai</sub> tsan<sub>in</sub> pujatsna nuka winia nemasruiti. Núnis<sub>an</sub> Winia yáintsuna nu aya itiurchat nájateawai.’

<sup>31</sup> ‘Tuma asamtai tájarme, Ashí shuar tunáa túruinia nusha yajauch chichainia nusha tsan<sub>kuratin</sub> awai. Antsu Yusa Wakan<sub>in</sub> yajauch chicharin ainia nuka tsan<sub>kurash</sub>tiniaiti.

<sup>32</sup> Winiasha Aents Ajasuitjiana nuna yajauch chichartuinia nú shuarsha tsan<sub>kuram</sub>niaiti. Tura Yusa Wakan<sub>in</sub> yajauch áujmatainia nuka pen<sub>ké</sub> tsan<sub>kurach</sub>miniaiti. Ju nun<sub>kan</sub>masha tura ukunmasha tsan<sub>kurnarch</sub>tatawai’ tímiayi.

*Ni nerejai numi nekaamniaiti*

*(Rúkas 6.43-45)*

<sup>33</sup> ‘Yutai numi pen<sub>keran</sub> nereawai. Tseas numisha yajauchin nereawai. Ni nerejai numi nekaamniaiti. Núniskete atum<sub>jai</sub>.

<sup>34</sup> Tseas wenunniutirmesha, ¿atumsha itiurak imiá yajau-chitirmesha pen<sub>ker</sub> chichamsha chichastarum? Shuar ni enentáin enentáimna nuna chichaawiti.

<sup>35</sup> Pen<sub>ker</sub> shuar pen<sub>ker</sub> enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti.

<sup>36</sup> Tura Wisha tájarme, nekapsatin tsawant jeamtai ashí enentáimtsuk chichakma nuna Yúsan paant ujakartatui.

<sup>37</sup> Iis, ame chichammij<sub>jai</sub> nekanattarme. Pen<sub>ker</sub> chichakuitkiumka sumamashtatme. Tura pen<sub>ker</sub> chichakchaitkiumka sumamattame.”

*Nu shuar yajauch ásar iniakmamun seawarmiania nu*

*(Márkus 8.12; Rúkas 11.29-32)*

<sup>38</sup> Pariséu shuarsha Israer-shuara jintinniu<sub>risha</sub> Jesusan chicharuk “Uuntá, ame Yúsa<sub>yaitjai</sub> tusam nayaimpinmaya kakarmaj<sub>jai</sub> iniakmamu túrata, iisha wáinkiatái” tiarmiayi.

39 Tutai Jesus tímiayi “Shuar yajauch tura Yúsan enentáimtachu ásar nayainpinmaya iniakmamun seiniawai. Tuma asamtai, áyatik yaunchu Junas túrunamu iniakmastiniaiti.

40 Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nunká jakan tepes-tatjai.

41 Júnás Níniwi péprunmaya shuaran Yus-Chichaman et-serkamtai nu shuar ni tunaarín enentáimtusar ni enentáin yapajíawarmiayi. Tura juí yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtikiawartatui.’

42 ‘Yaunchu nuwá yajayá shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiyai. Tura juí yamáí Sarumúnjají nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtikiawartatui’ tímiayi.

*Yajauch wakan jüiki akupkamuitiat wáketna nu*  
(Rúkas 11.24-26)

43 ‘Shuara enentáiyá yajauch wakan jínkin yumi penké yútatsna nuí wéawai. Tura nuí péñker pujustinian wáinkiach ataksha waketkitniun enentáimiu.

44 “Wi jíinkimíaj nuí waketkittíajai” tawai. Tura waketki shuara enentáin péñker iwíaramu tura ankantán wáiniak

45 ni aín siati (7) iwíanchin níijíají nankaamas yajauchin itíá shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui” tímiayi Jesus.

*Jesusa yachí, Jesusa nukurí*  
(Márkus 3.31-35; Rúkas 8.19-21)

46 Jesus nu shuarjají tuke chichaak pujají ni nukurísha ni yachísha tariarmiayi. Tura aa wajasar Níijíají chichastaj tiarmiayi.

47 Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

48 Chichaman ujakmia nuna Jesus tímiayi “¿Ya ainia winia nukursha winia yatsursha?”

49 Nuyá ni unuiniampurín iniakmas tímiayi “Ju áiniawai winia nukur tura winia yatsursha.

50 Ashí shuar winia Apar nayainpiniam pujana nu waker-amun umiiniana nu winia yatsur winia umar winia nukur áiniawai” tímiayi.

## 13

*Untsurí métek-taku chichamjají Jesus unuiniamiania nu*

*(1) Atsaamin atsaampramiayi*

*(Márkus 4.1-9; Rúkas 8.4-8)*

<sup>1</sup> Nu tsawantají Jesus ni jeeya jíinkin antumianka kánmatkarín pujusmiayi.

<sup>2</sup> Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarín pujusarmiayi.

<sup>3</sup> Túrunawarmatai untsurí métek-taku chichamjají unuiniamiayi. “Atsaamin atsaamprataj tusa jíinkimiai, tímiayi.

<sup>4</sup> Atsaamki wesa arakrj jintia písunmasha iniaarmai. Tura chiniki tariar yuawarmai.

<sup>5</sup> Chikichcha kaya írunmanum iniaarmai. Nuñka ishichik asamtai wárik tsapainiarmai.

<sup>6</sup> Tura nantu etsantramtai péñker kankáprúrcharu asa sukuam káararmai.

<sup>7</sup> Chikichcha janjí nupanam iniaarmai. Tura janiki wárik tsakar nupetak ajakramai.

<sup>8</sup> Chikichcha péñker nuñkanam iniaarmai. Nusha péñker nerekar chikich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai.

<sup>9</sup> Kuishim ákuinikia antuktarum” tímiayi.

*“¿Urukamtai aya métek-taku chichamjají jintíam?” aniasarmiania nu*

*(Márkus 4.10-12; Rúkas 8.9-10)*

<sup>10</sup> Nuyá ni unuiniamurín Jesusan taruntar aniiniak “¿Urukamtai aya métek-taku chichamjají ju shuar unuiniam?” tiarmiayi.

<sup>11</sup> Tutaí Jesus tímiayi “Urukuk ju nuñkanam Yus akupin ati, nuka yaunchu nekanachmiayi. Tura yamaikia Yus ashí nuna atumín paant iniakturmawai. Antsu chikich nuna nekaachmín áiniawai.

<sup>12</sup> Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiarne.

<sup>13</sup> Tuma asamtai aya métek-taku chichamjají unuiniyajai. Nú shuarka íniayatan wáiniáiniatsui. Ántuiniayatan ántachua núnis nekainiatsui. Túmainiak Winia nekarainiatsui.

<sup>14</sup> Nujají yaunchu Yúsna etserin Isayas timia nu uminkiaiti. Juna tímiayi:

“Ti ántayatrum anturkashtatrome. Wáiniatrumsha nekaashtatrome.



15 Ju shuara enentáí kátsuram ásar péñker nuna nakitiaini-awai. Nu asamtai péñker ántuiniatsui, jii sha pusá áinis áiniawai. Túrachkunka paant nekaawarainti, tura nekas antukarainti, tura enentáíjiaí enentáimias Winia tsuarat tusa tarutiarainti.”

16 Tura átumka paant wainkia asarum péñker anta asarum shíiraitrume.

17 Nekasan tájarme, untsurí Yúsnan etserniusha tura péñker shuarsha átum yamáí wáintrum nuna wáinkiatniun wakeru-  
iniayatan wáinkiacharmiaí. Tura átum yamáí ántarme nuna antuktinian wakeruiniayatan antukcharmiaí’ tímiayi.

*Jesus atsaampramu chichaman paant jintintiamiania nu  
(Márkus 4.13-20; Rúkas 8.11-15)*

18 ‘Ayu, antuktarum. Atsaampramu chichaman paant jintintiatjarme.

19 Árak jintia písunam iniaarma nuka shuar Yus-Chichaman ántayatan ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai.

20 Árak kaya írunmanum iniaarma nuka shuar Yus-Chichaman antuk waras umirainia núiti.

21 Tura núkap kan kaprurcharu ásar katsuiniatsui. Antsu itiurchatan ínkiuiniak tura Yus-Chichaman wakeruina ásarmatai chíkich yajauch áujmatam wárik iniaisar ikiuiniawai.

22 Árak jan kí nupanam iniaarma nuka shuar Yus-Chichaman antuk emka umirniua núiti. Tura ju nunkanam írunna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai.

23 Tura árak péñker nunkanam iniaarma nuka shuar Yus-Chichaman antuk péñker umirainia núiti. Tura péñker nerenawai. Chíkich sian (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis áiniawai” tímiayi Jesus.

*(2) Yajauch nupá tríkiunam atsaamkamú*

24 Jesus ataksha ju métek-taku chichaman áujmatsamiayi. “Shuar Yus akupeamunam pachiinkiertin júnisaiti. Shuar péñker arakan, tríkiun ni nunken araamai.

25 Tura ashí kanararmatai nemasrj kashi taa trikiu arakmanum yajauch nupan aratak ikiukmiai.

26 Trikiu tsapakar nereakui nuyá yajauch nupasha nusháa nereku asa ti paant ajasmai.

27 Nuna ísar takainia nu ni úuntrin werí tiarmai “Uunta, ¿péñker arak araachmakam. Itiura júsha yajauch nupasha tsapakuit?” ’

<sup>28</sup> ‘Tutai nérentin timiai “Winia nemasur arakuiti.” ’

‘Takui ni takarniurj tiarmai “¿Yajauch nupan uwerat tusam wakeramek?” ’

<sup>29</sup> ‘Tutai timiai “Atsá, uwerairap. Yajauch nupan uweaj tukamarum trikiu uweniirum.

<sup>30</sup> Iniaisatarum. Antsu métek tsakakti. Júuktin tsawant jeamtai winia takartinian emka yajauch nupan uwer irumar jinkiawarat tusan akupkartatjai. Tura áesawartatui. Tura trikiu neren júukar pénker ikiusarat tusan akupkartatjai” timiai” tímiayi Jesus.

### (3) *Mustasa jin*ki*ái*

(*Márkus 4.30-32; Rúkas 13.18-19*)

<sup>31</sup> Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jin*ki*aiya áintsan*ke*te. Shuar pénker nunken araamai.

<sup>32</sup> Mustasa jin*ki*áikia imiá uchichiitiat tsapái tsakaakka ashí numichij*ai* nan*ka*amas uunt ajawai. Ti uunt asamtai chin*ki* ni kanawen pasunmainiawai” tímiayi Jesus.

### (4) *Karin enketatin*

(*Rúkas 13.20-21*)

<sup>33</sup> Núnisan*n* chíkich métek-taku chichaman áujmatsamiayi. “Shuar Yus akupeamunam pachiinkiertin karinia áintsan*ke*te. Nuwa níjiamchiniam karinia en*ke*a mashi páchimiawai. Tura nu mash karimtik*ia*wai” tímiayi.

*Jesus aya métek-taku chichamjain*n* jintintiamiania nu*

(*Márkus 4.33-34*)

<sup>34-35</sup> Ashí nuna Jesus métek-taku chichamj*ai* áujmatsamiayi. Yaunchu Yúsnan etserin timia nu uminkiat*i* tusa túramiayi. Etserin juna áarmiayi:

“Métek-taku chichamj*ai* áujmattiatjai. Yámankamtaiknumiá nékashtain etserkattaj*ai*” tu áarmiayi.

Nu asamtai aya métek-taku chichamjain*n* áujmatmiayi Jesus.

*Jesus yajauch nupa trikiunam atsamkamun paant awajsami-ania nu*

<sup>36</sup> Nuyá shuaran ikiukin Jesus jeá támiayi. Túramtai ni unuiniamurj tariar “Yajauch nupa áujmatmena nu paant awajsata” tiarmiayi.

<sup>37</sup> Tutai Jesus tímiayi “Wi Aents Ajasuitjai. Wi pénker arakan atsaamkaitjai.

<sup>38</sup> Ashí nunka aja áintsaiti. Pénker jin*ki*ái Yus-shuaran Yus akupea nuna nakumeawai. Yajauch nupa iwianchna ainia nuna nakumeawai.

<sup>39</sup> Tura íwianch ii nemasr*i* asa yajauch nupan arakuiti. Tura nunka amúamunam Yusa suntar*i* arakan júuktinia áintsan shuaran yaruaktatui.

40 Yajauch nupa irur jinium áesatniua áanis nunka amúamunam túrunattawai.

41-42 Nui Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurur jinium apeawartatui. Nuisha ti úutin ti wáitsatniusha átatui.

43 Antsu péñker túruinia nuka ti shiir wincha ajasar ni Aparí akupeana nuí etsa núnis tsáapnin ajasartatui. Wats, kuishim átsuk. Antukta.'

(5) *Kuit wáinkiamu*

44 'Shuar Yus akupeamunam pachiinkiatin kuit nunka uuqma áintsankete. Shuar nu kuítian wáiniak nuin ataksha uuqmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.'

(6) *Kaya shiirmach ti kuitia nu*

45 'Shuar Yus akupeamunam pachiinkiatin júnisaiti. Shuar kayachin ti shiirman eak wekaana áintsankete.

46 Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.'

(7) *Neka*

47 'Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai.

48 Tura nekanam nemarmatai kukar jiki, nuí péñker namaknasha chaninnium chumpiniawai. Tura yajauch namaknaka ajapenawai.

49 Núnisan átatui nunka amúamunam. Yusa suntari taar Yusshuaran tura íwianch shuaran akantrattawai.

50 Tura íwianch shuarnaka uunt jinium apeattawai. Nuisha ti úutin ti wáitsatin átatui." Nuna ashí ni unuiniamurijjai áujmatsamiayi Jesus.

*Yamá nekaamujaisha tura yaunchu nekaamujaisha Yusshuaran yáintiniaiti*

51 Jesus nuna tinia amuk "¿Ju mash antukurmek?' tímiayi.

Tutai ni unuiniamuri "Ee, Uunta, ashí antukji" tiarmiayi.

52 Tuiniakui Jesus tímiayi "Shuar ashí Yúsnan péñker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusamniaiti. Núnisan nu shuar yamá nekamujaisha tura yaunchu nekamujaisha Yusshuaran yáintiniaiti."

*Jesus Nasarétnum waketkimiania nu*

(Márkus 6.1-6; Rúkas 4.16-30)

53 Jesus nu métek-taku chichaman áujmatas amuk nuyá wémiayi.

54 Tura ni péprurin Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiyai. Tura “¿Jusha tuí imiá unuimiaruit, tiarmiyai. Itiurak aents tujintiamun túrammait?

55 Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas ániatsuk.

56 Tura ni umaísha iijíai írutra pujuiniatsuk. ¿Nuikia itiura mash neka?” tiarmiyai.

57 Túrawar Jesusan itiuurchat enentáimturarmiyai.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyańka ni shuarinńkia nin anturainiatsui” tímiayi.

58 Tura nú shuar Jesusan enentáimtuiniachu asamtai aentsti tujintiamun aya ishichik túramiyai.

## 14

### *Imiakratin Juan jakamu*

(Márkus 6.14-29; Rúkas 9.7-9)

1 Kariréa nunkanam Erutis akupniuyayi. Tura Jesus túramuncha antukmiayi.

2 Tura ni írutramurin tímiayi “Nuka imiakratin Juan jakamunmayá nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

3-4 Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jinńkia sepunam enkeatarum tusa akupkamiayi.

5 Niisha Juan kan máataj tukamá aentsun ashamiarmiyai. Ashí aents “Juan Yúsnan etserniuiti” enentáimtuiniakui ashamiayi.

6 Tura akupin Erutis akiiniamu tsawantri jeamtai nú námpertin Jirutíasana nawantri ashí ipiaamu pujuiniamunam jantsemamiayi. Túramtai Erutis shiir enentáimtak

7 “Ame ashí wakeram nu seattia, tímiayi. Nekasan amastatjai, Yussha iirui” tímiayi.

8 Tutai nu nuwach emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

9 Tutai Erutis wake mesekmiayi. Túrasha “nekas Yus iirui” tiniu asa tura ni amikrisha antukaru asamtai umikmiayi.

10 Ni suntarin sepunmayan Juan ka muuken tsupik itiarti tusa akupkamiayi.

11 Tura amamkunam itiar nuwachin súsarmiyai. Tura ni-isha ni nukurí susamiayi.

12 Nuyá Juanka írutramurí tariar ayashí jukiar iwiarsarmi-  
ayi. Túrawar Jesusan ujauwearmiayi.

*Jesus senku mir (5000) áishmankan ayuramiania nu  
(Márkus 6.30-44; Rúkas 9.10-17; Juan 6.1-14)*

13 Jesus nuna antuk Nínki ni unuiniamuríjjiaín kanunam  
enkemar arant aents atsamunam wémiayi. Túrasha nuna  
aents nekaawar kukarak weriarmiayi Jesusan.

14 Kanunmaya jíiniaj tukamá untsurí áentsun wáinkiamiayi.  
Tura wáiniak waitnentrarmiayi. Tura jáiniancha tsuárarmiayi.

15 Kíakui ni unuiniamurí Nin tariar tiarmiayi “Kíawai,  
Uunta. Tura shuar tíjiuch pujaaka atsawai. Ju aents akup-  
karta. Péprunam wear sumak yuuwearti” tiarmiayi.

16 Tutai Jesus tímiayi “¿Urukamtaik wearat? Antsu atumek  
ayuratarum.”

17 Tutai tiarmiayi “Iikia takaktsuji. Aya senku (5) tantachik  
jimiarchik namakchijiaín takakji.”

18 Tuíniakui Jesus “Wats, nu itiartitiarum” tímiayi.

19 Tinia aents chírichriniam pujusarti tusa akupkamiayi.  
Nuyá senku (5) tantancha jímiar namaknasha achik  
nayaimpiniam ímias Yúsan yuminsamiayi. Tura puur ni  
unuiniamurín aents ayuratarum tusa súsarmiayi.

20 Ashí yurumáwar jémararmiayi. Tura nuyasha puunaruka  
tuse (12) chañkin tíarmiayi.

21 Nui yurumáwarmia nusha nuwasha uchisha nekapmat-  
suk senku mir (5000) aya áishman áirmiayi.

*Jesus entsá pátatek wekasamiania nu  
(Márkus 6.45-52; Juan 6.16-21)*

22 Nuyá Jesus ni unuiniamurín kanunam enkemprarum  
amain émaa ajatarum tusa akupkarmiayi. Niisha áentsun  
akupkarmiayi.

23 Akupkarsha naint waka Yúsan áujumiayi. Káshisha nui  
Nínki tuke pujumiayi.

24 Tura antumiañ tí wanakaram asamtai kanu ajapén ajas-  
matai nase tukumma entsa tamparukmiayi.

25 Tsawaana aj nii tuke wenaj Jesus entsá pátatek wekas  
pujuiniamunam jeamiayi.

26 Tura ni unuiniamurí entsá pátatek wekaan wáinkiar  
ti sapijmiakarmiayi. Tura ashamainiak “wakanchashit”  
tiarmiayi.

27 Tuíniakui Jesus tiarmiayi “Kakaram ajastarum. Wiitjai.  
Ashamprukairap.”

28 Takui Pítur chicharuk tímiayi “Uunta, Ámetkumka nui  
wekasa jeatin untsurkata.”

29 Takui Jesus tímiayi “Wats, winitia.”

Tutai Pítiur kanunmaya akaikin Jesus wajana nuí jeataj tusa entsá pátatek wekasamiayi.

<sup>30</sup>Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu unsummiayi.

<sup>31</sup>Nu chichamtaik Jesus uwejnum achik júak “Maa, Yus imiá ishichik enentáimtuscheme” tímiayi.

<sup>32</sup>Tura kanunam enkemáwarmatai nasesha menkakamiayi.

<sup>33</sup>Túramtai kanunam enkemarmia nusha Jesusan tikish-matar chicharuk “Nekas ame Yusa Uchirínme” tiarmiayi.

*Jesus Jinisarítiumiá shuaran tsuármiania nu*

*(Márkus 6.53-56)*

<sup>34</sup>Tura amaini katiñkiar Jinisarít nuñkanam jearmiayi.

<sup>35</sup>Tura nuyá aents Jesusan nekaawar nu nuñkanam ashí ujanairarmiayi. Túrawar jaancha ni pujamunam itiararmiayi.

<sup>36</sup>Ni pushirínkisha antiñtai tusar seawarmiayi.

## 15

*Shuáran yajauch awajeana nuna Jesus jintintiamiania nu*

*(Márkus 7.1-23)*

<sup>1</sup>Nuyá Jerusaréñ péprunmaya Pariséusha yaunchu akupkamu jintinniurísha Jesusan tariar aniasarmiayi

<sup>2</sup>“¿Urukamtai ame unuiniamuram ii uuntri yaunchu jintin-trarmia nuna uminiatsu? Iis, ikijmiatskesha yurumáiniawai” tiarmiayi.

<sup>3</sup>Tuúniakui Jesus aniasarmiayi “¿Urukamtai atumsha Yus akupkamu umirtsuk aya aents akupkamu umiirum?”

<sup>4</sup>Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

<sup>5-6</sup>Antsu átumka tárume “Shuar ashí niiniu íranna nuna mash “Yúsnaiti” takui nuikia nujaj ni aparíncha nukuríncha yáinçhamniaiti, tárume. Nin yáinçhamniai nakitiak ayatik “Ashí winia áiniana nu Yusna asamtai yáinçhamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi.

<sup>7</sup>Antra chichamtiniaitrume. Yúsnan etserin Isayas yaunchu nekas atumin áartampramiayi juna:

<sup>8</sup>“Ju aents ni wenejaj shiir awajtuiniawai, tura ni enentái jeachat pujuiniawai.

<sup>9</sup>Tura tukeneasan shiir awajtuiniawai. Aentsu chichamen jintintiainiyat “Yusa chichamente” tuiniawai.” Tu áarmiayi” tímiayi Jesus.

10 Tinea shuaran untsuk tiarmiayi “Ju antukrum pé<sub>n</sub>ker nekaatarum.

11 Aents yúana nuka shuáran yajauch awajsashtatui. Antsu wenunmayá jiinia nuka shuáran yajauch awajeawai” tímiayi.

12 Nuyá ni unuiniamurí Jesusan tariar “Maa, Pariséu ame chichammin antukar ti itiurchat enentáimprarai” tiarmiayi.

13-14 Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáanam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

15 Takui Pítiur Jesusan tímiayi “Nu métek-taku chicham paant awajsata.”

16 Tutai Jesus tímiayi “¿Atumsha nekaachurmek.

17 Enentáimprachurmek? Ashí wenunam wayaana nu wake-nam wéatsuk. Tura nuyá inia<sub>n</sub>kastiniaiti.

18 Antsu wenunmayá jiinia nu enentáinmayá jiiniu asa áentsun yajauch awajeawai.

19 Enentáinmayá ashí yajauch enentáimsatin jiniainiawai. Man<sub>k</sub>artuatniusha, chikicha nuwé kasamkatniusha, tsanirnatniusha, kasamkatniusha, wáitruatniusha, yajauch áujmatsatniusha

20 ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwá Israer-shuarcha Jesusan enentáimtusmiania nu  
(Márkus 7.24-30)*

21 Jesus nuyá jiinki Tiru péprunmasha Sitiun péprunmasha wémiayi.

22 Tura nu nun<sub>k</sub>anmayá nuwá Jesusan tarí tímiayi “Uunta, uunt akupin Tawit ame weatrum asamtai winia waitnen-trurta. Nawantur yajauch wakantruku asa ti wáitrutawai” tímiayi.

23 Tura Jesus áikchamiayi. Tura ni unuiniamurí tariar “Awemata, tiarmiayi. Tuke untsunki apapétmaji” tiarmiayi.

24 Nuyá Jesus tímiayi “Aya Israer-shuarnum men<sub>k</sub>akaru áinia nuna e<sub>k</sub>aktinian Yus akuptukuiti.”

25 Túrasha nuwá tikishmatar tímiayi “Uunta, waitnen-trurta.”

26 Tutai Jesus tímiayi “¿Uchí apatkurí jurukir yawá susamni-akait?” tímiayi.

27 Tutai nuwá tímiayi “Nekas, Uunta, tame. Tura yawasha ni aentsrí yurumainiakui nun<sub>k</sub>á iniaarun yuániatsuk.”

28 Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantri péñker ajasmiaiyi.

*Jesus untsurí jáinian tsuararmiania nu*

29 Jesus nuyá jiinki Kariréa antumianka káanmatkarin waketkimiayi. Tura naint waka nuí pujusmiayi.

30 Nuí untsurí aents Nin tariar shutuapnasha kusuruncha chichachuncha tsupirkamuncha chíkich jáiniancha itiararmiayi. Túrawar nawenam aeprusarmiayi. Túram tsuararmiayi.

31 Nuna íisar chichachusha chichainiakui, tsupirkamusha péñker ajainiakui, shutuapsha péñker wekainiakui, kusususha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

*Jesus kuaru mir (4000) áishmañkan ayuramiania nu (Márkus 8.1-10)*

32 Nuyá Jesus ni unuiniamurin untsukar tiarmiayi “Ju aentsun waitnentainiajai. Warí, menaintiu tsawant Wijíai yurumtsuk yujainiatsuk. Ayurtsuk ni jeen akupkachminiaitjai. Jintiá pimpiki wáitsartatui.”

33 Ni unuiniamurí tiarmiayi “Túrasha, Uunta, ¿shuar atsaasha tuyañ yurumak imiá sumaktaji ju aents ayurawartincha?”

34 Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

35 Nuyá aents nunká pujusarti tusa akupkamiayi.

36 Tura siati tantan achik namaknasha achik nuyá Yúsan yuminsamiayi. Tura puur aents ayuratarum tusa ni unuiniamurin susamiayi.

37 Ashí yurumáwar jémararmiayi. Tura puunaru siati chan̄kin tiarmiayi.

38 Tura nuí yurumáwaruka nuwasha uchisha nekapmatsuk aya áishmañkak kuaru mir (4000) árimiayi.

39 Nuyá Jesus áentsun akupak kanunam en̄kemar Maktara nun̄kanam wémiayi.

## 16

*Pariséusha Satuséusha iniakmamurin Jesusan seawarmiania nu*

*(Márkus 8.11-13; Rúkas 12.54-56)*

1 Pariséusha tura Satuséusha Jesusan nekapsatai tusar tariarmiayi. Túrawar “Ame Yúsaiyáitkiumka kakarmarmijíai nayaimpinmaya iniakmasta, iisha wáinkiatái,” tiarmiayi.



2 Tutai Jesus tímiayi “Átumka “Kapaaku péetar kíntiamkui kashin esatrurtatui” tíniuitrume,

3 Túrasha “Te ajas kapaaku péetar tsawaakui yumi yajauch átatui” tíniuitrume. Tura nekasaiti. Maa, átumka nayaim ísrum ju nunkanam túrunattana nu nékarme. Antsu Yus yamáí jú nunkanam tura nuka nékatsrume. Ántrairume.

4 Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmastiniaiti” tímiayi. Tinia ikiuak wémiayi.

*Pariséusha Satuséusha jintintiainia nu aneartiniaiti  
(Márkus 8.14-21)*

5 Tura entsá amaini katiñkiar ni unuiniamurí tantan júkitniun kajinmatkiarmiayi.

6 Nuyá Jesus tímiayi “Wáinkiatarum, Pariséusha Satuséusha wakaprutai takakainia nújaisha aneartarum.”

7 Tutai ni unuiniamurí tiarmiayi “Ii tanta itiachakrin tátsuk.”

8 Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek.

9 Senku tantajai túramiaj nu kajinmatkintrumek. Senku mir (5000) áishmankan ayuramtai untsurí chankin tiármia nu enentáimtsurmek.

10 Tura siati tantajai kuaru mir (4000) áishmankan ayuramtai nuna ishichik chankin tiármia nu kajinmatkintrumek.

11 Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujai” tímiayi.

12 Nuna Jesus takui ni unuiniamurísha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniatairin tímiayi.

*Pítiur Jesusan Yus anaikiamun paant ujakmiania nu  
(Márkus 8.27-30; Rúkas 9.18-21)*

13 Tura Sesaria-jiripiunam jeawar Jesus ni unuiniamurin aniasarmiayi “Aents Ajasuitjiana júna ¿yaiti turutainiawa Winia?”

14 Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chíkichcha Jeremíasaiti, chíkichcha chíkich aents Yúsnan etserniuiti turamainiawai” tiarmiayi.

15 Tutai nincha aniiniak “¿Atumsha yaiti túrutrum?” tímiayi.

16 Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

17 Tutai Jesus tímiayi “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame.

18 Tura Wis̄a tájame, ame Pítruitme, kayach tútaim. Nu kayanam jēa jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasr̄isha nu jeamman pukukchattawai.

19 Yus akupeamu yawincha amastatjai. Ju nuṅkanam j̄inkiatniusha atíatniusha amasmaiti. Tuma asamtai ame ju nuṅkanam suritiam nu nayaimpinmasha suritniaktatui. Tura ju nuṅkanam tsan̄kateam nu nayaimpinmasha tsan̄katnaktatui” tímiayi.

20 Nuna tinia Jesus ni unuiniamur̄in Krístuitiaj nu etserkairap tinia akupkarmiaiyi.

*Jesus Nin máatniun etsertumakmiania nu  
(Márkus 8.37-9.1; Rúkas 9.22-27)*

21 Nuyá Jesus j̄una unuiniatan̄ nan̄kammiayi. “Wi Jerusarén̄num wétiniaitjai. Nuṅ Israer-shuara úuntrīsha, Israer-patri úuntrīsha, Israer-shuara jintinniur̄isha ti wáitkiarsartatui. Nuyá mantuawartatui túrasha menaintiú tsawantaj nantaktiatjai.”

22 Takui Pítiur arantach jukí chicharuk tímiayi “Uunta, nuka pen̄ké áchatniuiti. Áminkia túrutmacharminiaiti.”

23 Jesus ayanmatar Pítrun tímiayi “Werumta, Satanása. Ya-jauch awajtame. Ámeka Yus wakeramu enentáimtsume. Antsu j̄u nuṅkanam enentáimainia áinis enentáimme.”

24 Nuyá Jesus ashí ni unuiniamur̄in tímiayi “Shuar Winia nemartustaj tusa wakerakka ni wakeramur̄in iniais ni krusi yanaki Winia nemartusti.

25 Shuar áyatik pen̄ker pujustaj tákuṅka nu shuar uwemt-suk jakattawai. Antsu jákatniuitkuisha pen̄ker pujustinian enentáimtsuna nú shuar nekas iwiaakman wainkiattawai.

26 Wats, shuar ashí j̄u nuṅkanam ír̄unna nuna sumakka tura nujai ni wakan̄i émesek çitiurak pen̄ker pujustin̄? Shuara wakan̄i emesramu çashí j̄u nuṅkanam ír̄unna nujai iwiam-niakait?

27 Wi Aents Ajasu asan, winia Aparu kakarmarij̄ijai tura ni suntarij̄ijai tana ashí shuaran̄ ni takasmajai métek akiktatjai.

28 Paant tájarme, shuar juṅ wajainia ju játsuk Wi akupin ajasmatai wáitkiartatui” tímiayi.

## 17

*Jesus nushá iira ajasmiania nu  
(Márkus 9.2-13; Rúkas 9.28-36)*

1 Nuyá sais (6) tsawant nan̄kaamasar Pítruncha, Jakupuncha, tura ni yach̄i Juan̄nasha níniak júkiar Jesus náinnium yakí wakamiai.

<sup>2</sup> Nui Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirisha ti puju jüitsumir ajasmiai.

<sup>3</sup> Nui sha Muisaisnasha Eríasnasha Jesusjai chichainian wáinkiarmai.

<sup>4</sup> Nuyá Pítiur Jesusan tímiayi “Uunta, ti shiir pujaji jui. Wak-erakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.”

<sup>5</sup> Tura Pítiur tu auju wájai yuran kim ti puju amuamiayi. Tura nu yuran minmaya chichaman antukarmiayi. “Juka winia aneamu Uchiruiti, tímiayi. Nin ti shiir enentáimtajai. Nii péñker anturkatarum” tímiayi. Tu chichasmiai Yus.

<sup>6</sup> Nuna ni unuiniamurj antukar ti ashamkar pákea ajakiarmiayi.

<sup>7</sup> Túrunawarmatai Jesus táriar antiñ “Ashamkairap, nantaktiarum” tiarmiayi.

<sup>8</sup> Tura pañkainiar íimij tukamá aya Jesusan wáinkiarmai.

<sup>9</sup> Nuyá náinniumia akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmaya nantaatsaiñ etserkairap’ tímiayi.

<sup>10</sup> Nuyá ni unuiniamurj Jesusan aniiniak “¿Urukamtai in jintintramin “Kristu táatsaiñ Erías emka tátiniaiti” tuinia?” tiarmiayi.

<sup>11</sup> Tuíniakui Jesus áikmiayi “Nekas Erías tátiniaiti. Tura nii mash iwiarattawai.

<sup>12</sup> Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajsarmiayi. Núnisan Winiasha, Aents Ajasu aiñ, wáitkiarsartatui.”

<sup>13</sup> Nuna takui ni unuiniamurj imiakratin Juáñkan áujmatui, tu enentáimprarmiayi.

*Jesus iwianchin jüiki akupkamiania nu  
(Márkus 9.14-29; Rúkas 9.37-43)*

<sup>14</sup> Ataksha aents matsatmanum jeawarmatai shuar Jesusan tarí tikishmatramiai.

<sup>15</sup> Tura tímiayi “Uuntá, winia uchir waitnentrutrata. Wainchi tukum ti wáitniuiti. Jiniumsha patamniuiti. Entsasha iniainaiti.

<sup>16</sup> Ame unuiniamurmincha itiarjiai túrasha tujinkiarai.”

<sup>17</sup> Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjarum? Wats, uchi itiaritiarum’ tímiayi.

<sup>18</sup> Itiarim Jesus yajauch wakanin jüiki akupkamiayi uchi ayashínia. Túramtai nu chichamaik péñker ajasmiai.

<sup>19</sup> Nuyá urum ni unuiniamurj Jesusjai niñki pujusar áujmatainiak “¿Urukamtai yajauch wakan jüiktin iikia tujinkiamaj?” tiarmiayi.

20 Tuíniakui Jesus tiarmiayi “Yus nekas enentáimtachu asarum tujinkiarne. Túmaitiat nekasaiti mustasa jin\_kiái timiá uchichitiat ti uunt tsakaatsuk. Núnisan\_ Yus ishichkisha enentáimtakrumka nu naint ékemkata tutai nu naint túrunattawai. Pen\_ké tujinkiashtatrumé Yus nekas enentáimtakrumka.

21 Kame nu yajauch wakan jiki akupkatniuka ijiarmam Yus áujsatniuiti.”

*Ataksha Jesus ni játniun ujakmiania nu  
(Márkus 9.30-32; Rúkas 9.43-45)*

22 Jesus ni unuiniamurijiai Kariréa nun\_kanam wekas juna ujakarmiayi. “Wi Aents Ajasu asan, aentsnum surunkattajai tura mantamnattajai.

23 Túrutawarmatai menaintiú tsawantai nantaktiatjai.” Tura ni unuiniamur\_i nuna antukar ti kúntuts enentáimprarmiai.

*Jesus an\_kantaitiat akiktinia nuna akikmakmiania nu*

24 Jesus ni unuiniamurijiai Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntri Israer-patrin akiktinia nuna akínkaiit?”

25 Tutai Pítiur “Ee” tímiayi.

Tura Pítiur jeá wayá chichaatsain\_ Jesus emka tímiayi “Chíkich nun\_kanmayá akupin çyana kuítrijiaín\_ takainia. Ni shuáriniunkek atantainia. Antsu yajayá shuárnan atantainiatsuk. Nekaschak, Semun\_ká?”

26 Tutai Pítiur “Nekas yajayá shuárnan atantainiawai” tímiayi.

Jesus tímiayi “Nuikia ni shuari\_ an\_kant ániawai. Iisha núnisrik nu akiktin an\_kantaitji.

27 Túrasha itiurchat enentáimprarin\_ tusar akiktai. Ame tsau jukim entsá wetá. Túram emka namak japikim iwian\_kam nui kuit wáinkiattame. Nu jukim Wíniasha áminiusha akikmakta.”

## 18

*“¿Ya imiá nan\_kaamantuit?” tunaiyarmiania nu  
(Márkus 9.33-37; Rúkas 9.46-48)*

1 Nu tsawantai\_ ni unuiniamur\_i tariar Jesusan aniasarmiayi “Yus akupeamunam pachiinia nu çya imiá nan\_kaamantu áminiait?”

2 Nuna tuíniakui Jesus uchin untsuk ajapen awajtusar

3 tímiayi “Tí nekasán tájarne, atumí enentáimtai\_ri yapajiarum uchia áinis ajachkurmeka Yus akupeamunam pachiinkiachminiaitrumé.

4 Nu asantai\_ ju uchia áinis péejchach enentáimtumana nuka Yus akupeana nui\_ nekas nan\_kaamantu ajasminiaiti.

<sup>5</sup> Nú arantcha Winia anentuk uchin itiaana nú shuar Wini-asha itiaareawai' tímiayi.

*Tsuumainti yajauch túrumtikiatin*  
(Márkus 9.42-48; Rúkas 17.1-2)

<sup>6</sup> 'Shuar ju uchin Winia umirtana nuna tunaanum ajuar-matain<sub>ñ</sub>kia nuna túratsai<sub>ñ</sub> niisha kuntujén kayajai jin<sub>ñ</sub>kiar nayaantsanam ajapen kunanam ajunmaitkiu<sub>ñ</sub>ka maak ainti, tímiayi.

<sup>7</sup> Ju nu<sub>ñ</sub>kanam tunáa iniaatai írunuk tuke itiurchataiti. Antsu shuar chikichan tunaanum ajuarka ti itiurchatan in<sub>ñ</sub>kiuntatui' tímiayi.

<sup>8</sup> 'Nu asamtai ame uwejem tura nawem tunaanum ajun-matniuitkiu<sub>ñ</sub>kia tsupikiam ajapata. Kame muntuch pu-justin tura ukunam nayaimpiniam wétin pé<sub>ñ</sub>keraiti. Antsu kajinkiashtin jinium takamtsuk jeatniuka imiá yajauchiiti.

<sup>9</sup> Núnisa<sub>ñ</sub> ame jimi tunaanum ajunmatniuitkiu<sub>ñ</sub>kia ukuinkiam ajapata. Kame chikichik jiji<sub>ñ</sub>ai pujusam nayaimpiniam wétin pé<sub>ñ</sub>keraiti. Antsu jinium mai j<sub>ñ</sub>intiuk wétin imiá yajauchiiti' tímiayi.

*Murik menkaaka áujmatsamu*  
(Rúkas 15.3-7)

<sup>10</sup> 'Uchi ainia nu nakitraitrap. Yusa suntari<sub>ñ</sub> nin wáinkiatniua nu winia Aparu<sub>ñ</sub> tíjuch pujuiniawai.

<sup>11</sup> Kame wi Aents Ajasu asan, menkaakarun eaktajtsan táwitjai.'

<sup>12</sup> 'Enentáimpratarum. Shuar sia<sub>ñ</sub> (100) murikiun takakuiat chikichik menkakamtai untsur<sub>ñ</sub> menkakacharun náinnium matsaak, menkakan eaushtatuak.

<sup>13</sup> Wáinkiasha untsur<sub>ñ</sub> menkakacharua nujai nankaamas waraschattawak.

<sup>14</sup> Núnisa<sub>ñ</sub> atumi Apar<sub>ñ</sub> nayaimpiniam pujana nu, nu uchi chikichkisha menkakacharti tawai' tímiayi.

*Yus-shuarti tsan<sub>ñ</sub>kurnairatin*  
(Rúkas 17.3)

<sup>15</sup> 'Chikich Yus-shuar ámin yajauch túrutmaku<sub>ñ</sub>kia nii werim áajsata. Tura ámechik werim ame yatsumjai chichasta. Anturtamku<sub>ñ</sub>kia ame yátsum yáin<sub>ñ</sub>kiume.

<sup>16</sup> Tura anturtamchaku<sub>ñ</sub>kia nuyá chikichik shuar jimiará shuarsha jukim ataksha weritia. Túram ataksha áujnaisatarum, niisha paant nekaawarat tusam.

<sup>17</sup> Túrasha yatsum tuke ántachku<sub>ñ</sub>kia Yus-shuar iruntainiam iwiainiakta. Túrasha yatsum tuke ántachku<sub>ñ</sub>kia Yus-shuarcha núnisa<sub>ñ</sub> enentáimtusta nu shuar.'

18 ‘Nekasan tájarme, jū nuṅkanam suritiam nu nayaimpinmasha suritniaktatui. Tura jū nuṅkanam tsanḱateam nu nayaimpinmasha tsanḱatnaktatui.’

19 ‘Núnisnak tájarme, jū nuṅkanam pujusrum jimiará Yus-shuartiram métek enentáimprarum winia Apar nayaimpiniam pujana nu seakrumniṅkia wakerarmena nuna suramsatfarme.

20 Jímiar menaintiusha Yus-shuar Winia enentáimturuk iruntrarmatai Wisha nuí niijiaí pujajai” tímiayi Jesus.

21 Takui Pítieur werí Jesusan aniasmiayi “Uuntá, winia yatsur yajauch awajtakui ḱurutma tsanḱuratniuitiaj. Siátikik tsanḱuratniuitiaj?”

22 Jesus aiyak “Siátik tátsujme, antsu iniaṅnatsuk tsanḱuratniuitme” tímiayi.

*Takakmau tsanḱurachun pachis áujmatsamiania nu*

23 Tuma asa Jesus Yus akupeamunam pachiinkiaru tsanḱurnairartiniaiti tusa jū métek-taku chichaman áujmatuk tímiayi, “Uunt akupin takarṅin tumashin akirkarat tusa untsukarmai.

24 Yama nánkamuk tí nukap tumashmakua nuna untsukmai. Akikmakchamnia ti tumashmakuyi.

25 Tura nu takakmau kuitrṅ atsakui uunt akupin “Yajasma áitkiasrum nuṅrtiuk uchirtiuk ashí waririntiuk suruktarum, timiai. Nu kuitjaj akirkati” timiai.

26 Tutai nu takakmau uunt akupniun tikishmatar seek timiai “Uunta, waitneasam nákarsatá. Auka, mash akiktatjame.”

27 Uunt akupin waitnentar mash tsanḱur anḱant akupkamaí.

28 Tura nú chichamaik nú takakmau jiinki ni aṅin ṅkiunmai. Nú aṅisha nin ishichik tumashiiyi. Tura tsékenki suwenam achik chicharuk timiai “Wari akirkata tumashitmena nu.”

29 Tura ni aṅ nin tikishmatar timiai “Waitneasam nákarsatá. Auka, mash akiktatjame” timiai.

30 Túrasha nakitramai. Antsu tsanḱurksuk sepunam enḱeamai ashí akirkatí tusa.

31 Chíkich takakmau nuna wáinkiar ti kúntuts enentáimtuiniak uunt akupniun ashí etsertukarmai.

32 Nuna antuk uunt akupin untsuk itiaí timiai “Yajauchitme. ḱWinia “waitnentrurta” túrutkumin tsanḱurachmakjam?”

33 Amesha núnismek ame aṅim tsanḱuratniuitme” timiai.

34 Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.”

<sup>35</sup> Jesus nuna áujmatas amúak tímiayi “Núnisan winia Apar nayaimpiniam pujana nu atumin túrutmattarme atumi yachi nekas enentáijai tsankureachkurminkia.”

## 19

*Jesus nuwá ajapatniun áujmatsamiania nu  
(Márkus 10.1-12; Rúkas 16.18)*

<sup>1</sup> Jesus nuna tinia ikiuak Kariréa nunkanmaya wémiayi. Tura Jurtañ entsa amain Jutía nunkanam jeamiayi.

<sup>2</sup> Untsurí aents nemariarmiayi tura jániancha péñker awajsamiayi.

<sup>3</sup> Nuí Pariséu Jesusan nekapsataj tusar aniasarmiayi “¿Shuar ni nuwen itiurchat akui ajapamniakait?”

<sup>4</sup> Tutai Jesus tímiayi “¿Átumka Yus-Papí áujkachukaitrum? Yámankamtaik Yuska shuáran áishmankan nuwancha najanamiayi tawai.

<sup>5</sup> Tuma asamtai áishman ni aparín ni nukurín ikiuki ni nuwejai tsanin chikichik ayashtinia áinis ajasartatui, tu áarmaiti, tímiayi.

<sup>6</sup> Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti tímiayi.

<sup>7</sup> Takui tiarmiayi “Nuikia ¿urukamtai papí áarar nuwá ajapatniun Muisais tsankatkamia?”

<sup>8</sup> Tutai Jesus tiarmiayi “Timiá ántichu asakrumin nuwá ajapatniun tsankatkamiayi. Túrasha émkaka núnischauyayi.

<sup>9</sup> Wi tájarne, shuar ni nuwen chíkichjai pujuschan ajapeakka tura chikichan nuatkuñka tsanirmayi. Chíkich áishmansha nuwá ajapamun nuátkañka nusha tsanirmayi” tímiayi.

<sup>10</sup> Takui ni unuiniamurí tiarmiayi “Nuikia áishman ni nuwé penké ikiukchamniaitkiuñkia nuátkachminiaiti.”

<sup>11</sup> Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai.

<sup>12</sup> Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjai nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

*Jesus uchin shiir awajsamiania nu  
(Márkus 10.13-16; Rúkas 18.15-17)*

<sup>13</sup> Nuyá Jesusan uchin itiariarmiayi. Nin antin Yúsán áujtusarat tusar wakeriarmiayi. Túruiniakui ni unuiniamurí chicharkarmiayi.

14 Túruiniakui Jesus tímiayi “Uchi Winí winitin tsan̄katkatarum. Suritkiairap. Kame ju uchia áintsan̄ pééjchach áinian nunak Yus akupkamniaiti.”

15 Tinia uchin miniakas nuyá wémiayi.

*Kuítrintin Jesusjaj̄ chichasmiania nu  
(Márkus 10.17-31; Rúkas 18.18-30)*

16 Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

17 Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

18 Tutai shuar “¿Tuna nekas umírkatniuitiaj?” tímiayi.

Takui Jesus tímiayi “Man̄kartuawaip, tsanirmawaip, kasámkáip, chíkich shuar tsanumpruraip,

19 ame apa nukusha umírkatá, ame shuárume ame ayashim aneamna nútiksamek aneeta.”

20 Tutai natsa tímiayi “Núnaka úchichik mash umiki tsakaruitjaj. Nuyasha ¿warí táatrusa?” tímiayi.

21 Takui Jesus tímiayi “Nekas péñker átaj tákumka, weme ame kuítrum kuítrincha ainia nu súsartá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

22 Tura natsa nuna antuk kúntuts wémiayi ti kuítrintin asa.

23 Nuyá Jesus ni unuiniamur̄in tiarmiayi “Nekasan tájarme, kuítrintin Yus akupeamunam pachiinkiatin ti itiurchataiti.

24 Ataksha tájarme, kamiriuka kawái nan̄kaamas uunt asa auja j̄in wayachminiaiti. Núnisan̄ kuítrintin Yus akupeamunam pachiinkiatin ti itiurchataiti.”

25 Ni unuiniamur̄i nuna antukar antúu ajarmiaiyi. Túrawar aniniainiarmiayi “¿Nuikia yaki uwempramniait?”

26 Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

27 Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Warin̄ wáinkiattaj̄i iisha?”

28 Jesus tímiayi “Nekasan tájarme, ukunman̄ka ju nun̄ka yamaram ajastatui. Aents Ajasu asan, Wisha nūi, uunt akupin ajastatjai tura atumsha winia nemartusutirmeka Wij̄jaj̄ métek akupin ajastatrume ashí Israer-shuar akupkatin.

29 Tura shuar ni j̄encha, yach̄incha, umaincha, apar̄incha, nukur̄incha, nuar̄incha, uchir̄incha, tura nun̄kencha Winia anentu asa ikiukin wekaakka, nu shuar nii ikiukmia núnisan̄ yamaisha ti untsur̄i wáinkiattawai tura ukunmasha tuke shiir pujustatui Yusjaj̄.



<sup>30</sup> Untsurí yamáí penkerí áiniana nu ukunam ukunmaani pujusartatui, tura yapajíáwar yamáí ukunmaya áiniana nu ukunam emka pujusartatui' tímiayi Jesus.

## 20

*Jesus takarniun pachis áujmatsamiania nu*

<sup>1</sup> 'Yus akupeamunam pachiinkiatin júnisaiti. Nunka nérentin ni aramurín júuktaj tusa káshik iniartaj tusa jíinkimiayi.

<sup>2</sup> Chikichík tenariu kuit jean tsawant takamtsuk akiktajrume tusa chichas ni aramun júuktinían akupkarmiayi.

<sup>3</sup> Nantu takuntajsha ataksha jíinki shuar yujan wáiniak

<sup>4</sup> timiai "Atumsha winia arakur júuktin yáintkiatarum. Shiir akiktajrume." Tutai wearmai.

<sup>5</sup> Ataksha tutupin aj nuyá áankúsha jíinki, núnisan tinia akupkarmai.

<sup>6</sup> Ataksha nantu patamsaj jíinkimiai. Tura shuaran yujan wáiniak "¿Urukamtai takakmatskesha áani pujarum?" timiai.'

<sup>7</sup> "Warí, iincha iniatmainiatsji" tiarmai.'

"Tuíniakui timiai "Atumsha winia nunkaruj takautarum. Péñker akiktajrume."

<sup>8</sup> 'Kirit ajátekiáí takatrín wáinniun timiai "Takatan takasaru untsukam akikiarta. Kíaraj nankamawaru emka akikiarta. Túram káshik nankamawarujaj amuktá" timiai.

<sup>9</sup> Takui nantu patamsa aj nankamawaru wayawarmatai chikichík tenariu kuit jean ashí akikiarmai.

<sup>10</sup> Mash umintramtai nuyá emka nankamawaru wayawar "nuna nankaamas achikchatjiash" tu enentáimsarmai. Tura chikichík tenariu kuit jean achikiarmai.

<sup>11</sup> Achikiar nérenniun itiurchat enentáimturarmai.

<sup>12</sup> Tura tiarmai "Iikia ashí tsawant nantujaj wáitsachjik. Ju shuarsha nantu patamsa aj nankamawaruka penké ishichík takasaraí. Túrasha iijjaj métek akikiarume" tiarmai.

<sup>13</sup> Tutai nérentin chikichkiniak iniakmas timiai "Umpá, penké kasartsujme. Káshik chikichík tenariu kuit jeá chichasar iijjaj iwiarachjik, timiai.

<sup>14</sup> Pai, ame kuítrum achikiume. Nantu patamsaj takasuncha amijjaj métek akiktinían wakerajaj.

<sup>15</sup> Warí, winia kuítrujaj wi wakeramun túrachminkaitiaj. Antsu wi tsanka asamtaí ¿yajauch enentáimturmek?" timiai.'

<sup>16</sup> 'Núnisaiti Yus-shuarnum. Émkaru áinja nu uku ártatui. Tura ukuyá áiniana nu, emka ártatui. Untsurí ipiaamu áiniawai tura ishichík achikma áiniawai." Tu áujmatsamiayi Jesus.

*Jesus ataksha ni jákatniurín etserkamiania nu  
(Márkus 10.32-34; Rúkas 18.31-34)*

17 Jesus Jerusarénum jintiá wesa ni unuiniamurin akankin tiarmiayi

18 “Iistarum, Jerusarénum wéaji. Nuisha Israer-patri úuntrin tura ni jintinniurincha Winia surutkartatui. Nuisha, wi Aents Ajasu ain, “mantamnati” túrutartatui.

19 Tura apachnium surutkartatui. Nu katsekrukar, awat-tiar krúsnum máawarti tusar túrutawartatui. Túrasha jakayatan menaintiú tsawantaj nantaktiatjai” tímiayi.

*Jakupu tura Juanka nukurí Jesusan seamiayi  
(Márkus 10.35-45)*

20 Nuyá Jakupusha Juansha, mai Sepetéu uchirí, nukuríjjai tariat Jesusan tikishmatrarmiayi. Tura nukurí Jesusan wait-nentrutarat tusa seamiayi.

21 “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nu winia uchir chikichik untsuurnumaani chikichcha menaanmaani akupkarti tusam apujarta.”

22 Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai imi-aitniua áintsan imiantiniaitjai. ¿Nú piniñnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

23 Tuíniakui Jesus tímiayi “Ayu. Winia pinin kruiya umarta-trume. Wi imiantiatjana nujai imiantiatrume. Antsu Wijjai tsaninka pujustinniaka Wikia íschatniuitjai, antsu winia Apar iwiarturu áinia nuna nu apujstatawai” tímiayi.

24 Chíkich tias (10) unuiniamurí nuna antukar nu jímiaran kajerarmiayi.

25 Túmainiakui Jesus untsukar tiarmiayi “Ju nékarme, apach-niumka kapitían ajarar ni shuarin nérenniua áinis ti akupe-nawai. Ni úuntrisha waantu enentáimsar “wítjai akupniun” tu enentáimtikianiawai.

26 Antsu atumjainkia núnis áchatniuiti. Nankaamaku ajastaj tákuñka chikicha yaintri átiniaiti.

27 Ame kapitíantrum ajastaj tákuñka ashí shuara yaintri ajástí.

28 Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

*Jímiar jii kusurun Jesus tsuármiania nu  
(Márkus 10.46-52; Rúkas 18.35-43)*

29 Jirikiú péprunmayá wénakui untsurí aents Nin nemari-armiayi.

<sup>30</sup> Nui jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

<sup>31</sup> Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

<sup>32</sup> Tuíniakui Jesus wajas jii kusurun untsukar aniasarmiayi “¿Warí itiurtukat tusarum wakerutarum?”

<sup>33</sup> “Uuntá, iimtiaí tusar wakeraji” tiarmiayi.

<sup>34</sup> Tuíniakui Jesus nin waitnentrar ni jiiin antiñkiarmiayi. Nu chichamaik íimiar niisha Jesusan nemariarmiayi.

## 21

*Jesus Jerusarénum wayamiania nu*

*(Márkus 11.1-11; Rúkas 19.28-40; Juan 12.12-19)*

<sup>1</sup> Jerusarénum nuntumsar Petpajái péprunam jeawarmiayi. Nusha Uriwiu náinnium ayamchiyayi. Nui jeawar Jesus ni unuiniamurín jímiar an akupeak tímiayi

<sup>2</sup> “Tíjuch péprunam wérum umpuuru umpuuruchijai jinkiamu wáinkiatarme. Nu atiarum itartitarum.

<sup>3</sup> Tura aents “Urukamtai áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

<sup>4</sup> Tura nusha yaunchu Yúsna etserin aarmia nu umínkiatí tusa tímiayi. Júnis áarmiayi:

<sup>5</sup> “Ashí Israer-shuarnum ju etserkatarum:

“Iistarum, atumi Akupniuri, péejchach ajas umpuuruchiniam ekeemak winitramprume. Péejchach asa káarak áintstai umpuuru uchirín ekeemak winitrámtatrum,” titiarum.” Tu áarmaiti.

<sup>6</sup> Tutai nu jímiar unuiniamurí wear Jesus timia núnisan túrawarmiayi.

<sup>7</sup> Umpuuruchin nukurtiuk itiararmiayi. Tura ni pushirín áitkiaram Jesus entsamkamiayi.

<sup>8</sup> Shuar untsurí ásar ni wéamunam pushirín áitkiarmiayi. Chikichcha nuká jurukar ni wéamunam áeprurarmiayi.

<sup>9</sup> Shuar untsurí eem wearmia nusha tura uku winiarmia nusha kakantar untsumiarmiayi. “Juna weatrí uunt akupin Tawit asamtai nankaamakuiti. Yusa náariin winiana ju ii Uuntrinti. Shiir atí. Nayaimpinmasha Yus shiir awajsatai.” Tu untsumiarmiayi.

<sup>10</sup> Jesus Jerusarénum wayamntai ashí shuar ti enentáimainiak “¿Jusha yait?” tiarmiayi.

<sup>11</sup> Chikichcha “Yúsna etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

*Yusa Uunt Jeen suruktinian Jesus surimkiamiania nu  
(Márkus 11.15-19; Rúkas 19.45-48; Juan 2.13-22)*

12 Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutan<sub>kr</sub>incha núnisan ayanturmiayi.

13 Nuyá tímiayi “Yus-Papinium áarchamukait,  
“Yusa Jeenka Yus aujtai jé<sub>ai</sub>ti.” Antsu átumka kasa matsam-  
tajaya nútikiarme” tímiayi.

14 Nu<sub>i</sub> Yusa Jeen j<sub>ii</sub> kusurarusha shutuapsha Jesusan tari-  
armiayi. Túramtai tsuárarmiayi.

15 Tura Israer-shuar pátrisha tura Israer-shuara jintinni-  
urisha aents tujintiamun Jesus túrakui íisar kajerkarmiayi.  
Nu arantcha uchi Yusa Jeen “Juna we<sub>at</sub>ri uunt akupin  
Tawit asamtai nan<sub>ka</sub>amakuiti” unsumainiakui Jesusan ti  
kajerkarmiayi.

16 Tura tiarmiayi “¿J<sub>u</sub> uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana  
juka áuj<sub>s</sub>achukaitrum. J<sub>u</sub>n<sub>i</sub>s tawai,

“Uchisha kuír<sub>ch</sub>isha Yusa náar<sub>in</sub> imiá shiir awajtusarat tusa  
Yus tsan<sub>ka</sub>tkaiti.” Tu áarmaiti.

17 Nuna tinia ikiuiniak Jerusaré<sub>n</sub>numi<sub>a</sub> jiinki Petania  
péprunam we nu<sub>i</sub> kanarmiayi.

*Jesus iikiu numin yum<sub>in</sub>kramiayi  
(Márkus 11.12-14, 20-26)*

18 Kashin tsawa<sub>ar</sub> Jerusaré<sub>n</sub>num waketas Jesus tsukaarmi-  
ayi.

19 Iikiu numi jintiá yantam wajan wáiniak akaktajtsa wer-  
imiayi. Tura werí aya núminiak wáinkiamiayi. Túra nu-  
min tímiayi “Atakka nere<sub>ch</sub>attame.” Takui nu chichamaik  
káarmiayi.

20 Nuna wáiniak ni unuiniamur<sub>i</sub> ti enentáimprar aniasarmi-  
ayi “¿Urukaku imiá wárik jaka?”

21 Tuíniakui Jesus tiarmiayi “Nekasan tájarme, Yus nekas  
enentáimtakrumka, “nekaspash túrat” táchakrum iikiun túrajna  
nusha túramniaitrum. Tura nu arantcha nu naint “Ékemtam  
nayaantsanam inia<sub>nta</sub>” tutai túrunattawai.

22 Ashí Yus áujeakum seamna nu, Yus nekas enentáimtakum  
seakme<sub>ka</sub>, wáinkiáttame” tímiayi.

*Yusa kakarmar<sub>iji</sub>ai Jesus takasmiania nu  
(Márkus 11.27-33; Rúkas 20.1-8)*

23 Yusa Uunt Jeen Jesus wayá unuiniamiayi. Turaj Israer-patri uuntri tura Israer-shuara úuntri<sub>sha</sub> Jesusan tariar aniasarmiayi “¿Yana chichamejaj<sub>i</sub> ju túram. Ya ju túratniuncha akuptamkait?” tiarmiayi.

24 Tutai Jesus tiarmiayi “Wisha ania<sub>staj</sub> tusan wakera<sub>j</sub>rume. Ju áirkakrumni<sub>nkia</sub> Wis<sub>ha</sub> yana chichamejaj<sub>i</sub> túraj nuna ujaktatjarme.

25 Wats, ¿ya imiakratin Juan<sub>kan</sub> akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurni<sub>nkia</sub> “¿urukamtai enentáim<sub>tichuitrum</sub>?” túramtatji.

26 Kame “shuar akupkaiti” tákurnisha ashí aents manta<sub>mattaji</sub>. Warí, ashí niisha Juan <sub>Yús</sub>nan etserniuyi tuíniatsuk” tiarmiayi.

27 Nuyá Jesusan “Nékatsji” tiarmiayi.

Tutai Jesussha a<sub>i</sub>niak “Wátsek, Wis<sub>ha</sub> núnisnak akuptukua nuna ujakchattajrume” tímiayi.

*Jimiará uchi tiarmia nuna áujmatsamiania nu*

28 Jesus unuiniak tiarmiayi “Enentáim<sub>pratarum</sub>. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

29 ‘Tutai uchi “Atsá, nakitiajai” timiai. Tayat urum enentáimiar takaumai.’

30 ‘Nuyá aparí chikichnasha werí núnisa<sub>n</sub> timiai.’

‘Tutai uchi “Apawa, páchitsuk wetajai” timiai, túrasha wé<sub>ch</sub>amai.’

31 ‘¿Túa ni aparí wakeramun umirkama?” tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiintsrumni<sub>n</sub> nii emka Yus akupeamunam pachiinkiertatui.

32 Iis, imiakratin Juan <sub>pén</sub>ker wekasatniun etserkamiayi, túrasha antukchamar<sub>me</sub>. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaari<sub>j</sub> enentáim<sub>turchamar</sub>me’ tímiayi.

*Yajauch takaun áujmatsamiania nu*

*(Márkus 12.1-12; Rúkas 20.9-19)*

33 ‘Ju chíkich áujmatmasha antuktarum. Nun<sub>ká</sub> nérentin uwa ajan ajammai. Tura wenuimiai. Uwa neketaincha najanamai. Kumpin je<sub>an</sub>cha najanamai. Tura mash pén<sub>ker</sub> iwiar shuar wáitrukarti tusa apujkimiai. Tura ni<sub>nkia</sub> yajá nun<sub>kan</sub>am wemai.

34 Tura júuktin tsawant jeamtai juuk nakak akúptúrkarti tusa chíkich takarniur<sub>i</sub> akupkamai.

35 Tura nuḡ pujuinia nu, akupkamun achikiar chikichnaka katsumkar, chikichnasha máawar, chikichnasha kayajai tukurar máawarmai.

36 Túrawarmatai nérentin takarniun nuna nan̄kaamas akupramai. Ataksha nuḡ pujuarmia nu núnisaḡ túrawarmai.

37 Amúamunam ni uchirín akupeak “Winia uchir asamtai umirkachartimpiash” timiai.

38 Túrasha nu takau nérenniu uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai.

39 Tiar achikiar arant júkiar nuḡ máawarmai.”

40 Tinia Jesus aniasarmiayi “Nun̄ká nérenniurḡ taa nu takaun ḡitiurkatiḡ?” tímiayi.

41 Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chíkich takaun neren akanak nin susamnia nuna apujsattawai” tiarmiayi.

42 Tuíniakui Jesus tímiayi “Átumka Yus-Papikia ḡpeḡkek áujchaitrum? Júnis áarmaiti:

“Jeḡ jeamin utsan̄karmia nú kaya ashí kayajai nan̄kaamas apujsamuiti. Núnaka ii Uuntrḡ Yus túrait. Iisha ísar ti enentáimtaji.” Tu áarmaiti.

43 Tuma asamtai tájarme, Yusna írunna nu wáinkiatárum tusa suramsamuitiat atumíyaḡ junas chíkich aents súnastatui. Niisha awan̄tukiartatui.

44 Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

45 Israer-patri uuntrḡsha Pariséusha Jesus áujmatman antukar “in túramji” tusar achiktaj tiarmiayi.

46 Tura ashí aents “Jesus Yúsnan étserui” tuinia ásarmatai nin ashamkarmiayi.

## 22

*Métek-taku chichamjai nuatnaiyamun Jesus áujmatsamiania nu*

1 Jesus ataksha áujmatuk juna tímiayi:

2 “Yus akupeamunam pachiinkiartin júnis enentáimpramniaiti. Uunt akupin ni uchirí nuáteakui nampermamai.

3 Túrak ni takarniurḡ ipiaamautarum tusa akupkarmai. Tura ipiaamusha nakitrarmai.

4 Ataksha chíkich takarniuncha ipiaamakrum ju titiarum tusa akupkarmai. “Mash yurumkan iwiarajai, tawai, titiarum, timiai. “Waakasha máatarum tusan akupkarjai,

tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai.

<sup>5</sup> Támaitiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai.

<sup>6</sup> Chikichcha ipiaakratniun achikiar yajauch awajsarmai, tura chikichnaka máawarmai.

<sup>7</sup> Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai.

<sup>8</sup> Nuyá ataksha ni takarniurin akupkamai. “Nuatnaikiatin jisat mash iwiaramuiti, timiai. Tura nu ipiaamu winichmin armai.

<sup>9</sup> Tuma asamtai pepru jintí werum ashí shuar nánkamas wáintrum nu ipiaatarum” timiai.

<sup>10</sup> Takui takarniuri jinkiar pepru jintin wajainian, yajauch shuarnasha péñker shuarnasha, ashí ipiaawarmai. Túramtai jea piákmai.’

<sup>11</sup> Nuyá uunt akupin ipiaamun íisartaj tusa wayamai. Nuí shuaran péñker iwiarmamprachun wáinkiamai.

<sup>12</sup> Tura timiai “Umpá, ¿urukamtai nuatnaiyamunam entsatai pushí entsatsuk wayam?” Tutai nu áishman tákamtak pujusmi-ayi.

<sup>13</sup> Nuyá uunt akupin yurumka ajaaman timiai “Achikrum nawenmasha uwejnusha jinjiarum aa júkrum kiritniunam ajapatarum. Nuísha ti úutin ti wáitsatin átatui” timiai.

<sup>14</sup> Kame untsurí ipiaamu áiniawai antsu ishichik achikma áiniawai.”

*Uunt akupin Sésar akiktinia nu*

*(Márkus 12.13-17; Rúkas 20.20-26)*

<sup>15</sup> Nuyá Pariséu chichaman najatawar uyumtikiatai tusar tiarmiayi.

<sup>16</sup> Túrawar ni shuarincha tura akupin Erutisa nemarniurisha Jesusan akuptukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chikich shuar tuinia nu ántutsuk nekasam Yus-Chicham jintíame. Shuar shiir enentáimturarar tusam jintíatsme, tiarmiayi.

<sup>17</sup> Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

<sup>18</sup> Jesus ni yajauch enentáijjai aníam nekáa tiarmiayi “Aya shiir chichamtiniaitrome. ¿Urukamtai uyumatkiarkatin wakerutarum? timiai.

<sup>19</sup> Wats, Sésar akiktinia nú kuit itititiarum.” Takui chikichik kuítian itiararmiayi.

20 Nuna iis Jesus aniasarmiayi “¿Jui yana yapimpiait tura yana naari áarmait?”

21 Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi.

22 Tura nuna antukar ti enentáimprarmiayi. Tura ikiuiniak wearmiayi.

*Jesusan jakamunmaya nantaktinian aniasarmiania nu (Márkus 12.18-27; Rúkas 20.27-40)*

23 Nu tsawantajk Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi.

24 “Uuntá, Muisais juna áartampramiayi, “áishman uchin yajutmatsuk jakamtainkia ni yachi nu nuwan nuatak ni yachin yajútmátrati,” tu áarmiayi, tiarmiayi.

25 Ayu, íi shuarnum siati (7) yáchintin áarmiayi. Iwiairi nuatak uchin yajutmatsuk jakamiayi. Tura wajen ni yachin ikiurkimiayi.

26 Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi.

27 Nuyá nuwasha jakamiayi.

28 Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

29 Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne.

30 Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui.

31 Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujkachukaitrum. Júnisan áarmiayi:

32 “Wiitjai Apráama Yúsrinjai, Isaka Yúsrinjai, Jakupu Yúsrinjai.” Tu áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin áiniawai” tímiayi.

33 Ashí aents nuna antukar nu jintintiam ti enentáimprarmiayi.

*Yus akupkamu imiá enentáimtustinia nu (Márkus 12.28-34)*

34 Satuséu Jesusan aiktinian tujinkarmatai Pariséu nuna antukar iruntrarmiayi.



35 Tura chikichik Pariséu jintintin asa Jesusan uyumtikiataj tusa aniasmiayi

36 “Uuntá, ζtúa Yus akupkamu imiá nankaamas enentáimtustiniait?”

37 Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijiaisha tura tuke enentáimtusam aneeta.” Tu áarmaiti, tímiayi.

38 Núiti emka ashí akupkamu nankaamas enentáimtustinia nu.

39 Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.”

40 Nu jímiar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

*Kristu Tawit weeaitiat Yusa Uchirínti  
(Márkus 12.35-37; Rúkas 20.41-44)*

41 Tura Pariséu tuke irunar pujuiniakui

42 Jesussha aniasarmiayi “Kristu tutai ζya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

43 Tuíniakui Jesus tiarmiayi “Nuikia ζurukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

44 “Uunt Yus winia Úuntrun juna tímiayi: “Akupin pujutainium, winia untsuuruinj, pujusam nákarsata. Ashí ame nemasrumin nupetkan Ámin umirtamkarti tusan amatjai” tímiayi Yús.” Tu tímiayi Tawit.

45 Watsek, Tawit Krístun “winia Úuntur” tajsha ζitiurak ni pampanmarí áti?” tímiayi Jesus.

46 Nuna takui penkesha áikcharmiayi. Túrawar atakka uyumantikiatai tusar aniascharmiayi Jesusan.

## 23

*Jesus Pariséuncha Israer-shuara jintiniurinha  
“yajauchitrumé” timiania nu*

*(Márkus 12.38-40; Rúkas 11.37-54; 20.45-47)*

1 Jesus ni unuiniamurinha tura ashí shuárnasha tiarmiayi

2 “Israer-shuara jintinniurisha tura Pariséusha Muisais akupkamun paant ujatmainiawai.

3 Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiayat nusháa túrin áiniawai.

4 Ti itiurchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejéjajisha ishichkisha takuitniun nakitiainiawai.

<sup>5</sup> Aya shuar írsarti tusar ashí túruiniawai. Ashí shuar péñker enentáimturarti tusar Yus-Papin nijaiñcha tura kunturíncha ti wañkaram awajsar anujak yujainiawai. Tura nu arantcha pushirí sasariarman ashí shuarjají nañkaamas esaram awajas wekainiawai.

<sup>6</sup> Nampernumsha péñker iwiaramunam pujustinian wakeruiniawai. Iruntainmasha nañkaamantu ajasa pujustinian wakeruiniawai.

<sup>7</sup> Jintiá wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

<sup>8</sup> ‘Túrasha átumka ashí shuar “Jintínkiartiniá” turutiarti tusa enentáimsashtiniaitume. Átumka nuámtak yáchintrume. Átumka chikichik jintinkiertin ni naarí Kristu takakrume. Nu asamtai “Jintínkiartiniá” túramcharmin áiniawai.

<sup>9</sup> Ju nunñkanmasha shuar “Aparú” tiirap. Chikichik nayaimpiniam pujana nu atumí Aparínti.

<sup>10</sup> Atumi uuntrí aya Krístuk asamtai “Uuntrú” túramcharmin áiniawai.

<sup>11</sup> Antsu átum írutkamunmayá uunta nuka peejchach átiniaiti.

<sup>12</sup> Shuar nañkaamantu ajastaj tákuinñkia Yus nin péejchach awajsattawai. Antsu péejchach ana nuna Yus nin nañkaamaku awajsattawai’ tímiayi.

<sup>13</sup> ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitume. Yus akupeamunam wayátin waiti epenniuitume. Atumsha wayátsuk chikichcha wayátaj tuinia nusha suritniuitume.’

<sup>14</sup> ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitume. Wajé jee atankiirum aents enentáimturarajín tusarum ti esaram Yus áujtiniatume. Túrin asarum átum ti asutniátniuitume.’

<sup>15</sup> ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitume. Nunñkanmasha nayaantsanmasha yajá wekainiuitume chikichik shuar winí nemartusat tusarum. Tura atumi nemarí ajasmatai atumjají nañkaamas tunáa sumamamnia awajearme.’

<sup>16</sup> ‘Wáinkiatárum átumka. Jintinkiertiniaiatrum nékachu asarum kusurua ániuuitume. Ju jintíarme: “Shuar nekasan tajai tusa Yusa Jeeñ páchiakka nii tana nuna umitsuk ikiukminiaiti. Antsu nekasan tajai tusa Yusa Jeeñ kuri ana nuna páchiakka ti nekas umiktiniaiti” tniuitume.

<sup>17</sup> Nétsetrume. Yúsjaññkia ashí kuri ántrachukait. Antsu Yusa Jeeñ írunna nuka aya nuññ ikiusma asa Yusna ajasuiti. Tuma asamtai kurijají nañkaamas Yusa Jeeñ enentáimtustiniaiti. Enentáimcha asarum kusurua áinin wáakuuitume.

18 Nu arantcha tñiuitrume: “Shuar nekasan tajai tusa naman-maar-Yus-sútain páchiakka nii tana nuna umitsuk ikiuk-miniaiti. Antsu Yús-sutainiam naman patasman páchiakka ti nekas umiktiniaiti” tñiuitrume.

19 Nétsetrume. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrume.

20 Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaincha tura nu patasmancha mái-metek páchiawai.

21 Núnisañ shuar Yusa Jēen páchiakka aya nunak páchiatsui antsu Yus nu jēenam pujú asantai nunasha páchiawai.

22 Núnisañ shuar nayaimpin páchiakka Yus pujutainch-setrume. Penké naman Yusjai ánrachukait. Aya Yúa tura Yus nu pujana nunasha páchiawai.’

23 ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrum. Kumintsu nukēsha, anisa nukēsha, menta nukēsha tias (10) akantram chikichik akankamu Yus súwitrum. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrum. Yus nekas enentáimtustincha, waitnentáimturтинcha tura tuke péñker túratniusha enentáimtsuk ikiuwitrum.

24 Átumka jintinkiartiniaiatrum nékachu asarum kusuru áiniuitrum. Kutanam yajasmach enketu wáinkiumeka júwitrum. Túrayatrum kamiriu wáinkiumeka kawai nankaamas úunt aiñ takamtsuk kújawitrum.’

25 ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrum. Átumka tsapasha piniñsha initiaaniñ nijiatzuk aya pátatek nijawitrum. Núnisrum pátatek shiir awajmamniuitrum tura enentáiminkia kasamkatniusha tura chíkichna wakerukтинcha nujai piákuitrume.

26 Kusuru áiniuitrum, Pariséutirmeá. Antsu emka initiaaniñ tsapasha piniñsha nijaktarum. Túrakrumniñkia pátatkesha mai péñker átatui. Núnisrum atumsha atumi enentáin ana nu shiir awajsarum pátatkesha shiir átatrum.’

27 ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrum. Iwiarsamu pújujai yakarar shiir awajsamua áiniuitrum. Aaniñ shiir ániawai. Tura initkia jaká ukunchijjai piákuiti.

28 Núnisaitrum atumsha. Chíkich shuar ísmaka ti shiira áiniuitrum. Túrasha atumi enentáinkia ashí mujmiiai piákuiti.’

29 ‘Maa wáinkiatarum jintinniutirmesha, Pariséutirmesha. Ántrarum shiir chichamtiniaitrum. Yaunchu Yúsna etserin iwiarsamunam átumka shiir enentáimtakrum jēa

jeamkairume. Tura péñker shuar yaunchu jákarusha shiir enentáimurtaj tusarum ni iwiarsamu shiir awajearme.

<sup>30</sup> Túrakrum ju tñiuitrume: “Iikia yaunchu ii weatrijiai pu-jaitkiurkia Yúsnan etserin máatin yáimkiachaji.”

<sup>31</sup> Nujai ti paant chicharme atumsha. “Ti weatri Yúsnan etserniun máawar tunáa túrin ármiayi” tárume. Tura “Yáimkiachaji” táyatrum, atumsha métek túrin asarum “Niijiai méteketji” tárume.

<sup>32</sup> Wats, atumi weatri nan kamawarmia nu átum amukta-trume’ tímiayi Jesus.

<sup>33</sup> ‘Napia áiniuitrume. Shuar aya yajauch awajniuitrume. Túmatirmesha Yus tunáa shuaran jinium akupkartatna nuya çitiurak uwempratarum?

<sup>34</sup> Untsurí shuaran akuptuktatjarme. Yúsnan etserniun-cha, ti nekancha, jintinkiertinniasa akuptuktatjarme. Tura atumsha chíchich máattarme, chíchichcha krúsnum ajintruarum máattarme, chíchichcha iruntai jeanam asutiáttarme, tura chíchichcha ashí nunkanam áintrattarme.

<sup>35</sup> Nu tura asarum péñker shuara numpé puarma nujai átum sumamattarme. Yámankamtaik Apir ti penker shuáraitiat máamuyayi. Tura ukunam Perekiása uchirí Sakarías atumi uuntri Yusa Jee ámanum naman-maar-Yús-sutai ajapén aténkamunam máawarmiayi. Wats, Apir máamunmaya Sakarías máamunam ashí péñker shuar ti untsurí máamujai sumamattarme.

<sup>36</sup> Nekasan tájarme, yamáí pujuinia nú shuar ashí nujai sumamawartatui’ tímiayi Jesus.

*Jerusarénnumia shuaran Jesus aneak úutmiania nu  
(Rúkas 13.34-35)*

<sup>37</sup> ‘Jerusarénnumiatirmeá, Yúsnan etserin máiniaitrume. Yus akatar akupturmakmasha kayajai tukuram máiniaitrume. Túrin árumniñ waitnentajrume. Atash ni uchirin weana áitkiasnak weartinian wakerimjarme, tura nakitramarme.

<sup>38</sup> Iistarum. Ame pépruram ajapamuiti.

<sup>39</sup> Tura “Yusa náariñ winiana nu, shiir atí” títiatrumna nu tsawant jeatsain penké wáitkiashtatrume. Nuna tájarme” tímiayi Jesus.

## 24

*Yusa Uunt Jee saanaktinian Jesus ujakmiania nu  
(Márkus 13.1-2; Rúkas 21.5-6)*

<sup>1</sup> Jesus Yusa Uunt Jeeñia jñinki weai ni unuiniamurí nin tariar jean iniaktusar áujmatsarmiayi.

<sup>2</sup> Tura Jesus tiarmiayi “Nu mash yamáí wáintrume. Tura nekasan tájarme ukunman̄ka mash saanaktiatui. Chikichík kayaksha ekentramurí atsuttawai” tímiayi.

*Amúamu tsawant nekaatin*  
(Márkus 13.3-23; Rúkas 21.7-24; 12.22-24)

<sup>3</sup> Nuyá Uriwiu náinnium wear nin̄ki nuí pujusar ni unuini-amurí Jesusan aniasarmiayi “¿Nusha urutaik túrunatí. Tura ame tátincha tura nuñka amuukatin tsawant jeakuisha war-ijjain̄ nekaattají? Nu ujatkata” tiarmiayi.

<sup>4</sup> Tuíniakui Jesus tímiayi “Aneartarum, anan̄kramawairap.

<sup>5</sup> Untsurí shuar winia náarun pachisar “wi Krístuitjai” tiar untsurí shuaran anan̄kawartatui.

<sup>6</sup> Ti untsurí meset chicham antuktatrome túrasha sapijmi-akairap. Núnisan̄ átiniaiti nuñka amúatsain̄.

<sup>7</sup> Apachcha chíkich nuñkanmaya apachjai máaniawartatui. Tura ti tsukasha átatui. Sun̄kursha ti pampartatui. Uúsha ti uurkartatui. Nuka untsurí nuñkanam ashí túrunawartatui.

<sup>8</sup> Nujai ti wáitsatin aya yama nan̄kamui’ tímiayi.

<sup>9</sup> ‘Nuyá atumniasha yajauch awajsarti tusa surutmakar-tatui. Tura mantamawartatui. Tura winia naar pachia asakrumin ashí shuar muíjramkartatui.

<sup>10</sup> Nu tsawantaj untsurí shuar Yúsan iniaisartatui. Túrawar nuamtak muíjniainiak surunairartatui.

<sup>11</sup> Untsurí shuar wáitruiniak “wi Yúsnan etserniuitjai” tiarta-tui. Túrawar untsurí shuaran nusháa enentáimtikrartatui.

<sup>12</sup> Tura tunáa ti ákui nuamtak anenaichartatui.

<sup>13</sup> Tura shuar ashí nuna tuke katsuntra nu uwemprattawai.

<sup>14</sup> Ashí aents nekaawarat tusa Yus-Chicham ashí nuñkanam etsernaktatui. Túramtai amuukatin tsawant jeattawai” tímiayi.

<sup>15</sup> Shuar juna áujea nu enentáimprati. Kame Jesus tímiayi “Yúsnan etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai

<sup>16</sup> ashí shuar Jutía nuñkanam írunka nu, muranam pis-ararti.

<sup>17-18</sup> Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchatí. Antsu nuyañ wárik pisarti.

<sup>19</sup> Nu tsawantaj nuwá ajamtincha tura kuírchin takaku ainia nusha ti wáitsartatui.

<sup>20</sup> Ayampratin tsawantaisha tura michá nántutincha nu pis-artin tsawant áchatí tusarum Yus seatarum.

<sup>21</sup> Maa, nu tsawantaj ti wáitsatin átatui. Ti yáunchusha núnisan̄ wáitsatin atsuuyayi. Ukunmasha atsuttawai.

22 Nu wáitsatin ti esarmaitkiuin<sub>ñ</sub>kia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai' tímiayi.

23 "Tura atumin "Júiti Kristu," tuíniakuisha tura "Nu<sub>ñ</sub> pujawai" tuíniakuisha anturkairap.

24 Untsur<sub>ñ</sub> shuar Krístuitjai tusar wantinkiertatui. Untsur<sub>ñ</sub>isha "Yúsnan etserniuitjai" tiartatui. Tura shuáran anan<sub>ñ</sub>kataj tusar aents tujintiamun iniakmasartatui. Tura ti kakarman túruiniak Yús-shuarnasha anan<sub>ñ</sub>kamin áiniakuin<sub>ñ</sub>kia anan<sub>ñ</sub>kawarainti.

25 Túrunatsa<sub>ñ</sub> nuna emka ujaajrume.

26 Tuma asamtai "Iis, Kristu nu<sub>ñ</sub> aents atsamunam pujawai" túramainiakuisha nu<sub>ñ</sub> wéerap. "Ju<sub>ñ</sub> ú<sub>ñ</sub>mak pujawai" tuíniakuisha anturkairap.

27 Núnisa<sub>ñ</sub> ú<sub>ñ</sub>umkan táchattajai. Peem péetuk ti wárik ashí nun<sub>ñ</sub>kanam wáinkiachminkiait. Núnisnak wi Aents Ajasuka winiakun paant wantinkiertajai.

28 Wats, jaka tepaana nu<sub>ñ</sub> chuan<sub>ñ</sub> káutkachartatuak' tímiayi.

### *Kristu tátintri*

(Márkus 13.24-37; Rúkas 21.25-33; 17.26-30, 34-36)

29 "Ti wáitsatin nan<sub>ñ</sub>kaasmatai ti wárik tsawái nantu kaji<sub>ñ</sub>kiattawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui.

30 Nu<sub>ñ</sub>kia Wi Aents Ajasuka, tátiniur paant átatui. Tura ashí nun<sub>ñ</sub>kanmayá aents Wi winiái wáitkiar asuttiamattaji tusar útiartatui. Wisha ti kakaram tura Yusa wincharijjai yura<sub>ñ</sub>miniam winiái wáitkiartatui.

31 Yusa suntar<sub>ñ</sub>in kachu kakaram umpuarterum tinia akupkamtai nu suntar ashí nun<sub>ñ</sub>kanmayá ashí Yús-shuaran, Yus achikma ásarmatai, irurartatui' tímiayi.

32 Iikiu numir<sub>ñ</sub> nakumea nu nekaatarum. Ni nuken eteakui "esat nantu jeatemayi" tátsurmek.

33 Núnisa<sub>ñ</sub> ashí ju<sub>ñ</sub> wáinkiumeka "amuukatin tsawant nekas jeatemayi" títiniaitrume.

34 Nekasan tájar<sub>ñ</sub>me, yamá aents pujuinia nu amúatsa<sub>ñ</sub> ashí túrunattawai.

35 Nun<sub>ñ</sub>kasha nayaimpisha amuukartatui antsu winia chichamur amuukashtatui' tímiayi.

36 "Tura nu túrunatin tsawant nekanachminiaiti. Yusa suntar<sub>ñ</sub>isha nékainiatsui. Wisha Yusa Uchir<sub>ñ</sub>intiatnak nékatsjai. Antsu aya winia Aparuk nékawai' tímiayi.

37 "Wi tátiniur jeamtai yaunchu Nuai pujumia nú tsawantin túrunamia núnisa<sub>ñ</sub> átatui.

38 Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuatnainiarmiayi. Ni nawantrincha nuatmamtikiarmiayi. Tura tumá pujuiniaj Nuai uunt kanunam enkemamtai

39 nu aents tuke nékainiatsain ama amaarak mash amuukarmiayi. Núnisan átatuí Wi tátin jeamtai.

40 Nu tswantaik jimiara shuar ajanam pujuttawai. Chikichik junaktiatuí tura chikichkia ikiunkittiwai.

41 Núnisan jimiara nuwa shana nekeak pujuttawai. Chikichik junaktiatuí chikichcha ikiunkittiwai' tímiayi.

42 'Nu asamtai atumsha iwiarnarum pujustarum. Nekaachminiaiti uruk áintsuk taritjarum.

43-44 Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujustarum.'

*Pénker takamtikniuncha yajauch takamtikniuncha Jesus áujmatsamiania nu*

*(Rúkas 12.41-48)*

45 'Shuar pénger uminian tura pénger enentáimniun áujmatsattajai. Nuna uuntri yaja irauweak "Yurumátin jeamtai winia takartin ayuratarum" tíchanpiash.

46 Nu takamtikniuncha ni uuntri taa takatrin tímiatrusan túran tariñkia shiir enentáimtusainti.

47 Nekasan tájame, umin asamtai ni uuntri ashí ni waririn wáitrukát tusa takatan susattawai.

48-49 Antsu úuntur wau táchattawai tusa takamtikin ni uuntri yáintrin yajauch awajeak tura takatsuk aya yurumátiniun tura nampektinian wararkunka nu takamtikin yajauchiiti.

50 Turaj ni uuntri aya aneachma taa nu takamtikniun, yajauch asamtai,

51 ti kakaram asutiattawai. Yajauch shuar pujuinia nuí akupkattawai. Nuísha ti wáitak ti úuttiatuí' tímiayi Jesus.

## 25

*Jesus tias (10) nuwan áujmatsamiania nu*

1 'Yus akupeamunam pachiinkiatin júnis átatuí. Nuatnaikiatin jisat akui tias nuwa natsa kantiran akaawar nuátkattana nu áishmankan inkiun jeá itiatái tusar wearmai.

2 Senku nuwa enentáimcha armai. Tura chikich senku nuwa enentáimniun armai.

3 Enentáimcha arma nú nuwa aya akaamunak juíniak amuukamtai yaraatniun asutin júkicharmai.

4 Antsu chikich senku núwaka akaamuncha juíniak tura ataksha amuukamtai yaraatniun asutin júkiarmai.

5 Tura jíinkíarmatai nuatkatin áishmaṅ wari taachkui kari pujakui kanararmai.

6 Nuyá kashi ajapén shuar untsukum “Pai nuatkatin winiawai. Werirum inkiuntarum” timiai.

7 Tu untsumun antukar nantakiar kantiran akaatai tusar pujursarmai.

8 Nuyá seṅku nuwá enentáimcha arma nu, chíkich nuwá enentáimniun tiarmai “Incha atumi asuitirí ishichik ajamprusaitia. Ii kantirísha kajiniawai.”

9 “Tutai chíkich seṅku nuwá tiarmai “Atsá, warí íncha jeartamchattaji. Tura atumnia peṅké jeashtatui. Nekaska surutainium werum sumaka utumtarum” tiarmai.’

10 “Tura nuyá seṅku nuwá enentáimcha arma nu, asuitian sumak utitiai tusar wéaraj ukunam nuatkatin áishmaṅ tamai. Túramtai enentáimin nuwá arma nuka nuatnaikiatin námpernam nuatkatniujaj wayawarmai. Túramtai wáitin epeniarmai.

11 Tura epeniaraj enentáimcha nu táarmai. Tura tiarmai “Úuntá, waiti uratritia.”

12 “Tu untsumainiakui nu uunt kajerak chichak “Cha, zyátsukaitrum? Peṅké nékatsjarne” tiarmai.”

13 Jesus nuna áujmatas umik tímiayi “Aents Ajasuitjai tura tátin tsawantrusha tura uruk aiṅ tátaj nusha nékatsrume. Tuma asarum tuke iwiarnarum pujustarum’ tímiayi.

### *Kuit susamun áujmatsamiania nu*

14 ‘Núnisan Wi tátin júnisaiti. Shuar chíkich nuṅkanam wéak<sub>u</sub> ni takarniurṅ untsukar ni kuítrṅ akanak súsarmai.

15 Chikichkiniak seṅku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujaj métek súsarmai. Tura ikiuak yajá wemai.

16 Takarṅ seṅku mir kuítian achikmia nujaj takakmas ataksha seṅku mir kuítian patakmai.

17 Chikichcha núnisan jimiará míran achikmia nujaj takakmas ataksha jimiará míran patakmai.

18 Tura chíkich shuar ni uuntrí kuítrṅ chikichik míran achikmia nuna wáṅ taur úukmai.’

19 ‘Nuyá ukunam nu shuara uuntrí támai. Tura kuítian súkiarma nujaj itiurkarmakit tusa untsukarmai.

20 Emka seṅku mir kuítian achikmia nu tamai. Nuyá ni úuntrṅ chíkich seṅku mir patakman suak timiai “Uuntá, seṅku mir kuit surusmame. Pai, atak seṅku míran patasmajai.”

21 “Takui ni uuntrí timiai “Ti péṅker takakmauwitme. Nekas uminiaitme. Ishichkijiaisha ti péṅker takakma asakmin



ti núkap yamaikia amastatjai. Winí wayam wíjiaí ti shiir warasta” timiai.’

<sup>22</sup> ‘Nuyá chíkich shuar jimiara míran achikmia nu tarí timiai “Uuntá, jimiara mir surusmame. Pai, ataksha jimiara míran patasmajai.”

<sup>23</sup> ‘Takui ni uuntri timiai “Ti penker takakmauwitme. Nekas uminiaitme. Ishichkijiaísha ti penker takakma asakmin ti núkap yamaikia amastatjai. Winí wayam wíjiaí ti shiir warasta” timiai.’

<sup>24</sup> ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin

<sup>25</sup> sapijmiakun ame kuítrumniaka nunká táutran úukmajai. Pai, juíiti ame surukmiam nu” timiai.’

<sup>26</sup> ‘Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtuktarum tíniuitme túrutsumek.

<sup>27</sup> Tu enentáimkiumka zurukamtaí kuit-iruntainiam ikiur-tuschamam? Nuikia wi táakun patasan achikiáajai” timiai.

<sup>28</sup> Nuna tinia nuí wajainian tiarmai “Ju shuar chikichik mir kuit atankirum tias mir kuítian takaka nu susatarum.

<sup>29</sup> Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuiat jurunkittiawai.

<sup>30</sup> Ju umichu shuarsha aa kiritniunam ajapatarum. Nuí ti wáitiak ti úuttiatui” timiai”. Tu áujmatsamiayi Jesus.

### *Akantratin átatna nu*

<sup>31</sup> Jesus áujmatuk tímiayi ‘Aents Ajasuitjiana nu ashí akupin aasan Yusa suntari énekma winittiajai. Tura Uunt Akupin asan shiir pujutairui pujustatjai.

<sup>32</sup> Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai.

<sup>33</sup> Tura kachurtichunka, penkera nuna, untsuuruini awajsartatjai. Tura kachurtinniaka, yajauchia nuna, menaaruiñi awajsartatjai.

<sup>34</sup> Túran nekas Uunt Akupin asan untsuuruini wajainian títiatjai “Atumniaka winia Apar shiir awajtamsaitrume. Wi akupeajna nuí winitiarum. Yus nunkan najanamia tímianaik átum nuí warastinian tsankatramkamiarme.

<sup>35</sup> Kame Wi tsukamá wekai ayurtuamiarme. Kitiama wekaiísha umartin surusmiarme. Wait ajá wekaiísha itiaarum ajamprusmiarme.

<sup>36</sup> Pushir atsaísha átumka surusmiarme. Jaa tepaiísha íiráimiarme. Sepunam enketaiísha tarum íiráimiarme” títiatjai.

37 Tutai untsuuruinj wajainia turutiartatui “Uuntá, ¿urutia tsukamá wekaamnisha ayuramaji. Urutiá iisha kitiamama wekáa wainkiarsha umartincha amasmaji.

38 Tura urutia wait ajá wekaamnisha tura pushiram marmurmataisha iisha amasmaji.

39 Urutia iisha jaa tepamin tura sepunam enketmin wainkiarsha winitir íimijaji?” turutiartatui.’

40 “Turutainiakui Wi Uunt Akupin asan tiartatjai “Nekasan tájarme, ashí ju wí shuar péejchachisha waitnentramarum nu Winia anentakum túraitrume” tiartatjai’ tímiayi.

41 ‘Wi Uunt Akupin asan menaarujinj wajainian tiartatjai “Atumsha yajá wetarum. Yajauchijijai yuminframuitrume. Yus uunt iwianchi ni suntarijijai tuke kajinkiashtin jinium apeatniua nuj wétatrume atumsha.

42 Átumka Wi tsukamaji ayurtuachmarme. Kitiamajisha umartin suruschamarme.

43 Wait ajá wekaisha ikiatrachmarme. Pushirun imiamprajisha entsartin suruschamarme. Jaa tepajisha tura sepunam enketajisha íraichmarme” tiartatjai.’

44 ‘Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáinchamaji?” turutiartatui.’

45 ‘Wi Uunt Akupin asan tiartatjai “Nekasan tájarme, Ashí Wí shuar, péejchachisha waitnentrachmarum nuj Winiasha túrutachuitrume” tiartatjai.

46 Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjai pujustinnium weartatui” tímiayi Jesus.

## 26

*Jesus achiktin chichaman jurusarmiania nu  
(Márkus 14.1-2; Rúkas 22.1-2; Juan 11.45-53)*

1 Jesus ashí nuna tinia umik ni unuiniamurinj tiarmiayi

2 “Atumsha nékarme, Paskua jisat jeatin jimíarchik tsawant ajasai. Nuj Wi Aents Ajasu asamtai krúsnum máawarti tusar surutkartatui” tímiayi.

3 Nuyá Israer-patri uuntrijisha Israer-shuara jintinniurijisha Israer-shuara úuntrijisha Kaipiasa jeen áarin iruntrarmiyai. Kaipiassha Israer-patri uuntriyayi.

4 Nuj anankatin chichamjai Jesus achikiar maatai tusar chichaman jurusarmiyai.

5 Tura tiarmiayi “Jístatin túrachminiaiti aents téetet ajarain tusar.”

*Nuwa Jesusan kunkuinian ukatramiania nu  
(Márkus 14.3-9; Juan 12.1-8)*

<sup>6</sup> Jesus Petania péprunam pujus tunamaru Semun̄ka jeen pujumiayi.

<sup>7</sup> Nūj pujaj̄ nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiai.

<sup>8</sup> Túramtai ni unuiniamur̄i nuna íisar kajerkar tiarmiayi “¿Urukamtai au kunkuin imiá kuítniasha áantrasha wasurea?”

<sup>9</sup> Antsu ti kuitjaj̄ suruk shuar kuítrincha ainia nuna yáitskesha” tiarmiayi.

<sup>10</sup> Jesus tuinian anturak tiarmiayi “¿Urukamtai jū nuwa ya-jauch enentáimtarum? Túrutana jū ti pênkeran túrayi.

<sup>11</sup> Kuítrincha tuke atumjaj̄ pujushtatuak. Antsu Wikia atumjaj̄ tuke pujushtatjai.

<sup>12</sup> Jū nuwa kunkuinjaj̄ ukatruraj̄ juka, Wi iwiarnastin asamtai áitkiarayi.

<sup>13</sup> Nekasan tájarme, ashí nunkanam uwempratin chicham etsernakui tuke jū nuwa pachinias etsernaktatui. Túramtai ni túramur̄i kajinmankishtatui” tímiayi.

*Jútas Jesusan surukmiania nu  
(Márkus 14.10-11; Rúkas 22.3-6)*

<sup>14</sup> Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri uuntriin wémiayi.

<sup>15</sup> Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi.

<sup>16</sup> Nu akikiam Jútas itiurak Jesusan súsaraintaj tu enentáimias wekaimiai.

*Kristu jakamu enentaimtustin námper  
(Márkus 14.12-25; Rúkas 22.7-23; Juan 13.21-30; 1 Kurintiu-  
nam 11.23-26)*

<sup>17</sup> Wakapruachu tantan yurumáinia nú námper yama nan̄kamkui Jesusa unuiniamur̄i tariar aniasarmiayi “¿Tui paskua námper iwiaarakrin yurumáttam?” tiarmiayi.

<sup>18</sup> Tuíniakui Jesus tímiayi “Péprunam wetarum. Nūj chikichík shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamur̄jaj̄ ame jeemiin yurumátjai” tawai” titiarum” tímiayi.

<sup>19</sup> Tutai ni unuiniamur̄i wear Jesus timia nuna umikiar paskua nampertin yurumátniun iwiararmiayi.

<sup>20</sup> Tura kashi ajasáí Jesus ni tuse (12) unuiniamur̄ijaj̄ misanam yurumuk pujumiayi.

21 Nuj yurumáiniaj Jesus tiarmiayi “Nekasan tájarne, átum pujarmena juyá chikichik Winia surutkattawai.”

22 Nuna takui ti kúntuts enentáimprar mai aní awajiarmiayi “Uuntá, ¿wiáshitiaj?”

23 Mai tu awajenam Jesus tiarmiayi “Wi nú piniñnuman jimiartukan yuajna ju Winia surutkattawai.

24 Wi Aents Ajasu asan Yus Chicham tana nujaj métek túrunattajai. Túrasha shuar Winia surutkattana nuka ti asutniátin asa akiinmainchu ajakuiti” tímiayi.

25 Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

26 Tura yurumuk pujuiniaj Jesus yurumkan achik Yúsan yuminsamiayi. Tura puur ni unuiniamurin suiniak tímiayi “Ju yuatarum. Juka winia ayáshruiti.”

27 Nuyá piniñkian achik Yúsan yuminsamiayi. Tura suiniak tiarmiayi “Jusha ashí umartarum.

28 Juka winia numparuiti. Tura winia numpar puármatai, yamaram chicham nekas uminkiattawai tawai. Tura puármatai untsurí shuara tunaarin tsankurattawai.

29 Tura ataksha átum Yus akupea nu j jeatsrumnin ju uwa yumirin umarchattajai. Tura tsawant jeamtai atumjai Yus akupeana nu yamarman umartatjai” tímiayi Jesus.

*Pítieur natsantratniua nuna Jesus ujakmiayi*

*(Márkus 14.26-31; Rúkas 22.31-34; Juan 13.36-38)*

30 Yús-kantan kantamáwar umikiar Uriwiu náinnium wearmiayi.

31 Nuj Jesus tímiayi “Ju kashi átum Winia ashí natsantruratrume. Kame Yus-Papinium áarmaiti “Murikiu wáinnium mantuattajai túram murik pisarartatui.” Tu áarmaiti.

32 Tura nantakin Kariréa nunkanam Wi émkkattajai átum wéatsrumin.”

33 Takui Pítieur tímiayi “Chíkich natsantramainakuisha wikia túrashtatjai.”

34 Tutai Jesus tímiayi “Nekasan tájame, ju kashi atash shiniatsajin menaintiú natsantruratme.”

35 Pítieur tímiayi “Maa, Ámijjai métek mántuiniakuisha penkesha natsantrashtatjame.” Ashí ni unuiniamurj núnisan tiarmiayi.

*Jesus Jitsemaní ajanam Yúsan áusamiania nu*

*(Márkus 14.32-42; Rúkas 22.39-46)*

36 Nuyá Jesus ni unuiniamurijjai Jitsemaní náartin ajanam jeá tímiayi “Ju pujusrum náarsatarum. Aranta aj wena Yúsan áusatjai.”

37 Tinia Pítruncha tura mai Sepetéu uchirí jukí wémiayi. Nujsha ti kúntuts enentáimiuk wake mesekmiayi.

38 Nuyá Jesus tímiayi “Ti kúntuts jakamnia enentáimjai. Atumsha juí pujusrum Wijjají métek iwíáa pujutarum.”

39 Tinia Jesus arantach we nuj tikishmar tsuntsuma Yúsán áujeak tímiayi “Winia Aparú, Wi túrunatniua nu nusháa iwiamniaitkiuin̄kia ju wáitsatniua nu tsan̄katrukaip. Tura Wi wakeraj núniska áchati antsu Ame wakeram núnis atí” áujuk tímiayi.

40 Nuyá ni menaintiu unuiniamurí pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijjají iwíáa pujutin ¿tujinkirmek?

41 Iwíáa pujusrum Yus áujstarum. Tunáa nupettamkairap. Enentáimin ti wakeriniaitrome túrasha ayashim pimpiruiti.”

42 Tinia ataksha we Yúsán áujeak tímiayi “Winia Aparú, Wi imiá nekasan wáitsatniuitkiuin̄kia nūjia Ame wakeramna nu atí.” Tu áujsamiai.

43 Nuyá ataksha taa ni menaintiu unuiniamurí tarimiayi. Tura karí ti nupeteam ataksha kanúu pujuarmiayi.

44 Túmainiakui nin ikiukin ataksha áujmia núnisan̄ Yúsán áujstataj tusa waketkimiai.

45 Áujas umik ni unuiniamurí pujamunman̄ wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain̄, tunaarintin shuarnum surunkatin jeayi.

46 Wari nantaktiarum. Wéartai. Súrutna nu winiawai” tímiayi.

### *Jesusan achikiarmiania nu*

*(Márkus 14.43-50; Rúkas 22.47-53; Juan 18.2-11)*

47 Jesus tu chichají Jútas támiayi. Nusha ni unuiniamuríyayi. Nujajisha untsurí shuar puniajajisha tura numijajisha winiarmiayi. Nu shuaran Israer-patri uuntrisha Israer-shuara úuntrisha akupka ármiayi.

48 Jútas, Jesusan sura, tuke Jesusají jeatsuk nu shuaran tiarmiayi “Wi miniakkan mukunattajna núiti. Nu achiktarum.”

49 Nu asamtai Jesusan tarí “Winiajai Uuntá” tinia mukunamiai.

50 Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

51 Nuj chikichik Jesusa tsaníakmarí ni puniarin̄ ukuiniak shuara kuishin̄ tsupirkamiayi. Nu shuarsha Israer-patri uuntri takarniuriyayi.

52 Túramtai Jesus tímiayi “Puniarum en̄keata. Ashí puniajai máanainia nusha puniajai mantamnashtatuak.

53 Wi wakeraknaka winia Aparun timiá untsurí suntarin seakui páchitsuk akupturkainti. ¿Nu nékatsmek?

54 Tura nuna túramtainkia Yus-Chichamnum tana nu uminkiachainti” tímiayi.

55 Nuna tinia Jesus nu shuaran tiarmiayi “Átum kasá achiktaj tawa nútiksarum puniajaisha numijjaisha tarutniurme. Kame ashí tsawantaj Yusa Jeen atumjai pujusan Yus-Chichaman etsermiajai. Nuisha achirkachmarme.

56 Antsu yamaikia yaunchu Yúsnan etserin áararmia nu umínkiatí tusarum jútikrarme.” Tu tímiayi Jesus.

Nuyá ni unuiniamurí Jesusan Níniak ikiuniak pisararmiayi.

*Israer-patri uuntriin Jesusan júkiarmiania nu*

*(Márkus 14.63-65; Rúkas 22.54-55, 63-71; Juan 18.12-14, 19-24)*

57 Shuar Jesusan achikiarmia nusha Kaipiasaj júkiarmiayi. Nusha Israer-patri uuntriayayi. Nuisha Israer-shuara jintinniurisha Israer-shuara uuntri armia nusha irunar mat-sarmiai.

58 Tura Pítiur árantak Jesusan nemarkin uuntri jeen aari jeamiayi. Tura suntarjai tsanin pujusmiayi Jesusan itiurkartin tusa.

59 Tura Israer-patri úuntrisha Israer-shuara úuntrisha tura ashí naamka uunt armia nusha Jesusan wait-chichamjai súmamtikiatai tusar áujmatiarmai.

60 Untsurí shuar ántar tsanumpruniakuisha máatin chichaman nekaracharmiayi. Nuyá jimiará shuar tsanumpruniak

61 tiarmiayi “Ju áishman chichaak “Yusa Uunt Jeen yumpuaran ataksha menaintiú tsawantin jeamminiaitjai,” tu chichamai” tiarmiayi.

62 Nuyá Israer-patri uuntri wajaki Jesusan tímiayi “¿Áimtsmek. Turamainia nusha anturmammek?”

63 Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náariin tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

64 Tutai Jesus tímiayi “Ee, ame táména nútijai. Tura ataksha atumin tájarme, wi Aents Ajasu asan ti kakaram Yusa untsuuriní pujaj wáitkiáttarme. Tura yuranminiam winiaisha wáitkiáttarme” tímiayi.

65 Nuyá Patri uuntri nuna antuk ti kajek ni pushirí jaak tímiayi “Ju áishman ni chichamejai Yusan nekas yajauch chicharniuiti. Nuyásha ¿warí atumaji? Atumsha Yusan yajauch chicharu antukcharumek.

66 ¿Waritia enentáimprum?”

Tutai “Sumamayi. Mantamnati” tiarmiayi.

67 Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi

68 “Ame Krístuchukaitiam. ¿Ya awattama? Ítsuk nekaata.” Tu chichiararmiayi.

*Pítiur Jesusan natsantramiania nu*

(*Márkus 14.66-72; Rúkas 22.56-62; Juan 18.15-18, 25-27*)

69 Nu túmain Pítiur aa pujai nuwa chikichik jeari tímiayi “Amesha ju Kariréanmaya Jesus tutaijjai wekaichamkam.”

70 Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

71 Nuna tinia jíinkitiaj tusa wéaj chíkich shuar wáiniak nujujuinian tiarmiayi “Au áishmansha Nasarénumia Jesusjai wekainiuiti.”

72 Tutai Pítiur ataksha tímiayi “Nekasan tájarme, ju áishman kan penké nékatsjai.”

73 Árusan nujujuarmia nu Pítrun tariar tiarmiayi “Nekas amesha aujai wekaimiame. Warí, chichammijjai páantaiti.”

74 Tutai Pítiur “nekas Yus írui” taku tímiayi “Nu áishman kan penké nékatsjai.” Nuna taj atash shiniukmiayi.

75 Túramtai Pítiur Jesus nuik tímia nuna enentáimpramiayi. “Atash shiniatsain menaintiú natsantrurtatme” tímiayi Jesus. Pítiur nuna enentáimiar jiiinki we ti útmiayi.

## 27

*Piratui Jesusan júkiarmiania nu*

(*Márkus 15.1; Rúkas 23.1-2; Juan 18.28-32*)

1 Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi.

2 Tiar Jesusan jin kiawar apachi uuntrin Punsiu Piratui júkiarmiayi.

*Jútas máamamiania nu*

3 Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi.

4 Tura tímiayi “Nu áishman tunaarinchán máatarum tusan surukan wi sumamajai.”

Taku tiarmiayi “Nusha íjijajisha warí urukatin. Nuka amek íschatniukaitiam.”

5 Tinia Jútas nuju Yusa Uunt Jee kuítian utsan ikiuak nuyá we kajempramiayi.

6 Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijjai irurchamniaiti.”

<sup>7</sup> Tura nuamtak áujmatsar “nun̄ka sumaktai” tiar Nuwe Najantai nun̄kan sumakarmiayi yajayā shuar nūj iwiarsatniun.

<sup>8</sup> Shuar sumakma kuitjaī sumakma asamtai yamaisha Numpá Nun̄ka tuke tūniawai.

<sup>9-10</sup> Nujaī yaunchu Yúsnan etserin Jeremías timia nu uminkiamiayi:

“Uunt Yus turutmia núnisañ túrawarmiayi. Israer-shuar trainta kuítian seawarmatai nuna akantrar nujaī Nuwe Najantai nun̄kan sumakarmiayi.” Tu áarmiayi.

*Piratu Jesusan aníasmania nu*

*(Márkus 15.2-5; Rúkas 23.3-5; Juan 18.33-38)*

<sup>11</sup> Jesusan apachi úuntriñ ejeniarmatai nii aniasmiayi “¿Nekasmek Israer-shuara uunt akupniuríntiam?”

Tutai Jesus “Ame támena núitjai’ tímiayi.

<sup>12</sup> Nuyá Israer-patri úuntriṣha Israer-shuara úuntriṣha súmamtikia Jesus pachischamiayi.

<sup>13</sup> Nuyá Piratu tímiayi “Ashí yajauch chichartamainia nu ¿anturmammek?”

<sup>14</sup> Tútaisha Jesus pen̄ké áimkiachmiayi. Túmakui akupin ti enentáimiar títinian nekaachmiayi.

*Piratu Jesusan “mantamnati” tímiania nu*

*(Márkus 15.6-20; Rúkas 23.13-25; Juan 18.39-19.16)*

<sup>15</sup> Jísat tsawantin apachi uuntrī Israer-shuar shiir enentáimprarat tusa sepunam en̄ketun shuar wakeramun j̄iki an̄kant akupniuyayi.

<sup>16</sup> Nūj sepunam tunáa shuar Parapás náartin pujumiayi. Ashí shuar nékarmiayi.

<sup>17</sup> Tuma asamtai Piratu Israer-shuar iruntrarun aniasmiayi “¿Yana an̄kant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi.

<sup>18</sup> Kame Israer-shuar ántar kajerainiak ni itiarman nekaamiayi.

<sup>19</sup> Tura Piratu nuna inintrak pujaī ni nuarí chichaman akuptukmiayi. “Jū pen̄ker áishman̄ súmamtikiatniujaī pachiinkiaip. Mesekranam nii áitkiatniun nekaan wáitsan tsawarjaī” tímiayi.

<sup>20</sup> Túrasha Israer-patri úuntriṣha Israer-shuara úuntriṣha “Parapás an̄kant wetí, tura Jesus mantamnati” titiarum tusar shuáran akatrarmiayi.

<sup>21</sup> Apachi akupniurī ataksha aniasarmiayi “Jū jimiará áentsun ¿yana an̄kant akupkat tusarum wakerarum?”

Tutai “Parapás” tiarmiayi.

<sup>22</sup> Tutai aniasarmiayi “Jesusnasha. Yusa Anaikiamurī Kristu tuinia nunasha, ¿itiúrkáttaja?”



Tutai ashí “Krúsnum máatá” tiarmiayi.

<sup>23</sup> Tuíniakui Piratu tiarmiayi “¿Warí yajauchinia túrait?”

Tutai kakantar untsukum “Krúsnum máatá” tiarmiayi.

<sup>24</sup> Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainiaín ikijmiak tímiayi “Ju péñker áishman máatniunam wikia pachíintsujai. Antsu atumek íistarum.”

<sup>25</sup> Tutai ashí shuar tiarmiayi “Íik ii shuaríjjai ju áishman máatin íistaji.”

<sup>26</sup> Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi.

<sup>27</sup> Nuyá akupin pujutai jeanam akupniu suntari Jesusan júkiar ashí suntaraim irunturarmiayi.

<sup>28</sup> Tura pushirí áitkiar akupin entsatain kapaaku pushin áentsrarmiayi.

<sup>29</sup> Múuknúmsha tawaspan janke najanamun etsemtikiarmiayi. Tura karisun akupniu numiría áaniun untsuuríni atak-sarmiayi. Túrawar wishikiainiak tikishmatrar tiarmiayi “Israer-shuara uunt akupniuríme.”

<sup>30</sup> Tiar usukiarmiayi. Tura karisun jurukiar múuknum awatiarmiayi.

<sup>31</sup> Tura núkap wishikrar kapaaku pushin áitkiar ni pushirín áentsrarmiayi. Nuyá krúsnum maatai tusar júkiarmiayi.

*Jesusan krúsnum máawarmiania nu*

*(Márkus 15.21-32; Rúkas 23.26-43; Juan 19.17-27)*

<sup>32</sup> Jesusan júki wésar Serini nunkanmaya shuaran, ni naari Semun, Jesusa krúsrín jurukit tusar achikiarmiayi.

<sup>33</sup> Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti.

<sup>34</sup> Nui Jesusan umutai yapájai pachimpra najanamun áartaj tusar súsarmiayi. Tura Jesus apas iis umarchamiayi.

<sup>35</sup> Krúsnum ajintrurar suntar yáki Jesusa pushirín jukit tusar nakurusar awakmakua nuna súsarmiayi. Nújainkia yaunchu Yúsnan etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi.” Tu áarmiayi.

<sup>36</sup> Nuyá wáinkiatái tusar pujursarmiayi.

<sup>37</sup> Tura urukamtaí máamuit ashí aents nekaawarti tusa áarman muuknumaani anujtukarmiayi. **JUITI JESUS, IS-RAERA UUNT AKUPNIURI**

Tu áarmauyayi.

<sup>38</sup> Núnisan Niijjai métek jimiará kasa chikichkin untsuurnu-maní tura chikichnasha menaanmaní krúsnum máawarmiayi.

<sup>39</sup> Shuar nui nankaamainiak muuke peatar wishikiainiak

40 tiarmiayi “Ame Yusa Uunt Jee sáakim menaintiú tsawantin jeamtatjai tíchakaitiam. Nekas Yusa Uchirínkiumka krúsnumiá akaikim uwemprata” tiarmiayi.

41 Núnisan̄ Israer-patri úuntriša, Israer-shuara jintinni-uríša, Pariséusha, Israer-shuara úuntriša, Jesusan wishiki-ainiak nuamtak tiarmiayi

42 “Chikichnaka uwemtikraiti tura Nínkikia uwemtsui. Is-raera Uunt Akupniurínkiumka krúsnumiá akaikimtai nekas enentáimtustatji.

43 “Yúsán nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchirínjtjai” turam-chamkaj” tiarmiayi.

44 Kasá shuarsha Niijiai ajintruamu armia nusha Nin wishikrarmiayi.

### *Jesusa jakamuri*

*(Márkus 15.33-41; Rúkas 23.44-49; Juan 19.28-30)*

45 Nuyá tutupin ai tee ajasmiayi. Túrunayat ataksha aánkú tsáapin ajasmiayi.

46 Nuni ai Jesus kakantar untsumkamiayi. “Erí, Erí, rama sapaktani’ tímiayi. Nusha shuar chichamjainkia “Yusrú, Yusrú, ¿urukamtai ajapa ikiurkiniam?” tawai.

47 Shuar nuí wajarmia nusha nuna enentáimtsuk antukar tiarmiayi “Yaunchu Yúsánan etserniun Eríasan untsuawai.”

48 Tura chikichik tsékenki we uruchin itiamiayi. Tura chu-ruinian ajamper sapapjai ijiú mukunati tusa susamiayi.

49 Tura chikichcha wishikeak tiarmiayi “Iniáisatá, Erías tarí uwemtikratpiash.”

50 Jesus ataksha kakantar untsamak nuyá jakamiayi.

51 Nu chichamaik Yusa Uunt Jee tarach ajamu yakiiniya achik nuńkaani tseu jaanakmiayi. Nuńkasha úurkamiayi. Kayasha jakukarmiayi.

52 Núnisan̄ iwiarsamusha uraniarmatai untsurí Yus-shuar jákarusha nantakiarmiayi.

53 Nusha emka Jesus nantakmiatai niisha nantakiar iwiarsamun ikiukiar Yusa péprurín Jerusarénum wayawarmatai untsurí shuar wáinkiarimiayi.

54 Nuyá suntar Jesusan wáinkiarimia nusha tura ni kapi-tiántriša nuńka úurkamtai nuyá chikichcha ashammai ajas-matai ti sapijmiakarmiayi. Tura tiarmiayi “Ju áishman̄ nekas Yusa Uchirínti.”

55 Nuísha nuwá Jesusan nemariarmia nu, arant wajasar, ii wajaarmiayi. Nusha Kariréanmayá pataatukiar Jesusan yainki ejeniarmiayi.

56 Nujaj Máktaranmaya Marisha, Sepetéu nuwéssha, tura chíkich Marisha ármiai. Chíkich Marikia Jakupuncha tura Jusenchá nukuríyayi.

*Jesus iwiarsamu*

*(Márkus 15.42-47; Rúkas 23.50-56; Juan 19.38-42)*

57 Kiaraj shuar ti kuítrintin Arimatéu péprunmaya ni naari Jusé támiayi. Nusha Jesusan enentáimtiniuyayi.

58 Nii Piratuj we Jesusa ayashin seamiayi. Nin súsarát tusa Piratu akupkamiayi.

59 Túram Jusé Jesusa ayashin krusnumia jusa ti péñker tarachjai penuarmiayi.

60 Tura kaya waa táurmanum yamaram amia nuí iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etektuk ikiuak wémiayi.

61 Nuisha Máktaranmaya Marisha tura chíkich Marisha iwiarsamunam naka ii pujuarmiayi.

*Jesus iwiarsamun suntar wáinkiarmania nu*

62 Nú kiarajin ayampratin tsawantna mash iwiarnakui Israer-patri úuntrisha Pariséusha Piratuj wearmiayi.

63 Tura tiarmiayi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tiniuyi.

64 Nu asamtai iwiarsamunam menaintiu tsawant suntar wáinkiarat tusa akuptukta. Ni unuiniamurí kashi tariar tura ni ayashin kasamkar “Pai, nantakni” shuáran tiarajin. Jujajinkia nuna nankaamas shuáran anankawarainti” tiarmiayi.

65 Tutai Piratu tiarmiayi “Nuí suntar takakrume. Werum iwiarsamu urakchamnia péñker wáinkiatárum.”

66 Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiayi. Tura suntarnasha awajtukiarmiayi.

## 28

*Jesusa nantakmiari*

*(Márkus 16.1-8; Rúkas 24.1-12; Juan 20.1-10)*

1 Ayampratin tsawant nankaasmatai tumintin yama tsawaana ai Máktaranmaya Marisha chíkich Marijiai iwiarsamu iyutai tusar wearmiayi.

2 Tumai Yusa suntari nayaimpinmaya iwiarsamun tari kaya atutkamun urak nuí pujusmiayi. Túmakui nunka ti úurkamiayi.

3 Yusa suntarisha peemia tímiatrus wínchayuyayi. Pushirisha ti puju áuyayi.

4 Tura iwiarsamun wáiniarmia nú suntarsha nuna wáinkiar ashainiak ti kurankarmiayi. Jaká áinis ajasarmiayi.

5 Nuyá nayaimpinmayaḡ suntar nuwaḡn tímiayi “Ashamkairap. Jesus krúsnum máawarmia nu eatsrumek.

6 Juḡkia pujatsui. Nii timia núnisaḡn nantakniuiti. Pai, áepsarma nu ítiarum.

7 Wárik wérum ni unuiniamurḡ “Jesus jakamunmayaḡ nantakni tura wari Kariréanam wétatui. Nuḡ werirum wáinkiáttarme” titiarum. Wats, nunak tájai” tímiayi.

8 Tutai nu nuwá iwiarsamunmayaḡ wárik jíinkiar ashamaini-ayat ti warasar tseke wakеткиarmiayi ni unuiniamurḡn ujak-tai tusar.

9 Tumaj Jesus wantintiuarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi.

10 Túram Jesus tiarmiayi “Ashamprukairap. Werum winia yatsur ujatruktarum. Kariréanam weartí. Nuḡ wear wáitkiartatui. Tu ujaktarum” tímiayi.

#### *Suntar etserkarmiania nu*

11 Nuwá wéarmatai iwiarsamu wáinin suntarsha péprunam wéar Israer-patri úuntrḡn ashí túrunamun ujakarmiayi.

12 Niisha nuna antukar Israer-shuara úuntrḡjiaḡ áujmatsatai tusar wearmiayi. Áujmatsar suntaran ti kuít akikiar

13 tiarmiayi “Atumsha étserkuram “Kashi kanararin ni unuiniamurḡ taar Jesusa ayashin kasamkarmai” titiarum.

14 Tura akupin átum kanarman nekamtaisha níjiaḡ ii iwiarattaji atumin yajauch awajtamsaḡn tusar” tiarmiayi.

15 Nuyá suntarsha kuítian achikiar tiarmia nuna tímiatrusaḡ titiái tusar wéarmiayi. Tura tuke yamaisha Israer-shuar tu túrunaiti tuńiawai.

#### *Jesus ni unuiniamurḡn akatar akupkamiania nu*

*(Márkus 16.14-18; Rúkas 24.36-49; Juanḡ 20.19-23)*

16 Nuyá ni auntse (11) unuiniamurḡ Kariréanam wéarmiayi. Tura Jesus timia nú nainnium jeawar

17 nuḡ Jesusan wáinkiar tikishmatrarmiayi. Kame chíkichka Jesusashit tuńiayat Nin wáinkiar tikishmatrarmiayi.

18 Nuyá Jesus tíjiuch tantá tímiayi “Ashí nayaimpinmasha nunḡkasha akupkatniun kakarman surusuiti.

19 Tuma asantai ashí nunḡkanam werum ashí shuar jintintiarum Wíi shuar awajsatarum. Túrarum Yus Apa náarijiaḡ, Yus Uchi náarijiaḡ, tura Yus Wakanḡ náarijiaḡ imiaitiarum.

20 Ashí atumin Wi akatramajrum nu nútiksarmek umiktin unuiniartarum. Tura juḡ nekaatarum: Tuke tsawantajḡ ikiut-suk atumjai pujuttajai” tímiayi Jesus.

## Yúsan Shiir Chichamen

### MÁRKUS

### aarmia nu

*Imiakratin Juan̄ka etserkamuri*

*(Mateu 3.1-12; Rúkas 3.1-9, 15-17; Juan̄ 1.19-28)*

<sup>1</sup> Jui Jesukrístunu shiir chicham nán̄kameawai. Jesukrístu Yusa Uchirinti.

<sup>2</sup> Yuska imiakratin Juan̄kan pachis ni etserniurin Isayasan ti yaunchu ni Papiriin juna áamtikramiayi:

“Iisiana, ame wéamurm̄in emka wetí tusan winia akatramurun akupeajai. Niisha ame jintimin iwiarattawai.

<sup>3</sup> Niisha aents atsamunam untsumuk juna títiatui: “Uunta jinti iwiarturtarum; naka awajsatarum.”

Nuke áarmaiti.

<sup>4</sup> Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim yajajárum imiantiarum” tímiayi.

<sup>5</sup> Anturkatai tusar ashí Jutía nun̄kanmaya shuar tura Jerusarén peprunmaya shuarsha Niin tariarmiayi. Taar, ni tunaarin ujakarmatai, Juan̄ Jurtan̄ entsanam imiainiarmiayi.

<sup>6</sup> Juan̄sha kamiriu ure najantramun entsauyayi. Emenmamkesha nuapeyayi. Tura chinijjai yutai-títikriatsnasha yuyayi.

<sup>7</sup> Niisha áentsun ujaak tímiayi “Wíjjainkia nan̄kaamas ana nu winia ukuruj winittiawai. Niisha nekas ii Uuntri asamtai, wikia tsuntsumpruan ni sapatr̄i jin̄kiamur̄inkisha atitrachminiaitjai.

<sup>8</sup> Wikia entsajain̄ aya ayashmin imiaajrume, antsu Niinkia imiantinia áanis Yusa Wakan̄i atum̄i enentáin en̄ketramprattarme” tímiayi.

*Juan̄ Jesusan imiaimiania nu*

*(Mateu 3.13-17; Rúkas 3.21-22)*

<sup>9</sup> Juan̄ áentsun imiak pujurainiai, Jesuska Nasarét pepru Kariréa nun̄kanam ana nuyá jiinki Juan̄kan tarimiayi. Tura Juan̄ Jurtan̄ entsanam Jesusan imiaimiayi.

<sup>10</sup> Nuin̄, Jesus entsayā jiniuk, nayaimpin uranniun wáinkiamiayi. Tura Yusa Wakan̄in yámpitsa núnin najanar Niin̄ taarun wáinkiamiayi.

<sup>11</sup> Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

*Uunt iwianch Jesusan anaŋkataj tímiania nu  
(Mateu 4.1-11; Rúkas 4.1-13)*

12 Nuyá wárik Yusa Wakaní Jesusan atsamunam jukimiayi.

13 Tura nuí, yajasma yujamunam, kuarenta tsawant pu-  
jumiayi. Nuí pujaj uunt iwianch Satanás naartin Jesusan  
nekapsataj tusa pujurmiayi. Túramtai Jesusan wáinkiatatai tusar  
nayaimpinmayá suntar tariarmiayi.

*Kariréa nunŋanam ni takatrín Jesus nanŋkammiania nu  
(Mateu 4.12-17; Rúkas 4.14-15)*

14 Ukunam, Juanŋkan sepunam enkeawarmatai, Jesuska  
Kariréa nunŋanam Yusa akupeamurín pachis shiir  
chichaman etserki támiayi.

15 “Tsawant jeayi. Shuarnum Yusa akupeamurí jeatemai.  
Tuma asamtai, yaunchu enentáimsamuram yapajjárú, um,  
Uwempratin Chicham umirkatarum” tu etserkamiayi.

*Jesus namakan achinian ni unuiniamurí ajasat tusa kuaru  
achikmiania nu  
(Mateu 4.18-22; Rúkas 5.1-11)*

16 Jesus Kariréa antumianŋka kánmatkarín wekas, namakan  
achinian Semunŋnasha ni yachi Antresnasha nekan ajuntuk  
pujuinian wáinkiamiayi.

17 Wáiniak “Nemartustarum, tímiai. Namak achiarmena  
nútiksanak áentsun-əəu Yusna arti tusan awajsatjarme” tímiai.

18 Tura nuyanŋka ni nekarín ajapa ikiuiniak Jesusan ne-  
marsarmiayi.

19 Nuyasha Jesus ishichik arantach wesa, Sepetéu uchirín  
Jakupun ni yachín Juánŋnasha kanunam ni nekarín apáa pu-  
juinian wáinkiarimiayi.

20 Wáiniak, nemartusta tusa untsukarmiayi. Tutai ni  
aparíncha, ni aparí takarniuríncha kanunam ikiuiniak Jesu-  
san nemarsarmiayi.

*Jesus iwianchin áishmannumiá jiki akupkamiania nu  
(Rúkas 4.31-37)*

21 Nuyá Kapernáum péprunam jeawarmiayi. Nuí Israer-  
shuara ayampratin tsawantri jeakui Jesus Israer-shuar irun-  
tainiam wayá Yus-Chichaman unuiniamiayi.

22 Tura ni jintinniurí jintintiarimia nuna inianŋkas  
uunt chichamjai Jesus jintiakui ni chichamen anturkar ti  
enentáimprarmiayi.

23 Nuisha nu iruntainiam áishman iwianchruku ámiayi. Ni-  
isha untsukum

24 “¿Warí itiurtamkattsamea incha taum, Nasarénumiá Je-  
susa? Wikia nékajme. Ámetme Tunaartichu Yúsaiya winiamna  
nu. In emestamprataj tusam táchamek” tímiai.

25 Tutai, Jesus kakantar chicharuk “Takamátsatá. Ni enentáiyá jíinkitia, tájame” tímiayi.

26 Tutai íwianch áishmankan ukurak ajaknikiar untsamak kakaar aa jíinkimiayi.

27 Nuna wáinkiar, ashamkar nuámtak aniniaisarmiyai. “¿Ausha warinkit. Yamaram chicham warí chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi.

28 Tura ti wárik nu túrunamu ashí Kariréa nunkanam an-tunkamiayi.

*Jesus Semunka tsatsarin tsuármiania nu*

*(Mateu 8.14-15; Rúkas 4.38-39)*

29 Nuyá Israer-shuara iruntai jeenia jíinki Jesuska Jakupujai Juanjaisha we, Semun ni yachi Antresjai pujuarmia nui jeawarmiyai.

30 Semunka tsatsaritsuer peaknum jaa tepemiayi. Núnaka wárik Jesusan ujakarmiyai.

31 Nuinkia Jesus werí uwejunum achik iniantkimiayi. Tura nu chichamaik michatramiyai. Michatar, pénker ajas, Jesus-nasha ni nemarniurincha ayurawarmiyai.

*Untsurí jaan Jesus pénker awajsarmiania nu*

*(Mateu 8.16-17; Rúkas 4.40-41)*

32 Nu tsawantai kiaraj, ashí jáinian, iwianchrुकuncha Jesusan itiararmiyai.

33 Tura ashí nú péprunmayaa shuar taar wáitiniam Jesusan káutkarmiyai.

34 Untsurí shuáran chíkich sunkuraim jáinian Jesus tsuararmiyai. Tura iwianchrुकu armia nuna enentáiyan iwianchin jírkiarmiayi. Jesuska íwianch nékamu asa, winia náarun ántar pachisarain tusa suritkiarmiyai.

*Kariréa nunkanam Jesus Yus-Chichaman etserkamiania nu*

*(Rúkas 4.42-44)*

35 Nuyá kashin káshik tsawaatsain Jesus nantaki Yúsan áujsataj tusa jíinki atsamunam wémiayi.

36 Tura Semun ni amikrijjaj Jesus wemaanum wéarmiyai.

37 Nin wáinkiar “Ashi shuar Ámin eatmainiawai” tiarmiayi.

38 Tutai Jesus chichaak “Chíkich péprunmasha arantach we-tai. Nui Yusa chichameetserkatai; nuna túrattsan táwitjai” tímiayi.

39 Nuna ti ashí Kariréa nunkanam Israer-shuar iruntai jeanam etseras wekaimiyai; tura núnisan iwianchniasha jíiki akupkini wekaimiyai.

*Tunamaru shuaran Jesus tsuármiania nu*

*(Mateu 8.1-4; Rúkas 5.12-16)*

40 Túramtai, ti tunamaru shuar Jesusan seatajtsa tarimi-ayi. Taa tikishmatar tímiayi “Wakerutakmeka tsuaratin tujin-tratsme.”

41 Jesus nin waitnentak uwejejai antiñmiayi. Antin “Wakerajme. Péñker ajasta” tímiayi.

42 Nu chichamaik, Jesus chichakmatai, ni sunkuri menkakamiayi. Tura péñker ajasmiai.

43 Túrunamtai Jesus kakantar chicharuk

44 akupeak “Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame péñker ajasmarumin nekaawarat tusam, Muisais aar akupkamiania nu umikiam súsatin ana nu susata” tímiayi.

45 Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nunkanmaya Jesusan tariarmiayi.

## 2

*Jesus emearun péñker awajsamiania nu*

*(Mateu 9.1-8; Rúkas 5.17-26)*

1 Kapernáum péprunam Jesus ukunam ataksha wémiayi. Jeamtai, ni jeen pujan nekaawarmiayi.

2 Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi.

3 Nuñkia ni amikrin emearun kuaru shuar tampumpu-awar júkiar Jesusan itiararmiayi.

4 Tura jawar, untsurí shuar írunu ásamtai jea wayatniun tujinkiarimiayi. Tuma ásar, yakinini wakar jea urakar, áankawar, tampunam ni amikrin Jesus pujamunam awain-tiuawar itiararmiayi.

5 Tura niisha Jesus nekas tsuártatui tu enentáimmiarin Jesus nekáa emearun chicharuk, “Uchirú, ame tunaarumka tsankuramuiti” tímiayi.

6 Israer-shuara jintinniurisha nuna antúu pujuarmiayi. Tura ni enentáijjai enentáimsar,

7 “¿Jusha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiayi.

8 Jesuska ni enentáimmiarin nekarawar “¿Urukamtia átum tu enentáimprum? tímiayi.

9 Emearu, tunaarum tsankuramuiti títinjai, emearu, wajakim tampuram entsakim wekasata títinjai ¿tuá imiá yúpichuchit?



10 Wats wi, Aents Ajasu asan Yusa kakarmarijjaí shuara tunaari tsankuramniaitjiana nuna paant iwiaintiuktajrume” tímiayi. Nuna tinia emearun chicharuk

11 “Wajaktia, tájame; túram tampuram jukim jéemiin wetá” tímiayi.

12 Nu chichamaik emearu wajaki, tampurin jukí, ashí íimiainiaín jínkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarin uunt awajsarmiayi.

*Jesus Riwin untsukmiania nu*

*(Mateu 9.9-13; Rúkas 5.27-32)*

13 Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi.

14 Tura jintintiawar amuk, akupin akitiai jeanam nankaamak, Arpeu uchirin Riwin pujan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi.

15 Chíkich tsawant, Riwisha Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjai nu unuiniamurijjaísha ashí nuim misanam pujuarmiayi.

16 Tura kuítian-juu shuarsha yajauch shuarsha Jesusjai irunar yurumáinian wáinkiar, Pariséu jintinniurisha Israer-shuara jintinniurisha Jesusa unuiniamurin aniasarmiayi. “¿Urukantai ame úntrum Jesus, kuítian-juu shuarjai tura yajauch shuarjaísha yuruma?” tiarmiayi.

17 Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

*Yurumtsuk Yus áujisatniun Jesusan aniasarmiania nu*

*(Mateu 9.14-17; Rúkas 5.33-39)*

18 Juanka unuiniamurisha Pariséu unuiniamurisha yurumtsuk Yúsan áujiarmiayi. Túmakui chíkich shuar Jesusan tariar chicharainiak, “Juanka unuiniamurisha, Pariséu unuiniamurisha yurumtsuk Yúsan áujainiatsuk; ¿ame unuiniamurmeka urukantai yurumtsuk áujainiatsu?” tiarmiayi.

19 Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikri warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai.

20 Tura tsawant jeattawai, Winia jurukartin. Nuiñkia winia unuiniamur ijiarmawartatui’ tímiayi Jesus.

21 Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chin\_kiá nuna nan\_kaamas jáaktatui.

22 Nijiamanch yamáí nawar nuap najanamu arutnum yaraachminiati. Túramka wakaprua kariak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

*Trikiu nerēn yuawarmiania nu  
(Mateu 12.1-8; Rúkas 6.1-5)*

23 Chíkich ayampratin tsawantaj Jesus ajanman ajapén nan\_kaamarmiayi. Tura ni unuiniamurj trikiu nerēn majukiar wearmiayi.

24 Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surinkiamu aisha takainia?” tiarmiayi.

25 Tutaj Jesus tímiayi “Ii uuntri Tawitia túramurj Yús-Papinium áujsachukaitrum. Niisha ni nemarniurjsha tsukamainiak, ni yurumkarj atsakui, túrawarmia nu áujsachukaitrum.

26 Apiatár Yusnan pujurniu uuntri pujaj Uunt Tawit Yusa Jēn wayamiayi. Tura Tawitkia, patri nan\_kaamas uunt asa, pátrichuitiat, iniaktusma tantan, aya patri yútainiak, yuamiayi; tura ni nemarniurj\_incha ajamsamiayi. Nu áujsachukaitrum, tímiayi.

27 Ayampratin tsawantaj túrashtinian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi.

28 Wisha, Aents Ajasu asan imia ayampratin tsawantan Nerenniurjntjai” tímiayi.

### 3

*Uweje jakan Jesus tsuármiania nu  
(Mateu 12.9-14; Rúkas 6.6-11)*

1 Ataksha chíkich tsawantaj Israer-shuar iruntainiam Jesus wayamiayi. Nuj shuar ámiayi, ni uweje jaka.

2 Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi.

3 Nuinkia Jesus uweje jaka shuaran chicharuk “Ajapén wajasta” tímiayi.

4 Nuinkia mamikmaun chicharuk “¿Ayampratin tsawantaj pé\_nker túratin yajauch túratniujaj tuá imiá pé\_nkerait. Shuar uwemtikratin máatniujaj tuá imiá pé\_nkerait?” tímiayi.

Nuna takui niisha pachischarmiai.

<sup>5</sup> Tura Jesus kajek nin iiyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmasmatai ni uweje jaruku ataksha pé<sup>n</sup>ker ajatsamiayi.

<sup>6</sup> Nuyá Pariséu shuar jíinkiar, Jesus maami tusar Erutis shuarjají áujmatsarmiayi.

*Untsurí shuar Jesusan káutkarmiania nu*

<sup>7</sup> Nuyá Jesus ni unuiniamuríjiaí antumian<sup>n</sup>num wémiayi. Kariréa nun<sup>n</sup>kanmayá untsurí shuarsha Jesusan nemariarmiayi.

<sup>8</sup> Untsurí nun<sup>n</sup>kanmayásha káunkarmiayi. Jutía nun<sup>n</sup>kanmayásha, Jerusarén péprunmayásha, Itiumía nun<sup>n</sup>kanmayásha, Jurtan entsa amainiásha, Tiru tura Setun pepru pujuinia nú nun<sup>n</sup>kanmayásha, untsurí shuar ni túramurín nekaawar, Jesusan káutkarmiayi.

<sup>9</sup> Untsurí káunkar chanuntawarain tusa Jesus ni unuiniamurín kanuram inianáastarum tusa seamiai.

<sup>10</sup> Kame untsurí shuaran Jesus nuik tsuaru asamtai, jaa shuar nuí káunkarmiania nu Jesusan antintaj tusar shitianainiakui nuna seamiai.

<sup>11</sup> Tura iwianchrukusha Jesusan wáinkiar tikishmatrarmiayi. Untsumainiak “Ame nekas Yusa Uchirínme” tiarmiayi.

<sup>12</sup> Tura nuna etserkairap tusa Jesuska kakantramiayi.

*Jesus tuse shuaran anaikiarmiania nu*

*(Mateu 10.1-4; Rúkas 6.12-16)*

<sup>13</sup> Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi.

<sup>14</sup> Tura Niijiaí wekasar Yus-Chichaman unuiniartinian tuse shuáran anaikiarmiayi.

<sup>15</sup> Tura sun<sup>n</sup>kur tsuártinian, iwianchcha jíiki akupkatniun ni kakarmarín súsarmiayi nú shuaran.

<sup>16</sup> Ju shuáran anaikiamu ármiayi: Semun, Jesus chíkich naarin Pítur apujtusmiania nu;

<sup>17</sup> Sepetéu uchirí Jakupu, ni patai Juánsha; ipiamtajai métek kakaram ásarmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai.

<sup>18</sup> Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun,

<sup>19</sup> Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

*Yusa Wakanin yajauch chicharna nu*

*(Mateu 12.22-32; Rúkas 11.14-23; 12.10)*

20 Waketkiarmatai, ti untsurí shuar taarmatai takatrí ti akui, yurumátniun jeacharmiayi.

21 Jesusa shuárísha nuna nekaawar Jesus ti itiurchat pujus wáurtsuash tu enentáimsar jukitiai tusar nu jeanam jeariarmiayi.

22 Nuyá Israer-shuara jintinniurí Jerusarénumia táarmiania nu, Jesusan áujmatainiak “Pirsepú enkea asa iwianchrukuiti. Tuma asa uunt iwianchi kakarmarijjai iwianchin jiki akupeawai” tiarmiayi.

23 Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiur ajapmamatín?

24 Chikichik nú nunkanmaya shuar nuámtak kajernaiyakuíñkia, nu nunka wari meserchattawak.

25 Nuámtak shuar ni shuarijjai kajernaiyakuíñkia nu shuarsha amunaikchartatuak.

26 Núnisan ¿Satanáskesha ni suntarijjai máaniakka itiurak tuke pujusarat? Amunaikiartatui.

27 Náñkamas shuar kakaram shuara jeen wayá, nérenniun jinikiatsuk ni kuítrín kasarkachminiaiti. Antsu nérenniun jinikiá ni kuítrín kasarkamniaiti.

28 Nekas tájarme, shuar tunáa ashí túruiniana nuka tsankuramniaiti. Winiasha winia Aparnasha yajauch áujmatusha tsankuramniaiti.

29 Antsu Yusa Wakanín yajauch áujmatna nuka tsankurachminiaiti; antsu nu shuar niñki tuke sumamattawai.”

30 “Jesuska iwianchrukuiti” tuíniakui Jesus nuní tímiayi.

*Jesusa yachi Jesusa nukurí  
(Mateu 12.46-50; Rúkas 5.19-21)*

31 Nuyá ni yachi ni nukuríjjai taar aa wajasar, Jesusan untsukat tusa akupkarmiayi.

32 Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

33 Tutai Jesus chichaak “Ya ainia winia nukursha yatsursha” tímiayi.

34 Nin téntakar pujuarmia nuna iis “Júiti winia nukurka, yatsurka, tímiayi.

35 Shuar Yusa wakeramurín uminiana nu winia yatsuruiti, winia umaruuti, winia nukuruuti” tímiayi.

## 4

*Atsaamin atsaampramiania nu  
(Mateu 13.1-9; Rúkas 8.4-8)*

1 Nuyá jiinki antumianka yantamen Jesus ataksha un-  
uniartinian juarkimiayi. Tura untsurí shuar iruntrar-  
matai, kanunam enkempramiayi. Shuarsha antumianka  
káanmatkarin pujuarmiayi.

2 Jesuska métek-taku chichamjai ti jintintiarmiayi. Jintintiuk  
juna tímiayi:

3 “Antuktarum. Atsaamin atsaamprataj tusa jíinkimiai.

4 Atsaamkui ni arakri jintiá iniararmai. Chínki yakiya  
káutkar yuawarmai.

5 Chikichcha kaya írunmanum iniararmai, nunka ishichik  
ámanum. Tura nunka ishichik asamtai wárik tsapainiarmai.

6 Tura etsa etsantar sukuám kancape atsá asamtai  
káararmai.

7 Chikichcha janjí nupanam iniararmai. Jankisha  
tsapainiar kankar ajakrarmai; túram nerecharmai.

8 Chikichcha pénger nunkanam iniararmai. Tura  
tsapainiar nerekarmai, chikich trainta, chikich sesenta,  
chikich sian nerekarmai.

9 Kuíshim ákuinkia antuktarum” tímiayi.

*(Mateu 13.10-17; Rúkas 8.9-10)*

10 Untsurí wearmatai, ishichik Nijijai juakarmiania nu, ni  
tuse unuiniamurijjai aniasarmiayi “¿Ame jintintiamna nusha  
warimpiat?” tiarmiayi.

11 Tutai Jesus chichaak “Yuska ni akupeamurin atumin  
paant nekantikramattsa wakerutmarme. Antsu chikich  
shuarka aya métek-taku chichamjai jintintiáwartatui.

12 Íniyatan wáinkiacharat tusa, antukarsha nekaacharat  
tusa, umirtsuk ni tunaari tsankurnacharat tusa túrattawai’  
tímiayi.

*(Mateu 13.18-23; Rúkas 8.11-15)*

13 Tura tímiayi ‘Wi jintintiajrumna nú métek-taku chicham  
nekaachurmek. Nu nékachkurmeka ¿itiurak chikich métek-taku  
chichamsha nekaatarum?

14 Atsaamniua nuka Yus-Chichaman étserna nuna naku-  
mui.

15 Jínkiái jintiá iniaarua nuna chikich shuar ántuiniamun  
nakumui. Nu shuar chichaman ántuiniawai. Tura antukar-  
matai Satanás wárik tarí ni enentáin atsaampramun jurawai.

16 Chikich shuar ántuiniamu kayanam atsaampramua  
núnskete. Niisha chichaman antukar wárik warainiak  
umiktasa wakeruiniawai.

17 Tura ni kancape atsakui, aya ishichik katsuiniawai. Tura  
ukunam, Yus-Chichaman wakeruiniakui shuar kajeram tura  
chikich itiurchatan wáinkiar Yúsaiya kanainiawai.

18 Chíkich ántuiniamuka jankí nupanam atsaampramua núniskete. Nu shuar Yus-Chichaman ántuiniawai.

19 Ántuiniayat ju nunkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kankar emenkatui. Tuma asamtai nerektinian tujintiainiawai.

20 Tura chíkich ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siansha nerenawai.'

*Uukma ana nu paant nekanattawai*

*(Rúkas 8.16-18)*

21 Nuyá Jesus juna tímiayi '¿Shuar shiripkin ekeemak itia pitiaknum enkeattawak. Peaknum wakenam ikiustatuak? Atsá. Antsu misanam ekentsashtinkiait.

22 Núnisan ashí uukma ana nu ukunam paant nekanattawai. Tura núnisan yamá ishishmasa chichasmasha ukunam paant nekanattawai.

23 Kuíshim ákuinkia antuktarum.'

24 Tura nuyá tímiayi 'Ántarmena nu esetrarum enentáimsarum antuktarum. Urutá péñkerak enentáimsatarum, núnisan Yuska ámin nekaatniun suramsattarme, tura nú núkap patatramsattarme.

25 Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.'

*Yusa akupeamuri júnisaiti*

26 Nuyá Jesus chichaak juna tímiayi 'Yusa akupeamuri júnisaiti. Shuar jiníkiain atsaampratniua núniskete.

27 Jiníkiain atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui.

28 Kame jiníkiái nunkanam init aku niníki tsapaatsuk; emka nukareawai, nuyá tuyureawai tura nujamar katsuwai.

29 Túruna káakmatai júuktin tsawant jeayi tusar júniawai.'

*(Mateu 13.31-32; Rúkas 13.18-19)*

30 Ataksha Jesus tímiayi '¿Yusa akupeamuri warijiainkí nakumkataj. Warijiainkí métek-takuit?

31 Mustasa jiníkiái araamua nujai métek-takuit. Nu jiníkiasha ashí nankaamas ishitiupchichiti.

32 Tura araam tsapái ashí nankaamas uunt ajawai; tura tseñkeakmarisha kámpuram asamtai nuji mikintranam chiníkiasha shiir ayamainiawai.'

*(Mateu 13.34-35)*

33 Núnisaṅ Jesus untsurí métek-taku chichamjají Yus-Chichaman ujaamiayi. Nii nekaatniun jearmia nunak ujaamiayi.

34 Chíkich shuaran aya métek-taku chichamjají ujaamiayi; antsu ni unuiniamurijjají Nin̄ki pujus ashí paant jintintrarmiayi.

*Nasencha, entsan cha Jesus imijian̄mia nu*  
(Mateu 8.23-27; Rúkas 8.22-25)

35 Nu tsawantají etsa akaikimtai Jesus ni unuiniamurin̄ chicharainiak “Entsa amain katintai” tímiayi.

36 Tutai kanunam en̄kemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanunmayasha atampriarmiayi.

37 Tura nasesha ti nasenkatasa nan̄kammiayi; chíchimi kanunam yaráná piáktasa ajamiayi.

38 Jesuska kanú sen̄karin̄ atamprus kanúu tepemiayi. Tura, ni unuiniamurí Jesusan ishintiak chicharuk “Uunta ii wayajnia júka pachitmatmek” tiarmiayi.

39 Tutai Jesus nantaki nasen kakantrarmiayi. Entsan-cha chicharuk “Takamatsata. Miaku ajasta” tímiayi. Tutai nasesha men̄kakamiayi, entsasha miaaku ajasmiai.

40 Túrunamtai Jesus ni unuiniamurin̄ chicharainiak “¿Urukamtai ashamarum? Itiura Yus nekas enentáimtatsrum” tímiayi.

41 Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

## 5

*Jataranmayan̄ iwianchrukun Jesus tsuárman̄ia nu*  
(Mateu 8.28-34; Rúkas 8.26-39)

1 Nuyá antumian̄ amaini Jatara nun̄kanam jeawarmiayi.

2 Jesus kanunmayá jiinkimtai áishman̄ iwianchruku, shuar jakáa iwiartainiumiá wárik taa Jesusan in̄kiun̄miayi.

3 Nu shuar iwiartainium tuke pujuyayi. Tura jirujain̄kia nin jinkiaatniun tujinkiararmiayi.

4 Jirujají nawenmasha, uwejnumsha tuke jin̄kiau ármiayi. Túramaitiat jinkiaarman̄ tsuriar tepet-tepet awajmiayi. Tura ti kakaram asamtai nin nupetkachminiuyayi.

5 Tuke tsawaisha káshisha, iwiartainiumsha murasha kayajají ijiumak untsumu wekainiuyayi.

6 Tura yajayan̄ wáiniak Jesusan tseke tarimiayi; tura tikishmatramiayi.

7-8 Túrunamtai Jesus chicharuk “Iwianchiá, ni enentáiyá jin̄kitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nan̄kaamaku Yusa Uchir̄i Jesúsá? Yus iirmanum wáitkiarsaip, tájame” tímiayi.

9 Takui Jesus tímiayi “¿Ame náarmesha yait?”

Tutai niisha ayak “Untsur̄i ásar wikia Untsur̄i-suntar tu anaikiamuitjai” tímiayi.

10 Nuna ti amik, nu nun̄kanmayá akuptukain̄ tusa Jesusan ti seamiayi.

11 Nuisha nainnium nuntumas untsur̄i kuchi shushun̄mak matsamarmiayi.

12 Tuma asamtai, kuchiniam en̄kemátin tsan̄katrukta tusar Jesusan seawarmiayi.

13 Tuiniakui Jesus “ayu” tímiayi. Takui íwianch áishman̄kainia j̄inkiar kuchiniam en̄kemáwarmiayi. Kuchisha ti untsur̄i, j̄imirá mir (2.000) áchiawash. Ashí mash nánatanam iniaawar antumian̄num inian̄karmiayi. Nuisha entsá k̄iakar jakermiayi.

14 Túrunamtai kuchin wáinin pisarar péprunmasha shuar-numsha nuna etserarmiayi. Tuma asamtai iyutai tusar ashintiukarmiayi.

15 Túrawar Jesusai jeawarmiayi. Jeawar áishman̄ yaunchu iwianchrukun yamaikia péñker ajasun pushir̄in entsar pujan wáinkiararmiayi. Wáinkiar ashamkarmiayi.

16 Tura waketkiar kuchi túrunamuncha iwianchruku péñker ajasmancha mash etserkarmiayi.

17 Tuma asamtai ni nun̄keyá j̄inki wetá tusa seawarmiayi. Jesus kanunam en̄kemamtai áishman̄ nuik iwianchruku amia nu Jesusan chicharuk

18 “Wi Ámijiai tuke tsan̄inkian wekasatjai” tímiayi.

19 Tura núnaka Jesus suritkiamiayi. “Antsu ame jeemiin, áminiumiin weme, ashí Uunt Yus túrutma nu tura waitnentrampa nusha ujakarta” tímiayi.

20 Tutai áishman̄sha wémiayi. Tura antsu Tekapuris nun̄kanam Jesus nin péñker awajsamia nuna ashí shuaran ujakmiayi. Nu nun̄kanmayá shuarka nuna antukar ti enentáimprarmiayi.

*Jimiará jaan Jesus tsuármiania nu*

*(Mateu 9.18-26; Rúkas 8.40-56)*

21 Ataksha Jesus kanujai katiñmatai, aents untsur̄i Nin irunturarmiayi. Jesuska antumian̄ka káanmatkar̄i wajamiayi.

22 Tura Israer-shuar iruntai jeá náampruku, ni naar̄i Jairu, támiayi. Taa, Jesusan wáiniak, piniakum tepersamiayi.

23 Piniakumar ti seak, “Winia nawantur jarutui. Winitia, túram péñker ajasat tusam uwejm̄ijiai antinrukta. Nuiñkia jarutkashtatui” tímiayi.



24 Tu tímiatai Jesus niijjai wémiayi. Tura untsurí shuar wena ásar Nin chánuarmiayi.

25 Nuj pachitkia nuwá ti jaa wémiayi. Niisha tuse uwi numpan ajapeak wáitias pujuyayi.

26 Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuítríncha ashí ajapaitiat tsuámarchauyayi; antsu tsuamsha nu arant ajauyayi.

27 Nu nuwasha, Jesus túramun antuku asa, ni ukuurini amainiñ ni pushirin antinmiayi.

28 “Wi aya ni pushirin antinnaka péñkerapi ajasaintjia” tu enentáimiar túramiayi.

29 Tura Jesusa pushirin antin nú chichamaik numpa ájapman menkakamiayi. Péñker ajasman ayashiiñ nekapramiayi.

30 Tura nuin Jesuska, ni kakarmarjijai tsuarman nekapmampramiayi. Tura nuna nekáa, ayantar chichaak “¿Yaki winia pushirun antintruka?” tímiayi.

31 Tutai ni unuiniamurí tiarmiayi, “Untsurí Ámin antinmainiasha ¿urukamtai “yaki winia antintkia” tame?”

32 Tura Jesus, yaki túruta tusa ashí ímprimiayi.

33 Nuinkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi.

34 Takui Jesus nin chicharuk “Nawantru, Winia nekas enentáimtursa asakmin, péñker awajtamsaitme. Shiir wetá, tura tuke péñker pujusta” tímiayi.

35 Tura Jesus nuna tuke chichas pujai, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtai Unuikiartin tuke itit awajsatam?” tiarmiayi.

36 Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtursata’ tímiayi.

37 Tura Niiijjai wétinian aya Pítruncha, Jakupuncha ni yachi Juanjai tsan̄katkarmiayi.

38 Iruntai jea uuntri jeen jeawar, áentsun charaatum ajainian, úutainian untsukum ajainiancha Jesus wáinkiamiayi.

39 Tura nuwach penké jakan nékayat, wayá nin chicharuk “¿Urukamtai timiá úutrú, tura wa wa ajarum? Nuwach jákachai, antsu kanarai” tímiayi.

40 Nuna takui wishikrarmiayi. Tura Jesus ashí jiiir akupkarmiayi. Áyatik nuwachí aparín, nukuríncha tura Niiijjai táaruncha nuwachí tepamurín jukimiayi.

<sup>41</sup> Tura wayawar Jesuska nuwachi uwejen achik tímiayi “Taritia kumi.” Nusha shuar chichamjainkia “nawantrú nantáktiá” tawai.

<sup>42</sup> Nuwach tuse uwí takakuya nu, nú chichamaik nantaki wekasamiayi. Túramtai nu pujuarmiania nu ti enentáimprarmiayi.

<sup>43</sup> Jesuska chichaak “Atumsha penké etserkairap’ tímiayi. Tura “nuwach ayuratarum” tímiayi.

## 6

### *Jesus Nasarétnum pujusma*

(Mateu 13.53-58; Rúkas 4.16-30)

<sup>1</sup> Jesus nuyá jin̄ki ni nun̄ken waketkimiayi. Ni unuiniamurisha nemariarmiayi.

<sup>2</sup> Nuisha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuj unuimiaruit. Ni nekaatniur̄incha yaki susait. Tura aentsti tujintiajnia nuna Niisha itiurak tura?

<sup>3</sup> Jusha karpintíruchukait; Maríi uchir̄inchukait. Ni yachisha Jakupusha, Jusesha, Jútassha, Semun̄sha nékatsjik. Tura ni umajsha jui iijjai pujuiniatsuk” tiarmiayi. Túrawar Nin nekas enentáimtustinian tujinkiarmiayi.

<sup>4</sup> Túrasa Jesus nin chicharuk “Yúsnan etserniun chíkich nun̄kanmayan̄ka shiir anturainiawai. Antsu ní nun̄keyan̄ka, ní shuarsha anturainiatsui” tímiayi.

<sup>5</sup> Tura nuisha, ni nun̄kenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antin tsuármiayi.

<sup>6</sup> Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

*Yus-Chicham etserkatarum tusa Jesus ni unuiniamur̄in akupkarmiania nu*

(Mateu 10.5-15; Rúkas 9.1-6)

<sup>7</sup> Tuse unuiniamur̄in untsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmar̄in súsarmiayi.

<sup>8</sup> Tura chicharuk “Jintiá yurumátniusha jukiirap, uyuntrumiincha kuitcha en̄kearum jukiirap. Antsu aya áanik mashtun̄ jukiirum wetarum.

<sup>9</sup> Sapat uwekatarum, tura entsartincha jímiar jukiirap, tímiayi.

10 Tura jea wayarmena nuin pujustarum; pujá-pujakuarum nuyá chikich peprunmasha wetarum.

11 Tura nánkamas aents atumin awaintiamainiachkuisha, anturtamainiachkuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

12 Nuyá Jesusa unuiniamuri jíinkiar enentái yapajiar Yúsai enentáimtumartinian etserkarmiayi.

13 Tura iwianchruku enentáiya iwianchin jíirki akupkarmiayi, tura asuitijiai yakarar untsurí jáinian tsuararmiayi.

### *Juanka jakamuri*

*(Mateu 14.1-12; Rúkas 9.7-9)*

14 Jesusa náarin tura ni túramurin ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi.

15 Tura chikich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya nukete” tiarmiayi.

16 Erutis nuna antuk “Nekas Juánkaiti. Ni muuken tsupikintian akupkamiay nu, jakamunmaya nantakniuiti” tímiayi.

17-19 Kame Uunt akupin Erutis, ni yachi Jiripi nuarin nuatkamiayi. Nu nuwa naari Jirutíasaiti. Juansha uunt akupniun Erutisan chicharuk “Yatsumi nuari akintrukchatniuitme’ tímiayi. Tutai nuwa Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surinkiamiayi. Antsu Juan achikrum sepunam enkeatarum tusa akupkamiayi.

20 Juansha tuke enentáijiai Yusa jintin wekainiuyayi. Erutis, ni esetar enentáimniun neka asa Juánkan ashamak Jirutías wakeramurin túrawain tusa suritkamiayi. Kame Erutis Juan étserman nékachuitiat antuktinian wakerimiayi.

21 Jirutías, itiurak máawaj tu pujai, uunt akupin Erutis, ni akiiniamu tsawantri jeamtai, ni suntarincha, Kariréa nunkanmaya úuntrincha, kuítrintin armia nunasha untsukar, namperan najanamiayi.

22 Nujsa Jirutíasa nawantri wayá jantsemámtai Erutis tura níijiai nampernum matsamarmia nusha shiir enentáimsarmiayi. Túramtai uunt akupin nuwachin chicharuk “Ame wakeram nu seattia. Wi amastatjai.

23 Nekas tájame, ashí ame seatmena núnaka amastatjai. Wats, seatkumniñkia takakjana nuna jímiapetek nakakan, amastatjai” tímiayi.

24 Tutai nuwäch jiinki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juan̄ka muuke seata” tímiayi.

25 Nu chichamaik nuwäch wari wayá Erutisan chicharuk “Yamaikia uunt amamkunam Juan̄ka muuken wakerajai” tímiayi.

26 Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi.

27 Tuma asa uunt akupin Juan̄ka muuke itiata tusa ni sun-tarín wárikmas akupkamiayi.

28 Túramtai suntar wari we, sepunam Juan̄ka muuken tsupikmiayi. Tsupik, amamkunam itia, nuwān susamiayi. Túram achik ni nukurín susamiayi.

29 Juan̄ maamun antukar ni unuiniamurj ni ayashin iwiarsatai tusar júkiarmiayi.

*Senku mir áishman̄kan Jesus ayuramiania nu  
(Mateu 14.13-21; Rúkas 9.10-17; Juan̄ 6.1-14)*

30 Tura Jesusa unuiniamurj Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi.

31 Tura untsurj shuar táiniakui, niisha ankant ajastinni-asha yurumátniuncha tujinkiararmiayi. Tuma asamtai Jesus chichaak “Iijjai wemí aents atsuiniamunam; nuj ishichik ayamprarmi” tímiayi.

32 Nuyá Jesus ni unuiniamurijjai kanunam enkemprar, aents atsuiniamunam jeatai tusar jíinkiararmiayi.

33 Túrasha shuar ni wéenan wáinkiararmiayi. Tura “Jesusaiti” tiarmiayi. Tuma ásar ashí péprunmayā untsurj shuar tseke ashintiukar, ni jeatniunam nákakarmiayi.

34 Jesus kanunmayā jiinki ti untsurj aents iruntrar mat-satun wáinkiamiayi. Murik pénker wáinchataiya núnisan mat-satu ásarmatai Jesus nin wáitnentrarmiayi. Tura núkap unuiniararmiayi.

35 Nuyá k̄iakui ni unuiniamurj Jesusan tariar chicharainiak “Atsamunam pujatsjik; tura yamá k̄iatsuk.

36 Shuar wari akupkarta. Tíjiuch péprunmasha, shuar-numsha wearti, ni yurumkarj sumarmakarati” tiarmiayi.

37 Tutai Jesus chichaak “Atumek ayuratarum” tímiayi.

Tutai “Iisha ju shuar ayuratai tusar, ¿jimiara sian kuitjai yurumak sumaktai tusar wétinkiaitaij?” tiarmiayi.

38 Tura Jesus ni unuiniamurj chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

39 Tutai Jesus tímiayi “Ju shuar chírichriniam pujusarti tusar akupkatarum.”

40 Ankant ankant sian siansha, senkuenta senkuenta iruntrar matsamsarmiayi.

41 Jesuska senku tantancha, jímiar namaknasha jusa, yaki nayaimpinmaaní íimias Yúsan yuminsamiayi. Tura yurumkan púurmiayi. Puur ni unuiniamurín súsararmiayi. Namaknasha puur súsararmiayi, ashí shuáran ajamsarat tusa.

42 Ashí yurumáwar ejemarmatai,

43 puunaruncha, namak ampirmancha achikiar, tuse chankinian áimkiar júkiarmiayi.

44 Nu yurumkan ti untsurí yurumáwarmiayi. Aya áishmankak senku mir (5.000) áirmiayi.

*Jesus entsá pátatek wekasamiania nu  
(Mateu 14.22-27; Juan 6.16-21)*

45 Nuyá Jesus ni unuiniamurín chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuáran áujsan ikiuktijatjai” tímiayi.

46 Shuáran áujas ikiuki Yusjái chichastaj tusa náinnium wémiayi.

47 Tura kirit ajasmanum kánuka antumiannum ajapén nanammiai. Jesuska niniki juakmiayi.

48 Jesusa unuiniamurisha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nankaamaktiasa wea núnisan wémiayi.

49 Jesus entsá wekaan ni unuiniamurí wáinkiar, wakan-chashit, tu enentáimprarmiayi. Túrawar ti untsumkarmiayi.

50 Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíitjai Jesus; ashamprukairap” tímiayi.

51-52 Nuínkia entsaya kanunam waka enkempramiayi. Túramtai nasesha majaantmiayi. Ni unuiniamurínkia enentáikiritia áintsan ásarmatai Jesus yurumkan núkap awajsamia nuna paant nekaatniun tuke tujinkiararmiayi. Tuma ásar yamá túrunamu itiurak aankia tusar ti enentáimprar sapijmiakarmiayi.

*Jinisarítnumia shuáran Jesus tsuármiania nu  
(Mateu 14.34-36)*

53 Nuyanka katinkiar, Jinisarít núnkanam jeawarmiayi. Jeawar kanun ajuñiarmiayi.

54 Kanunmaya jíntrarmatai, nu nunkanmaya shuar Jesusan nekaawarmiayi.

<sup>55</sup> Tura “Jesus pujawai” táman antukar, ashí jeanmaya jaan ni peakrintiuk Jesus pujamunam itiaarmiayi.

<sup>56</sup> Tura Jesus wekaak wémia nuisha, péprunmasha, shuar matsatmanumsha, ishichik matsatkamunmasha jaan itiarar jintiá áeprusarmiayi. Túmainiak Jesusan pushirmin antintaj tusar seawarmiayi. Tura ashí antinkarmia nuka péñker ajasarmiayi.

## 7

### *Jesus Pariséun áujmatsarmiania nu (Mateu 15.1-20)*

<sup>1</sup> Pariséusha, Israer-shuara jintinniurisha Jerusarénumia Jesusan tariarmiayi.

<sup>2</sup> Tura Jesusa unuiniamurin ikijmiatsuk yurumun wáinkiar “Israer-shuara túrutairin túruiniatsui” tiarmiayi.

<sup>3</sup> (Kame Pariséusha, tura ashí Israer-shuarsha, ni uuntri jintintiamurin umikiar ti núkap ikijmiarar yurumin áarmiayi.

<sup>4</sup> Péprunmaya tari “ikijmiatsuk yurumáshtiniaiti” tiniu áarmiayi. Tura ti untsurí ni uuntri túrutairi núnisan áarmiayi. “Tsapancha, ichinnasha, jiruncha, peaknasha nijiakartiniaiti” tiniu áarmiayi.)

<sup>5</sup> Tuma asantai Pariséusha, Israer-shuara jintinniurisha Jesusan chicharainiak “¿Urukamtai ame unuiniamuram ii uuntri jintinramniuitiaj nuna túruiniatsui. Urukamtai ikijmiatskesha yurumáinia?” tiarmiayi.

<sup>6</sup> Tutai Jesus tímiayi “Ántar chichamtiniaitrame. Isayas yaunchu nekas atumin áartampramiayi juna:

Ju aents ni wenejai Winia “ti péñkeraiti” turutainiawai, tímiayi Yus, tura ni enentáinkia jeachat pujuiniawai.

<sup>7</sup> Tura tukeneas Winia shiir awajtuiniawai. Aentsu chichame jintiainiayat, “Yus-Chichamaiti” tuíniawai.”

Tu áarmaiti.

<sup>8</sup> Tura átum Yusa chichame iniaisarum, aentsu jintintiamurin umirkarum, ichinnasha, tsapancha nijiaktin, tura chíchich túrutaisha áintsarmek untsurí túrarme.

<sup>9</sup> Túrákrum Yus-Chichamka tsukintiaani ikiusurme atumí uuntri chichame umirkatai tusarum.

<sup>10</sup> Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

11-12 Túrasha átumka Pariséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuinikia, atumsha péñkeraiti, aparíncha

nukurincha yáinchatí” tarume. (Kurpan tana nuka, Yus susamu, tawai.)

<sup>13</sup> Nekaatarum, Pariséutiram. “Í yaunchu uuntri chichame tuke umiki wétiniaiti” tákurum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

<sup>14</sup> Nuyá ataksha Jesus ashí shuáran untsukar “Mash antur-tuktarum, ashí nekaatarum, tímiayi.

<sup>15</sup> Aya ayashnium wayaana nu, shuáran yajauch awajsachminiaiti; tura antsu ni enentáiniá jiinia nu, yajauch awajsattawai.

<sup>16</sup> Shuar nuna ántakka enentáimprati” tímiayi.

<sup>17</sup> Nuyá áentsun ikuiak, jeá wayamtai, ni unuiniamurí aniasarmiayi “¿Nu métek-taku chicham warintiu?” tiarmiayi.

<sup>18</sup> Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti.

<sup>19</sup> Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi.

<sup>20</sup> Nuyá tímiayi “Shuara enentáiniá jiinia nu, yajauch awajsamniaiti.

<sup>21</sup> Shuara enentáiniá, initia, yajauch enentáimsatniusha, tsanirmatniusha, natsa tsanirmatniusha, shuar máatniusha,

<sup>22</sup> kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initia wininiatsuk.

<sup>23</sup> Ashí nu tunáa ainia nu, shuara enentáiniá jíiniu asa, shuáran yajauch awajainiawai” tímiayi.

*Serupinísianmaya nuwa Jesusan nekas enentáimtusmiania nu (Mateu 15.21-28)*

<sup>24</sup> Tiru pepru, Setún péprusha Serupinísia nunkanam ámiayi. Nuka Israer-shuara nunkenchayuyai. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi.

<sup>25</sup> Wárik nu nunkanmaya nuwa Jesus pujan nekaamiayi. Nu núwaka nawantri iwianchrukuyai. Tuma asa Jesusan tarí ni nawen piniakum tepersamiayi.

<sup>26</sup> Nu nuwa Israer-shuarcha, Serupinísianmayayuyai. Túmaitiat, nawantru enentáiyá iwianchin jiiirturkitia tusa Jesusan seamiayi.

<sup>27</sup> Tutai Jesus nuwan chicharuk “Uchi emka ejemarartí. Uchi apatkurí atankir yawach súsatin péñkerchaiti” tímiayi.

28 Tutai nuwá ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuúniatsuk” tímiayi.

29 Tutai Jesus tímiayi “Pénker tame. Tuma asam, shiir wetá; ame nawantrumí enentáiya iwianch jíinkiyi” tímiayi.

30 Takui niisha wémiayi. Tura ni jeen jeá, ni nawantrin iwianch jíinkintai pénger ajas peaknum tepan wáinkiamiayi.

### *Jesus empekun tsuármiania nu*

31 Jesus Tirunmaya jíinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi.

32 Nuí chichachu ámiayi, kuishin empeku. Nu shuáran Jesusan itiariar, ni uwejejaí antinkiat tusar seawarmiyai.

33 Shuar matsatmanumiá Jesus nin akanki jukí kuishin tsara uwejejaí tsutsukruamiayi. Tura usukia, nu shuara iniaín antintkiamiayi.

34 Tura nayainpinmaaní íimias súkaska mayati “Epata” tímiayi. Nuka, shuar chichamnumka “chinkiatí” tawai.

35 Nu chichamaik ni kuishisha chiníkiamiayi, iniaísha séermiyai. Tura paant chichasmiyai.

36 Tura Jesus chicharainiak “Pénké etserkairap” tímiayi. Jesuska surí-suritiamaitiat, nu nankaamas etseriarmiyai.

37 Tura ti enentáimprarmiyai. Enentáimprar, “Jú Jesus aya péngeran túrawai. Empekuncha ántumtikniaiti, tura chichachun chichamtikniaiti” tiarmiyai.

## 8

### *Kuatu mir shuáran Jesus ayuramiania nu* (Mateu 15.32-39)

1 Nu tsawantáí shuar timiá untsurí iruntrarmiyai. Yurumkarí atsakui Jesus ni unuiniamurí untsukar júna tímiayi:

2 “Jú shuáran waitnentajai. Menaintiú tsawant Wijíai pujuinia ásarmatai ni yurumkarí amuukachaik.

3 Tura ni jeen ayurtsuk akupeamka, tsukariín jintiá pimpikiartatui, yajaya káunkaru ásar” tímiayi.

4 Tutai ni unuiniamurí chichainiak “Túrasha júi atsamunam, jú aents ejemaratat tusar ¿tuyá yurumkak wáinkiatatái?” tiarmiyai.

5 Tutai Jesus nin aniasmiayi “¿Urutmá tanta aa?”

Tutai “siati awai” tiarmiyai.

6 Nuiñkia ashí áentsun “nunká pujustarum” tiarmiyai. Tura tantan achik, Yúsan yumĩnsamiayi. Tura puuk, áentsun ajam-satarum tusa ni unuiniamurí susamiayi.



7 Tura uchich namaksha ishichik aan achik, Yúsan yu-miñkias, ni unuiniamur<sub>in</sub> chicharuk “J<sub>u</sub>sha shuar ajamsa-tarum” tímiayi.

8 Turam ashí yurumáwar ejemarmiyai. Ampirma púunaruncha siati chañkinnium áimkiarmiyai.

9 Kwatru mir (4.000) shuar yurumáwarmiyai. Yurumáwar amikiarmatai, Jesus nin áujas akupkarmiyai.

10 Tura ni unuiniamur<sub>ijiaj</sub> kanunam en<sub>k</sub>emprar Tar-manúta nun<sub>k</sub>anam wearmiayi.

*Pariséu Jesusan iniakmasta tiarmiania nu  
(Mateu 16.1-4; Rúkas 12.54-56)*

11 Pariséu Jesus<sub>aj</sub> áujmatsatai tusar tariarmiyai. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiyai.

12 Tuíniakui Jesus kúntuts enentáimias, súkaska mayati “¿Urukamtai, yamaiya aentstiram, nayaimpinmaya kakarman iniakmasat tusarum wakerarum? Nuka pen<sub>ké</sub> sunaschattarme, paant tájarne” tímiayi.

13 Nuyá nin ikiukiar ataksha kanunam en<sub>k</sub>emar amain katiñmiayi.

*Pariséu túramur<sub>ijiaj</sub> aneartarum, tímiayi Jesus  
(Mateu 16.5-12)*

14 Tura ni unuiniamur<sub>i</sub> yurumak jukitiai tukamá kajin-matkiarmiyai. Kanunmañka aya chikichik tantanak takaku ármiayi.

15 Jesussha ni unuiniamur<sub>in</sub> enentáimtikiuk tímiayi “Wáinkiatarum; Pariséusha Erutissha wakaprutain takakainia nújaisha aneartarum” tímiayi.

16 Tutai ni unuiniamur<sub>isha</sub> tunaiyarmiyai “Tanta kajin-matkin asakrin nuna túramtsuj<sub>iash</sub>” tiarmiyai.

17 Tura Jesus nuna nekáa chichaak “¿Urukamtai aya yurumkak enentáimtarum? Tuke nékatsrumek. Pen<sub>ké</sub> enentáimtsurmek. Atumí enentá<sub>i</sub> tuke kiritk<sub>iait</sub>? tímiayi.

18 Jimi a<sub>isha</sub> itiura wáintsurmea. Kuíshim a<sub>isha</sub> itiura ántatsrum. Ashí kajinmatkintrumek.

19 Nekaatarum, nuik, señku tantan púuran señku mir áishmañkan ayurachmakaj. ¿Tura ampirma urutmá chañkinnium chumpiamarum?” tímiayi.

Niisha tiarmiyai “Tuse chañkinnium chumpiam<sub>ji</sub>.”

20 Ataksha Jesus tímiayi “Tura siati tantaj<sub>aj</sub> kwatru mir shuaran ayuramtai, ¿ampirmasha urutmá chañkinnium chumpiamarum?”

Niisha “siati” tiarmiyai.

21 Tuma asamtai Jesus tímiayi “¿Itiura imiá nékatsrum?”

*Jesus kusurun ímtiksamiania nu*

22 Nuyá Petsaitia péprunam jeawarmiayi. Jeawarmatai, áishman̄ j̄ii kusurun Jesusan itiararmiayi. Túrawar antiñta tusar seawarmiayi.

23 Tuma asamtai Jesus uwejn̄um achik péprunam aani en̄keki jukí j̄iin usukij̄ij̄ai kuérmiayi. Tura uwejéj̄ai antiñ “¿j̄immek?” tímiayi.

24 Tutai kusuru íimi tímiayi “Aentsun iiyajai, túrasha paantcha. Numi wekainian áaniun iiyajai” tímiayi.

25 Nuyá ataksha Jesus ni uwejéj̄ai kusuru j̄iin antiñmiayi. Tura kusurusha úmamkes iis, péñker ajas, ashí paant ímpramiayi.

26 Jesus chichaak “Jeem̄iin weakum péprunam wayawaip tura shuar ujakaip” tímiayi.

*Pítur Jesusan “Yusa Anaikiamurinme” tímiania nu*

*(Mateu 16.13-20; Rúkas 9.18-21)*

27 Jesus ni unuiniamur̄ij̄ij̄ai uunt pepru Sesaria-jiripiunam jeatsuk, tíj̄iuch uchich péprunam irasarmiayi. Jintía wésar Jesus ni unuiniamur̄in chicharainiak, “¿Yaiti turutainiawa Winia?” tímiayi.

28 Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

29 Tutai Jesus tímiayi “Atumsha, ¿waritume. Yáitij̄?” tímiayi.

Tutai Pítur tímiayi “Ámeka Krístuitme; Yúsaiya akupka-muitme.”

30 Tutai Jesus chichaak “Peñké etserkairap” tímiayi.

*Jesus ni jákatniur̄in ujakmiania nu*

*(Mateu 16.21-28; Rúkas 9.22-27)*

31 Unuinia: “Wi Aents Ajasuitjiana ju ti wáitsatniuitjai. Israer-shuarti ii uuntrīsha, Patri úntrīsha, ii jintinniur̄isha Winia nakitrurar mantuawartatui. Túrasha menaintiu tsawant nan̄kaasmatai nantaktiniaitjai” tímiayi.

32 Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

33 Tutai Jesus ayantmatar, ni unuiniamur̄in iis, Pítrun kakantar chicharuk “Satanása, werumta. Ámeka Yusna ana nu enentáimtatsme, antsu aya áentsnak enentáimtame” tímiayi.

34 Nuna tuasua amik tura nuj̄ matsamarmia nunasha, ni unuiniamur̄incha untsuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusrj̄ yanakj̄ nemartustí.

35 Kame shuar ju nun<sub>u</sub>kanam aya nin<sub>u</sub>ki anenmamkun<sub>u</sub>ka nu shuar ni iwiaakmar<sub>u</sub>n emen<sub>u</sub>kaktatui. Antsu Winia anentu asa tura winia chichamprun anea asa, shuar aya pen<sub>u</sub>ker pujustinniak enentáimtsuna nu, nekas iwiaakman wáinkiat<sub>u</sub>tawai.

36 Nekaata, shuar ashí ju nun<sub>u</sub>kanam írunna nuna sumaksha túrasha ni wakan<sub>u</sub>i jinium wéakuisha, ¿itiurak pen<sub>u</sub>ker pujusaint?

37 Shuarka wakan<sub>u</sub>n uwemtikrataj tusa wakerak ¿urutmak akikmakaint?

38 Antuktarum. Yamaiya aents Yúsan nakitiar ajapawaru yajauch ainia nu ímiainiamunam shuar Winia natsantrakuin<sub>u</sub>kia tura winia chichampruncha natsantakuin<sub>u</sub>kia, wi, Aents Ajasuitjiana ju, winia Aparu kakarmar<sub>u</sub>jijai tura nayaimpinmaya pen<sub>u</sub>ker suntarjai atak taakun, nú shuaran natsantrattajai Wisha.' Tu tímiayi Jesus.

## 9

1 Ataksha Jesus nin chicharuk, 'Nekas tájarme, shuar játsuk Yus ni kakarmar<sub>u</sub>jijai aentsu enentáin akupkattana nú tsawantan wáinkiatatna nu ju<sub>u</sub>i iij<sub>u</sub>ai pujuiniawai" tímiayi.

*Jesus nusháa iira ajasmiania nu  
(Mateu 17.1-13; Rúkas 9.28-36)*

2 Nuyá sais tsawant nan<sub>u</sub>kaasmatai, Jesus Pítruncha, Jakupuncha, Juán<sub>u</sub>nasha uunt náinnium júkiarmiayi. Nu<sub>u</sub>sha Jesus nushá iira ajasmiai.

3 Ni pushir<sub>u</sub>sha ti puju jítsumir ajattsarmiayi. Nujai métek puju awajsatin ju nun<sub>u</sub>kanam atsawai.

4 Túruna nu<sub>u</sub>i Erías, Muisaisjai wantinkiar Jesusjai chichainian wáinkiar<sub>u</sub>miayi.

5 Nuyasha Pítiur Jesusan chicharuk "Uuntá, ii ju<sub>u</sub>i pujustin ti pen<sub>u</sub>keraiti. Menaintiú áakmaktai, Áminiu chikichik, Muisaisna chikichik, Eríasnasha chikichik" tímiayi.

6 Jesusa unuiniamur<sub>u</sub>i sapijmainiak, Pítiur wariniak titi nekaachmiayi. Nékachu asa nuna tímiayi.

7 Tura yura<sub>u</sub>nkim tara mikintiu awajsamiai. Yura<sub>u</sub>nminmaya chichaak "Júiti winia aneamu Uchir. Nii anturkatarum" tímiayi.

8 Nuyanka ni unuiniamur<sub>u</sub>i ayantmar iiyaj tukamar aya Jesusnak wáinkiar<sub>u</sub>miayi. Chikichkia atsuarmiayi.

9 Nuyá náinniumia akainiak Jesus nin chicharuk "Wáinkiarumna nu etserkairap. Wi, Aents Ajasuitjiana ju jakamunmaya nantaatsain<sub>u</sub> nu etserkairap" tímiayi.

10 Tutai ni tímian ímiatrusan ú<sub>u</sub>karmiayi. Tura "jakamunmaya nantaatsain<sub>u</sub> tana nu, ¿wariniak ta?" nuamtak tunainiar<sub>u</sub>miayi.

11 Tura Jesusan aniasarmiayi “¿Urukamtai Israerti ii jintinni-urisha, Eriás emka tátiniaiti, tuinia?” tiarmiayi.

12 Tutai Jesus tímiayi “Nekas Eriás ashí iwiarattsa emka tátiniaiti. ¿Tura Aents Ajasunun Yus-Papinium warintua?

“Ti wáitsattawai; Nin nakitrartatui.” Tu áarmaiti.

13 Wi tájarme, Eriás nekas táwiti. Támatai, shuar ashí ni wakeri-armia nuna nin túrawarmiayi. Yusa Papiriin Eriása túrunatniuri aarma amia tímiatrusan túrawarmiayi” tímiayi Jesus.

*Jesus iwianchin jiki akupkamiania nu*

*(Mateu 17.14-21; Rúkas 9.37-43)*

14 Tura ni unuiniamuri matsatmanum atak wáketuk, ti untsurí aents káutkar Israer-shuara jintinniurisha niijjai tu-nai pujuinian wáinkiamiayi.

15 Tura aencha, Jesusan wáinkiar warainiak, tsékeñki we-riar, áujarmiayi.

16 Túrunawarmatai, Jesus chicharainiak, “Wari tunaiyarum?” tímiayi.

17 Tutai chikichik ayak “Uuntá, winia uchirun Ámin itiar-jame. Iwianchruku asa chichachuiti.

18 Túmakui íwianch enkemtakun paat ajar áepeawai; túram uchisha saun kaput apak nain kátetete awajeawai. Túram kakaakcha ame unuiniamurmin seamjai, jirtukti tusan, túrasha tujintrutkarai” tímiayi.

19 Tutai Jesus tímiayi “Yusan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi.

20 Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

21 Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti.

22 Tuma asa tuke jutikiú pujurniuiti; jiniumsha apeawai, entsá maataj tusa ajaawai. Yaintrukminiaitkiumka wait-neasam yaintrukta” tímiayi.

23 Tutai Jesus chicharuk “¿Urukamtai, yaintrukminiaitki-umka, tame? Nekaata, shuar Winia nekas enentáimturna nu ashí túramniaiti” tímiayi.

24 Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

25 Tura shuar untsurí káunainian Jesus wáiniak kakantuk “Empeku chichachu awajin iwianchi jinkitia, tájame. Jíinkim ataksha wayawaipia” tímiayi.

26 Tura íwianch jiiniuk untsamak uchin we-werkasa ajakar chichichtu áepkimiayi. Túram uchi jaka ímianis tepemiayi. Túrunantai untsurí shuar “jakayi” tiarmiayi.

27 Támanak Jesus uwejen achik awajkiimiayi, tura uchi nantaki wajakmiayi.

28 Tura Jesus jeá wayamtai, niñki pujasar, ni unuiniamurí aniasar “¿Urukamtai iisha jíiktin tujinkiamaji?” tiarmiayi.

29 Tutai Jesus tímiayi “Ju iwianchkia ijarmar Yus áujkur jíikminiaiti” tímiayi.

*Jesus ataksha ni jákatniurin ujakmiania nu*

*(Mateu 17.22-23; Rúkas 9.43-45)*

30 Nuyá jíinkiar Kariréa nunkanmaani nankaamakarmiayi. Ni unuiniamurin unuinia asa nu nankaamamun nekaawarain tusa Jesus nakitmiayi.

31 Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantai nantaktiatjai” tímiayi.

32 Tura nu chichaman nekaacharmiayi. Nékainiachiat, anin-trustinian arantukarmiayi.

*“¿Yaki imiá nankaamantuit?”*

*(Mateu 18.1-5; Rúkas 9.46-48)*

33 Nuyá Kapernáum péprunam jeawarmiayi. Tura Jesus jeá pujus ni unuiniamurin aniniak, “¿Atumsha jintiá winisrum warí áujmatmiarum?” tímiayi.

34 Tura natsarar pachischarmiai. Kame jintiá wésar “íijjai ¿yaki imiá nankaamantu ajasat?” tunainiarmiayi.

35 Ni unuiniamurí pachischarmatai, Jesus pujus ashí tuse unuiniamurin irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi.

36 Tura uchin itiáa miniakas chichaak:

37 “Shuar uchin winia naaruj shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

*“Shuar in nakitramachkunka in páchitkiawai”*

*(Rúkas 9.49-50; Mateu 10.42)*

38 Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura íijjai írutkachu asamtai nu túratin suritkiamji” tímiayi.

39 Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar wari tsanumprutratniun tujinkiattawai.

40 Shuar in nakitramachkunka, in páchitkiawai, tímiayi.

41 Winia nemarka asakrumin shuar yumiichinkesha ajam-pramkuka ántar túratsui; akikma átatui' tímiayi.

*(Mateu 18.6-9; Rúkas 17.1-2)*

42 "Tura shuar ju uchin Winia umirtuinia nuna yajauchin túrumtikiamtaínkia, ti asutniattawai. Tuma asamtai uchin yajauchin túrumtiktsain kuntujeñ kayajai jin̄kiar nayaantsanam ajunmaka maak ainti.

43 Ame uwejmek yajauchin túrumtikramamniaitkuínkia tsupikta. Mai uwejtuk wáitsatniunam jeatniujain̄kia chikichík uwejjai ju nuñkanam pujusar tuke iwiaaku pujustinnium jeatin ti shiiraiti. Warí, wáitsatniunman̄ka ji kajinkiashtin awai,

44 jákaru akarisha jáiniatsui tura jisha tuke kapaawai.

45 Nawemsha yajauchin túrumtikramamniaitkuínkia nusha tsupikta. Mai nawentuk wáitsatniunam jeatniujain̄kia chikichík nawejai ju nuñkanam pujusar tuke iwiaaku pujustinnium jeatin ti shiiraiti. Wáitsatniunman̄ka ji kajinkiashtin awai,

46 jákaru akarisha jáiniatsui tura jisha tuke kapaawai.

47 Jimisha yajauchin túrumtikramamniaitkuínkia ukuinkiatata. Mai jiiñtiuk wáitsatniunam jeatniujain̄kia chikichík jijjiai ju nuñkanam pujusar Yus akupeana nuñ jeatin ti shiiraiti;

48 wáitsatniunman̄ka jákaru akarisha jáiniatsui tura jisha tuke kapaawai.

49 Naman Yus susamu weaktinia áintsan̄ aentstirmesha jijjiai nekapanastatrum.

50 Weesha ti penkeraiiat michumarka, ¿itiurak jeajeat átink'? Wats, wee jeakua áintsarmek atumek shiirenentáimtunaistarum" tímiayi Jesus.

## 10

*Nuwa ajapatniun Jesus áujmatsamiania nu*

*(Mateu 19.1-12; Rúkas 16.18)*

1 Jesus Kapernáumnumia jiinki, Jutía nuñkanam nan̄kaamaki, Jurtañ entsa amain jeamiayi. Nuñ pujai, aents ataksha Nin irunturarmiyai. Iruntrarmatai tuke túrin asa ataksha unuiniamiayi.

2 Tura Pariséu Jesusan nekapsatai tusar wakeruniak, Nin chicharainiak "¿Áishman̄ ni nuarí ajapatin tsan̄kamkamukait?" tiarmiayi.

3 Tutai Jesus tímiayi "¿Muisais wariniak timia?"

4 Tutai "Papíjjiai in ajapatniun tsan̄katramkamiaji" tiarmiayi.

5 Tutai Jesus tímiayi “Atumí enentaj kátsuram asantai nu chichaman atumin tsankatramkamiarme.

6 Tura Yus yámankamtaik ashí najanamia nu, áishmanasha nuwancha najanamiayi.

7 Tuma asantai áishman ni aparíncha nukuríncha kanaki ikiuki, ni nuaríjaj tsaniñtiniaiti.

8 Warí, áishman nuaríjjaj jímiaraitiat chikichik ajasartatui. Tuma asantai yamá jímiarhaiti, antsu chikichik ajasuiti.

9 Tuma asa, Yus atsankiania nuna, aents akankashtiniaiti” tímiayi.

10 Tura urum jeá wayawar, Jesusa unuiniamurí nu chichaman ataksha aniasarmiayi.

11 Tuiniakui Jesus tímiayi “Shuar ni nuarín ajapa ikiuak chikichan nuátkan̄ka, emka nuarín yajauch awajas, ikiuak, tsanirmayi.

12 Nuwasha ni áishri ajapa ikiuak, chikichjaj niiniurtukka, niisha tsanirmayi” tímiayi.

### *Jesus uchin shiir awajsamiania nu*

*(Mateu 19.13-15; Rúkas 18.15-17)*

13 Antñkiarat tusar uchin Jesusan itiararmiayi. Túruiniakui Jesusa unuiniamurí “itiairap” tiarmiayi.

14 Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchia núnisan peejchach enentáimtumainia nu Yusa akupeamurín pachiinkiamniaiti.

15 Nuní asantai tájarme, uchi umiana núnisan Yusa akupkamurín shuar umíachkūka nuna pachiinkiachminiaiti.

16 Nuyá uchin miniakas, “Yus yáinmakarti” tímiayi.

### *Kuítrintin Jesusan áujsamiania nu*

*(Mateu 19.16-30; Rúkas 18.18-30)*

17 Ukunam, Jesus nuyá weaj, shuar tseke Nin tarimiayi. Tarí tikishmatar chicharuk “¿Uuntá, Amesha ti péñkeraitme. Tuma asam, turuttia, ¿warinia túrakna tuke iwíiaaku átataj?” tímiayi.

18 Tutai Jesus tímiayi, “¿Urukamtai Winia, péñkeraitme, túrutam? Shuarka chikichkisha péñkerka atsawai. Aya Yúsak péñkeraiti.

19 Yus akupkamu nékatsmek. Ju áiniawai: tsanirmawairap, mankartuawairap, kasamkairap, chíkich shuar tsanumprurairap, anankartuawairap, apasha nukusha umirkatarum. Nu áiniawai” tímiayi.

20 Tutai kuítrintin chichaak “Uunta, núnaka úchichik mash umiki tsakaruitjai” tímiayi.

21 Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaun̄kattme. Túram winitia, krus yanaktinia áintsamek itiurchatrum āin̄ nemartusta” tímiayi.

22 Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

23 Nii wématai, Jesus ashí ni téntakmarin iis, ni unuiniamurin chicharuk, “Kuítrintin ainia nu Yusa akupeamurin pachiinkiatin ti itiurchaiti” tímiayi.

24 Takui ni unuiniamurij nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurin pachiinkiatin pen̄ké itiurchataiti.

25 Uunt kamiriu auja jin̄ wayatin ana nú nan̄kaamas, kuítrintin Yusa akupeamurin pachiinkiatin itiurchataiti” tímiayi.

26 Nuna antukar nú arant niisháa enentáimprarmiyai. “¿Nuīnkia yaki uwempramniait?” tunaiyarmiyai.

27 Tura Jesus nin iisar chichainiak “Aents nin̄ki túrachminiaiti, antsu Yus túramniaiti. Yuska ashí túramniaiti” tímiayi.

28 Nuyá Pítur Nin chicharuk “Iis, iikia ashí ikiukir némartsujik” tímiayi.

29 Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeen̄cha, yachin̄cha, umain̄cha, aparin̄cha, nukurin̄cha, nuar̄in̄cha, uchirin̄cha, nuñken̄cha uyumatsuk ikiuakka,

30 nu shuar jū nuñkanam sian̄ patatnas jeen̄cha, yachin̄cha, umain̄cha, nukurin̄cha, uchirin̄cha, nuñken̄cha, jū nuñkanam wáitiatatui. Tura ukunam, nuñka amuukamtai, nu shuarsha jáchatainiam tuke pen̄ker pujustatui.

31 Tura untsur̄i shuar yamáí pen̄ker̄i ainia nu, ukunam ukunmaan̄i pujusartatui, tura iksan̄ untsur̄i shuar yamáí ukunmaȳa ainia nu, ukunam eem pujusartatui” tímiayi Jesus.

*Jesus ni jákatniur̄i ataksha ujakmiania nu  
(Mateu 20.17-19; Rúkas 18.31-34)*

32 Nuyá arak Jerusarén̄num wéenak, jintiak wearmiayi. Jesuska émak wémiayi. Ni unuiniamur̄isha niisháa enentáimprarmiyai. Ashamainiayatan̄ Jesusan nemarsarmiyai. Túmainiāi atak ni nekas unuiniamur̄in̄ akankiar, ni túrunatniur̄in̄ ujakmiayi.



33 Ujaak tímiayi “Antuktarum, arak Jerusarénum wéaji. Nui Winia, Aents Ajasuitjiana juna, Patrj uuntriincha, jintin-niummasha surutkartatui. Niisha apachnium mantamnati tusar surutkartatui.

34 Nusha Winia wishikrurar, katsumprukar, usukruawar mantuawartatui. Túramaitiatnak menaintiú tsawantaj nantaktiatjai” tímiayi.

*Jakupu Juanjai seawarmiania nu  
(Mateu 20.20-28)*

35 Sepetéu uchirj Jakupusha Juansha Jesusan taruntarmi-ayi. Taruntar “Uuntá, ii seattajnia nu túrak tusar wakeraji” tiarmiayi.

36 Tutai Jesus tímiayi “¿Warí itiurtukat tusam wakerutam?”

37 Tutai “Ame nupetmaktin tsawantrum jeamtai, iisha Ámijjai pujustaitsar wakeraji, wi untsuurumini, winia yatsursha menaarmini. Nu tsankatrukta” tiarmiayi.

38 Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

39 Niisha tiarmiayi, “Túramniaitji, páchitskea.”

Tuúniakui Jesus tímiayi “Wats, Wi umartatjana nu umarta- trume, tura Wi imiantiatjana núnisrume imiantiatrume.

40 Túrasha winia untsuuruini, menaruinisha átum pujus- tinian Wikia súsashtiniaitjarme, antsu Yus wakerana nu nuin apujstawai” tímiayi.

41 Tura chíkich tias unuiniamurj nuna anturkar Jakupun- cha, Juánnasha ti kajerarmiai.

42 Tura Jesus ni unuiniamurj irur tímiayi “Ju nékarme; Yus- shuarchanum akupniuitjai tuinia nu, waantu enentáimtumás, ni shuarin ti akupeawai; tura uunt ainia nusha ashí shuar ti takamtikiainiawai.

43 Antsu atumjai núnisan atsutniuiti. Átumka, wi unuinia- mutiram, uunt ajastaj tusarum wakerakrumka, ashí yáimin ajastiniaitrum.

44 Shuar atumí penkerj ajastajtsa wakerakka, takarniua nuke ajas, umirtamkatí.

45 Wisha, Aents Ajasuitjiana ju, shuar takartusarat tusan táchamjai, antsu ashí shuaran yáintaj tusan táwitjai. Wisha jarukan shuaran uwentikratajtsan táwitjai” tímiayi.

*Jesus Partimiásan tsuármiania nu  
(Mateu 20.29-34; Rúkas 18.35-43)*

46 Jesus ni unuiniamurijjai, tura chíkich untsurj aentsjai Jirikiú péprunam jeawarmiayi. Nuyá Jirikiúnmayasha jíinkiar

weenaj, Timiasa uchirí Partimiás, kusuru amia nu, jintiá yantam kuítian seamu pujumiayi.

<sup>47</sup> Niisha, Nasarénumiá Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnentrurta” tímiayi.

<sup>48</sup> Tura untsurí nuí matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesúsá, winia waitnentrurta.”

<sup>49</sup> Nuna antuk Jesus wajas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajak-tia; untsurmawai” tiarmiayi.

<sup>50</sup> Tuiniakui niisha esekmatairín ajapa ikiuak wajaki Jesusan tseke tarimiayi.

<sup>51</sup> Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

<sup>52</sup> Tutai Jesus chichaak “Shiir wetá. Winia nekas enentáimtursa asam péñker ajasume” tímiayi. Tura nu chichamaik ímpramiayi. Tura Jesusan nemarki wémiayi.

## 11

*Jesus Jerusarénum wayamiania nu  
(Mateu 21.1-11; Rúkas 19.28-40; Juan 12.12-19)*

<sup>1</sup> Wésar Jerusarénum tura Petpajái péprusha Petania péprusha Uriwiu naint ínkiuasmak ámanum jeawar, Jesus jimiara unuiniamurín ujuikimiayi.

<sup>2</sup> Ujuiak tímiayi “Aatuniní pépruchiniam werum nuiñ umpuuru uchich jin̄kiamu wáinkiatarme. Nu umpuuruuka tuke entsamprukchamuiti. Nu atiarum utitiarum.

<sup>3</sup> Tura “¿Urukamtia áitkiarum?” turamainiakuisa, “ii Uuntri wakerawai” titiarum” tímiayi.

<sup>4</sup> Tutai wearmiayi. Tura umpuurun wáitiniam aani jin̄kiamun, jintiá yantamnum wajan wáinkiar atiawarmiayi.

<sup>5</sup> Nuí pujuarmia nu “¿Warí áitkiarum. Urukamtai umpuuru atiarum?” tiarmiayi.

<sup>6</sup> Takui, niisha Jesus timia nu ujakam suritkiacharmiayi.

<sup>7</sup> Tura umpuurun Jesusan itiarar pushirín umpuurunam awantkarmiayi. Túram Jesus entsamkamiayi.

<sup>8</sup> Tura untsurí shuarsha pushirín jintianam ayapar áinkiarimiayi. Chíkichcha jintiá yantamnumiñ nukan juuk jintianam áintrarmiayi.

<sup>9</sup> Eem wearmia nusha, uku winiarmia nusha warainiak “Jusanna” untsunkarmiayi. “Yusa náaríin winiana nu imiá penkeraiti.

<sup>10</sup> Ii uuntri Tawitia akupeamuri tátatna nu imiá penker atí. Ii Yusri naari shiir ati.” Tu untsunki wearmiayi.

<sup>11</sup> Tura Jesus Jerusarénnum jeamiayi. Jeá, Yusa Uunt Jeen wayamiai. Tura ashí iiyasua amik, kintiampraj tusa ni tuse unuiniamurjijaj tjiuch Petania péprunam wearmiayi.

*Jesus iikiu numin yuminkramiania nu  
(Mateu 21.18-19)*

<sup>12</sup> Kashin tsawar, Petanianmaya jintia wesa, Jesus tsukam-miai.

<sup>13</sup> Tura arant wajan iikiu numirin núkenniun wáiniak, nereatsuash tusa iyumiayi. Tura nereshtairin asamtai neren penké wáinkiachmiayi.

<sup>14</sup> Nuyá iikiu numin yuminkeak: “Ame nerem penké yu-naashti” tímiayi. Ni unuiniamurisha nuna táman antukarmi-ayi.

*Yusa Uunt Jeen suruktinian Jesus suritkiamiania nu  
(Mateu 21.12-17; Rúkas 19.45-48; Juan 2.13-22)*

<sup>15</sup> Nuyá atak Jerusarénnum jeawarmiayi. Nui Jesus Yusa Uunt Jeen wayá suruktai tusar pujuarmia nuna jiiki akup-katasa nankammiayi. Kuítian yapajin armia nuna misarin tura yampitsan súrin armia nuna kutankrincha ayanturmi-ayi.

<sup>16</sup> Tura káarak entsaki Yusa Uunt Jeen nankaamaktinian suritkiarmiayi.

<sup>17</sup> Nuyá “Yus áujsatai tusar ashí shuar Yusa jeen wayamnia átatui” tú aarchamukait Yusa Papiriin. Antsu átumka Yusa jee kasa matsamtaiya nútikiarme” tímiayi.

<sup>18</sup> Aents nui matsamarmia nu Jesusa chichamen antukar ti enentáimprarmiai. Tuma asamtai Israer-patri úuntrisha, Israer-shuara jintinniurisha, nuna nekaawar, Jesusan ashamainiak mantamnati tusar chichaman jurusarmiayi.

<sup>19</sup> Nuyá kiakui Jesus Jerusarénnumiá jiinkimiayi.

*Iikiu numin káarun wáinkiarmaniania nu  
(Mateu 21.20-22)*

<sup>20</sup> Kashin káshik nankaamainiak iikiu numin kankaptuk jaka wajan wáinkiarmai.

<sup>21</sup> Tura Pítiur enentáimias Jesusan tímiayi “Uunta, iista, iikiu Ame yuminkramam nu kankaptuk káarchaik.”

<sup>22</sup> Tutai Jesus tímiayi “Yus nekas enentáimtustarum.

<sup>23</sup> Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar,

ju náintian “jiinki nayaantsanam iniántí” tákuinkia, páchitsuk iniañtatui, tímiayi.

24 Tuma asamtai tájarme, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkíáttarme.

25 Tura Yus áujkuram pujarmena nu, kajernaiyamuram ákuinkia tsañkurnáiratarum. Atumí Aparí nayaimpiniam pujana nu atumí tunaarín tsañkurturti tusarum túratarum.

26 Atumsha tsañkurnáiyachkurminkia, núnisañ atumí Aparí nayaimpiniam pujana nu atumí tunaarín tsañkurtámprashtatrumé” tímiayi Jesus.

*Yusa kakarmarijiaí Jesus takasmiania nu  
(Mateu 21.23-27; Rúkas 20.1-8)*

27 Ataksha Jerusarénum waketkiarmiayi. Jesus Yusa Uunt Jeen wekai, Israer-patri úuntrisha, Israer-shuara jintinni-urisha, Israer-shuara iruntai-jeé úuntrisha Nin káutkarmiayi.

28 Káutkar Jesusan tiarmiayi “¿Yana kakarmarijiaí ju túram. Ame túramna nuna ya tsañkatrama?” tiarmiayi.

29 Tuiniakui Jesus tímiayi, “Chikichkiniak aniatatjarme. Áirkatarum. Túrakrumniñkia Wisha winia takastinian tsañkatrukma nuna ujaktatjarme.

30 Wats, turutiarum, ¿ya Juan imiaitniun tsañkatkama? ¿Shuar tsañkatkamka? ¿Yus tsañkatkamka? Áirkatarum” tímiayi.

31 Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik.

32 Antsu “shuar tsañkatkaiti” tákurkia, ashí shuar ashamaji” tunainiarmiayi. Ashí aents Juan nekas Yúsnan etserniuiti, tu enentáimainiakui ashammiairmiayi.

33 Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijiaí takaaj nuna ujakchattajrume.”

## 12

*Yajauch takau armia nu  
(Mateu 21.33-46; Rúkas 20.9-19)*

1 Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jean najanamai. Najana takartusti tusa shuáran ikiuak niñkia jeachat wémai.

2 Neretai tsawant jeamtaí, ni takarniurín júukman akankat tusa akupkamai.

3 Tura ajanam takau arma nu, nu takarniun achik, katsumkar, áyatik awainkiarmai.

4 Ataksha chíkich takarniun akupkamai, tura nunasha kayajaj tukurar, múuknum katsumkar, katsekar awainkiarmai.

5 Tuma ain ataksha chíkichan akupkamai, tura nunasha máawarmai. Ti untsurín akupramai. Chikichnasha katsumkarmai, chikichan máawarmai.

6 Tura nijijai chikichik tuke ámiayi, nuka ni aneamu uchirí. Nu uchincha ukunam akupkamai. Akupeak “Winia uchir-naka shiir awajsartatui” tímiayi.

7 Tura ni uchirí winian wáinkiar, takau shuar nuámtak chichainiak “Juka ajá nérenniu uchirínti. Wátsek, maatai; túramka ájaka iiniu átatui” tiarmai.

8 Túsar achikiar máawarmai. Ayashincha ajanmaya ajapawarmai” tímiayi.

9 Tura nuyá aniasmiayi, “¿Wats, warí enentáimsarum; ajá nérenniurí itiurkattawa? Jeashtanmayá taa, ajá takainia nú shuaran amuktatui. Ni ajaríncha chikichan ikiastatui.

10 Ju, Yus-Papinium aarma ana nu áujсахukaitrum: Kaya péñkernak, jeammin “yajauchiiti” tusar ajapawarmia nu ashí kayajaj nankaamas péñker apujsamuiti.

11 Nusha Yus túramuiti. Iisha íisar ti enentáimtaji. Nuke áarmaiti” tímiayi.

12 Tura nú metek-taku chichamjai nin áujmatma asa achik-tai tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

*Unt akupin súsatin tura Yus súsatin  
(Mateu 22.15-22; Rúkas 20.20-26)*

13 Tura wear, imiaamtikiar yajá chichakmatai nújai yajauch títai tusar Pariséu shuarnasha, Erutisa nemarín shuarnasha akatar Jesusan akuptukarmiayi.

14 Túram Nin jeariar chicharainiak: “Uuntá, aents nakiti-ainiajn tuke nekas chicham páchitsuk chichaame, nu nékaji. Aents pátatek iyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar súsatin péñkerkait. Susattajik. Suritkiattajik? Nu nekaatai tusar wakeraji” tiarmiayi.

15 Tura Jesus ni yajauch enentáimmiarín nekara “¿Urukamtai Winia yajauch titi tusarum wakerutarum? Kuit itiatarum, Wi íistaj” tímiayi.

16 Tutai kuítian itiariarmiayi.

Jesus nuna iis tímiayi, “¿Juisha yana yapí tura yana naari áarmait?” tímiayi.

Tutai “Uunt Sésarna” tiarmiayi.

17 Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurĭn antukar ti enentáimprarmiyi.

*Aents nantaktinian Satuséu anintrusarmiania nu (Mateu 22.23-33; Rúkas 20.27-40)*

18 Nuĭsha Satuséu aents, jakamunmaya nantaktin penĕ atsawai tiniu armia nu, Jesusan tariarmiyi. Taar Jesusan chicharainiak:

19 “Uuntá, Muisais ĵuna áatrampramijai:

“Áishman ni nuarĭ júreatsain jakamtainĕia, yachin yajutmatratsa, ni yachĭ nu wajen nuátkatniuiti.”

20 Wats, siati yachĭ ármiayi. Iwiarĭ nuwan nuatak yajutmat-suk jakamiayi.

21 Ni yachĭ wajen akinkiamiayi. Nusha núnisan yajutmat-suk jakamiayi. Nuna yachĭsha núnisan tura nuna yachĭsha núnisan túramiyi.

22 Tura ashĭ siati patainman, patainman nu nuwan nuátkarmiyi. Yajutmatsuk, yajutmatsuk ĵiniawarmiyi. Tura ukunam nuwasha jakamiayi.

23 Nuinĕia nantaktin tsawantai, nantakiarmatai, ¿yana nuarĭn ati? Ashĭ siati nuátkacharmaka” tiarmiyi.

24 Tutai Jesus tímiayi ““Jakamunmaya nantaktin atsawai” tátsurmek. Yusa chichame tura Yusa kakarmarĭ nékachu asarum awajiarne, tímiayi.

25 Iimiatarum, aents jakamunmaya nantakiarmatai, nuatnaikiatin atsuttawai, antsu nayaimpinmaya suntara núnisan pujusartatui.

26 Tura jakamunmaya nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmaya Muisaisan chicharuk “Wikia Apraáma Isaaka tura Jakupu Yúsrĭntjai” Yus tímiayi.

27 Yaunchu jákaru ain, Yus nuna taku, ayashnium jakayat iwiaaku puĵuinia nuna Yusrĭntjai, tawai. Nekas jaka ainia nuna Yusrĭnchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péĕker ainia nu (Mateu 22.34-40)*

28 Jesussha Satuséusha áujmatnainian Israer-shuara jintin-niurĭ taa anturkamiayi. Anturak, Jesus ti penĕker áimkiui, niisha Jesusan ĵuna aniasmiayi: “¿Yus akupkamu tuá imiá péĕkerait?” tímiayi.

29 Tutai Jesus tímiayi “Júiti Yus akupkamu imiá péĕker: Antukta Israer shuará. Iĭ Yusrĭ úuntaiti, tura Niĕki nekas Yúsaiti.

30 Tuma asamtai, tuke enentáimjaj̄i ti enentáimsam Uunt Yus aneeta. Túram ame iwiaakmarmesha, kakarmarmesha Yus íktusta. Núiti nekas péñker akupkamu, tímiayi.

31 Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nan̄kaamas péñker akupkamu atsawai’ tímiayi.

32 Tutai jintintin tímiayi “Ee, péñkeraiti, Uunta. Nékasmek tame. Chikichík Yus awai, chíkichkia atsawai.

33 Tura tuke enentáijjaj̄i ti enentáimsar, ii kakarmarisha Yus íktusar Nin aneakrikia, ii ayashj̄i aneajnia núnik ii írutramurisha aneatniuitji. Nusha ashí Yus sutai ana nujaj̄i nan̄kaamas péñkeraiti’ tímiayi.

34 Nuna tiniu asamtai Jesus ni péñker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

*Kristu tutai ¿yana uchirimpait?*

*(Mateu 22.41-46; Rúkas 20.41-44)*

35 Jesus Yusa Uunt Jeeen unuiniak pujumiayi. Tura chichaak “¿Urukamtai ii jintinniurj̄i “Yus anaikiamu Krístun Tawitia shuarj̄i” tuinia?”

36 Tawit, antsu, Yusa Wakaní aarta tutai, Yus-Papinium juna áarmiyai:

Uunt winia Úuntrun tímiayi “Ame nemasrumin nupetkatin amuatsaj̄in winia untsuuruininj̄i pujusta”.

37 Kame Tawitkia, Krístun áujmatuk, “winia Uuntru” taisha, ¿itiura ní shuarisha átink’?” tímiayi Jesus. Tuma asamtai untsurj̄i shuar nuj̄i matsamarmia nu ti shiir antukarmiayi.

*“Israer-shuaran jintintin ainia nújaj̄i aneartarum” Jesus tímiania nu*

*(Mateu 23.1-36; Rúkas 11.37-54; 20.45-47)*

38 Jesus unuiniak tímiayi, “Israer-shuara jintinniurj̄i ainia nujaj̄i aneartarum. Niisha waantu enentáimtumasar, esaram pushin entsarar wekasatajtsar wakeruiniawai. Péprunmasha shuar shiir áujtusarat tusa wakeruiniawai.

39 Israer-shuar iruntainiam penkerj̄i pujutainium pujustinian wakeruiniawai. Nampernumsha penkerj̄i pujutainium pujustinniasha wakeruiniawai.

40 Tura wajé jeeencha atantainiawai. Túrawar aents nekaracharat tusar ti esaram chichamjaj̄i Yúsán áujainiawai. Níncha chikichjaj̄i nan̄kaamas Yus asutiawartatui” tímiayi.

*Waje kuítr̄in susamiania nu*

*(Rúkas 21.1-4)*

41 Jesus Yusa Uunt Jeēn kuit enketainiam naka pujus áents kuítr̄in chumpian wáinkiamiyi. Untsurí kúitrintin núkap enkeawarmiayi.

42 Nuyá wajē kuítrincha taa jimiarā uchich kuítian, reara áantsan, enkeamiayi.

43 Jesuska unuiniamur̄in untsuk “Nekas tájarme, jū wajē kuítrinchaítat, ashí enkeena nú nan̄kaamas núkap enkeayi.

44 Iis, kuítr̄inniusha nii ampirma nuna enkeenawai, tura antsu jū nuwá kuítrinchaítat, ampirmatsuk nī yurumatniur̄in takurmakman ashí enkeayi” tímiayi.

## 13

*Yusa Uunt Jeēn yumpuntratniun Jesus ujakmiania nu  
(Mateu 24.1-2; Rúkas 21.5-6)*

1 Yusa Uunt Jeēniá Jesus jiinkimtai, unuiniamur̄i Nin tímiayi “Iisia, Uunta, kayasha ti shiir ániawai. Jeēsha imiá úuntchakait.”

2 Tutai Jesus tímiayi “Jū imiá uunt jeē wáinmek. Kaya eken-tramu au ashí mash yumpuntrartatui” tímiayi.

*Amuukatin tsawantin uruku átatna nu  
(Mateu 24.3-28; Rúkas 21.7-24; 17.22-24)*

3 Nuyá Uriwiu náinnium wakar, Yusa Uunt Jeē naka pujusar, Pítrusha, Jakupusha, Juansha, Antressha, ní̄nkimias Jesusan aniiniak

4 “Uuntá, tímiam nu, ζurutiá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

5 Tutai Jesus tímiayi “Aneartarum, anan̄kramawairap.

6 Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsur̄in anan̄kawartatui.

7 Tura meset chicham ántakrumka, yajayā meset chicham ántakrumsha sapijmiakairap. Nekas túrunashtinkiait. Nujaīsha amuukatin tsawantka tuke jeatsui, tímiayi.

8 Shuar chíkich shuarjaī mesetan najanawartatui; apachcha chíkich apachjaī núnisarān mesetan najanawartatui. Untsurí nun̄kanam úurkattawai. Tsukasha ártatui, charaatum ajamusha núnisān átatui. Tura nujaī itiurchatka aya yama nan̄kamui.’

9 “Túmaitkui atumsha aneartarum. Akupin iruntainiumsha surutmakartatume, tura íi shuar iruntainmasha katsumpramkartatume. Wíi shuar asakrumin, kapitiánnium, akupniunmasha juramkittiarme. Nuī jearum, Winia chichastatume.

10 Nu túruntsaīn ashí áentsnum Yus-Chicham etsernaktini-aiti.



11 Atumin surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní jintinramattarmena nu titiarum. Íis, atumí enentáijiaí tíchattarme, antsu Yusa Wakaní jintintiam títiatrume.

12 Nu tsawantin shuarsha ni yachin mantamnati tusa suruktatui. Apasha ni uchirin suruktatui. Uchisha aparincha nukurincha kajerak, jakati tusa suruktatui. Núnisan untsurí shuar túrawartatui.

13 Nuinikia Wíi shuar asakrumin ashí nakitramprartatui. Tura shuar yawetsuk katsuntrańka uwemprattawai” tímiayi.

14 Nuyá Jesus tímiayi “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiuřmesha, ashí Jutía nunkanam pujarmena nu, náinnium pisartarum.

15 Jeá yakiini pujana nu akaiki wariri achiktajtsa, jeen wayashti.

16 Ajanam pujana nusha ni pushirin jukitiajtsa waketkishti.

17 Tura ajamtin áiniana nusha, kuírchin umuntsainia nusha, nu tsawantin timiá itiurchatan wáinkiertatui.

18 Tuma asamtai átum pisaarmena nuí yumitin achati tusarum Yus seatarum.

19 Nu tsawantinkia ti wáitsatin átatui. Yama nankamtaik Yus nunkan najanama nuísha, yamaisha ukunmasha timiu wáitsatin penké atsuttawai.

20 Tura Uunt Yus wáitsatin tsawantan ishichik awajsattajai tíchaitkuinikia, uwempratin penké atsuinti. Tura ni shuarin anaikiamia nuna yáintajtsa wakerak, nu tsawantan ishichik awajsattawai.

21 Nu tsawantai “júiti Kristu” túramkuinikia anturkairap.

22 Kame “Kústuitjai” ántar tuinia nu, tura “Yúsnan etsernuitjai” ántar tuinia nusha wantinkiertatui. Wantinkiar Yus anaikiamu shuárnasha anańkatai tusar wakeruiniak, ni kakarmarin iniakmainiak aentsti tujintiamun túrartatui.

23 Tura átum aneartarum. Aetak, túruntsain unjakchajrumek’ tímiayi Jesus.

### *Aents Ajasu tutai tátintri*

*(Mateu 24.29-35, 42-44; Rúkas 21.25-36)*

24 Jesus tuke unuiniak juna tímiayi: “Tura nu wáitsatin nankaasmatai, etsaasha nantusha etsantrashtatui.

25 Yaasha nayaimpinmaya kakekartatui, tura nayaimpiniam kakaram ainia nu muchitrartatui.

26 Nuyasha ashí aents Winia wáitkiartatui. Wí, Aents Ajasuitjiana ju, ti kakaran, ti wincha ajasan, yurańminiam winiái wáitkiartatui.

27 Nuī nayaimpinmayā suntarun akupkattajai, Wíi shuaran ashí nun̄kanmayan irurarat tusan. Arakaaniya, nun̄kaaniya, ashí nun̄ka nán̄katkamunmayan Wíi shuaran irurartatui.'

28 'Ikiu numi nakumea nu nekaatarum. Ni chin̄kimpri pun̄kak nuke jeakūj, "jū nun̄kanam esat jeatemai" tátsumek.

29 Núnisrumek Wī tájarmena nu wáinkiumeka, ni tatintrī jeatemai tu nekaattarme.

30 Nekas tájarne, yamaí aents pujuinia nu kajin̄ amuiniatsain̄, ashí Wī tájana nu túrunatniuiti.

31 Nayaimpisha nun̄kasha amuukatniuiti. Tura winia chichampruka amuukashtiniaiti.

32 Tura tsawantcha nekanachminiaiti. Nayaimpinmayā suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai.

33 Atumsha anearum enentáimprarum Yus aujsa pujustarum, tsawant nékachu asarum.'

34 'Tura Wikia jū shuarjai méteketjai. Jū shuarsha jeachat weak, ni jēen ikiuawai. Ikiuak ni shuarin̄ wáitrukartí tusa apujas ikiuak ashí shuaran takatr̄in súawai. Tura wáitin wáinniu, "ameja pé̄nker wáinkiata" tími.

35 Wikia nu jēa nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash shiniukaimpiash, káshikiash tátataj.

36 Nérentin aya aneachmak taa, kanúu tepaī wáitkiāj tusarum aneartarum.

37 Wī atumin tájana nu, ashí shuáran tajai, anearum pujustarum" tímiayi Jesus.

## 14

*Jesusan chichaman jurusarmiania nu*

*(Mateu 26.1-5; Rúkas 22.1-2; Juan̄ 11.45-53)*

1 Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiayi. Israer-patri uuntrīsha, Israer-shuara jintinniur̄isha Jesusan anañkar achikiar maatai tusar wakeriarmiayi.

2 Túrasha "Jista tsawantin túrachmi, aents charaatum ajarain̄ tusar" tiarmiayi.

*Nuwā kun̄kuinian Jesusan ukatramiania nu*

*(Mateu 26.6-13; Juan̄ 12.1-8)*

3 Jesussha Petania péprunam tunamaru Semun̄ka jēen misanam pujan, nuwā tarimiayi. Nartu kun̄kuinian arapástru tutai kaya najanamunam piakun itiamiayi. Nu kun̄kuin ti kuitiaiti. Mutí chuchuké kupik Jesusa muuken̄ kun̄kuinian ukatramiayi.

<sup>4</sup> Tura nuḡ pujuarmia nu, kajerar tunaiyarmiayi “¿Urukamtai ju kuḡkuinian ántar wasurea?

<sup>5</sup> Juḡnasha súrakka, menaintiú sianḡ kuítnium surukminiuyi. Nu kuitcha kuítrinchan súsaḡka maak” tiarmiayi. Tusa nuwaḡ kajerkarmiayi.

<sup>6</sup> Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiayi.

<sup>7</sup> Kuítrincha atumjaiḡ tuke íruntsuk. Wakerakrumka tuke péḡker awajsatniuitrume. Antsu Wikia atumjaiḡ tuke pujush-tatjai.

<sup>8</sup> Juḡ nuwaḡ ashí nii túramnia núnaka umikiai. Wi jákatin jeatsaiḡ, iwiarsatin kuḡkuinian shiir ukatrurai.

<sup>9</sup> Nekas tájarme, ashí nuḡkanam Yus-Chicham etsernak-tatna nuḡ, juḡ nuwaḡ túramurisha etsernaktatui, nin kajin-matkiaraiḡ tusa” tímiayi.

*Jútas Jesusan suruktaj timiania nu*

*(Mateu 26.14-16; Rúkas 22.3-6)*

<sup>10</sup> Nuyá Jútas Iskariúti, Jesusa unuiniamurintiat, Israerpatri uuntrin werimiayi, Jesusan suruktaj tusa.

<sup>11</sup> Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsanḡkamkattaj tusa enentáimias wekaimiayi.

*Jesusjai iruntrar yurumáwarmia nu*

*(Mateu 26.17-29; Rúkas 22.7-23; Juanḡ 13.21-30; 1 Kurintiu-nam 11.23-26)*

<sup>12</sup> Wakapruachu tantan yuatin jisat nanḡkama tsawant tsawarmatai, paskua námpertin yúatin murik máatin jeamtai, Jesusa unuiniamurḡ iniasarmiayi “Paskuatin murikiu yúatin iwiaratai tusar ¿tuiḡ wétataj<sup>i</sup>. Tuiḡ yurumattam?” tiarmiayi.

<sup>13</sup> Tutai Niisha jimiará unuiniamurḡn akatar akupeak “Péprunam wetarum. Nuḡ áishmaḡn yumin jukí wéa wáinkiattarme. Nu áishmaḡn nemarsatarum.

<sup>14</sup> Wayaḡna nuḡ jeá nérenniurḡ títiarum “Uunt túramui, ¿wisha, unuiniamurjaiḡ tuiḡ yurumáttaj?”

<sup>15</sup> Nu nérentin, yakí písunam uunt tesamunam ashí iwiaramun iniakturmastatrume. Nuḡ jisat ii najanatin iwiaratarum” tímiayi.

<sup>16</sup> Ni unuiniamurḡ wear, péprunam jeawar, Jesus timia núnisaḡ wáinkiararmiayi. Tuma ásar paskua námperan iwiararmiayi.

<sup>17</sup> Nuyá kíakui Jesus ni tuse unuiniamurijjaiḡ wayawarmiayi.

18 Niisha misanam pekaamak, yurumáiniak pujusar, Jesus tímiayi. “Nekas tájarme, chikichík shuar Wijíají yurumna nu, surutkattawai.”

19 Nujají kúntuts enentáimprarmiyai. Chíkich chíkich Jesusan aniasar “wíashitiaj” tiarmiayi.

20 Jesus tímiayi “Ju misanam tuse irunar yurumprum nu, chikichik surutkattawai. Wijíají pininnum yurumkan ayak yuana núiti.

21 Nekas Wi, Aents Ajasuitjiana ju, jákatniunam wéajai, áarturma áintsanak. Tura áishman súrutna nu ti wáitsattawai. Niisha akiinmainchu ajakuíti” tímiayi.

22 Yurumainiak Jesus Yúsan yuminkias, yurumkan achik, puuk, chicharainiak “Achiktarum, júsha winia ayashruiti” tímiayi.

23 Pininnasha achik, Yúsan yuminkias, ni unuiniamurin súsarmiyai. Ashí umararmiyai.

24 Umararmatai Jesus tímiayi “Júiti winia numpar, untsurín yáintajtsa puártinia nu. Nujají Yamaram Chichaman Yus nananaiti.

25 Nekas tájarme, uwa yumirí ataksha juí umarchattajai. Tura tsawant jeamtai, ukunmasha, Yus akupeana nuí yamarman umartatjai” tímiayi.

*Pítíur natsantratniua nuna Jesus ujakmiania nu  
(Mateu 26.30-35; Rúkas 22.31-34; Juan 13.36-38)*

26 Yus-kantan kantámawar, jíinkiar, Uriwiu náinnium wearmiayi.

27 Nuinkia Jesus nin tíarmiayi “Ju kashi átum natsantrurtatrome. “Murikiu wáinniun máattajai, túramtai murik tsakinmakartatui” tu aarchamukait.

28 Tura ukunam Wi nantakin atumin Kariréanam émtuktiajrume” tímiayi.

29 Tutai Pítíur chicharuk “Ámin ashí natsantramaini-akuisha, wikia natsantrashtatjame” tímiayi.

30 Tutai Jesus tímiayi “Nekas tájame, ju kashi atash jimiará shiniatsajín, natsantrurtatme. “Núnaka nékatsjai” menaintiú turuttiatme” tímiayi.

31 Tutai Pítíur kakaram chichaak “Ámijíají métek máantuiniakuisha, núnaka penké tíchattajai” tímiayi. Ashí ni unuiniamurí núnisan tiarmiayi.

*Jesus Jitsemaní ajanam Yúsan áujsamiania nu  
(Mateu 26.36-46; Rúkas 22.39-46)*

32 Nuyá Jitsemaní ajanam wearmiayi. Jeawar Jesus ni unuiniamurín tímiayi “Juí pujustarum, Yúsan áujsatasa pujají”.

33 Pítrun, Jakupuncha, Juánnasha jukimiayi. Tura Jesuska ti kuntuts enentáimiar wake mesek nekapsatasa nankammiayi.

34 Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tímiayi.

35 Jesussha ishichik arantach we, nunká piniakumar tepes Yúsan aujmiayi. “Ju wáitsatin átatna nu, túrutatniuitkuĩkia iniaitiusta” tu seamiayi.

36 Tuke áujuk tímiayi “Apawá, ashí tujinchaitme. Piniñnumiá ashí umartinia áantsañ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.”

37 Tura ni unuiniamurĩn tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichkisha iimia pujustin tujinkiamek?”

38 Anearum Yus áujساتارum, tunaanum iniaarajj tusarum. Atumí wakanĩin kakarmaitrume, antsu atumí ayashĩin kakarmachuitrume” tímiayi.

39 Ataksha we, nuik Yúsan áujsama núnisañ áujsamiai.

40 Ataksha waketruki, ni unuiniamurĩn kanúu tepenan tarimiayi. Karĩ ti pujá asamtai, Jesusan áujsatniun tujinkiarimiayi.

41 Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai.

42 Nantáktiárum, wemí. Iis, Winia súrutna nu nuntumsai” tímiayi Jesus.

### *Jesusan achikiarmiania nu*

*(Mateu 26.47-56; Rúkas 22.47-53; Juan 18.2-11)*

43 Jesus nuna chicháa pujá unuiniamurĩ Jútas tarimiayi. Nijjaj untsurĩ aents puniá takaku, tura numincha takaku káutarmiayi. Israer-patri uuntri, Israer-shuara jintinniurĩ, tura Israer-shuara úuntri akupkarma asa káutkarmiayi.

44 Káuntsain Jútas chicharainiak, “Wi mukunattaj áujkin núiti Jesus. Achirum, péñker emetarum jukitiarum” tímiayi.

45 Tura Jesusan tarí, mukunuk áujas “Uuntá, Uuntá” tímiayi.

46 Túramtai aencha Jesusan achikiar emetawarmiayi.

47 Túruiniakui nuĩ wajatusha puniarĩ úkuitsañ, patri uuntri takarniurĩn awati ni kuishĩn tsupirkamiayi.

48 Túram Jesus áentsun tímiayi “Kasakaitiaj. Puniajaj nu-mijjaj, kasá nútiksarmek achirkatai tusarum tarutniurme.

49 Ashí tsawant atumjai Yusa Uunt Jeeñ wayan unuiniakun pujuchmakaj. Túmaj nuĩ achirkacharme. Tura Yus timia nu uminkiat tusa ju túrunayi.”

50 Nuiñkia ni unuiniamurĩ Niniak ikiuiniak pisararmiayi.

### *Natsa pisarmiania nu*

51 Tura áishman nátsaach aya tarachin penumas Jesusan atamprimiayi. Tura natsaach suntar achikiam

52 tarachrın ajapa ikiuak misú tsékenkimiyai.

*Patri uuntriin Jesusan júkiarmiania nu*

(Mateu 26.57-68; Rúkas 22.54-55, 63-71; Juan 18.12-14, 19-24)

53 Patri uuntriin Jesusan ejeniarmiayi. Nuı Patri uuntriısha, Israer-shuara jintinniurısha, Israer-shuara uuntriısha irunturarmiayi.

54 Tura Pítiur íikian nemarki Patri jeen aach jeá, Patri sun-tarijjai jinia anamuk pujumiayi.

55 Patri uuntri ashı naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmıayi.

56 Túrasha untsurı shuar Jesusan tsanumpruiniayatan yapajı yapajı chichainia ásarmatai wáinkiacharmıayi.

57 Nuyá chíkich wajakiar wáitruiniak juna tiarmiayi

58 “Yusa Uunt Jeen, aents jeamarmia nuna yumpuntiatjai. Túran menaintiú tsawantai, chikichan, aents jeamchamun jeamtatjai” tau antukmaji” tiarmiayi.

59 Tura tuke yapajáwar tiarmiayi.

60 Nuısha Patri uuntri ajapén wajaki Jesusan chicharuk “¿Áimsatin penké tujintiamek. Warinia turamainia?” tímiayi.

61 Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusrı Uunt tajinia nuna Uchirinkaitiam?”

62 Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurinı pujai wáitkiattarme. Tura nayaimpinmaya yurañminiam winiaı wáitkiattarme” tímiayi.

63 Tutai Patri uuntri kajek, ni pushirin jaak tímiayi “¿Chíkich títincha warı atsumaji?”

64 Nii tana nujai Yúsan kátsekeamu antukurme. ¿Warintia enentáimprum?” tímiayi.

Takuı “jakamniaiti” ashı tiarmiayi.

65 Chíkich chíkich Jesusan usukiáwarmıayi. Jiin epetkar awatiar “¿Ya áitkiarma? etserkata” tiarmiayi. Patri suntarısha yapiniam awatiarmiayi.

*Pítiur Jesusan natsantramiania nu*

(Mateu 26.69-75; Rúkas 22.56-62; Juan 18.15-18, 25-29)

66 Núnaka túruiniaı Píturu nunká, jea aani pujan, nuwa Patri uuntri takarniuriya nu tarimiayi.

67 Niısha Pitrun jinia anamu pujan wáinkiamiayi. Wáiniak, “Amesha Nasaretnumiá Jesusjai wekaichukaitiam” tímiayi.

68 Tutai Pítur chicharuk, “Nékatsjai. Ame támena nuna nékatsjai” tímiayi. Tura aḡ wáitiainiam jiinkimiayi. Tumai atash shiniukmiayi.

69 Nu núwasha Pitrun ataksha wáiniak, shuáran nuḡ pujuinian tímiayi “Júiti ni shuari.”

70 Tura ataksha “atsá” tímiayi.

Ishichik árusaḡ, shuar nuḡ pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auyá shuara nuní chichaame” tiarmiayi.

71 Tutai Pítrusha kakantar chichaak, “Ju áishmaḡnaka átum tárugna núnaka nékatsjai. Wáitrakuḡkia Yus úrsati” tímiayi.

72 Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsaḡḡ, ame, núnaka nékatsjai, menaintiu turuttiatme” tíchamka. Pítru nuna enentáimias ti útmiayi.

## 15

*Jesusan Piratuí ejeniarmiania nu*

*(Mateu 27.1-2, 11-14; Rúkas 23.1-5; Juan 18.28-38)*

1 Tura kashin káshik Patri uuntri, Israer-shuara úuntriḡḡḡ, Israer-shuara jintinniurḡḡḡ, ashí naamka armia nuḡḡ irunturar, chichaman jurusarmiayi. Túrawar Jesusan jinḡkiamun apach kapitián Piratuḡḡḡ ejeniarmiayi.

2 Ejeniarматаi Piratu aniasmiayi “¿Amesha Israer-shuara Uuntriḡkáitiam?”

Tutai Jesussha “Amek tame” tímiayi.

3 Nuyá Patri uuntri ti tsanumprurarmiayi.

4 Ataksha Piratu aniasmiayi “¿Áimsatin penḡké tujintiamek? Ti untsurḡ etserturmainiatsuk.”

5 Tura Jesus nunasha áikchamiayi. Túmakui Piratu ti enentáimpramiayi.

*Jesusan, mantamnati, tíarmiania nu*

*(Mateu 27.15-31; Rúkas 23.13-25; Juan 18.38-19.16)*

6-7 Shuar ámiayi, ni naari Parapás. Niisha ni shuarḡḡḡḡḡ meset ámanum, shuaran maa asamtai sepunam enḡkeamuyayi. Tura námper tsawantaḡ Piratu sepunmaya chikichik shuarnak jḡḡki akupniuyayi, aents seawarmia nuna.

8 Nuḡsha untsurḡ shuar Piratun káutkar tiarmiayi “Ame ju námper tin tuke túramna nu túratá.

9-10 Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniurḡḡ jḡḡki akupkattajak? ¿Nu wakerarmek?” tímiayi.

11 Tutai Patri uuntri áentsun chichainiak ““Antsu Parapás jḡḡkim akúpkatá” titiarum” tiarmiayi.

12 Tutai Parapásan seawarmatai Piratu ataksha chicharainiak “Jesusnasha, átum ii akupniurj tarumna nuna, ¿itiurkattaja?” tímiayi.

13 Ataksha ni kakantar tiarmiayi “Krúsnum mantamnati.”

14 Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tíarmiayi “Krúsnum mantamnati.”

15 Tuma asamtai, aents shiir enentáimprartí tusa, Piratu tunáa shuaran, Parapásan jiki akupkamiayi. Tura Jesusnasha katsumkarum krusnum ajintrurtarum tusa suntaran tsankatkamiayi.

16 Tiniu asamtai suntar Jesusan jukiar, kapitiáni jeen awayawarmiayi. Nu jea naari Piritiúriuiti. Túrawar untsurj suntaran untsukarmiayi.

17 Ashí káunkar, pushin kapaanniun Jesusan áentsrarmiayi. Tawasap janke najanamun etsenkrumtikiarmiayi.

18 Nuisha Jesusan áujсар “Shíraitme, Jesusá, Israer-shuara akupniuriya” wishikiainiak tiarmiayi.

19 Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi.

20 Tura Jesusan wishikrar amukar, kapaantin pushin áitkiar, ni pushirj áentsrarmiayi. Túrawar krúsnum ajintrurtai tusar jikiarmiayi.

### *Jesusa jakamuri*

*(Mateu 27.32-44; Rúkas 23.26-43; Juan 19.17-27)*

21 Semun Serini núnkanmaya shuárauyayi. Arijantruncha, Rupuncha aparíyayi. Semunkan takatnumia winian suntar emetawarmiayi, Jesusa krusrj yanaki jukiti tusar.

22 Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

23 Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi.

24-25 Nantu yakí jatemsamtaí krúsnum ayapar ajintrurar ikiusarmiayi. Túrawar suntar yakí jukit tusar nakurutaijai nakurusar Jesusa pushirj yaruakarmiayi.

26 Urukamtaí máamuit, ashí aents nuna nekaawarat tusa, ni krúsrj ju aarmauyayi: *ISRAER SHUARA AKUPNIURI*

27 Nu náinnium jimiará kasa shuaran Nijjai máawarmiayi. Chikichik Jesusa untsurinj krúsnum, chikichik ni menarinj krúsnum máawarmiayi.

28 Yus-Papinium aarma ana nujai uminkiauyayi. Nui “tunáa shuarjai nekapmarmauyayi” tu áarmaiti.

29 Shuar nankaamainiak, muuke pearar, Jesusan katsekainiak tiarmiayi “Iisia, amesha, “Yusa Uunt



Jeen yumpuntiatjai, tura menaintiú tsawantaj ataksha jeamkattajai” tíchakaitiam, tiarmiayi.

<sup>30</sup> Amek krúsnumiã akaikim uwemprata.”

<sup>31</sup> Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwemtikraitiat, Niñki uwempratniun tujintiawai.

<sup>32</sup> Yusa anaikiamurj Krístuashit, ii akupniuriniashit, tiarmiayi. Wats, yamá krúsnumiã akáikití, iisha nu ísar Yus-shuar ajastai” wishikiainiak ántar nuna tiarmiayi. Jesusjaj krúsnum ajintruamusha Nin wishikiarmiayi.

*(Mateu 27.45-56; Rúkas 23.44-49; Juan 19.28-30)*

<sup>33</sup> Tutupin jeamtai ti kiritin ajasmiayi ashí nunkanam. Tura, nantu nunkaach ajasmatai ataksha tsaapnirmiayi.

<sup>34</sup> Nuin Jesus kakantar untsumuk tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtai ajapa ikiurkiniam?” tawai.

<sup>35</sup> Shuar nuj pujuarmia nu, nu chichaman nékachu ásar, nuna antukar “Eriasan untsúawai” tíarmiayi.

<sup>36</sup> Chikichik shuar churuinian uruchjaj ajamper, sapapjaj ijiú mukunati tusa susamiayi. Tura tímiayi “Wajastarum, Eriás Nin jukitaj tusa winishtimpiash. Iistai” tímiayi.

<sup>37</sup> Nuinkia Jesus kakaram untsamak jakamiayi.

<sup>38</sup> Túramtai Yusa Uunt Jeen ejamu niñki jaanakmiayi, yakíya nunká.

<sup>39</sup> Suntara kapitíántrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

<sup>40</sup> Nuwasha arant ii pujuarmiayi. Nu nuwajaj Máktara péprunmaya Marí, chíkich Marisha, Sarumáisha pujuarmiayi. Chíkich Marisha uchich Jakupuncha Jusenchá nukuríyayi.

<sup>41</sup> Nu núwaka, Kariréa nunkanam Jesus wekaimia nuj, Nin nemarsar yáintaitisar wekasarmiayi. Untsurí chíkich nuwasha Jesusjaj Jerusarénum wear, nu nuwajaj arant ii pujuarmiayi.

*Jesusan iwiarsarmiania nu*

*(Mateu 27.57-61; Rúkas 23.50-56; Juan 19.38-42)*

<sup>42</sup> Kiatemantai, ayampratín tsawant jeatsain, námper iwiaratin tsawant asantai,

<sup>43</sup> Arimiatíánmaya Jusé arantutsuk, kakaram ajas, Piratú jeá Jesusa ayashin seatajtsa utuamiayi. Nu Jusenchá ashí irunin ainia nu anturin árimiayi. Niisha Yus ju nunkanam akupin ajasat tusa nákasmiayi.

44 Tura Jesusa ayashin seam, Piratusha “wárik jaka” tímiayi. Tuma asa suntara kapitiántrín untsurak “¿Nekas jakayik?” tímiayi.

45 Tutai kapitián “Ee” takui, Jesusa ayashin Jusen tsankatkamiayi.

46 Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi.

47 Tura Máktaranmaya Marí, Jusé nukurí Marijijai ni ikiua-mun ii wajarmiayi.

## 16

*Jesus nantakmiania nu*

*(Mateu 28.1-10; Rúkas 24.1-12; Juan 20.1-10)*

1 Tura ayampratin tsawant nankaasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiayi.

2 Tura kashin Tumiñtin, ti káshik, nantu yáma jiinia, iwiarsamunam jearirmiayi.

3 Wésar chichainiak “Iwiarsamu wáitiri kayancha ¿yaki akanketramkattaji?” tiarmiayi.

4 Jear uunt kaya akankekman wáinkirmiayi.

5 Iwiarsamunam wayawar, natsan esaram puju pushin entsar, untsuurnumaanij pujan wáinkiar ti ashamkarmiayi.

6 Túmainiakui natsa tímiayi “Ashamkairap. Nasarénumiã Jesu krúsnum jakama nu éarme. Iniantkimiuiti. Juí pujatsui. Wátsek, juí ikiusmanum ístarum.

7 Túrarum werum Pítrusha, chíkich unuiniamurisha juí ujak-tarum. Kariréanam atumin émkiiyi. Turammarumna núnisan túruna wáinkiattarme” tímiayi.

8 Niisha ti ashamainiak purushniarar iwiarsamunmaya tseke wearmiayi. Ti ashamainia ásar, chikichkinkesha ujakcharmiiyi.

*Máktaranmaya Marín Jesus wantintiúkmiania nu*

*(Juan 20.11-18)*

9 Émkaka Tumiñtin ti káshik Jesus nantaki, Máktaranmaya Marín wantintiúkmiiyi. Nu María enentáiyã siati iwianchin Jesus yaunchu ajapruyayi.

10-11 Marisha Jesusa nemari kúntuts uutu matsatainian werí, “Jesus iwiaakui, imia wi wainkijai” tímiayi. Támaitiat anturkacharmiayi.

*Jesus jimiará shuaran wantintiukmiania nu*

*(Rúkas 24.13-35)*

<sup>12</sup> Tura urum jimiara shuar Jerusarénnumiã tsanin weenan, Jesus nusháa iira ajas tarimiayi.

<sup>13</sup> Niisha Jesusan wáinkiar waketkiar, unuiniamurin ujakarmiayi, tura ni chichamencha anturkacharmiayi.

*Jesus ni unuiniamurin akupkarmiania nu*

*(Mateu 28.16-20; Rúkas 24.36-49; Juan 20.19-23)*

<sup>14</sup> Nuyasha Jesusa auntse unuiniamurí misanam pekaamkar pujuinian Jesus tarimiayi. “¿Atumí enentái urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiarín wáinkiaru chichamen anturkacharu ásarmatai kakantramiayi.

<sup>15</sup> Nuyá chichaak “Ashí nunkanam wetarum. Túrarum ashí shuarnum Yusa shiir chichame etserkatarum.

<sup>16</sup> Shuar anturak imiani uwemprartatui. Shuar antukcharka, tuke sumamawartatui.

<sup>17</sup> Shuar winia náarun pachis, Yúsan nekas enentáimtakka, juna túrawartatui, Yusa kakarmarín iniakmastaj tusa: iwianchin jiki akupkartatui; chíkich chichamjai chichasarukamtai Winia nekas enentáimturatui;

<sup>18</sup> napincha achiksha, tseasnasha úmaksha, jaa ajascharatui. Jaa shuaran ni uwejejai antin, nu shuaran péñker awajsartatui.” Tu tímiayi.

*Jesus nayaimpiniam wakamiania nu*

*(Rúkas 24.50-53)*

<sup>19</sup> Jesus chichas amukmatai, Yus nayaimpiniam jukimiayi. Túruna Yusa untsuuriní pujusmiayi.

<sup>20</sup> Ni unuiniamurísha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

## Yúsán Shiir Chichamen

### RÚKAS aarmia nu

<sup>1</sup> Nekas iiní Jesus túramia nuna “ímatrusan áartajai” untsurí aents tiarmiayi.

<sup>2</sup> Yámankamtaikniumiān ísarmia nú shuar, tura Yus-Chichaman etserkatniun yáinkarmia nusha in unuitiamprarmia nútiksaran áartinian wakeriarmiayi.

<sup>3</sup> Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímatrusnak amincha áatratajtsan wakerimjame, winia úuntur Tiupiru.

<sup>4</sup> Jintintramawarma nú nankaamas nekaata tusan wakerakun áatjame.

#### *Imiakratin Juan̄ka akiiniatniur̄in ujakmiania nu*

<sup>5</sup> Jutía nunkanam uunt akupin Erutis akupkama nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeayuyai. Ni nuwēsha Irisapít Arun̄ weeayuyai. Irisapítia úntrisha Israer-shuar Yúsnan pujurin ámiayi.

<sup>6</sup> Yúsjaisha Sakaríassha Irisapítcha mái-metek péñker ámiayi. Yus akupkama nunasha umirin ámiayi. Tuma asamtai penkesha chíkich nin yajauch chicharkatin atsuarmiayi.

<sup>7</sup> Yusjaj̄ péñker wekainiayat Irisapít júrechuyai. Túrasha mai úuntach ámiayi.

<sup>8-9</sup> Israer-shuar Yúsnan pujurin chíkich weeanmayā nuyá chíkich weeanam, an̄kant an̄kant Yusa jeen takáu ámiayi. Chíkich tsawant, Sakarías weeá takastin amia nūj, Sakaríaska kun̄kuinian ekeemaktaj tusa in̄it wayat̄niuyuyai.

<sup>10</sup> In̄it kun̄kuinian ekeemaj̄ untsurí aents aani matsamsar Yúsán áujtak pujuarmiayi.

<sup>11</sup> Sakarías in̄it pujaj̄ kun̄kuin ekeematainiam untsuurnu-maan̄j aya aneachma nayaimpinmayā suntar wajamiayi.

<sup>12</sup> Nuna wajan wáiniak Sakaríaska purushnairmiayi.

<sup>13</sup> Túrasha nayaimpinmayā suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkaȳ. Tura ame nuwem Irisapít uchin takustatui. Nii akiiniamtai, “Juan̄” anaikiata.

<sup>14-15</sup> Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karia ainia nuna

umarchattawai. Tura áetak akiinchanak Yusa Wakaní pimiutkattawai, tímiayi.

<sup>16</sup> Tura ni shuarin Israer-shuar áiniana nuna, ii Uuntri Yusjaj ataksha nawamtikiartatui.

<sup>17</sup> Uunt Yúsajya akatramu átatui. Yaunchu Yúsnan etserin Erías kakaram etserkamia núnisan niisha etserkattawai. Nujaj shuaran ni uchiríjjaj nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentáj iwiaramu arti tusa etserkattawai” tímiayi nayaimpinmaya suntar.

<sup>18</sup> Nuna takui Sakarías nayaimpinmaya suntaran tímiayi “¿Nunasha warijjain paant nekaataj? Wisha nuarjaj máí-metek ti úuntchichukaitiaj” tímiayi.

<sup>19</sup> Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi.

<sup>20</sup> Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin penké tujinkiatame. Tura wi tajana nu, tsawant jeamtaí túrunattawai.”

<sup>21</sup> Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi.

<sup>22</sup> Nuyá Sakarías jiinkimtai, áuj sartaj tukamá tujinkiarmiayi. Sakaríaska, muut ajasu asa, aya úwijmiasan chichamiayi. Túmakui, Sakarías init pujus Yúsaj wáimiakun nekaawarmiayi.

<sup>23</sup> Yusa jeen takastin tsawantri amuukamtaí Sakaríaska ni jeen waketkimiayi.

<sup>24</sup> Nuyá ukunam ni nuarj Irisapít ajaprukmiayi. Tura senku nantutin aya jean pujusmiayi.

<sup>25</sup> Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

*Jesusa akiiniatniurin nayaimpinmaya suntar etserkamiania nu*

<sup>26</sup> Nu senku nantu nankaamasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai.

<sup>27</sup> Nasarénumia nuwan, naarj Marí, iyutí tusa akuptukmiayi. Nu núwaka áishmanjaj pujuchuyayi. Niisha Jusejaj nuatnaikiatsa anajmanair pujumiayi. Juseka uunt Tawit weeayuyayi.

<sup>28</sup> Wats, nayaimpinmaya suntar Marí pujamunam wayá tímiayi “Yus penker enentáimturma asamtaí, ámin winitjame,

Mariya. Yuska ámin nemartamuk ashí nuwá nan̄kaamas péñker awajtamui” tímiayi.

<sup>29</sup> Tura Marisha nayaimpinmayā suntaran wáiniak, chichaamun nékatsuk “Urukamtaik tu chicháa” tu enentáimpramiayi.

<sup>30</sup> Nuyá nayaimpinmayā suntar chicharuk tímiayi “Mariya, sapijmiakaip. Yus shiir enentáimturmawai.

<sup>31</sup> Antukta. Amesha ajaprukatme. Túram Uchi takustatme. Nusha “Jesus” anaikiata.

<sup>32-33</sup> Niisha uunt átatui. Nincha “Uunt Nan̄kaamaku Yusa Uchir̄i” tiartatui. Tura Uunt Yuska yaunchu Tawitian uunt akupniur̄i awajsamia núnisañ ame Uchirmin ame shuárumin Israer tutain Uunt akupin awajsattawai. Ni akupeamur̄isha Yus susamu asa pen̄ké amuukashtiniaiti” tímiayi.

<sup>34</sup> Nayaimpinmayā suntar nuna tutai Marí tímiayi “Nusha winia áishur atsaisha, ¿itiurak túrunataj?”

<sup>35</sup> Tutai nayaimpinmayā suntar Marí tímiayi “Yusa Wakaní tarutramtatui. Tura yurañmia núnisañ Uunt Yusa kakarmar̄i ijirmattawai. Nu tuma asamtai Uchi akiiniattana nu Yúsaiyā asamtai, “Yusa Uchir̄inti” tiartatui, tímiayi.

<sup>36</sup> Tura Irisapít ame kaná kaimia nusha núnisañ weam-tanam ajaprukai. Iis, “júrechuiti” tiarmia nu, yamaikia sais nantu pujawai ajamtin.

<sup>37</sup> Yúsjañkia itiurchatka pen̄ké atsawai” tímiayi.

<sup>38</sup> Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmayā suntarka wémiayi.

### *Irisapítian Marí iyumiania nu*

<sup>39-40</sup> Nu tsawant Marí wárikmas muranam Jutía nun̄kanam ni kaná kaj̄n Irisapítian iyutaj tusa wémiayi. Sakaríasaj̄ jeá, ni jeen wayá, Irisapítian áujsamiai.

<sup>41</sup> Marí áujeamun antukmatai Irisapítia ampujén uchir̄i muchitkiamiayi. Tumaj̄ Yusa Wakaní ni enentáin pimiutkami-ayi.

<sup>42</sup> Nuiñkia kakantar chichaak Marin tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti.

<sup>43</sup> Kaj̄rua, ame winia Uuntru nukur̄í áminin̄, Yus winia ti waitnentra asa, áujzata tusa ámin akuptamkachaik, tímiayi.

<sup>44</sup> Warí, wisha ame áujtamna nuna ántakui ampujruj̄ uchi waras muchitrutkayi.

<sup>45</sup> Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

<sup>46</sup> Nuna tinia iniaisamtai Marí juna tímiayi:

“Wikia tuke enentair̄jaj̄ “Yus timiá úuntaiti” tajai.

- 47 Tura Uunt Yuska winia Uwemtikruru asamtai ti waraajai.  
 48-49 Wisha péejchach ain ni wakeramurin umiktajtsan wakerakui winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamá nan kamamunak tuke turutú ajartatui.  
 50 Tura Nin umirkatniun wakerana nunasha Yus tuke waitnentrartatui.  
 51 Ti itiurchatan páchitsuk túrait Nii. “Nan kaamantuitjai” tu enentáimtumainia nuna nupetkaiti.  
 52 Ashí akupin ainia nuna awakkaruiti. Tura íksan péejchach ainia nuna uunt awajsaruiti.  
 53 Péñker ana nuna kitiainiakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti.  
 54 Israer-shuar Niiniu ájinia núnaka waitnentratniun kajinmattsuk yáinmákuitji.  
 55 Yaunchu ii Uuntri Aprááman tura ní shuarnasha “túrattajai” timia nuna ímiatrusan tuke túrait.” Nuní tímiayi Marí.  
 56 Marikia Irisapítjai menaintiú nantu pujus ni jeen waketkimiayi.

### *Imiakratin Juan ka akiiniamuri*

57 Nuyasha ni jurertin tsawantri jeamtai Irisapítcha uchin áishman kan takusmiayi.

58 Tura ni shuarisha, ni írutramurisha “Irisapítian Yus ti shiir yáinmiayi” tuíniak, nin iyuwearmiayi. Tura máí-metek warasarmiyai.

59 Israer-shuar túrutai júnisaiti: uchi akiiniamuri uchu tsawant jeamtai, shunichiri nuapen tsupiktin awai, sirkunsiún tutai. Yus nuna tú tiniu asamtai tuke túrin ármiai. Wats, Irisapítia uchiri akiiniamuriniá uchu tsawant jeamtai tsupirkatai tusar ni jeen jearmiayi. Nuiñkia ni aparí naari Sakarías anaikiataitsar wakeriarmiayi.

60 Tura ni nukurí tímiayi “Atsá. Antsu ni naari Juan átatui.”

61 Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi.

62 Nuiñkia uchi aparín “¿Warí anaikiatajtsam wakeram?” tusar aya úwejejain iniasarmiyai.

63 Tutai uchi aparísha “Nakash surusta; áartaj tusan wakerajai” tusa aya úwejejain iniakmamiayi. Takui nakash susam, ni naari Juánkaiti, tu áarmiayi. Nuna wáinkiar “Ayawa urukakun ta” tu enentáimprarmiayi.

64 Nú chichamaik Sakarías chichatsuk pujamun chichakmiayi. Tura nuiñ Yusa náarincha shiir awajsamiayi.

65 Nuin<sub>h</sub>kia ni írutramur<sub>h</sub>sha ashamkarmiayi; tura ashí Jutía nun<sub>h</sub>ka murá amia nu<sub>h</sub> nu túrunamun ujakam ashí nekaawarmiayi.

66 Nu túrunamun antukar ti enentáimsarmiayi. Tura “ju uchin Yus nekas pujurtsuk. Tuma asantai uunt ajas ¿urukuk ati?” tu enentáimprarmiayi.

*Sakarías Yus jintintiam tímiania nu*

67 Uchí apar<sub>h</sub> Sakarías, Yusa Wakaní pimiutkam tura Yus jintintiam, juna tímiayi:

68 “Israer-shuartí ii Yus<sub>h</sub>ri naari shiir awajsatniuitji. Ii Yús<sub>h</sub>r<sub>h</sub>sha tarutmaidji. Tura uwentikrampraitji.

69 Yaunchu ii uuntri<sub>h</sub> Tawit Yusa wakeramur<sub>h</sub>j<sub>h</sub>ia<sub>h</sub> uunt akupin áchamkia. Tura ni ukur<sub>h</sub>in ti kakaram Uwentikkiartinian suramsaitji.

70-72 Yuska ii nemasriya tura in nakitramainiajn<sub>h</sub> nuyá uwentikrampratniun enentáimsamia nuna, yaunchu ni etserniur<sub>h</sub>in pé<sub>h</sub>ker armia nuna ujakmiayi. “Winia ti pé<sub>h</sub>ker chichamprun tájana nuna yapaj<sub>h</sub>tsuk umirkan tuke wáitnentratajrume” yaunchu ii ún<sub>h</sub>tri<sub>h</sub>in tímiania nunasha ni etserniur<sub>h</sub>in ujakarmiayi. Yaunchu nu ujakma yamá<sub>h</sub> iisha wainji.

73-75 Nu ujakman Yuska yámankamtaik imiá yaunchu ii uuntri<sub>h</sub> Apraáman tíchamkia. Apraáman ujakmia nu jú<sub>h</sub>iti: “Wi wakera<sub>h</sub>j nútiksaran, Winia umirtukar pé<sub>h</sub>ker wekainia nuna ni nemasriya uwentikrattajai. Sapijmiatsuk winia tuke takar-tusarat tusan túrattajai” Yus tímiai<sub>h</sub> Apraáman. Iisha ni shuari<sub>h</sub> asakrin, nuna taku incha túramaji.

76 Tura amincha, uchiru, “Uunt Yusna etserniuiti” turamartatui. Amesha ni tátin<sub>h</sub>tri<sub>h</sub> iwiarataj tusam Uuntai<sub>h</sub> ém<sub>h</sub>kim wétatme.

77 Ni shuari<sub>h</sub>, ni tunaari<sub>h</sub> tsan<sub>h</sub>kurnar uwemprarat tusam túrattame.

78-79 Yuska ashí shuaran anea asa, incha wáitnentr<sub>h</sub>amak ni pujamunmaya<sub>h</sub> ni tsáapnin<sub>h</sub>tri<sub>h</sub>in suramsaitji. Ni enentá<sub>h</sub>in kiritniunam wekainia nuna, mesertinnium jeatemá ásarmatai, ni tsáapnin<sub>h</sub>tri<sub>h</sub> jeat<sub>h</sub> tusa túrait<sub>h</sub>i. Tura ashí incha ii enentá<sub>h</sub>in imiatkinchanum wekasarmí tusa túrait<sub>h</sub>i.” Nuní tímiai<sub>h</sub> Sakarías.

80 Uchisha tsakarmiayi. Tura Yús<sub>h</sub>an nekaki-nekaki wémiayi. Israer shuar<sub>h</sub>num etserkatin tsawan<sub>h</sub>tri<sub>h</sub> jeatsa<sub>h</sub>in<sub>h</sub>kia atsamunam pujuyayi.

## 2

*Jesusa akiiniamuri*

*(Mateu 1.18-25)*

<sup>1</sup> Wats, Juan akiiniamia nú uwitin uunt akupin Akustu ashí nun<sub>h</sub>kanam áentsun nekapmarartí tu chichakmiayi.



<sup>2</sup> Nu nekapmartinian yaunchu túrushtain yamáí túriarmiayi. Siria nunkanam Seriniu akupin pujái túrawarmiayi.

<sup>3</sup> Ni naari áartaj tusa ashí shuar ni nunkenin wétin áarmiayi.

<sup>4</sup> Tuma asamtai Jusé Nasarét péprunmaya Kariréa nunkanam amia nuyá jiinki Pirin péprunam Jutía nunkanam amia nuí wémiayi. Juseka Tawit weenam akiinia asa, ni nekas nunkenka Pirinkauyayi.

<sup>5</sup> Nu asamtai, ni náarin áartaj tusa Jusé wémiayi Marijiai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijiai ajamtiniuyayi.

<sup>6</sup> Tura nuí Pirinnum pujuiniaí Marí takustintri jeamiayi.

<sup>7</sup> Nuí iwiairin uchin áishmankan takusmiayi. Tura uchi penutaijiai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

*Murikiun wáinniuu nayaimpinmaya suntar Yus akatar akuptukmia nu*

<sup>8</sup> Tura Pirinnum tíjiuch murikiun wáinin kashi murikrin wáiniuk pujuarmiayi.

<sup>9</sup> Túmainiaí nayaimpinmaya suntar murikiun wáinin matsatainian wantintiukmiayi. Tura Yúsnumiá tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi.

<sup>10</sup> Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjarme.

<sup>11</sup> Júiti: yamáí tsawantai uunt Tawitia péprurin Pirinnum yaunchu Yus anaikiamu KRISTU tutai, uwentikramprataj tusa akiinturmarme. Nu Uchisha ashí áentsun akupniuiti, tímiayi.

<sup>12</sup> Tura jujai nekaattarme: uchi penutaijiai penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.”

<sup>13</sup> Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

<sup>14</sup> “Nayaimpinmasha Yus nankaamantuiti tu enentáimtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

<sup>15</sup> Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

16 Nuna tiar wárik wearmiayi. Tura Marincha Jusencha wáinkiarmaiya. Tura uchincha waaka yurumtainiam tepan wáinkiarmaiya.

17 Wear nuna wáinkiar, nayaimpinmaya suntar uchi túrunamuriñ timia nuna etserkarmiayi.

18 Tura murikiun wáinin tiarmia nuna antukaruka ti enentáimtusarmiayi.

19 Túrasha Marikia ashí túrunamia nuna ni enentáijjainkia enentáimtu pujumiayi.

20 Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímatrusañ túrunayi” tiarmiayi. Tuma ásar Yusa náarñ shiir awajsar kantampruawar wakеткиarmiayi.

### *Uchin Jesusan Yusa Uunt Jeen itiarmiania nu*

21 Tura uchi akiiniamu uchu tsawant jeamtai, ni túrutairñ túrin ásar, ni shunichirñ nuapen tsupirkarmiayi. Túrawar Marí ajapratsañ nayaimpinmaya suntar tímia nútiksañ “Jesus” anaikiarmiayi.

22 Tura Muisais akiiniatniunam akupkamia núnisañ, tsawantrñ jeamtai, Yusa Uunt Jeen Jerusarénum uchin Yus iiktustai tusar júkarmiayi.

23 Kame Yus-Papinium ju aarma awai:

“Ashí uchi iwiairñ áishmañ akiinkiuñka Yusna átatui.”

24 Tuma asamtai, Marí Yusa Uunt Jeen wáitsuk pujamu wayatniurñ jeamtai, uchin Yus iistí tusa Yusa Uunt Jeen Jerusarénum pujana nuñ itiarmiayi. Tura yampitsan jímiar an súsarmiayi. Muisáis akupkamun umiiniak nuna túrawarmiayi.

25 Nu túmaj Semeún naartin áishmañ Jerusarénum pujumiayi. Semeúnsha Yusa Wakaní pujurma asa péñker áishmañkayuyai. Yúsan nekas enentáimtiniuyuyai. Yusa anaiki-amurijjaj Israer-shuar ankant ajastin jeati tusa nákauyuyai.

26 “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi.

27 Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantaj Muisáis tímia núnisañ umirkatai tusar Marisha Jusesha uchin Jesusan Yusa Uunt Jeen itiararmiayi.

28 Itiariarmatai Semeún uchin jusa miniakas Yúsan áujuk juna tímiayi:

29 “Yamaikia, Uunta, Amijn wi jeatin ankant atí. Turutmi-anna nu ímatrusmek umikiume.

30-31 Ju Uchi ashí aents uwemtikrartá tusam susamna nuna yamá imia winia jjiirujaj wáinkiajai.

32 Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatnuiitjai.”

33 Tura Semeún Uchiniun tu chicharkui Jusesha Jesusa nukurísha ti enentáimprarmiyai.

34 Semeúnsha chichaak “Yus shiir enentáimturmasartí” nin tímiyai. Nuyasha Marin chicharuk tímiyai “Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarın ti paant iniakmastatui. Tuma ain untsurí Aun yajauch chichariartatui.

35 Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiyai Semeún.

36 Nuwasha Ana naartin nuj Yusa Uunt Jeen pujumiyai. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwa. Niisha ti úuntchiyayi. Niisha yama nuatnaikiamujai siati uwi ni áishrijjai tsanin pujusarmiyai.

37 Tura wajemamiyai. Tura uchenta kuatru uwi takakuyayi. Tura ninikia Yusa Uunt Jeenia jíintsuk káshisha tsawajsha tuke Yúsan áujniuyayi. Tura yurumtsuk Yúsan áujniuyayi.

38 Semeún tuasua amikmatai Anasha taa, Uchin wáiniak Yúsan yumińsamiyai. Tura Jerusaréńnum Yus uwentikrampratai tusa nákarmia nuna áujkuńka uchin áujmat wémiyai.

### *Nasarétnum wakеткиarmiania nu*

39 Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarétnum Jusesha Marisha Uchisha wakеткиarmiyai.

40 Uchi Jesus tsakaki, kakaram ajaki tura nú nankaamas nekaki wémiyai. Tura Yus Nin ti shiir awajsamiyai.

### *Jesus Yusa Uunt Jeen túrunamuri*

41 Jusesha, Jesusa nukurísha tuke uwitin paskua námper jeakui Jerusaréńnum weu ármiyai.

42 Ni túrutairi túruiniak, Jerusaréńnum weak Jesusan tuse uwi jeamtai júkarmiyai.

43 Námper amuukamtai ni nukurísha Jusesha nékachmanum Jesuska Jerusaréńnum juákmiyai.

44 Marisha Jusesha “wíi shuarjai winiawai” tusa, núnaka eatsuk chikichík tsawant wekasarmiyai. Nuyá wáinkiatatjukamá, ni shuariin tura ni nékamunam eakarsha,

45 wáinkiacharmiyai. Nuińkia Jerusaréńnum ataksha waketrukiarmiyai, eaktai tusar.

46 Tura menaintiú tsawant eakar Yusa Uunt Jeen Yus akup-kamun jintinnian anturak anintrú pujan wáinkiarmaiya.

47 Tura nuí ashí Jesusan anturkarmiania nu, niisha ti nékakui tura áimtanash ti péñker áimkiui, ti enentáimturarmiayi.

48 Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ¿ausha urukamtai itiurchat enentáimtikrumam? Ame apasha wisha urukayik tusar ti eakjame” tímiayi.

49 Tutai Jesus tímiayi “¿Urukamtai eattrum? Winia Aparnan túratnuiitjiana nuka nékatsrumek” tímiayi.

50 Tura timia núnaka peñké nekaacharmiayi.

51 Nuyá Jesus niijjái Nasarénum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi.

52 Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

### 3

#### *Imiakratin Juan̄ka etserkamurí*

*(Mateu 3.1-12; Márkus 1.1-8; Juan̄ 1.19-28)*

1 Tipiriu uunt akupin pujam kinse uwí jeamtai, Jutía nuñkanam Punseu Piratu akupin pujumiayi. Tura Kariréa nuñkanam Erutis akupin pujumiayi. Itiurea nuñkanmasha Trakuniti nuñkanmasha ni yachí Jiripi akupin pujumiayi. Tura Apirinia nuñkanam Risanias akupin pujumiayi.

2 Tura nu uwitin Anassa Kaipiássa Israer-patri uuntri pujuarmiayi. Nu uwitin Sakaríasa uchirí Juan̄ atsamunam pujan Yúsaiya chichaman antukmiayi.

3 Nuyá Jurtañ entsanam supichik matsamarma nuna Juan̄ wekaatusar juna tímiayi “Winia tunaarun Yus tsankurturat tusarum, enentai yapajjárum imiantiarum.” Tu ujakmiayi.

4 Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai. Nii untsunuk juna tawai: Atumí enentái Uunta jintí iwiarturtarum; naka awajsatarum.

5 Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti.

6 Túrunamtai ashí nuñkanmayá aents Yúsaiya uwempratin aan nekaawartatui.

7 Untsurí aents imiatit tusar tariarmia nuna Juan̄ chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi.

8 “Iikia Apraám weeitji, tuma asakrin Yus shiir enentáimturmají” tu enentáimtumasairap. Antsu enentáim yapajíámuitkiuinkia péñker wekaamurmijíai paant iniakmastarum. Warí, Yus wakerakka, ju kayan Apraáma shuarín páchitsuk najankainti, tímiayi.

9 Aneartarum. Numi ajaktinían kampuwárín jacha atuttsamuiti. Numi péñker nereatsna nuka ajakar jiníum apeamu ártatui” tímiayi.

10 Tutai aentska enentáimprar “¿Nuiñkia itiurkatjik?” tiarmiayi.

11 Tutai Juan tímiayi “Jimiará pushin takakna nu, takakt-suna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

12 Uunt akupniu kuítrín juu armia nú shuar imiantiaj tusar Juánkan weriar aniasarmiayi. “Uunta, ¿iisha warí itiurkatjik?” tiarmiayi.

13 Tutai Juan tímiayi “Kuit uunt akupin tana nu iniankasrum achikiairap.”

14 Suntarsha aniasarmiayi “Uunta, ¿iisha warí itiurkatjik?”

Juansha tímiayi “Ame kakarmarmijíai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

15 “Ju Juan Yusa anaikiamurínchuashit” tu enentáimsar paant nekaataitsar nákarmiayi.

16 Tumaj Juan tímiayi “Wikia aya ayashmin entsanam imi-ajrume. Tura wijíai nankaamas ana nu tátatui. Ni sapatrí jínkiamurínkisha atitrachminíaitjai. Niisha taa, imiantinia áanis tura jíiya áanis Yusa Wakanín enketramprattarme.

17 Shuar aruusan awajtia núnisan, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainíam apeattawai” tímiayi.

18 Juan nu arant shiir chichaman áentsun ti núkap ujakarmi-ayi.

19 Tura nuyasha akupin Erutisan chicharkamiayi. Ni yachi Jiripi nuarín Jirutíasan kasararak nuatkui tura chíkich yajauch-incha túrakui chicharkamiayi.

20 Tura Erutis núnaka ántutsuk chíkich yajauchin túramiayi. Juánkan achik sepunam enkeamiayi.

### *Jesusa imianmiari*

*(Mateu 3.13-17; Márkus 1.9-11)*

21 Nu túruntsain, Juansha ashí nú nunkanmaya áentsun imiak pujurainaj Jessusha imianmiayi. Niisha Yúsan áujuk pujaj nayaimpisha uranmiayi.

22 Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti wararjame” tímiayi.

*Jesukrístu shuari*

*(Mateu 1.1-17)*

23 Jesus trainta (30) uwí takaku asa ni takatrín nan̄kamamiayi. “Jusé uchirínti” tiniu armiayi. Jusésha Iria uchiríyayi.

24 Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi;

25 Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi;

26 Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi;

27 Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi;

28 Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi;

29 Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi;

30 Matat Riwí uchiríyayi; Riwí Semeún̄ka uchiríyayi; Se-meún̄ Jutáa uchiríyayi; Jutá Jusé uchiríyayi; Jusé Junan̄ka uchiríyayi; Junan̄ Iriakímia uchiríyayi;

31 Iriakím Mirea uchiríyayi; Mirea Mainián̄ka uchiríyayi; Mainián̄ Matata uchiríyayi; Matata Natan̄ka uchiríyayi;

32 Natan̄ Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramún̄ka uchiríyayi; Saramún̄ Naasun̄ka uchiríyayi;

33 Naasun̄ Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi;

34 Jutá Jakupa uchiríyayi; Jakup Isaka uchiríyayi; Isak Apraáma uchiríyayi; Apraám Tarea uchiríyayi; Taré Nakura uchiríyayi;

35 Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi;

36 Sara Kainián̄ka uchiríyayi; Kainián̄ Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi;

37 Ramik Matusarínkia uchiríyayi; Matusarín Enuka uchiríyayi; Enu Jaritia uchiríyayi; Jarit Maararíira uchiríyayi; Maararír Kainianka uchiríyayi;

38 Kainian Enusa uchiríyayi; Enus Seta uchiríyayi; Set Atańka uchiríyayi; tura Atań Yus najanamuyayi.

## 4

### *Jesusa nekapsamuri*

(Mateu 4.1-11; Márkus 1.12-13)

1 Jesusa enentáin Yusa Wakaní pimiutkamiayi. Jesussha Jurtań entsanmaya waketkintai Yusa Wakaní aents atsamunam jukimiayi.

2 Tura nuńsha kuarenta tsawant pujusmiayi. Tura íwianch Nin tunaanum ajuaraintiajta tusa pujurmiayi. Nu kuarenta tsawantin Jesus yurumsuk pujá asa ti tsukammiayi.

3 Nuńkia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

4 Tutai Jesus tímiayi “Yus-Papí tawai: “Aya apatkujajin shuar iwiaaku pujuschamniaiti. Antsu ashí Yus-Chicham tana nujaj nekas iwiaaku pujusminiaiti,” tawai” tímiayi.

5 Tura nuyá íwianch naint yakí wájakmanum jukí, ashí nunka ainia nuna ju chichamaik iniaktusmiayi.

6-7 Tura chicharuk tímiayi “Ashí ju nunka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nunkanam ashí akupkatniun susattajme. Tura nuj ni warirí ainia nusha áminiu átatui” tímiayi.

8 Tutai Jesus tímiayi “Yus-Papí tawai: “Aya Nińki Yus ame Úntrum tikishmatram enentáimtustiniaitme.” Tau asamtai, werumta, iwianchi” tímiayi.

9 Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi:

10 “Yus-Papí tatsuk: “Yuska ni suntarín wáinkiatá tusa akupturmaktatui.

11 Kayanam ajintrań tusa wenkurmaktatui.” Tuma asamtai nekas Yusa Uchiríntkiumka juyá akaikim ini-aata” tímiayi.

12 Tutai Jesus áimiuk tímiayi “Yus-Papí junasha tawai: Yus ame Úntrum nekapsataj tiip.”

13 Tuma asamtai íwianch penké tujintiak ishichik tsawant Jesusan iniaisamiayi.

*Kariréa nunkanam Jesus ni takatrín nankamamiania nu*  
(Mateu 4.12-17; Márkus 1.14-15)

14 Jesus ni enentáin Yusa Wakaní kakarmari pimiutkamu ajas Kariréa nunkanam waketkimiayi. Nu nunkanam nankaamantu túramurin áujmatiarmai.

15 Nu nunkanam ashí péprunam Israer-shuar iruntai jea armia nu ununiarmiayi. Tura anturkarmia nuka ni náarin shiir awajsarmiayi.

*Jesus Nasarétnum pujumiania nu  
(Mateu 13.53-58; Márkus 6.1-6)*

16 Ni tsakarmariin Nasarétnum Jesus wémiayi. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujсатаj tusa wajakmiayi.

17 Nuinkia Yúsnan etserin Isayasa áarmarin súsarmiayi. Nuna urak, nu juna áarman wáinkiamiayi:

18 Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna pénker awajsatniuncha,

19 tura Uunt Yus, shuáran yaiñtin tsawantri jeán etserkatniuncha akuptukuiti.

20 Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi.

21 Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

22 Jesusan ashí pénker áujmatiarmai. Tura Jesus ti shiir chichaakui ti enentáimprar “Juka Jusé uchirinchukait” tiarmiayi.

23 Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juisha túrata tusarum nu turuttiatrume.

24 Túrasha nekas tájarme, Yúsnan etserniun ni nunkenkikia nii tana nuna anturainiatsui.

25 Nuyasha tájarme, Irías pujumia nú tsawantin, menaintiú uwí nankaamas yumi yutukcha asamtai ashí Israer nunkanam ti tsuka amia nu ti untsurí waje irunmiayi.

26 Tuma ain nu wajen yaiñti tusa Yus Iríasan akuptukchamiayi. Antsu chíkich nunkanmayá wajen Sarepta péprunam pujumia nuna yaiñti tusa akuptukmiayi. Sarepta pepru Sitiún péprunam tíjiuch pujawai.

27 Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nunka, Sírianmayá Naamankan tsuármiayi” tímiayi Jesus.



28 Israer-shuarsha iruntai jeen pujuarmia nu, nuna an-tukar ti kajerkarmiayi.

29 Tura wajaťkiar Jesusan jiki péprunmaya akupkarmiayi. Tura pepru amia nu naint yakí nánkatkamunam, nuyá akaki ajuatai tusar júkiarmiayi.

30 Túrasha Jesuska irunar matsatainiamunman etempraktak jiinki wémiayi.

*Iwianchrukun Jesus tsuármiania nu  
(Márkus 1.21-28)*

31 Nuyá Jesus Kariréa nunkanam Kapernáum pepru amia nu wémiayi. Tura Israer-shuara ayampratin tsawantrijn tuke etserki wémiayi.

32 Yusa kakarmarin takaku asa nujai etserkamiayi. Tuma asamtai “Yusa kakarmarijiai unuitiamtsujik” tiar ti enentáimprarmiayi.

33 Chíkich tsawantaj áishman iwianchruku Israer-shuar iruntai jeenam pujumia nu untsumuk tímiayi,

34 “Inikiartusta. Iikia Áminkia pachistin nakitiaji. ¿Warí, incha amukratkataj tusam táchamek? Wikia nékajme. Ámeka ti penker Tunaarincha núitme” tímiayi.

35 Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chichamaik íwianch áishmannumia jiinki weak nunká ajuant ikiukmiayi. Túrasha nekas yajauch awajtsuk ikiukmiayi.

36 Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmarijiai iwianchin jiki awematsuk” tiarmiayi.

37 Tura ashí nú nunkanam Jesusa túramurijn áujmatarmiayi.

*Semun Pitru tsatsarin Jesus tsuármiania nu  
(Mateu 8.14-15; Márkus 1.29-31)*

38 Jesussha Israer-shuara iruntai jeenia jiinki Semunka jeen wémiayi. Semunka tsatsari tsuer ti jáamiayi. Ti jaakui Jesusan “tsuárturtá” tiarmiayi.

39 Jesussha jaa tepan tsunsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

*Untsurí jaan Jesus tsuármiania nu  
(Mateu 8.16-17; Márkus 1.32-34)*

40 Etsa akaikin aj ni shuari nánkamas sunkurjai jaarmia nuna Jesusan ikiaatkarmiayi. Jesussha jáinian chikichkiniak chikichkiniak uwejéjai antiñkiar tsuáramiayi.

41 Ti untsurí iwianchruku armia nunasha iwianchrin jírkiarmiayi. Jiinkiar íwianchkia untsumainiak “Ámeka Yusa

Uchirínme” Jesusan tiarmiayi. Tura niisha “Jesuska Yusa anaikiamurinti” tu nékainiakui Jesus kakantar chicharak itiat-mantikiarmiayi.

*Kariréa nunkanam Jesus etserkamiania nu  
(Márkus 1.35-39)*

<sup>42</sup> Kashin káshik tsawaak Jesus péprunmaya jiinki atsamunam Niñki wémiayi. Tura shuarsha eakiar ni pujamunam jeariarmiayi. Tura iijiai tuke pujusat tusar emetataitsar wakeriarmiayi.

<sup>43</sup> Túmain Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupkamuitjai” tímiayi.

<sup>44</sup> Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

## 5

*Namakan ti untsurín achikiarmiania nu  
(Mateu 4.18-22; Márkus 1.16-20)*

<sup>1</sup> Chíkich tsawantai Jesus Jinisarít antumianka tutainium káanmatkari pujai ti untsurí shuar, Yusa chichamen antuktai tusar wakeruiniak Jesusai káunkarmiayi. Antuktai tusar wakeruiniak kaé ajattsarmiayi.

<sup>2</sup> Tura jimiará kanun antumiankan káanmatkariin tepan wáinkiarimiayi. Ni nérenniurinkia jíinkiar ni nekarin nijiá pujuinia asamtai kánuka ankant ármiai.

<sup>3</sup> Tuma asamtai Jesus Semunka kanurín enkempramiayi. Tura Semunkan chicharuk “Ishichik ajapén juruktía” tímiayi. Nuiñkia kanunam enkemas áentsun káanmatkanam pujuinian unuiniamiayi.

<sup>4</sup> Unuinasua amik Semunkan chicharuk “Kanu kunanam jukim neka ai ajunkatarum” tímiayi.

<sup>5</sup> Tutai Semun tímiayi “Túrasha, Uuntá, káshisha tuke ajujunkuar tsawarji. Túrasha penké achikchaji. Kame áankisha Ame támajai ajunkatjai” tímiayi.

<sup>6</sup> Tura ajunkar namakan ti untsurín achikiarmiayi. Túram nekasha jaanaki wémiayi.

<sup>7</sup> Tuma asamtai ni írutkamurín chíkich kanunam pujuinian uwejéjai “winitia, yáintkiamniuram” tusar untsukarmiayi. Ni-isha táarmiayi. Túrawar jimiará kanunam métej awajsarmiayi. Tura kanusha inít wayastatuk ajamiayi.

<sup>8</sup> Nuna túramtai Semun Pítior Jesusan tikishmatar tímiayi “Uuntá, wikia ti tunaitjai. ¿Wíjiaisha ititurak pujustam?”

<sup>9</sup> Semunsha ni írutkamurijiai namakan timiá untsurín wáinkiar ashankarmiayi. Tuma asa Semunsha nuní tímiayi.

10 Tura Sepetéu uchiri Jakupusha Juansha Semunjai pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-eau ajastatme.”

11 Nuyasha kanurin kukar júkiar, ashí takakmarincha ikukiar Jesusan nemarki wearmiayi.

*Tunamaru áishmankan Jesus tsuármiania nu*  
(Mateu 8.1-4; Márkus 1.40-45)

12 Ukunam Jesus chíkich péprunam pujai tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeke páchitsuk tsuáramniaitme.”

13 Nuna tutai Jesus antin tímiayi “Wakerajai. Tsuaajme.” Tura nú chichamaik tunamarusha pénker ajasmiayi.

14 Túrasha Jesus chicharuk “Ámeke nu etserkaip, tímiayi. Antsu Israer-shuar Patrij werim ame pénker ajasmanum Muisáis akupkamia núnismek susata. Nujai ashí shuar ame pénker ajasmarmín nekaawartatui” tímiayi.

15 Tura Jesusa túramuri ti etsernamiayi. Túmakui untsurí aents anturkataj tusar káutkarmiayi. Tura ni sunkurincha tsuámartaj tusar káutiarmiayi.

16 Núnisan Jesuska aents atsuiniamunam we ni Aparin áujmiayi.

*Emearun Jesus tsuármiania nu*  
(Mateu 9.1-8; Márkus 2.1-12)

17 Chíkich tsawantaj Jesus unuiniak pujai Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénumiasha káunkarmia nu antúu pujuarmiayi. Jaa tsuártinian Yusa kakarmarin takakuyayi Jesus.

18 Nuinkia emearun tampumpua kuaru shuar itiararmiayi. Jesus pujamunam init awayattsar wakeriararmiayi.

19 Tura shuar ti untsurí piaku asamtai wayamnia atsumiyai. Túmaitkui yakiini wear jean urakar, aents kaé ajas matsatmanum Jesus pujamunam emearun tampunam nená itiararmiayi.

20 Nin itiarmania nu, Jesus Yusa kakarmarin takakui, tú enentáimtamun Jesus nekáa emearun tímiayi “Ame tunaarum tsankuramuitme.”

21 Nuinkia Israer-shuara jintinniurisha, Pariséusha ni enentáin enentáimsar “¿Jusha yait Yúsa náarin yajauch awajtin? Warí, aya Yúsak tunaan tsankurachminkiait” tu enentáimsarmiayi.

22 Tura Jesus ni enentáimsamurin nekáa tímiayi “¿Urukamtai tú enentáimprarum átum?”

23 Nuin<sub>̄</sub>kia ¿warí imiá yúpichuchit, tsuártiniak, ni tunaarí tsan<sub>̄</sub>kuratniuk?

24 Wats, Aents Ajasu tutai Wisha tunaan tsan<sub>̄</sub>kuratniun Yusa kakarmar<sub>̄</sub>in takakjai. Jujai nekaatarum tusan wats itiurchat tárumna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeem<sub>̄</sub>in wetá.”

25 Nú chichamaik emearu niisha íimiainiamunman<sub>̄</sub> tampur<sub>̄</sub>in achik wajaki ni jeen Yúsan wararki wémiayi.

26 Túmakui ashí shuar ti enentáimprar Yusa náar<sub>̄</sub>in shiir awajsarmiayi. Tura ashamainiak “aentsti tujinkiamu yamáí wáinkiaji” tiarmiayi.

*Riwin Jesus untsukmiania nu*

*(Mateu 9.9-13; Márkus 2.13-17)*

27 Ukunam Jesus wekas akupniu kuítr<sub>̄</sub>in-juu, naarí Riwí, ni chíkich naarí Mateu, akupin akitiai jeanam pujan wáinkiamiayi. Wáiniak “nemartusta” tímiayi.

28 Tutai Riwí wajaki takakmar<sub>̄</sub>inkia ikiuak Jesusan ne-marsamiayi.

29 Nuyá ukunam Riwí namperan Jesusan najatamiayi. Tura untsurí akupniu kuítr<sub>̄</sub>in-juu tura chíkich shuarsha káunkar misanam pujuarmiayi.

30 Tura Pariséusha Israer-shuara jintinniur<sub>̄</sub>isha Jesusan tsanumpruiniak Jesusa unuiniatur<sub>̄</sub>in tiarmiayi “¿Maaj, urukamtai atumsha akupniu kuítr<sub>̄</sub>in-juu ainia nújaj<sub>̄</sub>isha tura chíkich yajauch shuarjaj<sub>̄</sub>isha iruntrarum yurumprum?”

31 Tutai Jesus áimkiamiayi “Shuar jaachu pé<sub>̄</sub>ker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai.

32 “Wikia pé<sub>̄</sub>keraitjai” tuinia nuna untsuktajtsan táchaitjai. Antsu yajauch shuar ni enentáin yapajjá Winia ajasat tusan untsujai” tímiayi.

*Yurumtsuk Yus áuj<sub>̄</sub>satniun Jesusan aniasarmiania nu*

*(Mateu 9.14-17; Márkus 2.18-22)*

33 Nuyá Jesusan aníak tiarmiayi “Juan<sub>̄</sub>ka unuiniatur<sub>̄</sub>isha, Pariséu unuiniatur<sub>̄</sub>isha yurumtsuk Yúsan áujainiatsuk. Tura ame unuiniaturmeka ¿urukamtai ijiarma Yúsan áujainiatsu?” tiarmiayi.

34 Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamáí-nuatu pujai?”

35 Atsá. Wats Wisha ukunam junaktiatjai; nuin<sub>̄</sub>kia ijiar-matin átatui” tímiayi.

36 Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha

shiir anujkamu arut pushijjaj mai metek yamaram wáinkiachminiaiti.

<sup>37</sup> Núnisan nijiamanch yamá nawamu nuap najanamu arutnum yaraachminiaiti. Túramka nijiamanch kariak iji-akratniuiti; túmak nijiamchisha nuap najanamusha mai metek menkainiawai.

<sup>38</sup> Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniaiti.

<sup>39</sup> Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatui” tímiayi Jesus.

## 6

*Ayampratin tsawantaj trikiu neren achikiarmiania nu*  
(Mateu 12.1-8; Márkus 2.23-28)

<sup>1</sup> Ayampratin tsawantaj Jesussha unuiniamurijjaj araanunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi.

<sup>2</sup> Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukantai takaarum?”

<sup>3</sup> Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

<sup>4</sup> Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantanacha aya Israer-shuara Pátririj yúatin ármiai. Tuma ain Tawitcha yajachin túrutsuk achikmiayi, tímiayi.

<sup>5</sup> Wisha Aents Ajasuitkiun ayampratin tsawantan Nérenniurintjai” tímiayi Jesus.

*Shuara uweje jakaan Jesus tsuármiania nu*  
(Mateu 12.9-14; Márkus 3.1-6)

<sup>6</sup> Chíkich ayampratin tsawantaj Israer-shuar iruntai jeenam Jesus wayá unuiniartasa nankamamiayi. Nu shuar uweje untsuurja nu jakaa pujumiayi.

<sup>7</sup> Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuartimpiash” tusar ii pujuarmiayi.

<sup>8</sup> Túrasha Jesuska ni enentáimmiarín nekariarmiayi. Túmayat uweje jakaan chicharuk “Ju ajapén wajasta” tímiayi. Tutai áishman ajapén wajasmiai.

<sup>9</sup> Nuñkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujaj ¿tuá péñkerait? ¿Uwemtikratin, máatniujajsha tuá péñkerait?” tímiayi.

10 Nuyá téntakarmia nuna iis áishmaṅkan tímiayi “Uwejem takuitia.” Áishmaṅsha uwejen takuimtai nú chichamaik péñker ajasmiayi.

11 Tura chíkichkia ti kajerarmiayi. Túrawar “Jesus warí itiurkamniakit” tusar aniniaisarmiayi.

*Tuse unuiniamun Jesus anaikiamiania nu  
(Mateu 10.1-4; Márkus 3.13-19)*

12 Nuyá Jesus Yúsan áujsataj tusa náinnium wakamiayi. Tura nu kashi Yúsan au-aujkuwa tsawarmiayi.

13 Tsawarmatai unuiniamurin ikiankar tuse anaikiamiai. “Winia akatramuruitrume” tímiayi.

14 Ju árimiayi: Emka, Semuñ chíkich naarí Pítiur apujtusmia nu; tura nuyá ni yachi Antres, Jakupusha, Juañsha, Jiripisha, Parturumísha,

15 Mateusha, Tumassha, Arpeu uchirí Jakupusha, Ásump Semuñsha,

16 Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma árimiayi.

*Untsurí shuaran Jesus yáinkiarmaniania nu  
(Mateu 4.23-25)*

17 Niijjai Jesus náinniumiá pakanam taawarmiayi. Nuí pujusarmiayi. Nuísha untsurí unuiniamurísha, tura Jutía nunkanmaya, tura Jerusarénumiá tura nayaantsanam ayámach Tiru, tura Setuñ péprunmaya ti untsurí aents antuktaitсар pujuarmiayi. Jesus tsuarati tusar káunkarmiayi.

18 Iwianchrukusha tsuámararmiayi.

19 Jesus tsuártinian tujinkiachu asamtai ashi shuar antiñtaj tusar wakeriarmiayi.

*Náinnium Jesus etserkamu  
(Mateu 5.1-12)*

20 Ni unuiniamurin Jesus iis juna tímiayi: “‘Yusan atsumajai’ tárumna nu, Yus akupeamunam páchitkiaitrume; tuma asamtai warasminiaitrume.’

21 ‘Yamáí tsukamarmena nu ukunam ejemartatrume. Tuma asamtai warasminiaitrume. Yamái útrumna nu, ukunmañka wishirtatrume. Tuma asamtai warasminiaitrume.’

22 ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminiaitrume.’

23 ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsnan etserniun nútiksarañ yajauch awajsacharmakia.’

24 ‘Tura kuítrinniutiram atumsha atumí waratairí aya ya-maik waintrume. Ukunmaᅇka waraschattarme.’

25 ‘Atsumatsjai, tu enentáimprumna nu, ukunmaᅇka at-sumattarme. Nuinᅇkia waraschattarme. Yamái wishíarmena nu, ukunmaᅇka wáitiakrum úttiatrume. Nuinᅇkia waraschattarme.’

26 ‘Ashí aents atumin shiir awajtamkurmin aneartarum. Nujai waraschatniuitrume. Warí nuna uuntrí ántar-yusnan etserin armia nuna nútiksaraᅇ yaunchu shiir awajsarmiayi.’

*Ii nemasri aneatniun Jesus unuiniamiayi*

*(Mateu 5.38-48; 7.12)*

27 ‘Winia anturtarmena nuna juna tájarme: Ame nemasrum aneata, nakitramainia nusha shiir awajsata;

28 yajauch chichartamainia nusha shiir enentáimtusarta; katsekramainia nusha Yus áujtusarta.

29 Ame yapimin ijiutmamtai áatú yapiruᅇsha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata.

30 Seatmana nu susata, tura áminium jurutramainiakuisha ataksha awaᅇturkitia tiip.

31 Chíkich winia túrutati tusam wakeramna nútiksamek chikichcha túrata.’

32 ‘Iista, aya atumin anenmainia nuke aneakmesha, ¿nusha warí péᅇkera túrarum? Yajauch shuarsha nuna túrin áiniawai.

33 Tura atumniasha péᅇker awajtamainia nuke péᅇker awajkurmesha ¿nusha warí péᅇkera túrarum? Yajauch shuarsha nuna túrin áiniawai.

34 Awaᅇturkimniaiti tu enentáimtarum nuke íkiakrumsha ¿nusha warí péᅇkera túrarum? Yajauch shuar nuamtak yajauch shuarjai awaᅇturkimniaiti tu enentáimsar ikianainiawai.

35 Tura atumsha nemasrum aneatniuitrume, tura péᅇker túratniuitrume, tura awaᅇturkittiaawai tu enentáimtsuk ikias-tiniaitrume. Túrakrumninᅇkia Uunt Yus péᅇker akirmaktatrume; tura ni uchiríntjai tu iniakmastatrume. Yuska, “yumiᅇsajme” ticha nunasha tura yajauch shuarnasha shiir awajeawai.

36 ‘Ii Aparí waitnentrarniua nútiksarmek atumsha waitnentratarum.’

*Chikicha túramurí ti enentáimtusairap*

*(Mateu 7.1-5)*

37 ‘Chikicha túramurí ti enentáimtusairap. Núnisaᅇ Yuska atumí tunaarin iirtamsashtatui. Chikicha tunaarin “nuke asutniatniuiti” tiirap. Núnisaᅇ Yus atumin sumantikramashtatrume. Tsaᅇkurnairatarum. Núnisaᅇ Yus tsaᅇkurtamprattawai.

38 Chikichcha susata. Núnisaṅ Yus atumin suramsattarme. Niisha péṅker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksaṅ atumniasha túrutmattarme.”

39 Tura nuyasha júna métek-taku chichaman ujakarmiayi: “Jii kusurusha çitiurak chíkich kusuruncha jukimniait. Mai metek waṅnam iniaashtatuak?

40 Unuiniamua nu unuiniana nuna naṅkaamas áchatniuiti. Túrasha niisha ti unuimiatar unuiniana nujaj métek nekaamniaiti.’

41 ‘çItiurtsuk atumi jiiin numi eṅketna auk íitskesha atumí yachí jiiin tsuat eṅketusha iiyarum?

42 Ame jiiimiiin numi tuke eṅketaisha çitiurtsuk ame yatsumi jiiya tsuátan jurustajme tame? ¡Ántrairume! Emka ame jiiimiiin numi eṅketna nu jusata. Nuinḱia paant wáinkiatame yatsumi jiiin tsuat eṅketna nu jurustin.’

*Nerejai numi nekaainti*

*(Mateu 7.17-20; 12.34-35)*

43 ‘Péṅker numi yajauchin nereatsui; tura yajauch numi péṅkeran nereatsui.

44 Numisha ni neren nékanui. Tsachikniumiasha kushinḱiap júukchamniaiti. Tura naranmaya shuinia júukchamniaiti.

45 Núnisaṅ péṅker shuar ni enentái péṅker asamtai péṅkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyañ ni wenejai chichaawai.’

*Jimiará jea ukurtin*

*(Mateu 7.24-27)*

46 ‘Wi tájana nu túrachiatrumsha çurukantai Winia, Uunta, túrutrum?

47 Shuar winia chichamprun ántuinia nu jea jeammajai métekete. Winia anturtuk umiana nu jujaj métekete:

48 Shuar jeañ jeamuk emka inít taur kayanam ukurmai. Tura yumi ti yutuk, entsa nujanḱrua tukummaitiat pukukachmai kayanam ukuamu asa.

49 Antsu Winia anturtukiat umiatsna nuka jujaj métekete: Shuar jeañ jeamuk aya naikminiam jeammai. Tura entsa nujanḱrua tukumpram nu jeaka pukukamai. Tura mash sántramai.” Tu unuiniamiayi Jesus.

## 7

*Suntara yáintriṅ Jesus tsuármiania nu*

*(Mateu 8.5-13)*



1 Jesus áentsun unuinasua amik Kapernáum péprunam wémiayi.

2 Nuí Rúmanmaya suntara kapitíántrí pujumiayi. Nu kapitíáni takarniurí, ti aneamurí, jakamnia jaamiayi.

3 Tura Jesusan pachis áujmatainian antuk, ame shuarum Jesusan itiariti tura winia takarniun tsuárturti tusa Israer-shuara úuntrín akupkamiayi.

4 Niisha Jesusan weriar, umirtukat tusa ti seiniak tiarmiayi “Jú kapitíán nekas yáin̄tin péñkeraiti.

5 Niisha yajaya apachitiat in shiir enentáimturmají. Tura iruntai jean jeamtinniasa nin̄ki chicharkaiti, tura yayawai.”

6 Nuyá Jesus niijiai wémiayi. Tura ni jeen jeastatuk jatem-santai kapitíáncha ni amikrín akatar jú titiarum tusa Jesusan akuptukarmiayi. Niisha Jesusan chicharuk júna tiarmiayi “Uuntá, ánttram wayataj tu enentáimsaip. Ame ti nan̄kaamaku asam winia jearuí wayachminiaitme.

7 Tuma asakmin imia wiki Amiín jeatniun arantukjame. Ayatik “péñker ajastí” tákumin winia takarniusha péñker ajatrustatui.

8 Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitía” tutai winiawai. Tura winia takartinian “jú túratá” tutai umíawai.” Tu tímiayi.

9 Jesus nuna antuk ti enentáimias ni nemarainian tímiayi “Nekas tájarme Israer-shuar Yúsán tímiatrus enentáimtinian wáinchaitjai.”

10 Tura kapitianí akatramurí jeá waketkiar, takarniurí péñker ajasun wáinkiarumiayi.

### *Wajé uchirín Jesus iniantkimiania nu*

11 Nuyá ukunam chíkich pepru Naín tutainium ni unuiniamurijiai tura chíkich untsurí aentsjai Jesus wémiayi.

12 Tura péprunam nuntumas jakaan iwiarsatai tusar júinian wáinkiamiayi. Jakáa nukurí wájeyayi, tura uchirí jakamia núchikiiyayi. Tura ti untsurí nu peprunmaya nin nemsarmiai.

13 Jesus nu wajen wáiniak tura waitnentar “úutip” tímiayi.

14 Nuñkia Jesus jakaa en̄kerman tarunt antin̄miayi; nuna júniasha wajasarmiayi. Nuñkia Jesus jakaan chicharuk “Umpa nantaktia, tájame” tímiayi.

15 Tutai niisha nantaki pujus chichaamiayi. Tura Jesus ni nukurín “Jujú uchiram” tímiayi.

16 Tura matsamiarmia nu, nuna wáinkiar ashamkarmiayi. Tura Yusa náarin shiir awajsarmiayi. Tura chichainiak, “Yúsna etserniuchukait Niisha. Ataksha Yúsna etserin uunt

ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

17 Tura ashí Jutía nunċanmayasha tura ni írutkamu nunċa ármia nuyasha Jesus túramia nuna nekaawarmiayi.

*Imiakratin Juanċ sepunam pujak ni amikrċin akatar Jesusan akuptukarmiania nu*  
(Mateu 11.2-19)

18 Juanċ ni írutkamurċ ujakam Jesus túramun nekaamiayi. Nekáa ni írutkamurċin jímiarun untsukmiayi.

19 Tura Jesusaċ akupkarmiayi. “Atumsha Jesus aniaстарum. ċAmesha nekas Kristu Yus akupkamu tátnia núkaitiam. Kame chikichak nákastatajċ? titiarum. Nu nekáa ikiuutarum’ tímiayi.

20 Tutai niisha Jesusan werí jeariar tiarmiayi “Incha imiakratin Juanċ akatar akuptamkaji. ċAmesha nekas tátnia núkaitiam. Chikichak nákastatajċ? Nu nekaatai tusar wakeraji” tiarmiayi.

21 Wats, nii jeawarmia nuċ Jesus untsurċ jaan tsuártasa pujurmiayi. Iwianchrukuncha iwianchrċin ċiirki akupkatasa pujurmiayi. Tura kusuruncha ímtikmiayi.

22 Tuma asa Jesus akatramun ċuna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinch anumsha uwempratin chicham ujakmaiti. Juanċ nu ujaktarum.

23 Yawetsuk Winia tuke shiir enentáimturna nú shuar shiir átatui” tímiayi Jesus.

24 Waketkiarmatai Jesus Juánċan pachis áujmatman antuk shuar matsamarmia nuċ ċuna tímiayi: “Shuar atsamunmasha ċwarċ werimiarum. Pintiu nase umpúam atúu we ċunċ we ajana nu iistai tusarmek wémarum? Juanċ núnischaiti.

25 Nuikia ċwarċ werimiarum. Shuar péñker iwiamampra íistai tusarmek wémarum? Warċ, péñker iwiamampraka uunt akupniu jeen pujuiniatsuk.

26 Nuñkia ċwarċ werimiarum. Yúsna etserniuk werimiarum? Maa, nú nanċaamas wáinkiarume.

27 Yaunchu Yus-Chichamnum ċu áarmaiti: “Winia akatramurun amċini emka akupeajai ame jintimin iwiarat tusañ.”  
Juanċ nu akatramuċti.

28 Nekasan tájarme, Yúsna etserin imiakratin Juanċai nanċaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanċai nanċaamas átatui” tímiayi.

29 Penké shuarsha, kuítian-juusha, Juan imiaimiujai imianiarmia nu, Jesus timian antukar Yusa náarín shiir awajsarmiayi.

30 Túrasha Pariséusha Israer-shuara jintinniurisha Yus yáintaj támaitiat Juan imiaamujai imiancha ásar nakitrarmiayi.

31 Nuñkia Uunt Jesus tímiayi “Yamaiya áentstiram, warijjain métek árum nuna paant títiatjarne.

32 Uchijjai métek árume. Ni aijjai iruntrar nakurustaj tukamá tuíniawai “Námpera áinis nakurustaitsar peem umpuarji, túrasha jantsemáchureme. Nuyá iwiansatniua áinis nakurustaitsar íwiareakur kantamtai kantamáaji, túrasha átum úutcharme.” Tu tuíniawai.

33 Atumsha núnisaitrume. Kame Juan núkap yurumtsuk úmutsuk wekaimiayi. Túmakui átumka “iwianchrुकुित” tímiarme.

34 Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume.

35 Wats, nekas neka ainia nu, Yusa nekatairín iniakmainiawai.” Tu tímiayi.

*Pariséu Semuñ náartin Jesusan ni jeen ipiaamiania nu*

36 “Winí yurumáitia” tusa Pariséu Jesusan ipiaamiayi. Tutai Jesus ni jeen werí misanam pujusmiayi.

37 Nuñkia nu péprunmaya yajauch nuwá, Jesus Pariséu jeen yurumáttsa weyi táman antuk, kayá mutinium kunkuin asuiti áimkiamun takukí jearmiayi.

38 Tura úutki Jesusa nawen pujuras neajkijjai nijjarmiayi. Tura intiashijjai japirmiayi; nuyá nawenam mukuta kunkuinian ni nawen ukatramiayi.

39 Pariséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiunka, ju yajauch nuwá ántiana nuna nekaawainti. Warí, niisha netse nuwachukait” tu enentáimsamiayi.

40 Nuñkia Jesus Pariséun chicharuk tímiayi “Semuñká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

41 Tutai Jesus tímiayi “Kuítian ikiamniun jimiará áishman tumashmakarmiayi. Chíkich kiniantus (500) tura chíkichka aya senkuentak tumashmakmiayi.

42 Akiktin tsawant jeamtai máí-metek takakcha ármiai. Tuma asamtai kuítian ikiamin ni tumashrín máí-metek asakátrarmiayi. Wats, turuttiá ¿tú áishmanka ikiamniun nekas aneamia?” tímiayi.

43 Tutai Semuñ tímiayi “Enta, núkap tumashrín tsanukuramia nu.”

44 Tutai Jesus tímiayi “Nekas tame.” Nuin̄kia nu nuw̄an iis Semun̄kan tímiayi “Ju nuw̄a wáintsumek. Ame jeem̄in wayam̄tai winia nawer nijiartin entsa suruschamame; antsu ju nuw̄aka nawerun neaj̄kij̄iai nijiarturai, tura intiash̄j̄iai japirturai.

45 Mukutam áujtusчамame; antsu nin̄kia nawerun tuke mukutui.

46 Winia muukarūsha asuiti ikiurtusчамame; antsu nin̄kia nawerūi kun̄kuin asuitin ukatrurai.

47 Nu tuma asam̄tai tájame, niisha Winia ti anentu asam̄tai ni tunaarī untsur̄i ana nu tsan̄kuramuiti. Tura tunaar ishichik awai tau tsan̄kuramu ana nuka ishichik anen̄kratniuiti.” Tu tímiayi Jesus.

48 Nuin̄kia nuw̄an tímiayi “Ame tunaarum tsan̄kuramuitme.”

49 Tura chíkich ipiaamu Jesus̄jai misanam pujuarmiania nu “¿Jūsha ya asan̄ tunaancha tsan̄kurea?” nuamtak tunainiarmiayi.

50 Tura Jesus nuw̄an chicharuk ““Uwem̄tikiartiniaiti” tu enentáim̄turu asam uwem̄praitme. Shiir wetá” tímiayi.

## 8

### *Nuw̄a Jesusan yáinkiarmaniania nu*

1 Nuyá untsur̄i péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuini-amur̄i tuse ármia nu nemarsarmiayi.

2 Yaunchu untsur̄i nuw̄a jaa armia nuna tura iwianchruku armia nunasha Jesus tsuárarmiayi. Nu nuw̄asha Nin nemarsarmiayi. Nusha jū ármiai: Maktaranmayā Marí, siati íwianch jíirkimiuȳania nusha

3 tura uunt akupin Erutisa takarniur̄i Chusa nuw̄e Juancha, tura Susancha; tura chíkich untsur̄i ni takakmar̄in súsar Jesusan yáinkiarmaniania.

### *Atsaamin atsaampramun Jesus unuiniamianiania nu*

*(Mateu 13.1-9; Márkus 4.1-9)*

4 Untsur̄i péprunmayā Jesusan iistai tusar jíinkiarmaniania. Tura untsur̄i káunkarmatai jū métek-taku chichaman Jesus unuini-amiai:

5 “Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrunam̄tai weenak najakarmi-ayi. Nuyá chin̄ki tariar yuawarmiayi.

6 Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukuam káararmiayi.

7 Chíkich jinkiái jan̄kiniam iniaararmiayi. Tura jan̄kisha jinkiáisha mái-metek tsapainiar, jan̄ki kan̄kar ajakramiayi.

8 Tura chíkich jinkiáisha péñker nunkanam iniaararmi-ayi. Tura tsapainiar, péñker nerekar chíkichkia siansha (100) nerekararmiayi.” Tuasua amik kakantar chichaak Jesus tímiayi “Kuishim ákuinkia antuktarum.”

*(Mateu 13.10-17; Márkus 4.10-12)*

9 Nuyá ni unuiniamurj Jesusan aniak tiarmiayi “Ju métek-taku chicham tamena nu ¿warintkumea tame?”

10 Tutai Jesus tímiayi “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiyat kusurua núnin árti tusan, tura ántuiniyat nekaacharat tusan aya métek-taku chichamjai jintintiatjai,” tímiayi.

*Atsaampramu chichaman Jesus paant jintintiamiania nu  
(Mateu 13.18-23; Márkus 4.13-20)*

11 ‘Wats, ju nekaatarum, tímiayi. Jinkiáisha Yusa chichamen nakumui.

12 Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyān júawai.

13 Kayanam iniaaru tana nuka shuar antuk waras umi-ana nuna nakumui. Tura nú shuar kan̄kape atsá asam-tai, ishichik tsawantiniñ umikiar itiurchatan wáinkiar wárik kanainiawai.

14 Jan̄kiniam iniaaru tana nuka tuke enentáijiai umiatsna nuna nakumui. Nu shuarsha ántuiniawai, túrasha ni wakeramurijiai wekainiawai. Ju nun̄kanman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujai kan̄karma ásar nerektinian tujintiainiawai.

15 Tura jinkiái péñker nunkanam iniaaru tana nuka shuar antuk umiinia nuna nakumui. Niisha antukarmia nuna péñker enentáimtusar, yawetsuk umirkar ti péñker nere-nawai.’

*Ashí iwiainiakma átatui  
(Márkus 4.21-25)*

16 ‘¿Shiripkin ekeemak nukuktinkiait? Peaknum waaptak ikiuschatniuiti. Antsu jeñam wáiniana nu paant wáinkiarat tusa yakí ekentsatniuiti.

17 Núnisāñ ashí nekaachma ana nu paant átatui. Tura úukma ana nu nekanattawai. Tura iwiainiakma átatui.

18 Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takak-jai tu enentáimtumana nuka jurunkíttiawai.” Tu timiayi.

*Jesusa nukurí, Jesusa yachi  
(Mateu 12.46-50; Márkus 3.31-35)*

19 Jesus pujamunam nukurí ni yachísha tariarmiayi.

20 Turamtaí Jesusan tiarmiayi “Ame nukusha yatsumsha aa wajasar untsurmainiawai.”

21 Tutai Jesus tímiayi “Ee, nukuruiti, yatsuruiti, tura Yus tana nuna antuk umíana nusha winia nukuruiti, winia yatsuruiti.”

*Nasesha entsasha Jesusan umirkarmiania nu  
(Mateu 8.23-27; Márkus 4.35-41)*

22 Chíkich tsawantai Jesus ni unuiniamurijjiai kanunam enkemprar “Antumian amaini wetai” tímiayi.

23 Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi.

24 Túram nuñkia Jesusan ishintiainiak “Uuntá, iisha entsá wayaaji” tiarmiayi. Nuñkia Jesus nantaki nasencha entsan-cha chicharkamiayi. Nú chichamaik nasesha menkakamiayi, tura entsasha miaaku ajasmiai.

25 Nuyá ni unuiniamurin chicharuk “¿Urukamtaí Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiat-suk” tiarmiayi.

*Jatara nunkanam Jesus iwianchrुकun tsuármiania nu  
(Mateu 8.28-34; Márkus 5.1-20)*

26 Kariréa nunka amaini Jatara nunkanam jeawarmiayi.

27 Kanunmaya Jesus jiinkimtai nu péprunmaya áishman Nin taruntamiayi. Nu áishmansha yaunchu iwianchrुकuyayi. Misú wekas, jeá pujutsuk aents iwiarsamunam pujuyayi.

28-29 Íwianchkia nu aishmankan ti kakaram nupet wémiayi. Tura emetatai tusar uwejencha nawencha jirujai jinkiá wearmiayi. Túrasha tujinkiararmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtaí winiisha tarutnium, Uunt Nankaamaku Yusa Uchirí Jesusa? Winia wáitkiarsaip tusan seajme” tímiayi. Íwianch niin pujurun Jesus jiki akupeam tu tímiayi.

30 Jesus nu áishmankan anias “¿yáitiam?” tímiayi.

Tútai nii chichaak “Wikia Untsuríntjai” tímiayi. Untsurí íwianch niin pujurma asa nuna tímiayi.

31 “In uunt wáanam ii jiinkimiaj nuñ akuptukam amutkaip” íwianch seawarmiayi Jesusan.

32 Nuí ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

<sup>33</sup> Nuna takui íwianch áishman<sub>numi</sub>á jíinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

<sup>34</sup> Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi.

<sup>35</sup> Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jíintiukiarmia nú áishman<sub>kan</sub> pé<sub>nker</sub> ajas pushí entsar Jesusa nawen pujan wáinkarmiayi. Tura ashamkarmiayi.

<sup>36</sup> Iwianchruku áishman<sub>tsuárman</sub> wáinkiar<sub>mia</sub> nu yama taan ujakarmiayi.

<sup>37</sup> Tura ti ashamainiak Jatara nun<sub>kan</sub>maya aents ashí Jesusan “Wetá” tiarmiayi. Tutai Jesus kanunam en<sub>kemar</sub> wémiayi.

<sup>38</sup> Íwianch jíintiukiarmia nú áishman<sub>Jesusan</sub>, wisha ame wéamunam winitíaj tusa seamiai. Tutai Jesus nuna suritíak,

<sup>39</sup> “Antsu ame jeemíin weme Yus ámin túrutma nu ashí etserkata” tímiayi. Tutai áishman<sub>we</sub> Jesus nin túramia nuna ashí nu péprunam etserkamiayi.

*Jairu nawantrí<sub>ncha</sub> tura chíkich nuwan<sub>ncha</sub> Jesus tsuármiania nu*

*(Mateu 9.18-26; Márkus 5.21-43)*

<sup>40</sup> Tura Jesus kati<sub>nki</sub> Kariréanam tatí tusar nákas pujuarmiayi. Tuma ásar Nii waketki kati<sub>nki</sub> támatai nu aencha warasar áujsarmiayi.

<sup>41</sup> Tumaí Israer-shuara iruntai jeá uuntri<sub>Jairu</sub> naartin támiayi. Nii taa, Jesusa nawen tikishmatar “Winia jearu<sub>i</sub> waitneasam winitritiá” tímiayi.

<sup>42</sup> Ni nawantri<sub>chikichik</sub> amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar ka<sub>e</sub> ajas weena ásar chanuawarmiayi.

<sup>43</sup> Nu<sub>i</sub> nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nu<sub>isha</sub> ni kuítrín ashí ajapaitiat tsuámarchauyayi.

<sup>44</sup> Jesusa úkuriinj<sub>winiá</sub> weantuk ni pushirí ná<sub>nkatramurín</sub> anti<sub>n</sub>miayi. Nuna tura nú chichamaik numpé ájapeamuncha pé<sub>nker</sub> ajasmiayi.

<sup>45</sup> Nu<sub>n</sub>kia Jesus chichaak “¿Ya Winia antintkia?” tímiayi.

Tura “pen<sub>kesha</sub> anti<sub>n</sub>chajme” tuíniakui Pítíur ni tsaniak-maríjiaí Jesusan chicharuk “Uuntá, ti untsurí anti<sub>n</sub>masha, tura ti untsurí chanunmainiasha ¿itiura “ya Winia antintkia” tame?” tíarmiayi.

<sup>46</sup> Tútaisha Jesus tímiayi “Nekas Winia antintkiayi. Winia kakarmarjiaí tsuárajna nuna nékajai” tímiayi.

47 Nuyá nu nuwasha, nekarayapi tusa kuraṅki taa Jesusa nawen tikishmatramiayi. Tura ashí aents ántuiniamunam urukaku antiṅkia tura ititura wárik péṅker ajasmia nuna ujakmiayi.

48 Nuṅkia Jesus nuwan tímiayi “Nawantrú, shiir wetá. Winia nekas enentáimtursa asam péṅker ajasume.”

49 Jesus tuke chichas pujaj uunt Jairu jea, ti untsurí antiṅmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

50 Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péṅker ajastu” tímiayi.

51 Jeá jeawar Jesussha Nijijai untsurí wayatniun surimkiamiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsan̄katkamiayi.

52 Ashí úutainiak atakka wáinkiashtatjapi tu úutiarmiayi. Túmainiakui Jesus pen̄ké jakaan nékayat tímiayi “Úutirpa. Nuwachkia jákachai, antsu kanarai” tímiayi.

53 Jakaancha urukaku ta tusar wishikrarmiayi.

54 Nuyá Jesus nuwachi uwején achik, kákantar chicharuk “Nawantru nantaktia” tímiayi.

55 Túram niisha jakayat atak iwiaaku ajasmiai. Tura nú chichamaik nantakmiayi; túrunamtai Jesus “ayuratarum” tímiayi.

56 Nuwachi aparí nukurísha ti enentáimprarmiayi. Tura Jesus “Ju túramu pen̄ké etserkairap” tímiayi.

## 9

*Jesus ni unuiniamurin etserkati tusa akupkarmiania nu (Mateu 10.5-15; Márkus 6.7-13)*

1 Ni tuse unuiniamurin ikiaanak ni chichamejai iwianchrukun enentáiyān iwianchin jiīrki akupkatniun tura sun̄kurjaj jaa tsuártinniasha ni kakarmarin súsarmiayi.

2 “Yus akupin ajastin ujaktarum, tura jaa tsuártarum” tinia akupkarmiayi Jesus.

3 Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha pen̄ké jukiirap. Aya chikichik pushí jukitiarum.

4 Nánkamas jeanam jearum wayarmeka nuin̄ pujustarum. Nuin̄ pujusrumek chíkich péprunam wéakrum jíinkitiarum, tímiayi.

5 Tura atumin awaintiamatniun nakitiana nú péprunmaya jíinkirum nawemiya nun̄ka akakekrum ikiuktiarum. Awaintiamachma paant ati tusarum nu túratarum” tímiayi.



6 Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

*Erutis “Jesusan íistaj” tímiania nu  
(Mateu 14.1-12; Márkus 6.14-29)*

7-8 Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Eriás wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis penké nekaachmiayi.

9 Tura tímiayi “Wiki, Juanka muuke tsupirkatarum, tíchamkaj. Tuma ajsha, ¿ju shuar, ni túramurí ashí shuar chichainia nusha yátsukait?” Tu enentáimiuk “íistaj” tímiayi.

*Senku mir áishmankan Jesus ayuramiania nu  
(Mateu 14.13-21; Márkus 6.30-44; Juan 6.1-14)*

10 Atak Jesusa akatramurí waketki taar ni túramurin Jesusan ujakarmiayi. Nuñkia aents atsamunam Petsaitia péprunam tíjiuch weak nuí júkiarmiayi.

11 Tura penké shuar nuna nekaawar nemariarmiayi. Túram Jesus nin shiir áujsamiai. Tura Yusa akuptairí pachis unuiniamiayi. Tura jaa armia nuna tsuáarmiayi.

12 Tura kíakui, tuse unuiniamu Jesusan wériar tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátniurin sumarmakarti, tura kanartintrin wáinkarti. Juí pujajnia juñkia penké atsawai” tiarmiayi.

13 Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétinaitji” tiarmiayi.

14 Áishmansha ti untsurí senku mir (5000) jeeá ámiayi. Tura Jesus ni unuiniamurin chicharainak ““senkuenta senkuenta kanaarum ankant ankant pujustarum,” titiarum” tímiayi.

15 Túrawarmatai ashí pujusarmiayi.

16 Nuyá senku tantan tura jimiará namaknasha Jesus achik, yakiinjí íimias Yúsan yuminsamiayi. Nuyá ajamsarat tusa ni unuiniamurin súsarmiayi.

17 Ashí yurumáwar ejemarmarmiayi. Tura ampirman tuse chañkinnium áimkiarmiayi.

*Jesus Yusa anaikiamurinti ujakma amia nu  
(Mateu 16.13-19; Márkus 8.27-29)*

18 Jesus ni unuiniamurjijai áentsnumiá kanaki pujuarmiayi. Jesus Yúsan aujsua umik ni unuiniamurin tiarmiayi “¿Yáiti turutainia Winia?”

19 Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iríasaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

20 Tutai “Tura atumsha ¿yáiti túrutrum?” tiarmiayi.

Takuí Pítiur chichaak “Ámeke Yusa Anaikiamurj, Kristu tutai, núitme” tímiayi.

21 Tutai Jesus “Peñké etserkairap” tímiayi.

*Ni jákatniurin Jesus ujakmiania nu  
(Mateu 16.20-28; Márkus 8.30-9.1)*

22 Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátriri úuntri sha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtai nantaktiatjai.”

23 Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurinkia ini-aisati. Tuke tsawant ni krusri yanaki nemartusti.

24 Kame shuar ju nunkanam aya péñker pujustaj tákuñka nu shuar uwemtsuk jákattawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkiattawai.

25 Iimiata, shuar ashí ju nunkanam ana nuna súmakui tura jinium wétin ákuisha ¿itiurak péñker pujusat?

26 Wi Aents Ajasuitjiana ju Winiasa tura winia chichampruncha shuar natsantraitkuinkia, winia wincharujai, winia Aparu wincharijjai tura nayaimpinmaya péñker suntara wincharijjai atak táakun shuar natsantrurmia nuna natsantrattajai Wi.

27 Tura shuar Yusa akuptairin wáintsuk jákachartatna nu juí pujuiniawai. Nuna nekas tájarne” tímiayi.

*Jesus nusháa iira ajasmiania nu  
(Mateu 17.1-8; Márkus 9.2-8)*

28 Nuna tuasua amik nuyá chíkich semanatin Yúsan áujsataj tusa Jesus náinnium wakamiayi. Pítiur, Jakupu, Juanjai nemariarmiayi.

29 Jesus auju pujus nusháa iira ajattsarmiayi. Ni pushirisha ti puju jíitsumir ajasmiai.

30 Nuinkia jimiará áishman Nijjai chicháa wajarmiayi. Nuka Muisáis Eríasjai ármiai.

31 Níncha wincha jíitsumir téntakarmiayi. Tura Jesus wáitias Jerusarénum jákatniurin amia nuna áujmatarmiayi.

32 Pítiur ni tsaniakmarijjaj karj ti pujainiajn iwiáa pujuarmiayi. Tuma ásar Jesusan tura jimiará áishmanjaj jítsumir ajas wajainian wáinkiararmiayi.

33 Tura nu áishman Jesusan ikiuki weenaj Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi.

34 Nuna chicháa pujaj yurañkim tarj kaput amuawarmiayi. Tura yurañkim amuam ti ashamkarmiayi.

35 Nuiñkia yurañminmaya ju chichaamun antukarmiayi: “Juka winia aneamu Uchiruiti. Nii anturkatarum.”

36 Chichaamun antasua amikiar Jesus niñki wajan wáinkiararmiayi. Nuiñkia takamtak pujuarmiayi. Tura wáinkiarmania nuna penké etserkacharmiayi.

*Uchi iwianchrुकun Jesus tsuármiania nu  
(Mateu 17.14-21; Márkus 9.14-29)*

37 Kashin tsawantaj, náinniumiá táarmatai, ti untsurj shuar Jesus inkiuntai tusar wearmiayi.

38 Nu shuarnumiá chikichik áishman Jesusan untsuak tímiayi “Uuntá, waitneasam uchir írtústá. Uchirsha júchikiiti.

39 Íwianch achik núpeteam niisha náñkamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas ankant awajsatniun nakitiawai.

40 Túmakui ame unuiniamurmin iwianchin júirtukit tusan seamjai. Túrasha tujinkiarmai” tímiayi.

41 Tutai Jesus tímiayi “Yus enentáimtichutirmin, tutupnik wekaichatirmin çurutmá tsawanttsuk atumjaj pujustaj. Urutmá katsuntratjatsuk? Uchiram juj itiata” tímiayi.

42 Tura uchi winiaj íwianch nunká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin penker awajas ni aparin awantuki susamiayi.

43 Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniurin ataksha ujakmiania nu  
(Mateu 17.22-23; Márkus 9.30-32)*

Jesus túramun ti enentáimtu pujuiniaj Jesus ni unuiniamurin tímiayi

44 “Wi tájarmena ju penker antuktatum. Winia Aents Ajasu tútain surutkartatui.”

45 Tura Nii timia nuna unuiniamurj nekaacharmiayi. Nekaawarajin tusa paantcha awajsamuyayi. Tura warinkit tusa anintrustinniaasha arantukarmiayi.

*“¿Yaki imiá nankaamantuit?”  
(Mateu 18.1-5; Márkus 9.33-37)*

46 Nuyá ni unuiniamurj, yaki imiá nan̄kaamaku ati tusa, nuamtak mai tunai ajarmiyai.

47 Tura ni enentáimsamurj̄n̄ Jesus nekaamiyai. Tuma asa uchin achik ni pujamunam itiamiyai.

48 Itiá tímiyai “Winia anentuk ju uchin shiir awajeana nuka Winiasha shiir awajtaiwai. Tura Winia shiir awaj-tana nuka Winia akuptana nunasha shiir awajeawai. Kame átum nan̄kaamantuchu tárumna nu ti nekas nan̄kaamantuiti’ tímiyai.

*(Márkus 9.38-40)*

49 Nuyá Juan̄ tímiyai “Uuntá, shuar ame náarmin pachis iwianchin j̄iiki akupea nu wáinkiam̄ji. Tura in páchitkiachu asamtai nuka suritkiam̄ji.”

50 Tutai Jesus tímiyai “Antsu suritkaiirap. Shuar in nakitra-machkun̄ka in páchitkiawai.”

*Jesus Jakupun Juánnasha chicharkarmiania nu*

51 Jesus, nayaimpiniam waketkitniurj̄ jeatemamtai, enentáimmia ímiatrusan̄ Jerusarénn̄num we-wémiyai.

52 Wesa, kanartinian wáinkiarat tusa akatar émtikiarmiyai. Tura niisha Samaria péprunam jeawarmiyai.

53 Tura Samarianmayá aentska, Jerusarénn̄num wéenan nekaawaru ásar itiaatniun nakitrarmiyai.

54 Jesusa unuiniamurj̄ Jakupusha Juansha nuna nekaawar, Jesusan tiarmiyai “¿Uuntá, Érias yaunchu túramia núnisrik iisha túrat tusam wakeramek. Nayaimpinmayá ji tara Samar-ianmayá aentsun amukarti, títiatjik?”

55 Tutai Jesus nin ísar kakantar chicharuk tímiyai “Atumsha atumi enentáji urukukit nuka nekamatstrume.

56 Wi Aents Ajasu áentsun emesrattsan táchaitjai. Antsu uwentikratajtsan táwitjai” tímiyai. Nuyá chíkich péprunam wearmiyai.

*Jesus nemarsatin*

*(Mateu 8.19-22)*

57 Jintiá weenaj, chíkich áishman̄ Jesusan chicharuk “Uuntá, tuj̄ wétatam nuj̄sha nemarsatjame” tímiyai.

58 Tutai Jesus tímiyai “Kujanchmasha ni wáarj̄n̄ takaktsuk. Chínkisha pasun̄ken takaktsuk. Tura Wi Yusa Uchiríntiatan tepesan ayampratniur atsawai.”

59 Chíkich áishman̄kan Jesus “Nemartusta” tímiyai.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan̄kátrúktá” tímiyai.

60 Tutai Jesus tímiyai “Jakaa ainia nu ni shuarj̄n̄ iwiarsat-niunka enentáimtusarti. Tura ámeke weme Yus-shuar átin urukukit nu etserkata” tímiyai.

61 Nuyá chíkich tímiayi “Uuntá, nemarsataj tusan wak-erajme. Túrasha wíi shuaran emka áujsan ikiuweartaj tsan\_kátrúktá” tímiayi.

62 Tutai Jesus tímiayi “Shuar arayat ukunmaanĭ apajas iimna nu, Yus akupeana nuĭ takaschamniaiti.”

## 10

*Ni unuiniamurĭn setenta armia nuna Jesus etserkatarum tusa akupkarmiania nu*

1 Nuyá ukunam chíkich unuiniamurĭn setenta anaikiarmi-ayi Jesus. Tura jímiar jímiaran apatak émkitiarum tusa ashí péprunam ashí nun\_kanam ni wétin amia nuĭ akupkamiayi.

2 Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura zyaki júukat, aya ishichik takainiasha? Tuma asamtai ni takarniurĭ akupkat tusarum Nerentin seatarum.

3 Wetarum. Átumka murikiua núninaitrume. Uunt yawa yujamua núninnium tsuumai ámunam akupeajrume.

4 Yurumkasha, kuitcha, sapatcha júkiirap; shuarjai jintiá áujmamsatai tusarum wajasairap.

5 Jeá wayakrum emka ju titiarum: “Ju jeanam pujuinia nuna Yus shiir awajsarti.”

6 Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuinkia túrunashti” titiarum.

7 Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinki-ashtinkiait. Chíkich jeanam nuĭ werum nuĭ werum ajairap.

8 Awaintiamawartatna nú peprunam jearmeka ajampramsartatna nu yuatarum.

9 Jaa ainia nu tsuártarum. Túrarum “Yus ju nun\_kanam akupin ajastin ishichik ajatemsai” nu peprunmaya shuar titiarum.

10 Íksarmek itiaarmachartatna nú peprunam jearum, jintiá wajasrum ju titiarum,

11 “Yusna nakitra asakrumin, atumi pépruriniá nun\_ka ii nawen peema japirar akakekji. Túrasha ju paant nekaatarum: Yus ju nun\_kanam akupkatin ishichik ajatemsai.”

12 Yusa nekapsatin tsawantrĭ jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujai nan\_kaamas asutiáttawai. Núnaka paant tájarme tímiayi.

(Mateu 11.20-24)

13 Wáinkiatá, Kurasín péprunmayatiram. Wáinkiatá Pet-saitia péprunmayatirmesha. Atumí pépruriin aents tujinti-  
amun ti túraitjai. Warí, yaunchu Tiru péprunmasha, Se-  
tun péprunmasha nu tujintiamu túramuitkuin\_kia yaunchu ni  
enentáin yapajjáwaraayi. Túrawar kúntuts pujutai pushin  
entsarar yun\_kunim ajakiaraayi.

14 Tura atumsha aents tujintiamu túramu wáiniatrum ya-  
pajjachu asakrumin Tirunmaya tura Setunnumia aentsjai  
nan\_kaamas asutniáttarme.

15 Tura atumsha Kapernáumnumiatirmesha, “ti  
nan\_kaamantu ajarar nayaimpiniam jeattaji” tu  
enentáimtsurmek. Maaj, antsu jaka matsamtainium  
jeattarme, auka” tímiayi.

16 Tura Jesus ni unuiniamurin junasha tímiayi: “Atumin an-  
turtamainiakka Winiasha anturtuiniawai; atumin nakitra-  
mainiakka Winiasha nakitruiniawai; tura nú arant, Winia  
nakitrakka Winia akuptukua nunasha nakitiawai.” Tú áujas  
Jesus nin akupkarmiayi.

*Setenta unuiniamu waketki táarmiania nu*

17 Ukunam nu setenta unuiniamu warasar waketki  
táarmiayi. Tura chichainiak “Uuntá, ame náarmiin íwianch  
jiki akupeam umirtamkamji” tiarmiayi.

18 Tutai Jesus tímiayi “Ee, Wisha nayaimpinmaya peem  
peetna núnisan, uunt iwianch Satanásan akaiki iniaan  
wáinkiamjai.

19 Atumniaka winia kakarmarun susamjarme, napi najar-  
masha titin najarmasha yajauch awajtamsairum tusan; tura  
ii nemasri kakarmari nupetkatniuncha susamjarme.

20 Túrasha íwianch umirtamkui nu enentáimsam warasairap.  
Antsu atumí naarj nayaimpiniam aarma aa asamtai waras-  
tarum” tímiayi Jesus.

*Jesus warasmiayi*

*(Mateu 11.25-27; 13.16-17)*

21 Nuin\_kia ni enentáin Yusa Wakanj waramtiksam Jesus  
juna tímiayi: “Aparú, ashí nayaimpijjai nun\_ka Úntrinme;  
tuma asam ju túrunamu ti unuimiaru enentáimtumainia  
nuyá ú\_kuitme; antsu uchichia núnis nan\_kaamantuchu  
enentáimtumainia nú shuar paant awajtusuitme. Ee, Aparú,  
núnik wakerichmakum. Tuma asamtai shiir enentáimtajme,  
Aparú” tímiayi.

22 “Winia Apar ashí surusuiti. Wisha ni Uchiri asamtai  
Winia nékarui. Tura chikich Winia nekas nekarainiatsui.  
Yus Apancha Wiki nékajai. Tura Wi wakeraj nú shuaran  
winia Aparun paant awajtajai. Nú shuarsha winia Aparun  
nékainiawai.” Tu tímiayi Jesus.

23-24 Nuyá ni unuiniamurin iis tímiayi “Wi tájarme, untsurí Yúsnan etserniusha tura uunt akupniusha átum yamáí wáintrum nuna wáinkiatniun wakeruiniayatan wáinkicharmiayi. Tura átum yamáí ántarme nuna antuktinian wakeruiniayatan antukcharmiayi. Tura Yus achirmaku asakrumin, wáintrumna nu ti péñkeraiti” tímiayi.

*Samarianmaya áishman katsumkamun yainmia nuna Jesus unuiniamiania nu*

25 Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitaj?” tímiayi.

26 Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

27 Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiayi.

28 Tutai Jesus tímiayi “Péñker áimsame. Nu túrakmeka tuke iwiaaku átatme.”

29 Tutai akupkamun jintinkiertin ni anintramun kíshtumaktajtsa wakerak “Winia írutramursha ¿ya ainia?” tímiayi.

30 Takui Jesus tímiayi “Jerusaréñnumia jintia Jirikiú péprunam jeana nú jintianam áishman wean, kasa áishman tariar ni waririn, pushirincha kasarkarmiayi. Tura katsumkar mayái ashirak ajuantar ikiukiarmiayi.

31 Tura Israer-shuar Patri ukunman winis nu áishmankan wáiniak aya íkian iis ikiukmiayi.

32 Nuyá ukunam Patri yáintrisha nu jintianam wesa, nu áishmankan wáiniak, áyatik iis ikiuak wémiayi.

33 Tura nuyá Samaria nunkanmaya áishmansha nu jintianman wesa, nu áishmankan wáiniak ní shuárinchunak wáitnéntramiayi.

34 Nuyá nu áishmankan weantuk ni numpamnamurin asuit-ijjai tura wíniujai tsuar jaanchjiai penuarmiayi. Tura ni kawairiin ekenak jukimiayi. Tura írar kanutainiam jukí ejé nu áishmankan péñker wáinkiamiayi.

35 Tura kashin tsawarmatai Samarianmaya áishman weak jimiara kuítian jusa jeá nérenniurin susamiayi. Susa tímiayi “Ju áishman péñker wáitrukta. Tura wi amaajna ju táasmataisha wi wáketkun akiktajme” tímiayi.

36 Ayu, ámijiaisha, nu menaintiu áiniana nu, ¿tuá imiá nekas katsumkamun waitnéntramia?” tímiayi Jesus.

37 Takui akupkamun jintinkiartin chichaak “Entá, katsumkamun wáitnentrámia núa” tímiayi.

Tutai Jesus tímiayi “Amesha weme núnismek túrata.”

*Marta ni kaijiaí Marí jeen Jesus pujusmiania nu*

38 Nuyá Jesus jintiá wesa chíkich péprunam jeamiayi. Nu péprunmaya nuwá naari Marí ni jeen itiaamiayi.

39 Marta kaj ámiayi ni naari Marí. Marisha unuiniamun anturkataj tusa Jesusa nawen pujursamiayi.

40 Tura Mártaka ni takatrin ti enentáimtak Jesusan weantuk tímiayi “Uuntá Jesúsá, ¿winia kajir takatan winiak íktursainia nuka enentáimsumek? Winia yáintá turuttia” tímiayi.

41 Tutai Jesus tímiayi “Maaj Martá, untsurí túratin ana nu ti enentáimsam itit awajtamui.

42 Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

## 11

*Jesus Yus áujsatniun unuiniamiania nu  
(Mateu 6.9-15; 7.7-11)*

1 Chíkich tsawantaj Jesus Yúsan áujsataj tusa atsamunam pujumiayi. Áujtua amikmatai ni unuiniamuri chíkichik Nin tímiayi “Uuntá, imiakratin Juan ni unuiniamurin unuiniamia núnismek Yus áujsatin unuitiurta.”

2 Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatí.

3 Aparú, ii yurumkarí ashí tsawant amasta.

4 Tura winia nemasrun tsankurajna núnismek, Aparú, winia tunaaru tumashrisha tsankurturta. Tunáa wakeruktin tsankatrukaip. Antsu ashí tunaanumiá uwentikrurta.”

5-6 Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaksujai. Tuma asamtai amikru, menaintiu apatuk ajamprustá” tíchatameash.

7 Tura nii init pujusan chichaak “Warí, wáitisha epenmiaiti, tura winia uchirsha wijiaí ashí tepeenawai. Itiur nantakniak amastaj. Itit awajtipia” turamchanpiash.

8 Wats, paant tájarne, niisha amikrum asa, nantaki ikiamastinian nakitiayat, itit awajtin tusa nantaki ashí wakeramna nuna suramsattawai.



9 Tuma asamtai tájarme: Yus seatarum; túrakrumin suram-sattarme. Eḡakrumka wáinkiatarme. “Winiajai” tákurmin awáintiamattarme.

10 Seana núnaka suíniatsuk. Eḡana nuka wáintsuk. “Winiajai” tuinia núnaka awáiniatsuk.’

11 ‘Wats, átum uchirtintiram, ame uchiram apatkun seatmakui ḡkayaash súsaintiam? Namakan seatmakui ḡnapíash súsaintiam?’

12 Nujintian seatmakuisha ḡtitiḡkiash súsaintiam?’

13 Warí, átum imiá yajauchitirmesha atumí uchiri péḡker ana nu tuke súchakaitrum. Atumí Aparí nayaimpiniam pujana nu, seakrumniḡkia nú naḡkaamas ni Wakanḡin suramsat-tawai.” Tu unuiniamiayi.

*Jesusan “iwianchi kakarmarijiai túrawai” tiarmiayi  
(Mateu 12.22-30; Márkus 3.19-27)*

14 Shuar iwianchruku asa chichachu ámiayi. Nuna enentáyan nu iwianchin Jesus jiiiki akupkamiayi. Íwianch jiiinkintai chichachu chichasmiayi. Túramtai shuar nui pujuarmia nu ti enentáimprarmiayi.

15 Tura chíkich tiarmiayi “Juka iwianchi kapitíantri Satanásan, ni chíkich naari Pirsepún umirniuiti. Tuma asa nuna kakarmarijiai iwianchin jiiiki akupeawai.”

16 Tura chíkichkia, nekas Yúsnumiḡ taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

17 Tura Jesus tu enentáimiainian neka asa tímiayi “Núu nuḡkanmayan shuar nuamtak kajernaiyakuḡkia nú nuḡka wárik meserchattawak; nuamtak shuarsha ni shuarjiai kajernaiyaksha amunaikchartatuak.

18 Wíniaka “Pirsepú iwianchi kakarmarijiai iwianchin jiiiki akupeawai” túruttsurmek. Tuma asamtai tájarme, uunt iwianch Satanás naartin, ni suntarjiai kajernaiyaksha ḡitior tuke kakaram átink’?

19 Tura Wi Pirsepú kakarmarijiai iwianchin jiiiki akupeakuḡkia, atumi shuarisha ḡyana kakarmarijiaḡin iwianchin jiiiki akupena? Niisha “iwianchi kakarmarijiai túrichuitji” tuiniaisha ḡitiura Winiaasha, “iwianchi kakarmarijiai túrait’” turutminiaitrum?

20 Wikia Yusa kakarmarijiai iwianchin jiiikin akupeajai. Nu nekaarum Yus atumí enentáin akupin ajasuana nu nékarme.’

21 ‘Kakaram áishmanḡ kíishtumaktajtsa iwiarnar wajas jeḡn wáinkui, ni warirí inít ana nusha tímiatrusaḡ áiniawai.

22 Antsu niijiai naḡkaamas kakaram ana nu winiakka nupetkashtatuak. Tura kíishtumaktinian iwiar takakman jurawai. Tura kasamkámun ni amikrḡin súawai. Kakaram

áishman iwianchin nakumeawai. Tura nujaj nankaamas kakaram áishman Winia nakumprawai.

<sup>23</sup> Iista. Winia nemartatsna nu winia nemasruti. Núnisan Winia yáintsuna nuka aya itiurchat nájateawai.

*Iwianch jiiki akupkamuitiat wáketna nuna ujakmiania nu (Mateu 12.43-45)*

<sup>24</sup> Nuyá Jesus juna tímiayi: ‘Shuara enentáiyá iwianch jiinki ayamprataj tusa yumi penké yútatsna nu wéawai. Tura ayampratniun wáincha asa ataksha waketkitniun enentáimui. “Wi jinkimij nu waketkitjai” tawai.

<sup>25</sup> Tura waketki péñker iwiamun tura ankant aan wáiniui.

<sup>26</sup> Nuna wáiniak, ni ain siati iwianchin niijaj nankaamas yajaunchin itia enkemáwartatui. Túrunamtai nu shuar nuki nuna nankaamas yajauch ajastatui.” Tu tímiayi Jesus.

*Nekas warastin*

<sup>27</sup> Shuar iruniarmia nu Jesus nuna chichaa pujaj, nuwa untsukum “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

<sup>28</sup> Tutai Jesus tímiayi “Antsu ni chichamen antukar umirainia nuna, nukurjai nankaamas Yus ti yáinkiaru áiniawai, tajai” tímiayi.

*(Mateu 12.38-42; Márkus 8.12)*

<sup>29</sup> Shuar untsurí Njin káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumiáitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujaj iniakmasmia nujaj nekaatin áiniawai.

<sup>30</sup> Kame Junas túrunamujaj Níniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujaj Yuska ni kakarmarin iniakturmastatume.

<sup>31</sup> Yaunchu Sarumún uunt akupin pujaj Sepa núñkanmaya nuwa akupin Sarumunka chichamen nekaataj tusa ti jeash-tanmaya támiayi. Tura yamaikia Sarumunjaj nankaamas pujaj átumka anturtatsrume. Tuma asamtai Wi tájarme, Yus ashí shuaran nekapsattana nu tsawant jeamtai nu nuwa, akupniun péñker anturka asamtai, Yus íimianum péñker átatui. Antsu atumsha Winia anturtukcha asakrumin Yus íimianum yajauch átatume.

<sup>32</sup> Tura Yúsnan etserin Junas Níniwi péprunmaya shuar-num Yus Chichaman etserkamtai nu shuar ni tunaarin enentáimtusar enentáin yapajíáwarmiayi. Tura juj yamá Ju-nasjai nankaamas etserin pujajai. ¡Tuma asamtai nekapsatin

tsawant jeamtai Níniwinmaya shuar yamaiya shuar árumna nuna sumantikramattarme!’

*Ayqshi tsáapnintri*  
(Mateu 5.15; 6.22-23)

<sup>33</sup> ‘¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant ímsat tusar yakí ekensatniuiti.

<sup>34</sup> Ame jímijiai wáinkiam nujai wekasatin nekaattame. Tuma asamtai ame jímijiai péñker ana nu wáinkiumka péñker wekasattame; antsu ame jímijiai yajauch ana nu wáinkiumka, kiritniunam wekasatniua núnisan yajauchiniam wekasattame.

<sup>35</sup> Anearta. Enentáimin tsáapin ana nu kiritin ajaschati tusam anearam wekasata.

<sup>36</sup> Ame ayashmjin kirit ajatsuk aya tsáapniniaitkiuin<sub>2</sub>kia, shirikip paant awajea núnisan ashí paant wáinkiat<sub>2</sub>tame” tímiayi.

*Pariséuncha, Israer-shuara jintinniurisha “yajauchiit<sub>2</sub>rume”*  
*tímiayi Jesus*

(Mateu 23.1-36; Márkus 12.38-40; Rúkas 20.45-47)

<sup>37</sup> Jesus chichasua amikmatai Pariséu shuar, winia jearui yurumáitia tusa untsukmiayi. Tutai Jesus wayá misanam pujusmiayi.

<sup>38</sup> Tura Israer-shuar ikijmiartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

<sup>39</sup> Tura Uunt Jesus tímiayi “Pariséutirmeka atumí yurumtairi aya pátatek niija<sub>2</sub>ktin ti wakeriniait<sub>2</sub>rume. Atumsha nu yurumtaij<sub>2</sub>iai méteket<sub>2</sub>rume. Pátatek péñker túrarme. Tura atumí enentá<sub>2</sub>inkia kasamkatniusha tura yajauchia nusha piakuiti.

<sup>40</sup> ¡Enentáimcha! Warí, ashí pátatek wáini<sub>2</sub>aj! nuna Yus najanachmakia; tura init paantcha ana nunasha Yúsak najanachmakia.

<sup>41-42</sup> Aneartarum, Pariséutirmesha. Aya nuka méntasha, anissha tura aya apatkusha Yus súsat<sub>2</sub>in ti enentáimprume. Nukasha tsuriasrum apatkusha tias ana nuyá chikichik achikrum, Yús<sub>2</sub>naiti tát<sub>2</sub>surmek. Tura antsu nu túrat<sub>2</sub>in iniait<sub>2</sub>suk péñker wekasatniusha, Yus anenmarmena nusha péñker enentáimsatniuit<sub>2</sub>rume. Wats init, enentáimin ana nútiksarmek jusam susarta. Nuin<sub>2</sub>kia ashí chamir át<sub>2</sub>tui.’

<sup>43</sup> ‘Tura aneartarum Pariséutirmesha. Yus áujtai jeanam pen<sub>2</sub>keri pujutainium pujustin wakerarme. Tura jintiá aents íimiainiamunam ti shiir áujtusarat tusarum wakerarme.’

<sup>44</sup> ‘Jintinniutirmesha, Pariséutirmesha má<sub>2</sub>i-metek aneartarum. ¡Antar shiir chichamtinia! Iwiarsamu paantcha

núniniaitrumē. Shuar nu nan̄kaamaksha nájamiat nékatsui. Núnisaṅ shuar atum̄i chichame antukar yajauchia nuna nekartamtsume.”

<sup>45</sup> Nuikia Israer-shuara jintinniur̄i chikichik Jesusan chicharuk tímiayi “Uuntá, nu tákum incha yajauch chichareame.”

<sup>46</sup> Tutai Jesus tímiayi “Atumsha jintinniutiram aneartarum. Atum̄i akupkamur̄ij̄ij̄ai káarak ti kijin entsakchamnia súarme. Tura átumka yáin̄taj tusarum atum̄i uwejejaisha pen̄ké ántiatsrume.’

<sup>47</sup> ‘Aneartarum tájarme. Yaunchu atum̄i uuntrī Yúsnan étserniun máawarmia nuna iwiarsamur̄i átum̄i jeamniutrumē nu etserin ti pen̄ker ásarmatai kajinmatkishtin.

<sup>48</sup> Nu túrakrum atum̄i uuntrī túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niij̄ij̄ai méteketrumē. Warí, Yúsnan etserniu iwiarsamur̄in̄ jeamkuram atumek sumamarme.’

<sup>49</sup> ‘Atum̄i túramur̄in̄ nekáa Yus juna yaunchu tímiayi: “Winia etserturniun tura winia akatramurnasha niin̄ akuptukartatjai. Túramtai chikichnaka máawartatui, tura chikichnaka pataatukartatui.”

<sup>50</sup> Tuma asamtai ashí ni etserniur̄in̄ maamu ainia nuna, yamaiya áentstirmin Yus sumamtikramattarme. Nun̄ka nan̄janamunmayā jukí

<sup>51</sup> yamáí ímiaj̄aj̄i maamu ainia nuna, kame Apir maamunmayā jukí yamáí Sakarías maamua tímiaj̄aj̄i anintrustatui. Naman̄ maar Yus sutai ámanum tura Yus-jēā ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniur̄i maantamnewarmia nuna yamáí matsatrumna nútirmin aninmasartatui.’

<sup>52</sup> ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

<sup>53-54</sup> Jesus nuna takui Pariséusha, jintinniusha ti kakerkarmiayi. Tura nii tana nuj̄aj̄i “yajauch túrame” titiai tusar wakeruiniak untsur̄i anintriarmiayi.

## 12

<sup>1</sup> Nu tumaj shuar ti untsur̄i káunkarmiayi. Ti kaunka ásar nawen̄ mai-najatnai ajarmiayi. Tura Jesus ni unuiniamur̄in̄ tútan juarkimiayi. “Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama en̄keam páantchaiti. Tura ukunam nekaamniaiti.

<sup>2</sup> Núnisaṅ ashí paantcha ana nu iwiainiakma átatui. Ūukma ana nusha nekaamu átatui.

<sup>3</sup> Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.'

*Yusak ashamkatniuiti  
(Mateu 10.28-31)*

<sup>4</sup> 'Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui.

<sup>5</sup> Tura ya nekas ashamkatniuitrum, nuna paant jintintiat-tajrume. Ame ayashmi maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.'

<sup>6</sup> 'Jimiará chin̄ki ishitiúpchich ishichik kuitjai surukchatniukait. Túrasha Yusha nu chin̄kin pen̄ké kajinmatkishtatui.

<sup>7</sup> Wats, ashamkairap. Untsurí chin̄kijjai nan̄kaamas Yuska atumin enentáimturmarme. Warí, ame intiashmin mash Yus nekapmaruiti.'

*(Mateu 10.32-33; 12.32; 10.19-20)*

<sup>8</sup> 'Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntari íimiainiamunam natsantrashtajai;

<sup>9</sup> antsu shuar íimjainiamunam Winia natsantrana núnaka Wisha Yusa suntari íimiainiamunam natsantrattajai.'

<sup>10</sup> 'Winia, Aents Ajasu tutain, shuar yajauch chichar-takuin̄kia nusha tsan̄kuramniaiti, tura Yusa Wakan̄ncha yajauch chicharkuin̄kia nuka pen̄ké tsan̄kurachminiaiti.'

<sup>11</sup> 'Wats, Israer-shuar iruntai jeanmasha, tura Israer-shuar kapitiánniumsha, uuntnumsha juramainiakui, anin-mainiakui sha warintiajak tusam ti enentáimsáip.

<sup>12</sup> Ame áimkiatin jeamtai, Yusa Wakan̄i ame títiatmena nuna jintinramattawai," tu timiayi.

*Kuítiak enentáimtuschatniuitji*

<sup>13</sup> Chíkich áishman̄ Jesusan tímiayi "Uuntá, ii aparí ikiur-tamkimiaj nuna yatsur winiasha nakak surustí, titia" tímiayi.

<sup>14</sup> Tutai Jesus tímiayi "Áishman̄ka, atumin nu túratin anaikiamukaitiaj."

<sup>15</sup> Nuyá tímiayi "Pénker enentáimsatarum. Nii takakna nújain̄ shuar iwiaaku, áchatniuiti. Tuma asamtai kuítrintin ajastin aya nuke enentáimsaip."

<sup>16</sup> Nuyá juna métek-taku chichaman unuuniak tímiayi:

"Kuítrintin áishman̄ ni ajaríyan arakan ti nukap juukmai.

<sup>17</sup> Tura "¿Ti nukap asamtai tuiñ ikiustaj. Itiurkatjak?" tu enentáimsamiai.

<sup>18</sup> Wats, wi nékajai. Winia ikiutái-jearun ashiran nú nan̄kaamas úuntan najanatjai. Tura nuí ashí ikiustajai.

19 Nuĩnkia untsurĩ uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

20 “Tura Yus nin chicharuk timiai “Netse. Yamái kashi jakattame. Nuĩnkia imiá núkap ikiusumna nusha ¿yana átata?” timiai” tímiayi.

21 Nuyá Jesus tímiayi “Shuar niñki kuítrĩn ikiauntumna nu, núnisaiti. Túrasha Yusjajĩ íismaka kuítrinchaiti.”

*Yus ni uchirĩn péñker wáinkiaiti*  
(Mateu 6.25-34)

22 Nuyá ni unuiniamurĩn Jesus juna tímiayi: “Warĩ yuarik pujustajĩ tura warĩn entsartajĩ tusarum nuke ti enentáimsairap.

23 Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui.

24 Chĩnkisha enentáimsatarum. Niisha arakmainiatsui. Juuk yurumkan ikiuiniatsui. Tuma aiñ Yuska ni yurumátniurĩn tuke súawai. Atumsha chĩnkia nú nankaamaschakaitrum.

25 Tura ya shuarak, ti enentáimtana nujajĩ nú naya ajasmini-ait.

26 Kame yúpichuch ana nusha túrachminiaitiatrumsha, ¿urukamtai chĩkich ainia nusha ti enentáimtarum?”

27 ‘Íistá, kukujsha takaachitiat tura nájanchitiat ti shíirmach ániawai. Yaunchu akupin Sarumún ti shiir iwiarmamniuitiat kukujia tímianchauyayi.

28 Iis, nupa yamá tsakaawai tura kashin aents tsupikiar jinium apeánáwai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum?

29-30 Ju nuñkanam ana nu ti pachirap. Chĩkich shuar, Yúsán nékainiatsna nu, wariñ yuatajĩ, wariñ umartajĩ nuna ti pachiniawai. Tura atumsha tu enentáimsairap. Urukattjak, tiirap. Ame Apa nayaimpiniam pujana nu, ashí atsumarmena nuna nékawai.

31 Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

*Kuítian pachis Jesus unuiniamiania nu*  
(Mateu 6.19-21)

32 ‘Winia murikrutiram ashamkairap. Untsurĩchuitrume. Túrasha atumí Aparĩ ni akuptairĩn pachitmarktasa ti wakerutmarme.

33-34 Kuítrum tujĩ aa, nuĩ tuke enentáimtittiarume. Tume asamtai takakrumna nu surukrum atsumainia nu susatarum. Nuka enketai arut ajatsna nuĩ enkeatniua núniskete. Túrakrum nayaimpinmayá kuit amuatsna nu íkiauwearme.

Nuisha kasa nu kuitian kasamkataj tusa waya<sub>ch</sub>miniaiti, tura kaya<sub>asha</sub> nu kuitian yúatniun tujintiwai.'

*Anearar wekasatniuitji*

35-36 'Ju enentáimsatarum. Ni uuntri nuatnaikiatin námpernumia taa, "uraitia" takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatai, shiir itiaatai tusarum anearum wekasatarum.

37 Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, "misanam pujustarum" ni takarniurin títiatui tura yurumkan sústartatui.

38 Kashi ajapé<sub>n</sub> taaksha tura tsawa<sub>ana</sub> a<sub>i</sub> taaksha ni takarniurin iwiáa pujuinian wáinkiu<sub>in</sub>ka, nu takar<sub>in</sub> shiir pujuiniawai.

39 Tura j<sub>u</sub>sha nekaatarum. Jeennia nu, kasa tátinian nékaitkiu<sub>n</sub>ka, iwiáa pujusa<sub>ayi</sub>. Kasa wayá kasamkatniun suritkia<sub>ayi</sub>.

40 Atumsha núnisrumek, anearum pujustarum. Wi Aents Ajasu tutai aya aneachmanum tátatjai" tímiayi.

*Pénker takarin yajauch takarniu<sub>jai</sub>*

*(Mateu 24.45-51)*

41 Nuyá Pítiur aniasmiayi "¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?' tímiayi.

42 Tutai Jesus tímiayi "Atumsha pé<sub>n</sub>ker takatan wáinnia núnisketrume. Takatan wáinin ni uuntri takat<sub>ri</sub>n takainia nuna, yurumá<sub>tin</sub> jeamtai, ayurkamna núiti ni úuntri<sub>n</sub> shiir umirna nu, tura pé<sub>n</sub>ker enentáimtana nu.

43 Ni uuntri taa, takat<sub>ri</sub>n tímiatrusa<sub>n</sub> túran wáinkiu<sub>in</sub>ka nu wáinniusha shiir enentáimsamniaiti.

44 Umirin asamtai, ni uuntri ashí ni warir<sub>in</sub> wáitrukat tusa apusattawai. Nuna paant tájarne.

45 Tura nu takatan wáinniusha "úuntur wau táchattawai" tu enentáimias, ni uuntri takarniur<sub>in</sub> yajauch awajeaku<sub>in</sub>ka tura ni<sub>n</sub>ki ti yurumá, ti umar nampeaku<sub>in</sub>ka,

46 nu<sub>in</sub>ka ni uuntri ni nákachmanum aya aneachma taa ti asutiáttawai. Umichu pujuinia nu<sub>i</sub> akupkattawai.'

47 'Takar<sub>in</sub> ni uuntri wakera nuna nékayat, iwiartsuk umit-suk pujakka ti awatramu átatui.

48 Tú<sub>r</sub>asha takar<sub>in</sub> nékach<sub>u</sub> asa, asutniámnia tú<sub>r</sub>akka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisa<sub>n</sub> nan<sub>ka</sub>amas seawarta-tui.'

*Jesus<sub>jai</sub> shuar akannartatui*

*(Mateu 10.34-36)*

49 *Jijiai* nekapsatniua nútiksanak nunkanam jinia ikiapartaj tusan tamajai. Tura túrunat tusan ti wakerajai.

50 Imiantinia núnisan itiurchat ukatrucktati. Nusha wárik amuukat tusan ti wakerajai.

51 “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai.

52 Yamái jukimiutak chikichík shuarnum senku ainia nu akannakartatui; maintiu shuar ni shuarin jímíaran nakitrartatui. Jímíarsha ni shuarin maintiun nakitrartatui.

53 Apasha ni uchirín nakitrattawai. Núnisan uchisha ni aparín nakitrattawai. Nukusha ni nawantrín nakitrattawai, nawantrisha nukurín nakitrattawai. Tsatsarisha ni najatín nakitrattawai; najatisha tsatsarín nakitrattawai.”

(*Mateu 16.1-4; Márkus 8.11-13*)

54 Jesus áentsun chicharuk junasha tímiayi “Atumsha nantu akaatainmaani kjarматаi “yutuktatui” tátsurmek. Nusha nekas tárume.

55 Tura anaaraniá nase násenkamtai “séejik átatui” tárume. Tura nekas tárume.

56 Yuranminmasha nunkanmasha túruna nu nékarme. Túmaitiatrumsha ju tsawantai túrunattana nusha ¿itiura nékatsrum? ¡Maaj, ántrairume!”

*Nemasrumjaisha nawamnaikiata*

(*Mateu 5.25-26*)

57 ‘Túrasha péñker ana nusha ¿urukamtai atumek enentáimsarum wáintsuram?

58 Irutramuram úuntnum júramkuinkia jintia wésamek “numtak iwiarartai” titiá. Túrachkumninkia akupniunam juramkittime. Tura niisha suntarnum akuptamkattame. Tura niisha sepunam enketmattawai.

59 Tura nekas tajai, nuj enkemamka ashí rearchisha akikmachkumka jíinkishtatme” tímiayi.

## 13

*Ii enentái yapajíátniuitji*

1 Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniaj, Piratu nin maa, nuna numpen waaka numpejai pachimpramun ujakarmiayi.

2 Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai ¿tu enentáimprumek?

3 Atsá; atumí enentái yapajíáchkurmeka núnisrumek atumsha jakattarme. Nuna paant tájarme, tímiayi.



4 Tura tiasiúchu áishman<sub>u</sub> yakí jea Seruí kupiniak ini-aak nekenkarmiania nu, ¿warí enentáimtarum? Chíkich Jerusarénnunumia shuarjai nankaamas tunáa ásar túrunawarai ¿tu enentáimprumek?

5 Atsá, tájarme. Atumí enentáí yapajiáchkurmeka núnisrumek atumsha jakattarme.”

*Iikiu numi nereatsna nu*

6 Junasha Jesus métek-taku chichaman tímiauyi. Júiti:

Shuar ni ajariin íkiu numin araamun takakuyi. Nerekchish tusa iyumai. Túrasha nere atsumai.

7 Nuin<sub>u</sub>kia ni ajarin wáinniun timiai “Antukta, menaintiú uwitin juna nere átai tusan waketrú pujajai; túrasha penké wáinkiachjai. Ajakta. ¿Urukantai ánttrash wajastata?”

8 Tutai ajá wáinin timiai “Atsá, uuntá; ju uwitin wajastí. Wajamurin takarsatjai tura pé<sub>n</sub>ker nun<sub>u</sub>kan matsatkatjai.

9 Nujai nerekchampiash. Tura tuke nereachkuin<sub>u</sub>kia nuin<sub>u</sub>kia ajakta” timiai”, tímiayi.

*Nuwan punuá kaarun Jesus tsuármiania nu*

10 Ayampratin tsawantai Israer-shuar iruntai jeanam Jesus unuiniak pujumiayi.

11 Nuisha nuwá pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pa<sub>n</sub>kái nakuenkataj tukamá penké tujinmiayi.

12 Jesus nuna wáiniak, chicharuk “Nawantrú, ame jaamur-miyá ankant ajasume” tímiayi.

13 Nuna tinia ni uwejejai antinmiayi. Tura nú chichamaik nuwasha pa<sub>n</sub>kái nakuenkamiayi. Tura Yusa náarin uunt awajsamiayi.

14 Tura Jesus ayampratin tsawantai tsuaru asantai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nu<sub>i</sub> tátiniaitrume.”

15 Tura Jesus tímiayi, “¿Ántar chichamtinia! ¿atumí waakarisha atumí umpuururisha yumi aartai tusarum ayampratin tsawantin atíarum júatsrumek?

16 Tura ju nuwasha, atumí shuari Apraám shuarnumia akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant ain<sub>u</sub> yajauch awajsamunmayá atíachminkiait” tímiayi.

17 Jesus nuna takui ni nemasrisha natsaararmiayi. Tura penké shuar ni pé<sub>n</sub>ker túramurin wáinkiar warasarmiayi.

*Mustasa jinkíai*

(Mateu 13.31-32; Márkus 4.30-32)

18 Nuyá Jesus tímiayi “¿Yusa akupeamuri warijiaín métek-takuit?

19 Mustasa jinkiáijiai métek-takuiti. Mustasa jinkiaincha shuar ni ajariín araamiayi. Tsapái, tsakaak, uunt numi ajasmiayi. Ti uunt asamtai chin̄ki ni kanawen pasun̄marmiyai.”  
(Mateu 13.33)

20 Tura junasha tímiayi: “¿Yusa akupeamuri warijiaín métek-takuit?

21 Tanta wakaprutaia métek-takuiti. Arinia núkap ana nūj nuwá wakaprutain ishichik en̄keámiayi. Túram ashí wakapruamiayi.” Tu tímiayi.

*Yupikiach waiti*

(Mateu 7.13-14, 21-23)

22 Jesus Jerusarénum jeattsa weak untsurí peprunam wayá unuiniarkutak wémiayi.

23 Weāj ch̄kich shuar aniasmiayi “Uuntá, ¿uwemainia nu ishichikiaiit?”

24 Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiartatui, tájarme.

25 Jeá nérenniuri wáitin epenmiatai, atumsha āa wajarum nu, wáitiniam wajasrum untsúakrum “Uuntá, uratritia” títiatrum. Túrasha “Nékatsjarme. ¿Tuyantskaitrum?” turamtatrum.

26 Nuyá átum títiatrum “Túrasha, uuntá, iisha ámijiai yurumámji, ámijiai umarmaji. Tura ii pépruríncha unuiniamame.”

27 Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyañka kanaktiarum.”

28 ‘Nuyá Apraámsha, Isaksha, Jakupsha tura ashí Yúsnan etserin Yus akupeana nūj wayawaru wáinkiarum tura āa ajapam pujusrum ti útkuram naim tásarara ajattarme.

29 Tura Yus akupeana nūj, nantu tatainmaaniyasha nantu akaatainmaaniyasha, arakiyasha, nuñkaaniyasha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrum, wayashtatrum.

30 Nūjisha yamáí ukunmaani ainia nusha emka ártatui; tura yamáí emka ainia nusha nūjisha ukunmaani ártatui.”

*Jerusarénumaani Jesus wémiayi*

(Mateu 23.37-39)

31 Nu tsawantaj Pariséu aents Jesusan tariar tiarmiayi “Erutis mantamattsa wakerutmawai. Tuma asamtai juyañka wetá.”

32 Tutai Jesus tímiayi “Werum nu kujancham jū titiarum: “Íistá. Yamaisha ishichik tsawant iwianchin júkin akupkartajai; túran jaancha tsuárartajai. Tura ukunam amuktatjai.”

33 Tura Jerusarénnumani ishichik tsawant tuke wétiniaitjai. Yúsnan etserin aya Jerusarénnuman jákatniuiti.'

34 'jJerusarénnumiatiram, Yúsnan etserin máiniaitrume; tura Yus akatar akupturmakmania nusha kayajai tukurum máiniaitrume! Tuma ain atash ni shiamprin etektana núnisnak Wisha weaktasan wakerimjiarme, túrasha nakitramarme.

35 Iistarum. Atumniasha Yus ajapramaitrume. Tura "Yusa náarin winiana nu, shiir atí" títiatrumna nú tsawant jeatsain penké wáitkiashtatrume. Nuna tájarme" tímiayi Jesus.

## 14

### *Áishman eaak-jaan Jesus tsuármiania nu*

1 Ayampratin tsawantai Pariséu uunri jeen Jesus yurumáttsa wémiayi. Tura chíkich Pariséu wariniak túrat tusar ii pujuarmiayi.

2 Nui áishmana eaak-jaa Jesus pujamunam naka pujumiayi.

3 Jintinniuncha Pariséuncha Jesus aniasmiayi "¿Warí tárm? ¿Ayampratin tsawantai jaa tsuárminkiait. Tsuárchamniakait?" tímiayi.

4 Tura niisha áimtsuk pujuarmiayi. Nuinkia jaan antin tsuármiai. Tura "shiir wetá" tímiayi.

5 Nuyá Pariséun chicharuk, "Atumí umpuurarisha, waakarisha waa tármanum akaiki iniamtai, ayampratin tsawant ain nu chichamaik júatsrumek" tímiayi.

6 Takui áimkiatniun penké tujinkiarmiai.

### *Nuátnaikiatin nampernum ipiaamu ármia nu*

7 Ipiaamusha penkeri pujutainium pujustaitsar ti wakeruiniakui, Jesus nuna wáiniak juna jintintramiayi:

8 "Nuátnaikiatin nampernum penkeri pujutainium pujusaip. Nui pujakminkia, chíkich ámijai nankaamas penkeri táchatpiash.'

9 "Tura ipiatmania nu chichartamuk "Chíkich iiktusta" turamchatpiash. Nuinkia chíkich nánkatkamu pujutainium wéakum natsartatme.

10 Antsu ipiatmakmin, nánkatkamu pujutainium pujustá. Nuinkia ipiatmamnia nu chichartamuk "Amikru, ámeka jui penkeri pujutainium pujustá" turamtatui. Nujai chíkich ipiaamu ainia nu, "nekas penkerinti" turamartatui.

11 Iimiata, "penkerintjai" tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti."

12 Nuyá Nin ipiaamua nuna chicharuk tímiayi "Amesha yurumáití tusam untsuktajtsam wakerakmeka, ame amikrumsha, yatsumsha, ame shuarumsha, írutramuram

kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme.

<sup>13</sup> Antsu yurumáití tusam untsuktajtsam wakerakmekka, kuítríncha, wekaicha, shutuapsha, kusurusha ipiaawarta.

<sup>14</sup> Niisha akirmaktinian tujintiainiawai. Péñker shuar nantakiartatna nuñ akinkiattame. Nu tuma asamtai warastatme” timiayi.

*Uunt namperan Jesus nekapmá chichasmiania nu*

<sup>15</sup> Nu misanam pujuarmia nuya, chikichik Jesus chichaa-mun antuk, Jesusan timiayi “Yus akupeemunam pachiniak, yurumkuñka ti shiir ainti.”

<sup>16</sup> Nuna takui Jesus juna jintintiamiayi: “Áishman namperan nájanuk, untsurí shuaran taartí tusa akatar akupkamai.

<sup>17</sup> Yurumátin jeamtai “Winitiarum, yurumátin jeayi” tu tiarta tusa ni takarniurín akupkamai.

<sup>18</sup> Tura winichminiaitji tusar ashí ujakarmai. Chíkich timiai “Nuñkan yamáí sumarmakjai. Iyutaj tusa wéakun winishtatjai. Tsankurturti” timiai.

<sup>19</sup> Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai.

<sup>20</sup> Tura chíkich chichaak “Yamáí nuatnaikiajai. Tuma asan winishtatjai” timiai.

<sup>21</sup> Takarin waketki ni úuntrín ashí nuna ujakmai. Nuna antuk niisha kajekmiayi. Tura ni takarniurín timiai “Ju péprunam péñker jintianmasha tura uchich jintiachinmasha weme, kuítríncha tura wekaichasha, shutuapsha, kusurusha itiaarta.”

<sup>22</sup> Nuyá ukunam ni takarniurí taa chicharuk “Uuntá, ame turutmiamna nútiksanak túramjai; túrasha tuke ankant awai” timiai.’

<sup>23</sup> Tutai ni uuntrí chichaak “Jintianam weme, chíkich jintiachiniam weme, wáinmena nu ashí awayawarta. Winia jearui piakat tusan wakerajai.

<sup>24</sup> Emka ipiaawarmajnia nuka penké chikichkíksha winiñkia yurumáchartatui, tajarme’ timiayi.”

*Kristu nemarsatin yúpichuchichuiti*

<sup>25</sup> Untsurí aents Jesusjai irunki wearmiayi. Niisha nuna apajas iis juna timiayi:

<sup>26</sup> “Shuar ni aparíncha, ni nukuríncha, nuaríncha uchiríncha, yachíncha, umaincha Wijiai nankaamas enentáimtakka, tura shiir pujustinian wakerak Winí winitniun nakitiakka winia unuiniamur ajaschamniaiti.

<sup>27</sup> Ni wakeramurín ajakeak ni krusrj yanakj nemartatsna nu winia unuiniamur ajaschamniaiti.’

28 *Jea* yakí *jeamtaj* tusam wakerakmeká, kuítian urutmak ajapawaintiaj tusam tura urutmajaink' amukaintiaj tusam emka enentáimsashtatmek.

29 Túrutsuk aya ukura iniaisam amuktin tujinkiakmin<sub>nk</sub>ia, nuna wáiniainia nu, wishikiainiak *juna* tiartatui:

30 "Iiskua. Nu shuar *jeamtinian* nan<sub>nk</sub>amamiayi. Túrasha amuktinian tujinkiamiayi."

31 "Tura uunt kapitián *chíkich* kapitian<sub>nk</sub>ai mesetan najanatin áchatpiash. Emka, niisha pujus, tias mir (10.000) suntar<sub>nk</sub>ai painti mir (20.000) suntar winiana nuna nupetkaintjash tusa enentáimsashtatuak.

32 Tujintiakka, *chíkich* kapitián jeachat pujaanak, nawamnaikiatai tusa akatar akupkashtatuak.

33 Wats, "Kristu unuiniamur<sub>nk</sub> ajastin<sub>nk</sub>ai, wi takakjana *juna* warí winia itiurtawa" tu enentáimsatnuiutrume. Túrachkurmeka winia unuiniamur ajastin tujinkiar<sub>nk</sub>me.'

*Wee michumarka yajauchiiti*

(*Mateu 5.13; Márkus 9.50*)

34 'Weeka jeaku pé<sub>nk</sub>erai<sub>nk</sub>. Tura michumarka *ç*itiurak atak pé<sub>nk</sub>er ati?

35 Wee michumarka araa<sub>nk</sub>matniunmasha yaya<sub>nk</sub>atsui. Tura tsuatnum ikiusmasha á<sub>nk</sub>trai<sub>nk</sub>. Aya ajapatniukete. Kuishim áku<sub>nk</sub>ia antuktarum" tímiayi.

## 15

*Jesus murik men<sub>nk</sub>kakamu chichaman unuiniamiania nu*

(*Mateu 18.10-14*)

1 Akupniu kuí<sub>nk</sub>rin<sub>nk</sub>-juu tura yajauch shuarsha Jesusan an<sub>nk</sub>turkatai tusar tarú wearmiayi.

2 Tuma asamtai Pariséusha, Israer-shuara jintinniur<sub>nk</sub>isha Jesusan áujmatainiak "J<sub>nk</sub>usha tunáa shuaran itiaawai tura ni<sub>nk</sub>ij<sub>nk</sub>ai yurumáiniawai" tiarmiayi.

3 Nuna tuiniakui Jesus *ju* mé<sub>nk</sub>tek-taku chichaman jintinti-awarmiayi:

4 "Shuar sian (100) murikiun takuschampiash. Nu siá<sub>nk</sub>numiá *chikichik* men<sub>nk</sub>kakam<sub>nk</sub>ai nuwintia nuíwinkia ni matsatmar<sub>nk</sub>in<sub>nk</sub> ikiuak, men<sub>nk</sub>kaka nuna ti e<sub>nk</sub>achattawak. Wáintsuk inia<sub>nk</sub>isastatui.

5 Tura wáiniak yakainium awan<sub>nk</sub>kek waras je<sub>nk</sub>en wáketui.

6 Tura je<sub>nk</sub>en jeá ni amik<sub>nk</sub>rin<sub>nk</sub>, ír<sub>nk</sub>utramur<sub>nk</sub>incha ikiaan<sub>nk</sub>ak "Wij<sub>nk</sub>ai warastarum. Murikiur men<sub>nk</sub>kaka nuna wáinkiajai" tawai.

7 Wats, nuwintia nuiwi pé<sub>nk</sub>ker shuar akui nayaimpiniam warastin awai. Tura antsu *chikichik* yajauch shuar ni enentáin yapajiam<sub>nk</sub>tain<sub>nk</sub>ia, nú nan<sub>nk</sub>kaamas warastin á<sub>nk</sub>tatui, tájar<sub>nk</sub>me' tímiayi.

*Kuit emen̄kakman Jesus unuiniamiania nu*

<sup>8</sup> ‘Nuyá chíkich enentáimsatai. Nuwā tias kuítian takakna nuna chikichik men̄kakamtai, wáinkiataj tusa jinia ekeemak, jean japimiak émamkes eakchattawak.

<sup>9</sup> Tura wáiniak ni amikr̄in, írutramur̄incha ikiaanak, “Wij̄jaj warastarum. Kuit men̄kakamia nuna wáinkiajai” tawai.

<sup>10</sup> Núnisan̄ yajauch shuar ni enentáin yapaj̄iámtai, Yusa suntarī matsatmanum ti warastin awai” tímiayi.

*Uchi ni apar̄īn waketkitniun Jesus unuiniamiania nu*

<sup>11</sup> Nuyá Jesus juna unuiniamiayi:

“Áishman̄ jimiará uchin takakuyi.

<sup>12</sup> Tura pátatka uchi ni apar̄in timiai “Apawá, surustiniaitmena nu yamá surusta.”

‘Tutai ni apar̄ī ni kuítr̄in jímiapetek nakak mai uchin susamai.

<sup>13</sup> Ishichik tsawant nan̄kaamasaj̄i pátatka uchi ni warir̄in irur jukí jeachat chíkich núñkanam wémai. Nuñsha nán̄kamas yajauchin túrak kuítr̄in ashí ajapamai.

<sup>14</sup> Ni kuitr̄i ashí amuuka āin̄ nu nun̄kanam ti tsuka ámai. Niisha núnisan̄ tsukarīin wáitsamai.

<sup>15</sup> Túmak takatan eak̄tajtsa nu nun̄kanmaya apachīin werimiai. Nu áishman̄sha kuchir̄in wáitrukta tusa akupkamai.

<sup>16</sup> Uchi ti tsukamak kuchi ukatramun niisha yuátajtsa ti wakerimiai. Túrasha pen̄ké súcharmai.

<sup>17</sup> Tumáa pujus nuñkia enentáimpramai. “Winia apar̄ūi takau shuar pen̄keran ti yurumáiniawai. Tura wikia jūi tsukarūi wáitijai.

<sup>18</sup> Wats, apar̄ūi waketkitjai. Tura aparun chicharkun “Apawá Yúsjāisha ámij̄jāisha tunaan túrajai, titiajai.

<sup>19</sup> Ame uchiram áchamniaitjai yamaikia. Ame takarniurmea áantsanak átaj tusan wakerajai” titiajai” tu enentáimsamai.

<sup>20</sup> Tura wajaki ni apar̄īn waketkimiai’ tímiayi.

‘Tura ni apar̄isha jeachat winian wáiniak waitnentramai. Apar̄ī tséken̄ki in̄kiun̄ miniakak mukunámai.

<sup>21</sup> Nuñkia uchir̄isha timiai “Apawá, Yúsjāisha ámij̄jāisha tunáan túrajai. Ame uchiram áchamniaitjai.”

<sup>22</sup> ‘Túrasha ni apar̄inkia ni takarniur̄in chicharuk “Ti pen̄ker pushí itiarum áentsratarum, timiai. Tura uwejnum aweet- aisha aweemtikiatarum. Tura sapatcha aweemtikiatarum.

<sup>23</sup> Túrarum waaka nueram ana nu maatarum. Námp̄er nájankur shiir enentáimsar yurumámi.

<sup>24</sup> Warí, jū winia uchir jakaapitia tu enentáimsamjai. Túrasha iwiaakui. Men̄kakama nuna wáinkiajai.” Nuñkia ti warasar- mai’ tímiayi.

25 ‘Tumaj*̄* iwia*̄*í u*̄*chikia takatnum pujumai. Tura wáketuk, jeá nuntumas jantsemáiniak túntuiyamun antukmai.

26 Nuin*̄*kia yaintri*̄* matsatun chikichkiniak untsuk “¿Warimpait?” timiai.’

27 ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum penker tau asamtai” timiai.’

28 ‘Tura iwia*̄* uchi kajek wayatniun nakitramai.’

‘Tuma asamtai ni aparí jiiintiuki “wayata” timiai.’

29 ‘Tura uchisha aparin chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chiipiuksha penké surichuitme.

30 Tura ju ame uchiram nuwajaj*̄* yajauchin túrak ame kuítrumin wasurkania nu támatai, waaka nueram máachumek” timiai.’

31 ‘Takui aparí chicharuk “Uchirú, áme*̄*ka wijia*̄* tuke pujame. Tura wi takakjana nusha ashí áminuiti.

32 Tura ame yatsum jákai*̄*tu enentáimsamaj nu iwiaakuiti. Menkaka nu yamaikia wáinkiaji. Tuma asamtai námper najanar waraschatniukaitiaj” timiai” tímiayi.

## 16

### *Takatan wáinin*

1 Ju métek-taku chichamnasha Jesus ni unuiniamu<sup>7</sup> ‘Tura nii chichaak “Ame yátsrin unuiniamiayi.

“Kuítrintin áishmanka takatrin wáinniur*̄* ámai. Tura nérenniun ujainiak “Ame wáinniuram ame kuítrumin nánkamas ajapeawai” tiarmai.’

2 ‘Nuna antuk ni wáinniurin untsuk “¿Warinia jusha tura-mainia? timiai. Yamaikia winia wáinniur áhattame. Tuma asamtai winia kuítrujai ititurkamea nu iniaktursata” timiai.’

3 ‘Tutai takatan wáinin enentáimsamai. “Maaj, wisha ititurkatjak, timiai. Nunka táurtinnishajejtsjai. “Kuit surusta” titinnishajatsamajai.

4 Winia takatur atsakui yurumkan ajamprusarat tusan túratajna nuna nekajai” tu enentáimsamai.

5 Nuyá nérenniun tumashmaku armia nuna ankant ankant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

6 ‘Niisha áimiuk “Asuitin sian taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta” timiai.’

7 ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana sian̄ taru tumashiitjai” timiai.’

‘Tutai “Pai. Papinium tumashrum ana nu júiiti. Chíkich papinium aya uchentak aarta” timiai.’

<sup>8</sup> ‘Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nan̄kaamas Yus-shuarcha ajjiai ni túratniuriniak takainiak imiá enentáimkia áiniawai.’

<sup>9</sup> ‘Ju nun̄kanam anan̄katin átsuk. Tura kuitsha aya ju nun̄kanmayan̄kete. Tuma asamtai atumsha kuitrumjai “shuaran yain̄taj” tu enentáimsatarum. Kuitjai yain̄tin amuukamtai atumsha amuicha jeanam ipiaamu átaj tusarum túratarum.”

<sup>10</sup> ‘Shuar ishichik takakna nujai péñker túrakka, núkap takakna nujai sha péñker túrattawai. Tura ishichik takakna nujai péñker túrachkun̄ka, núkap takakna nujai sha péñker túrashtatui.

<sup>11</sup> Tuma asamtai ju nun̄kanmaya anan̄kartin kuitjai péñker túrachkurmeka, tuke átin ana nujai takastincha ¿itiur takas-tarumek?

<sup>12</sup> Takakme nuna Yus ikiatmasuiti. Nujai péñker túrachkurminkia, atumnia átinia nuna ¿itiurak suramsat?’

<sup>13</sup> ‘Takarniuri jimiará úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya sen̄kuentachik aarta” timiaituak. Chikichan umiruk chikichnaka umirkashtatui. Yussha kuitcha mái-metek enentáimtuschamniaitrumek” tímiayi Jesus.

<sup>14</sup> Pariséusha kuítian anen armia nu, ashí ni táman antukar Jesusan wishikrarmiayi.

<sup>15</sup> Túmakui Jesus nin tímiayi “Atumsha aents íimmianum péñker awajmamprume. Túrasha atumí enentáincha Yus péñker nékawai. Kame winia “nan̄kaamantuiti” turutit tusa wakera nuna Yuska nakitiawai.’

### *Yaunchu etserkamu, yamá etserkamu*

<sup>16</sup> ‘Juan̄ étsertsain̄ Muisáis aar akupkama nunasha tura Yúsnan etserin unuiniarmia nunasha antuktin ármiayi. Tura yamaisha tímianiaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiinkiatatj tusar ni kakarmarijjaij ti takainiawai.’

<sup>17</sup> ‘Túrasha yaunchu akupkamu ashí chicham uminkiat-niuiti. Nu chicham uminkiashtinkia nayaimpisha nun̄kasha amukatniujai nan̄kaamas itiurchataiti.’ \*

<sup>18</sup> ‘Áishman̄ nuar̄in ajapa chikichan nuátkun̄ka tsanirmawai. Tura nuwá ajapamu niiniurtakka nusha núnisan̄ tsanir-mawai.’

\* 16:17 Mateu 19.1 ya sen̄kuentachik aarta” timiai-12; Márkus 10.1-12



*Kuítrintin áishman Rásarujai*

19 ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najanniuyi.

20 Tura kuítrincha ámai ni naari Rásaru. Niisha kuchapruku tunamaruyi. Tuke tsawant kuítrinniu wáitirijn pujuyi.

21 Ti tsukamak kuítrinniu misariniã kakekan yuattsá wakerimiai. Tura yawasha ni kuchaprin nukatiarmai.

22 Kuítrincha jakamai. Jakamtai jaka shiir pujutainium, Apraám pujumia nuí nayaimpinmaya suntar júkiarmai. Kuítrinniusha jakamai. Jakamtai iwiarsarmai.

23 Jaka pujutainium wáitias pujus, pañkái íimias, Rásarun Apraámjai pujuinian wáinkiamai.

24 Wáiniak untsumuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha juí jinium pujusan ti waitiajai” timiai.’

25 “Tutai Apraám timiai “Uchirú enentáimpratá. Ame nunká iwiaaku pujusam ti shiir pujumame. Antsu Rásaruka nuí ti yajauch pujumai. Tura niisha yamaikia juí áyamui tura ámeke wáitiame.

26 Tura nú arant nánata ti uunt awai. Tuma asamtai juyá ai wétinian wakeruiniayat tujintiainiawai. Tura aiyá juí tátinian wakeruinia nusha tujintiainiawai.” ’

27 ‘Nuñkia kuítrintin timiai “Nuñkia apawá Apraamá, juna seajme. Winia aparú jeen Rasaru akupturkata.

28 Nuísha winia yatsur senku matsataniawai. Niisha ju wáitsatniunam tácharat tusa ujákartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.” ’

30 ‘Tutai kuítrintin áimkiamai “Túrasha apawa Apraamá, antsu jakamunmaya nantaki, shuar we ujakam enentáin yapajjáwarainti.” ’

31 ‘Tura Apraám timiai “Muisáis áarman tura Yúsnan etserin áarman anturainiachkunka jaka nantaki we ujakmasha antukchartatui” timiai.” Tu áujmatsamiayi Jesus.

**17***Yajauch túrumtikiatin ti tsúumainti  
(Mateu 18.6-7, 21-22; Márkus 9.42)*

1 Jesus ni unuiniamurin juna tímiayi, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu aneartí.

2 Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsain uunt

kayajaj̄i kuntujnum jin̄kiá nayaantsanam ajunkam maak ainti.

<sup>3</sup> Túrasha atumek íimiastarum. Ame yatsum ámin tunáa túrutmamtaĩkia chicharkata; tura niisha “tsaṅkurturta” túramkuĩkia tsaṅkurata.

<sup>4</sup> Chikichik tsawantiniṅ siati túrutmamtai, tura “tsaṅkurturta, atakka túrashtatjai,” siati túramkuĩkia, tuke tsaṅkurata.”

*Yus nekas enentáimtakrikia tujinkiashtatji*

<sup>5</sup> Jesusa unuiniamur̄i Nin chicharuk “Yus enentáimtajnia nú naṅkaamas enentáimtustin yáinmaktá” tiarmiayi.

<sup>6</sup> Tutai Jesus tímiayi “Mustasa jinkíái ti ishitiúpchich ana núnisaṅ ishichkisha Yus enentáimtaitkiurmeka, sikiumuru numi wajana nu, “Wajamurm̄iyaṅka ukuiniakam nayaantsanam wajasta” tákurmin nú numi umirtamkainti.’

*Yusa takatr̄i takasar “ti penker túraitji” tíchatnuiitji*

<sup>7</sup> ‘Atumí takarniur̄i arakmasua amik, waakancha iis támatai, ¿nú chichamaik amesha, “Winitíá, yurumáitíá” tíintmek?

<sup>8</sup> Atsá. Antsu, “yurumak iwiarturata. Wi yurumátin tura umartincha surusminiam iwiarnarta. Nuyá ame yurumátá.” Nu tíchaintmek.

<sup>9</sup> Nii túratin ana nunak túratsuk. Tuma asantai yu-miṅsashtatme.

<sup>10</sup> Atumsha núnisrumek Yus túramna nu ashí umikiam “ti penker túraitjai” tíchatnuiitme. Antsu “aya ii túratniur̄i ana nuke tura asar iikia ántraitji” títiniaitme.” Tu tímiayi Jesus.

*Tias áishmaṅkan tunamarun Jesus tsuárarmiania nu*

<sup>11</sup> Jesus Jerusaréṅnum wesa Kariréa nuṅka ikiuki Samaria nuṅkanam naṅkaamakmiayi.

<sup>12</sup> Tura péprunam jeamtai, tias áishmaṅ ripra suṅkurjaj̄i tunamaru armia nu, arant wajasarmiayi.

<sup>13</sup> Tura untsumainiak “Uunt Jesusá, waitnentrurta” tiarmiayi.

<sup>14</sup> Jesus nin wáiniak, “Pátrij̄ werirum iniaktumastarum” tímiayi.

Tura wésar péṅker ajasarmiayi.

<sup>15</sup> Nuyá chikichik ni tsuamarman nekáa kakantar chichaki Yusa náar̄in uunt awajki waketki Jesusan tarimiayi.

<sup>16</sup> Yumiṅsataj tusa Jesusan tikishmatar piniakumar tepesmiayi. Nu áishmaṅka Samarianmaȳuyayi.

<sup>17</sup> Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia?

<sup>18</sup> ¿Ju yajaya áishmaṅ níṅkik Yusa naar̄i uunt awajsataj tusa waketki tai?”

19 Nuyá áishman<sub>kan</sub> tímiayi, “Winia nekas enentáimtura asam pé<sub>n</sub>ker ajasume. Wajakim shiir weta” tímiayi Jesus.

¿Yusa akupeamur<sub>i</sub> urutaik ati?

(Mateu 24.23-28, 36-41)

20 Pariséu aents Jesusan aníak “¿Yusa akupeamur<sub>i</sub> urutaik ati?” tiarmiayi.

Tutai Jesus tímiayi, “Yusa akupeamur<sub>i</sub> paant wáinkiachminiaiti. “Yamaí nan<sub>k</sub>amnyi” tichamniaiti.

21 “Ju<sub>i</sub> awai, nu<sub>i</sub>sha awai” tíchamniaiti. Warí, Yusa akupeamur<sub>i</sub>nkia atum<sub>i</sub>n pujawai” tímiayi.

22 Nuyá ni unuiniamur<sub>i</sub>n chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiar<sub>k</sub>ia mak” turuttiatrume. Túrasha tujinkiatarme.

23 Aents Ajasu tutai “ju<sub>i</sub> pujawai, nu<sub>i</sub>sha pujawai” tuíniakui weriirap. Tana nu nemariirap.

24 Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisa<sub>n</sub> wi taamu paant átatui.

25 Tura nu túruntsa<sub>i</sub>n yamai pujuinia nu Winia nakitruiniakui ti wáitsatniuitjai.

26 Winia atak tátiniur jeamtai, yaunchu Nuái pujumia nú tsawantin túrunamia núnisa<sub>n</sub> túrunattawai.

27 Yurumáwarmiayi, umararmiayi, nuatnaikiarmiayi, ni nawantr<sub>i</sub> nuatnakat tusa surukarmiayi. Tumáa pujuinia<sub>i</sub> Nuái uunt kanunam en<sub>k</sub>emprantai, amarak nu aentsnasha mash amuukarmiayi.

28 Tura Sutuma péprunmasha Rauta írutramur<sub>i</sub>sha núnisara<sub>n</sub> Yusa asutiátniur<sub>i</sub> enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, je<sub>a</sub>ncha jeammarmiayi.

29 Tura Raut Sutuma péprunmaya<sub>a</sub> jiinkimtai asupri tutai kaya keekyútana áintsan<sub>a</sub> nayaimpinmaya<sub>a</sub> kakeetuk nu áentsun mash máawarmiayi.

30 Núnisa<sub>n</sub> winia atak tátiniur jeamtai enentáimtsuk pujusartatui.’

31 ‘Nu tsawant jeamtai je<sub>a</sub> yakiin<sub>i</sub> pujana nú shuar ni warir<sub>i</sub>n achiktaj tusa akaikishti. Jeá wayashti. Tura kampuniunam wekaana nú shuar ni je<sub>e</sub>n waketkishti.

32 Rauta nuar<sub>i</sub> túrunamu enentáimpratarum.

33 Aya ju<sub>a</sub> nu<sub>n</sub>kanmaya<sub>n</sub> enentáimias “iwiaaku átaj” tana nu ni iwiaakmar<sub>i</sub>n emen<sub>k</sub>áktatui. Tura ju<sub>a</sub> nu<sub>n</sub>kanam ni iwiaakmar<sub>i</sub>n emen<sub>k</sub>ana nu nekas iwiaakma ana nuna wáinkia<sub>t</sub>tawai.

<sup>34</sup> Paant tájarme. Nú káshitin jimiará áishman̄ nuu peaknu-man̄ kanúu tepeartatui. Chikichik junaktiatui, chíkichkia iki-unkittiwai.

<sup>35</sup> Jimiará nuwá mái-metek nekée pujuartatui. Chikichik junaktiatui, chíkichkia ikiunkittiwai.

<sup>36</sup> Jimiará áishman̄ kampuniunam wekainiartatui. Chikichik junaktiatui, chíkichkia ikiunkittiwai.” Tu tímiayi.

<sup>37</sup> Nuna antukar “Uunta ¿túi túrunatta?” tiarmiayi.

Tutai ni chichaak “Jaka tepana nuj chuan̄ káutkartatui.”

## 18

### *Shuar yawętsuk Yúsan tuke áujsatniuiti*

<sup>1</sup> Shuar yawętsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

<sup>2</sup> “Chíkich péprunam shuaran akupin amai. Nú áishman̄ Yúsnasha ashamchauyi; shuárnasha péņker enentáimtichuyi.

<sup>3</sup> Tura nú péprunam waje amai. Niisha shuáran akupniun chicharuk “Áishman̄ winia yajauch awajtusmania nu írtusta” tusa tuke waketrú pujuyi.

<sup>4</sup> Yámankamtaikkia nin anturkatniun nakitmiiai. Tura ukunam enentáimias “Wisha Yúsan ashamachiatnak shuárnasha péņker enentáimtichuiatnak ju waje tana nuna túrattajai.

<sup>5</sup> Warí niisha tuke taa itit awajtatsuk. Tuma asantai nin kajerkaĵ tusan wárik túrattajai” timiai” tímiayi.

<sup>6</sup> Nuyá uunt Jesus tímiayi “Shuaran akupin yajauchiitiat nuna timiai.

<sup>7</sup> Tura Yus ti péņker asa, ni achikmarin tsawaisha, káshisha untsuamka nú nan̄kaamas anturkashtatuak. ¿Yáĵtsuk men̄kakatuak?

<sup>8</sup> Atsá, wárik yáinkiertatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

### *Pariséusha, kuítian-juuncha Yúsan áujsarmia nu*

<sup>9</sup> “Péņkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

<sup>10</sup> “Jimiará áishman̄ Yusa Uunt Jeen Yus áujsatat tusar wear-mai. Chíkichkia Pariséuuyi, chíkichkia kuítian-juuyi.

<sup>11</sup> Pariséusha wajaki Yúsan áujuk júnis tímiayi: “Yusrú, chíkich áishman̄ kasa, yajauch, tsanirmau ainia nujai métekcha asan yumiņsajme. Tura ju kuítian-juu wajana jújaisha métekchaitjai.

12 Warí, Ame akupkamna nuna iniaṅkasan wisha chikichík semanatinṅ jimiará tsawant ijiarman áujejai; tura wi achi-ajna nuna tiásnumiṅ chikichkiniak Yúsnaiti tusan akankan súajai.” Tu tímiyai.’

13 “Tura kuítian-juusha arant wajas, nayaimpinmaanṅ pankái ímsatniunkesha natsaamak, tsunsuma, ni netsepen awatí “Yusá, ti tunaitjai. Waitnétrurtá” timiai.’

14 ‘Wats tájarme, nu kuítian-juu shuar Yus ímmianum ni enentái péñker awajnas ni jeen waketkimiai. Tura Pariséuka tamia núnisaṅ waketkimiai. Nekaatarum. Shuar nankaamantu enentáimtumana nuka péejchach awajnastatui. Tura antsu péejchach enentáimtumana nu, nankaamantu awajnastatui” tímiyai Jesus.

*Uchisha Jesusna áminiati*

*(Mateu 19.13-15; Márkus 10.13-16)*

15 Jesus antinṅkiarat túsar uchin itiararmiayi. Tura Jesusa unuiniamurísha nuna wáinkiar suritkiarmiayi.

16 Tura Jesus nin untsukar tímiyai “Uchi Winí winitin tsanṅkamkatarum, surimkiairap. Enentáimsatarum. Uchichia áintsanṅ enentáimtumana nú shuárak Yus ni enentáin akupin ajasminiati.

17 Uchi ni úuntrṅ umira núnisaṅ shuar Yúsán umíachkunka Yus ni enentáin akupin ajaschamniati.” Tu tímiyai Jesus.

*Kuítrintin áishman Jesusjai áujmatsamiania nu*

*(Mateu 19.16-30; Márkus 10.17-31)*

18 Shuara untrṅ Jesusan tarí áujsamiai. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiyai.

19 Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

20 Tura Yus akupkamu ana nu péñker nékame. Tsanir-mawairap, mankartuawairap, kasamkairap, tsanumpru-rairap, ame apasha, nukusha shiir enentáimtustarum. Nusha nékame” tímiyai.

21 Tutai áishmanṅ tímiyai “Uuntá, úchichik mash umiki tsakaruitjai.”

22 Jesus nuna antuk “Chikichik taatramsai, tímiyai. Ame takakmena nu ashí surukam kuítrinha ainia nu susarta. Nuinṅkia nayaimpiniam kuítrum átatui. Túram nemartustaj tusam winitia.”

23 Tura nuna antuk, nu áishmanṅ ti kuítrintin asa ti kuntuts enentáimpramiayi.

24 Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiyai.

25 Kamiriuka, uunt ana nu, auja jiin wayatin iturchataiti. Tura shuar kuítrín ti enentáimtana nu Yus akupeamunam pachiinkiatin nú nankaamas iturchataiti.” Tu tímiayi.

26 Tura nuna antukarmia nu tiarmiayi “¿Nuinkia yaki uwempramniait?”

27 Tutai Jesus tímiayi “Aents tujintiainia nuna Yuska páchitsuk túramniaiti.”

28 Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

29-30 Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan ni aparíncha, nukuríncha, yachínkisha, nuwenkeshá, uchirínkisha ikiuakka ju nunkanmasha núkap wáinkiatatawai nu shuar. Tura tuke iwiaaku pujustinniasa wáinkiatatawai.”

*Ataksha ni jákatniurín Jesus ujakmiania nu*

*(Mateu 20.17-19; Márkus 10.32-34)*

31 Jesus ni tuse unuiniamurín akanki ikiaanak juna tímiayi: “Jerusarénum jeatemaji. Juísha Jerusarénum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatatawai.

32 Apachnium surutkartatui. Túrawar wishikrurar, katsekrukar usukruawartatui.

33 Awatiar mantuáwartatui. Túramaitiatnak menaintiú tsawántaj nantaktiatjai” tímiayi.

34 Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

*Jirikiúnmayá áishmankan Jesus ímtikmiania nu*

*(Mateu 20.29-34; Márkus 10.46-52)*

35 Jesus Jirikiú péprunam nuntumsaj, nuí áishman ji kusuru, kuítian surusarat tusa jintiá pujumiayi.

36 Untsurí aents nankaamainian antuk “¿warínkit?” tímiayi.

37 Tutai, “Nasarénumiá Jesus nankaamawai” tiarmiayi.

38 Kusurusha nuna antuk untsukum “Jesusá, Uunt Kapitían Tawit weeachukaitiam. Tátiniuya núchakaitiam. Winiaja waitnentrurta” tímiayi.

39 Eemak wearmiania nu chicharainiak “takamatsata” tiarmiayi.

Tutaisha nú arant untsukum “Tawit weeachukaitiam; winiaja waitnentrurta” tímiayi.

40 Nuinkia Jesus wajas “itiatarum” tímiayi. Tura nii támatai,

41 “¿Warí itiuurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

42 Tutai Jesus chichaak “Ímtia. Winia nekas enentáimtura asam pénker ajasume” tímiayi.

43 Nu chichamaik kusuru íimmiayi. Tura Yusa naari uunt awajki Jesusan nemarmiayi. Tura ashí aents nuna wáinkarmia nusha Yusa náarín uunt awajsarmiayi.

## 19

### *Sakíu Jesusjai*

1 Nuyá Jirikiú péprunam wayá nuí wekaikini ajamiayi.

2 Nuí kuítrintin áishman ni naari Sakíu pujumiayi. Nu Sakíu kuítian-juu úuntriyayi.

3 Aents ti káunkámtai, Sakíu ti sútarach asa, Jesusan íistaj tukamá tujinkiamiayi.

4 Tuma asa Jesus nuke nankaamaktin asamtai, eemki tsékiniki sikiumuru numi wajamunam wakamiayi iistaj tusa.

5 Jesus nuí nankaamak pańkái íimias chicharuk “Sakíu wárik akáikitiá. Ame jeemijn yamá kanartiniaitjai” tímiayi.

6 Tutai Sakíusha wárik akaiki, shiir enentáimias Jesusan itiaamiayi.

7 Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiayi.

8 Nuyá Sakíu wajaki Jesusan chicharuk “Íistá Uuntá, wi takakjana juna jímiapetek nakakan kuítrincha ainia nuna susartatjai. Tura wáitruan chikichan kasarkaitkiuncha menaintiu patatsan awainkittiajai” tímiayi.

9 Tutai Jesus tímiayi “Ju áishman Apraáma shuárintiat yamá niisha níniujai uwempra asa nekas Apraáma shuari ajasuiti.

10 Wisha Aents Ajasu asan menkakaru ainia nuna eakan uwentikrartaj tusan táwitjai.” Tu tímiayi.

### *Kuítian nekapmá chichasmiayi*

11 Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusarénum nuntumsaraj, nuna enentáimsaráin tusa Jesus juna métek-takun chichasmiayi:

12 “Áishman penkeri amai. Nu áishmansha jeachat chíkich núńkanam kapitián náamkan tátaj tusa wemai.

13 Tura wétsuk ni takarniurin tias armia nuna untsukarmai. Tura ankant ankant kuit kurijjai nankaamas péńker armia nuna suíniak “Ju kuitjai wi táatsain takakmá ajatarum” timiai.’

14 “Tura ni nunkenia shuarka nakitiarmai. Túmainiak “nu áishman ii kapitiántri ajasain tusar nakitiaji” nu titiá tusar áishman kan akatrar akuptukarmai.’

15 “Tuma ain kapitián náamak ni nunken waketki tamai. Taa “winia kuítrujai warí túrarum” titiaj tusa ni takarniurin kuitia súsarmia nuna untsukarmai.’

16 'Ni takarniurj emka chikichik taa "ame kuítrumjaj takakmasan tias patasan achikmajai" timiai.'

17 'Tutai kapitián chichaak "Pénker túrame. Ishichik susamjamna nújaink' wi tímiajna tímatrusmek túrame. Tuma asakmin tias péprun akupin awajsattajme" timiai.'

18 'Chíkich taa "Ístá Uuntá, ame kuítrumjaj takakmasan senku patasan achikjai" timiai.'

19 'Nunasha chicharuk "Amincha senku péprun akupin awajsattajme" timiai.'

20 'Nuyá chíkich taa "Uuntá, ame kuítrumin paniiijaj ijian ikiusmajai.

21 Amesha kakaram chichau asakmin, ikiuschiatam achin asakmin tura arakmachiatam juu asakmin ashamkamjame" timiai.'

22 'Tutai kapitián timiai "Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha,

23 nuinkia ¿urukamtia kuit-ikiutainiam ikiuschamam? Nuinkia wi atak táakun patasan achikiaajna" timiai.

24 Tura nuj wajarmia nuna chicharuk "Kuítian takakmarj juruktiarum; túrarum tias takakna nú shuar susatarum" timiai.'

25 'Tura niisha chichainiak "túrasha Uuntá, tias takakja" tiarmai.'

26 'Tutai kapitián chichaak "Takakna nujai takaakuinkia patatnastatui tájarme. Tura takakna nujai takaachkuinkia ishichik takakkuisha jurunkittiwai.

27 Tura winia nemasur kapitián ajasajñ tusar nakitrurarmania nu itiatarum. Tura wisha íimiaiñ máatárum" timiai." Tu tímiayi Jesus.

### *Jerusarénum Jesus wayamiayi*

(Mateu 21.1-11; Márkus 11.1-11; Juan 12.12-19)

28 Nuna tuasua amik Jesus Jerusarénumaani wémiayi.

29 Petpajái pepru tura Petania péprusha Uriwiu náinnium tíjiuchi; nuj jeastatuk ajatemas ni unuiniamurjñ jímiarán chicharuk,

30 "Tíjiuch péprunam wetarum. Túrarum nuj umpuuruch ekemtukchamu jinksamu waja wáinkiatarme. Nu atiarum itiatarum.

31 Tura "¿urukamtai atiarum?" turamainiakkuisha, "ii uuntri wakerawai" títiarum" tímiayi.

32 Tutai unuiniamurj wear, Jesus timia ímatrusañ wáinkiarimiayi

33 Tura umpuuruchin atiakui nérentin chichainiak "¿Urukamtai umpuuruchsha atiarum?" tiarmiayi.



34 Tutai unuiniamusha “Ii uuntr̄i wakerawai” tiarmiayi.

35 Tura umpuuruchin Jesusan itiararmiayi. Túrawar ni pushir̄in umpuuruchiniam awantkar Jesusan ekenkarmiayi.

36 Tura Jesus wétinnium ni pushir̄in jintianam ayaparar áintrarmiayi.

37 Tura Uriwiu naint awan̄kénamunam tíjiuch ajasarmatai untsur̄i aents Jesusan nemariarmia nu warainiak kakantar untsumainiak aents tujintiamun untsur̄i túran wáinkiaru ásar Yusa náarin uunt awajsarmiayi.

38 “Yusa náar̄in winiana jū ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsarti” tiarmiayi.

39 Tura Pariséu aents nūj páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

40 Tutai Jesus tímiayi “Nuin̄kia jū takamatsarmatain̄kia, kayasha untsumkarainti. Nuna paant tájarme” tímiayi.

41 Jerusaré̄num tíjiuch ajatemas péprun wáiniak útuk júnis tímiayi:

42 “Jerusaré̄numiā shuártiram, jū tsawantinkesha shiir pujustintrum nekaarmeka maak. Túrasha yamaikia nekaatin nan̄kaamasai.

43 Kame ti itieurchat tsawant jeartamtatrum. Atumí nemasr̄i nun̄kajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrum.

44 Túrutma nun̄ká ajūnmartatrum. Tura atum̄in pujuinia nuna máawartatui. Tura ashí emesarmatai ishichkisha kaya irumpramusha pen̄ké atsuttawai. Wi Yusa anaikiamur̄in tarjrumna nu nekaachu asakrumin túrutmattarme.” Tu tímiayi.

*Yusa Uunt Jēen suruktinian Jesus surimkiamiania nu (Mateu 21.12-17; Márkus 11.15-19; Juan̄ 2.13-22)*

45 Nuyá Jesus Yusa Uunt Jēen wayá suruktasa pujuarmia nuna sumaktasa pujuarmia nunasha j̄iki awemarmiayi.

46 Túrak jūna tímiayi:

“Yús-Papinium yaunchu aarma awai: “Winia jēarka Yus áuj̄satin jēaiti” tu áarmaiti. Túrasha átumka kasáa matsamtaiya n̄utikiarme” tímiayi.

47 Tuke tsawantin Yusa Uunt Jēen Jesus uwempratin chichaman ununiak pujai Israer-patri úuntr̄isha, Israer-shuara jintinniur̄isha, tura pepru úuntr̄isha, itieur máamniakit tusar ti enentáimsarmiayi.

48 Túrasha ashí aents émamkes anturainiakui máatniun tu-jinkiararmiayi.

## 20

*Yusa kakarmarijiaí Jesus takasmiania nu*  
(Mateu 21.23-27; Márkus 11.27-33)

1 Yusa Uunt Jeen Jesus uwempratin chichaman unuiniak pujai Israer-patri úntrisha, Israer-shuara jintinniurisha, Israer-shuara úntrisha táarmiayi.

2 Taar Jesusan chicharainiak “¿Yana chichamejai ju túram? ¿Ya ju túratniuncha akuptamkait?” tiarmiayi.

3 Tutai Jesus tímiayi “Wisha aniaštajrum tusan wakera-jrume.

4 ¿Ya Juán nasha imiakrattia tusa akupkama? ¿Yusak? ¿Aentsuk? Turuttiarum” tímiayi.

5 Tútaisha niisha nuamtak warintiajik mai tunai ajarmiayi. “Yus akupkaiti” tákurninkia, “¿urukamtaí enentáimtuscharum?” turamtatji.

6 Túrasha “aents akupkaiti” tákurnisha ashí aents kayajai tukurmar mantamattaji. Warí “Juan Yúsna etserniuítí” tuíniatsuk” tiarmiayi.

7 Nuinkia Jesusan áiniak “Iisha nékatsji, Juan imiakratinni-asha yátsuk akupkama” tiarmiayi.

8 Tutai Jesus tímiayi “Wisha núnisnak winia akuptukua nuna tíchattajrume” tímiayi.

*Pénker-takachu armia nu*  
(Mateu 21.33-44; Márkus 12.1-11)

9 Nuyá Jesus ju métek-taku chichamjai aentsun jintintiami-ayi:

“Áishman ni ajariin uwa araa amuk, shuaran takartusti tusa ikiukmiai. Tura niinkia wau táchataj tusa jeachat wémai.

10 Tura júuktin tsawant jeamtaí juukman akanak jurumkit tusa takarniurin takau shuariin akuptukmai. Tura takarniurincha katsumkar áyatik awainkiarmai.

11 Nuyá nérentin chikich takarniurin akupkamai; tura nunasha núnisañ katsekkar, awatiar, sútsuk akupkarmai.

12 Nuyá ataksha chikichan akupkamai. Tura nunasha takau shuar katsumkar akupkarmai.’

13 ‘Nuyá ukunam ajá nérenniuri “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

14 ‘Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai.

15 Nuna tuíniak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkattawa?’

16 Niisha taa, nu takau shuáran máawartatui. Tura núṅkanka chikichan susattawai” tímiayi.

Nuna anturkar “Yus núnaka tsaṅkatkashti” tiarmiayi.

17 Tura Jesus nin émamkes ísar tímiayi “¿Nuikia Yus-Papinium áarma nu warintiua? Ju áarmaiti:

Kayan péṅkernak jea jeamin “yajauchiiti” tusar ajapawarmia nu ashí kayajai nankaamas péṅker apujsamuiti.

18 Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

*Pariséu achiktai tusar wakeriarmiania nu (Mateu 21.45-46; 22.15-22; Márkus 12.12-17)*

19 Israer-patri uuntri tura Israer-shuara jintinniurisha “nu métek-taku chichamjai in túramji” tu nekaawar nuik<sup>i</sup> Jesusan achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi.

20 Tura Kapitiánnium suruktai tusar wakeruiniak mamik-mau shuaran Jesusan akuptukarmiayi. Nu shuar péṅker shuara núnisan jeariar, Jesus nékatsuk yajauch chichakat tusar, aniastaj tusar wearmiayi. Ni chichakmarijjai uuntnum suruktai tusar túrawarmiayi.

21 Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íyatsme, antsu nekas Yusa jinti jintintiamé.

22 Wats turuttia, ¿Rúmanmaya uunt akupin ii kuitri akiktin péṅkerkait? ¿Akiktinkiait? ¿Suritkiatniukait? Nu nekaatai tusar wakeraji” tiarmiayi.

23 Tura Jesuska ni yajauch enentáimsamurin nekáa chicharainiak,

24 “Kuit itiatarum. ¿Yana yapi tura yana naarí jui áarmait?” tímiayi.

Tutai nii tiarmiayi “uunt akupniunu.”

25 Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

26 Aents ántamunam ni chichakmarijjai achiktinian penké tujinkiarmiayi. Antsu aya ímprarmiayi tura takamtak pu-jusarmiayi.

*Satuséusha achiktai tusar wakeriarmiania nu (Mateu 22.23-33; Márkus 12.18-27)*

27 Nuyá Satuséu “jakamunmaya penké nantakchamniaiti” tuinia nu, Jesusan aniastai tusar tariarmiayi.

28 Aniiniak tiarmiayi “Uuntá, Muisáis juna áartampramajai: “Áishman ni nuarí júreatsain jakamtainkia ni yachi nu wajen nuátkatí, yachin yajutmatratsa.” Tu áarmaiti, tiarmiayi.

29 Wats, siati yachi ármai, tiarmiayi. Iwiairi nuwān nuatak yajutmatsuk jakamai.

30 Ni yachi wajen akintiak, nuátak, niisha yajutmatsuk jakamai.

31 Nuna yachisha núnisan nu wajen nuátkamai; tura núnisan ashí siati nuna pataink<sup>i</sup> nuátkarmai. Yajutmatsuk yajutmatsuk kajinkiarmai.

32 Tura ukunam nuwasha jakamai.

33 Nantaktin tsawantai, nantakiarmatai, ¿yana nuar<sup>i</sup>n<sup>i</sup> ati? Ashí siati nuátkacharmaka” tiarmiayi.

34 Tutai Jesus tímiayi “Ju nunkanman<sup>i</sup> nuatnaikiatin awai.

35 Tura nantakiar atak iwiaaku ámin ainia nuka nuatnaiki-achartatui.

36 Warí, jákashtin ániatsuk. Nayaimpinmaya<sup>i</sup> suntara áintsan<sup>i</sup> ajasartatui. Tura nantakiaru ásar Yusa uchir<sup>i</sup> ajasartatui.

37 Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niijai<sup>i</sup> chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsr<sup>i</sup>nti, tímiayi. Nú áishman<sup>i</sup> yaunchu jákaru ain<sup>i</sup> “ni Yúsr<sup>i</sup>nti” tímiayi. Nuna taku nantaktin awai tu jintíamiayi.

38 Kame jaka meñkakatniunam pujuinia nuna Yúsr<sup>i</sup>nchuiti. Tuma asamtai jakáa Yúsr<sup>i</sup>nti tíchamniaiti. Antsu iwiaaku ainia nuna Yúsr<sup>i</sup>nti. Ashi Niiniun iwiaarkainiawai” tímiayi.

39 Nuna antukar Israer-shuara jintinniur<sup>i</sup> “pénker tame, Uuntá” tiarmiayi.

40 Tura nuyánka aniastinian arantukarmiayi.

*¿Kristu tutai yana uchirimpiait?*

*(Mateu 22.41-46; Márkus 12.35-37)*

41 Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tár<sup>i</sup>m?”

42 Warí, Sarmu papinium Tawit nin<sup>i</sup>ki juna tátsuk:

“Uunt winia Úntrun “Akupin pujutainium Winia untsuuru-  
in<sup>i</sup> pujustá, tímiayi.

43 Ame nemasrumin núpeteatsain<sup>i</sup> nu<sup>i</sup> pujustá” tímiayi.” Tú áarmaiti.

44 Kame Tawitkia, Krístun chicharuk, “winia Úntur” tajsha, ¿itiurak Kristu tutai Tawitia pampanmar<sup>i</sup> átink<sup>i</sup>?” Tú tímiayi Jesus.

*Israer-shuaran jintintin ainia nuyá aneartarum*

*(Mateu 23.1-36; Márkus 12.38-40; Rúkas 11.37-54)*

45 Ashí aents Nin anturkatasa pujuinia<sup>i</sup> ni unuiniamur<sup>i</sup>n Jesus juna tímiayi:

46 “Israer-shuaran jintintin ainia nuyá aneartarum. Ni-  
isha esaram pushin entsasar wekasataitsar wakeruiniawai.

Tura jintiá ti shiir áujtusarat tusar wakeruiniawai; tura iruntai jeanam penkeri pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai.

<sup>47</sup> Túrasha wajé jeencha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chikichjai nankaamas Yus asutiáwartatui.”

## 21

*Waje ni kuítrín susamia nu*  
(Márkus 12.41-44)

<sup>1</sup> Yusa Uunt Jeen kuítrintin kuit enketainiam kuítian enkeenan Jesus wáinkiamiayi.

<sup>2</sup> Tura waje kuítríncha jimiará uchich kuítian, reara áaniun, enkean wáinkiamiayi.

<sup>3</sup> Wáiniak tímiayi “Nekas tájarme, ju waje kuítrínchaitiat, ashí enkeena nú nankaamas núkap enkeayi.

<sup>4</sup> Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

*Yusa Uunt Jeen saanaktinian Jesus ujakmiania nu*  
(Mateu 24.1-2; Márkus 13.1-2)

<sup>5</sup> Yusa Uunt Jeen kaya shíirmach armia nuna tura chikich shíirmach susamu armia nunasha chikich shuar áujmatuk pujuarmiayi. Nuyá Jesus tímiayi:

<sup>6</sup> “Átum yamá shiir wáintrumna nu ashí emesnartatui. Kaya eken tramusha mash yumpuuntrartatui” tímiayi.

*Amuukatin tsawantin uruku átata nu nekaatin*  
(Mateu 24.3-28; Márkus 13.3-23)

<sup>7</sup> Nuyá Jesusan chicharainiak “Uuntá, nusha ¿urutaik túrunatí? ¿Kame ju túrunatin jeatemamtaisha warijjain nekaattaj?” tiarmiayi.

<sup>8</sup> Tutai Jesus tímiayi “Aneartarum; anañnawairap. Nekaatarum. Winia náarun pachisar, “wi Krístuitjai” tau ti untsurí jíntrartatui. “Nunka amuukatin jeayi” tu etserkartatui. Tuíniakui anturkarum nemariirap.

<sup>9</sup> Tura meset chichamsha, kapitían mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

<sup>10</sup> Nuyá tuke chicharuk tímiayi ‘Shuar chikich nunkanmaya shuarjai mesetnum ti nekas maaniawartatui.

<sup>11</sup> Ti uurkattawai; untsurí nunkanam tsukasha, sunkursha ti átatui. Nayaimpinmasha ti ashammai náñkamas túrunattawai. Nujai Yus ni kakarmarin iniakmastatui.’

<sup>12</sup> Tura ju túruntsain atumin pataaturmakar achirmakar-tatui. Iruntai jeanmasha makurmartai tusar juramkiartatui.

Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui.

13 Nuinkia atumin túrutmakrumin wi túramu etserkatin arutmattarme.

14-15 Tura atumi nemasri nakitramainiak “wáitiaiti” titinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíshtumaktaj tusan áetak enentáimsashtatjai” titiarum.’

16 ‘Tura imia atumi aparisha surutmakartatui. Atumi yachisha, atumi shuarisha amikrumsha núnisanan surutmakartatui. Tura máamunka máawartatui.

17 Tura Winia ajasaru asakrumin ashí aents nakitramprartatui.

18 Tura penké ishichkisha yajauch awajtamsachartatui.

19 Katsuntrarmeka iwiaaku átin wáinkiatarme.’

20 ‘Ju pepru Jerusarenka aa tanishriin suntar téntakar mat-satu wáinkiumeka, emesratin jeá nekaattarme.

21 Nuikia jui Jutía nunkanam pujuinia nu, náinnium pisartin áiniawai; tura jui Jerusarennum pujuinia nusha juyanka jinki wétin ainiawai. Tura ajanam pujuinia nusha, péprunam waketkishtin áiniawai.

22 Nu tsawantincha Yus asutiámun wáinkiatatui. Yús-Papinium nu túrunatin yaunchu aarma nu uminkiatatawai nu tsawantin.

23 Nunkanam ti wáitsatin átatui. Tura ju aents ti asutniawartatui. Tuma asamtai nuwa ajamtin ainia nusha, tura uchi kuírchin takakainia nusha imiá itiuurchatan wáinkiatatui.

24 Tura juyá aents mesetnum jákartatui. Tura chikichnaka ashí nunkanam misaawar júkiartatui; tura yajaya apach, Yúsnan enentáimtuiniatsna nu, jui Jerusarennum wayawar najakartatui. Nu túratniunka Yus tsanatkana nuiñ túrawartatui.’

### *Aents Ajasu tutai tátintri*

*(Mateu 24.29-35, 42-44; Márkus 13.24-37)*

25 ‘Nuinkia etsanmasha, nantunmasha, yáanmasha Yuska ni kakarmarin iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui.

26 Tura túrunatin ana nuna enentáimsar mayái ashinkiatatui. Warí, nayaimpiniam kakaram ainia nusha peantrartatui.

27 Nuyá Winia, Aents Ajasu tutain, yuranminiam ti shiir ajasan winiaí wáitkiartatui.

28 Nu túrunatin nánkamkui uwempratin jeatemayi tusarum kakaarum shiir enentáimsatarum.’

29 Tura ju chichamnasha nekapmamiayi. ‘Ikiu numi tura nánkamas numisha enentáimsatarum.

30 Ju nunkanam ni nuké yama punkakmatai “esat jeatemayi” tátsurmek.

31 Núnisan Wi tájana nu wáinkiumeka, Wi ju nunkanam akupin ajastin jeatema nu nekaatarum.'

32 'Tura aents yamaí pujuinia nu jáatsain nusha ashí túrunattawai. Núnaka paant tájarme.

33 Nayaimpisha nunkasha amuukartatui. Tura winia chichampruka amuukachminiaiti.

34-35 Nu tsawant aya aneachma jeattawai. Ashí aents ju nunkanam pujuinia nu, nuna enentáimtsuk pujuiniaj jeattawai. Tuma asamtai atumsha anearum wekasatarum. Ya-jauchiniam emetnarum, aya yurumátniuk, aya umartiniak enentáimtusrum, ju nunkanam ana nu ti wakerakrumniñkia péñker enentáimsatin tujinkiattarme. Nu atsutí tusarum tura nu tsawant aya áwaktamkajj tusarum péñker wekasatarum.

36 Anearum wekasatarum. Túrunattana nuj katsuntrataj tusarum Yus aujsa pujustarum. Túrarum Aents Ajasu tutai íimmianum péñker átaj tusarum túratarum."

37 Tuke tsawant tsawaisha Yusa Uunt Jeeñ Jesus unuiniamiayi. Tura káshikia Uriwiu náinnium we-wémiayi.

38 Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

## 22

*Jesus achiktin chichaman jurusarmiania nu*

*(Mateu 26.1-5, 14-16; Márkus 14.1-2, 10-11; Juan 11.45-53)*

1 Wakaprutai enketaachma tanta yuatin námper, paskua tutai, jeatemamiayi.

2 Israer-shuara Pátririsha Israer-shuara jintinniurisha áentsun ashamainia ásar, itiurak máawaintiaj' tusar ti enentáimsarmiayi.

3 Nuñkia Iskariúti Jútasan enentáin íwianch wáintiamiayi. Nú Jútaska Jesusa unuiniamuriñ páchitkiauyayi.

4 Israer-patri úuntrin tura Yusa Uunt Jee kapitían pujuarmia nuna werimiayi. Tura Jesusan tu surukminiaiti tusa niijjai chichasarmiayi.

5 Niisha nuna antukar warasar "kuit amastatji" Jútasan tiarmiayi.

6 Niisha "ayu" tinia, aents nékachmanum suruktaj tu enentáimsamiayi.

*Kristu jakamu enentáimtustin námper*

*(Mateu 26.17-29; Márkus 14.12-25; Juan 13.21-30; 1 Kurintianam 11.23-26)*

7 Wats, wakaprutai enketaachma tanta yúatin námper jeamiayi. Paskua tutainium murikchin máatin árimiayi.

8 Tura Jesus Pitruncha, Juáñnasha akupeak "Paskua tutai námper iwiaratarum" tímiayi.

9 Tutai niisha chichainiak “¿Tuí iwiarat tusamea wak-eram?” tiarmiayi.

10 Tutai Jesus juna tímiayi “Péprunam wetarum. Jearum áishmañ yumin takaku wekáa wáinkiattarme. Nú áishmañ nemsatarum. Tura jeá wayaakui,

11 nú jea nérenniuri chichareakrum “Uunt chichartamuk unuiniamurjai paskua yurumátin ¿tuí aa? turamui” titiarum, tímiayi.

12 Tákurmin nu nérentin yakí písunam uunt kuártun ashí iwiaramun iniakturmastatrome. Nuí ii yurumátin iwiaratarum” tímiayi.

13 Tutai niisha wear Jesus tímiania tímiatrusañ wáinkiarmiayi. Tura paskua namperan nuí iwiararmiayi.

14 Yurumátin jeamtai ni unuiniamurijjai Jesus misanam pujusarmiayi.

15 Pujusarmatai, Jesus chichaak “Wisha játsuk atumjai ju paskua najanatniun ti wakerimjai,

16 atakka ju nunkanam atumjai najanashtin asan. Tura antsu Yus akupeana nuí jear atak najanattaji” tímiayi.

17 Nuyá piniñkian achik, Yúsan yumiñkias, ni unuiniamurijn tímiayi “Ju piniñ achikrum sunaisatarum.

18 Atakka ju nunkanam uwa yumirijn atumjai umarchattajai, tajarme. Tura antsu Yus akupin ajastin jeamtai atak iijjai umartatji” tímiayi.

19 Nuyasha yurumkan achik, Yúsan yumiñkias puuk susarmiayi. Tura chicharainiak “Juka winia ayashruiti. Winia ayashur atum péñker pujustinnium surunkattana núiti. Winia enentáimtursarum yuatarum” tímiayi.

20 Tura yurumsua amikiarmatai piniñkian achik, “Ju piniñ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai’ tímiayi.

21 ‘Túrasha winia surutkattana nu Wijjai métek ju misanam pujawai.

22 Kame Wi, Aents Ajasuitjiana ju, Yus iwiamua nútiksanak jakattajai. Túrasha Winia surutkana nu nekaatí. Ti asutniattawai” tímiayi.

23 Nuna antukar “Wíashitiaj, yákit” tunaim ajarmiayi.

### *Nañkaamantu ana nu*

24 “¿Iijjai yaki imiá nañkaamantu aint?” tunaim ajarmiayi.

25 Tura Jesus tímiayi “Ju nunkanam akupin ainia nu, waantu enentáimtumasar akupenawai. Tura akupenakui “péñker túrin ániawai” tuíniawai.



26 Tura atumjainkia nuka atsutí. Antsu nan̄kaamantu ana nu, uchichia núnik ajastiniaiti; akupeana nusha takarniua núnik ajastiniaiti.

27 Enentáimsatarum. Misanam pujus yurumna nu, yurumkan ajamana nujai ¿tuá imiá nekas nan̄kaamantuit? ¿Yurumna nu nekas nan̄kaamantuchukait? Tura Wisha atumin yurumkan ajamna núnisnak pujajai.

28 ‘Winia itiurchatrun wáinmiaj nuĭ atumsha Wijjajĭ tuke pujumarme.

29 Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuĭ atumsha Wijjajĭ yurumáttarme, tura Wijjajĭ umarta-trume, tájarme.

30 Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

*Pítur “atsá nékatsjai” títinian Jesus ujakmiania nu  
(Mateu 26.31-35; Márkus 14.27-31; Juan 13.36-38)*

31 Nuyá Uunt Jesus tímiayi, “Nekaata, Semun̄ká. Trikiu neré tsatsamátniua áintsan̄ Satanás atumi enentáin páchim enentáimtikramprataj tusa seayi.

32 Tuma aiñ Yus enentáimtustinian kajinmatkiin̄ tusan Wisha Yúsán seamjai. Tura Yúsnum waketkim ame yatsum ikiakárarta” tímiayi.

33 Tutai Semun̄ tímiayi “Uuntá, sepunam en̄ketmainiakuisha wisha nemarsatajme. Tura mantamainiakuisha métek jakatjai” tímiayi.

34 Tutai Jesus tímiayi “Pitrú, nekas tájame, yamaik atash shiniatsajñ ame menaintiú natsantrurtatme” tímiayi.

*Itiurchat winiawai*

35 Nuyá Jesus tímiayi “Wisha yurumkajain̄chu, kuítjain̄chu, sapatjain̄chu akupkamjarmena nuĭ ¿táatramsamkarum?”

Niisha “Atsá pen̄ké táatramsachmaji” tiarmiayi.

36 Tutai Nii tímiayi “Antsu yamaikia yurumkan takakkuñka takustí, kuítniasha núnisan̄; tura puniancha takakchakka ni pushir̄in suruk punian sumakti.

37 Nekaatarum. Yus-Papinium yaunchu aarma ana nu wi túrunamujai uminkiatstawai. Juĭti aarma:

Yajauch shuarnum pachikiarmiayi.

Wari, Yus-Papinium ashí Winia aarma ana nu uminkiatniuiti.”

38 Tutai ni unuiniamurĭ tiarmiayi “Uuntá, juĭ jimiará puniá awai.”

Tutai Niisha “Asati” tímiayi.

*Jitsemaní ajanam Jesus Yúsan áujsamiania nu**(Mateu 26.36-46; Márkus 14.32-42)*

39 Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurisha nemariarmiayi.

40 Aí jeá nin chicharuk “Itiurchat winiakui iniaraj tusarum Yus áujsatarum” tímiayi.

41 Tuasua amik arantach, kaya nankimiam jeana núnik Jesus wémiayi. Tura Yúsan áujsataj tusa tikishmarmiayi.

42 Tikishmar júna tímiayi “Apawá, piniñnum yapá umartinia ántsañ Wi wáitsattajna nu wakerakmeke jurutkitia. Tura Wi wakerajna nucha antsu Ame wakeramna nu atí, tajai” tímiayi.

43 Nuyá, ikiakártaj tusa Yusa suntari nayaimpinmaya tarimiyai.

44 Tura Jesus imiá wáitias pujak nú kakaram Yúsan áujsamiayi. Tura ni searmarisha numpá ántsañ nunká kitiawarmiayi.

45 Yúsan aujsua amik wajaki ni unuiniamurin werimiayi. Tura kúntuts enentáimmarijjai ti pimpiki kanúu tepenan tarimiyai.

46 Nuinkia chicharainiak “¿Urukamtai kanúu teparum? Itiurchat winiakui iniaraj tusarum nantakrum Yus áujsatarum’ tímiayi.

*Jesusan achikiarmiania nu**(Mateu 26.47-56; Márkus 14.43-50; Juan 18.2-11)*

47 Jesus tuke chichaa pujaj, untsurí shuar táarmiayi. Tura nuní eemka Jesusa unuiniamurí Jútas naartin winimiayi. Tura Jesusan mukunatajtsa tarunmiayi.

48 Támatai Jesus chicharuk “Jútasá, ¿Aents Ajasu tutai mukunamek surutkattam?” tímiayi.

49 Jesusjaj pujuarmia nu, túmamun wáinkiar “¿Uunt puniajai íjuuartatjik?” tiarmiayi.

50 Tura chikichik Patri untrí takarniurí kuishin untsuurin tsupirkamiayi.

51 Tura Jesus tímiayi “Iniaisatarum.” Nuna tinia ni kuishin antin tsuarmiayi.

52 Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaitaj. Urukamtai puniajaisha numijaisha taratniuram?”

53 Nuik Yusa Uunt Jeeen tuke tsawant atumjai pujumaj nuí achirkachmarme. Túrasha átum kiritniumia kakarmajai nu-petkatin yamá tsawantin tsankatkamuitrume” tímiayi Jesus.

*Pítuur “Jesusnaka nékatsjai” tímiania nu*

*(Mateu 26.57-58, 69-75; Márkus 14.53-54, 66-72; Juan 18.12-18, 25-27)*

<sup>54</sup> Nuin̄kia Jesusan achikiar emetawar Israer-patri uuntri jeen júkiarmiayi. Tura Pítrusha íkian̄ nemarki wémiayi.

<sup>55</sup> Tura aach̄ jinia ikiapáramiayi. Túrawar anamuk pujuarmiayi. Pítrusha niijiāi pujusmiayi.

<sup>56</sup> Tura nuwá, Patri takarniur̄i amia nu, Pítuur jinia anamuk pujan wáiniak “Ju áishman̄sha Niijiāi pujumiayi” tímiayi.

<sup>57</sup> Tutai Pítuur chichaak “Nuwá, Nin nékatsjai” tímiayi.

<sup>58</sup> Tura árusan̄ chíkich nin wáiniak “Amesha Niin̄ páchitkaiatme” tímiayi.

Tutai Pítuur tímiayi “Atsá. Wikia áin̄kia páchitkiatsjai” tímiayi.

<sup>59</sup> Chikichik ura nan̄kaasmatai chíkich apach chichaak “Nekas ju áishman̄sha Niijiāi pujumiayi. Warí, niisha Kariréanmayaan̄chakait” tímiayi.

<sup>60</sup> Tutai Pítuur chichaak “Ame támena núnaka nékatsjai” tímiayi. Nú chichamaik Pítuur chicháa pujain̄k̄i atash shiniukmiayi.

<sup>61</sup> Tura nuin̄kia Uunt Jesus Pítrun apajas íismiayi. Túra “atah shiniatsain̄ ame menaintiu natsantrurtatme” Uunt Jesus timia nuna enentáimpramiayi.

<sup>62</sup> Nuyá Pítuur jiinki ti útmiayi.

*Jesusan wishikrarmiayi*

*(Mateu 26.67-68; Márkus 14.65)*

<sup>63</sup> Áishman̄ Jesusan wáiniarmiania nu ti wishikiainiak awatiarmiayi.

<sup>64</sup> Jiin̄ epetkar yapiniam awattiar chicharainiak “Nekamata, ya awatama” tiarmiayi.

<sup>65</sup> Tura katsekainiak ti untsur̄i chikichnasha nan̄kamas tiarmiayi.

*Uunt Iruntainiam Jesusan ejeniarmiania nu*

*(Mateu 26.59-66; Márkus 14.55-64; Juan 18.19-24)*

<sup>66</sup> Tsawarmatai, Israer-shuara úuntrīsha, Israer-patri úuntrīsha, Israer-shuara jintinniur̄isha iruntrar ni iruntair̄iin̄ ejeniarmiayi. Nūj chicharainiak

<sup>67</sup> “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme.

<sup>68</sup> Tura Wi aníamsha áirkashtatrume, túrasha akuptukchat-tarme.

<sup>69</sup> Tura wárik Wisha Aents Ajasuitjiana nu, ashí nan̄kaamaku ajasan, Yusa untsuur̄in̄i pujustatjai” tímiayi.

<sup>70</sup> Tutai niisha tiarmiayi “¿Nuin̄kia amesha Yusa Uchir̄in̄kaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

<sup>71</sup> Tutai niisha tiarmiayi “Warí, ¿iisha chíkich ujatkat tusar atsumajik? Imia nin̄ki chichaamu antukchajik” tiarmiayi.

## 23

*Piratuí Jesusan júkiarmiania nu*

*(Mateu 27.1-2, 11-14; Márkus 15.1-5; Juan̄ 18.28-38)*

<sup>1</sup> Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi.

<sup>2</sup> Nū jeawar, Piratun chicharainiak “Ju áishman̄ íi shuaran awajintikiar enentáimtikiania nu nekaamji. Rúmanmaya uunt akupin Sésaran kuit akiktinian suritramaji. Tura nu arant Nīnki, akupin Kristu tutaintjai, tawai” tiarmiayi.

<sup>3</sup> Tutai Piratu Jesusan chicharuk “¿Ame Israer-shuara akupniur̄in̄káitiam?” tímiayi.

Tutai Jesus tímiayi “Ee, núitjai, ame támena núnisnak.”

<sup>4</sup> Nuyá Israer-patri úuntrin̄cha tura aents nū iruntrarmia nunasha Piratu chicharainiak “Ju áishman̄ tunaan túran pen̄ké wáinkichuitjai, tajai” tímiayi.

<sup>5</sup> Túrašha niisha nú kakantar chicharainiak “Antsu nekas ashí Jutía nūnkanmaya aentsun ni unuiniana nūjaj̄i akajenawai. Kariréa nūnkanmaya nan̄kaamas ímiajaj̄isha tayi” tímiayi.

<sup>6</sup> Piratusha nuna antuk “Nu áishman̄ ¿Kariréanmayan̄káit?” tímiayi.

<sup>7</sup> “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarén̄num ishichik tsawant pujusmiayi.

<sup>8</sup> Erutiska Jesusan íistaj tusa ti wakerimiayi. Jesusa túramur̄in̄ áujmatman ti antukmiayi. Tuma asa, “Wí íimiaī aents tujintiamun túrashtimpiash” tusa Jesusan wáiniak warasmiayi.

<sup>9</sup> Jesusan ti nukap aniasmiayi; túramsha pen̄ké áimkiachmiayi.

<sup>10</sup> Nūjisha Israer-patri úuntrin̄sha, tura Israer-shuara jintin̄niur̄isha yajauchiit̄i tusar charaatum awajiarmiayi.

<sup>11</sup> Tura Erutissha ni suntarij̄ij̄aī Jesusan yajauch enentáimtuiniak Nin wishikiainiak ti pen̄ker pushin, akupniuentatair̄iya ánniun, áentsrarmiayi. Nuyasha Erutis ataksha Piratūin̄ akupkamiayi.

<sup>12</sup> Túram nu tsawant Piratu Erutisj̄aj̄ī nawamnaikiarmiayi. Kame yáunchuka nemasnaikiau ármiayi.

*Jesusan “mantamnati” tiarmiania nu*

*(Mateu 27.15-26; Márkus 15.6-15; Juan̄ 18.39-19.16)*

13 Nuyá Israer-patri úuntriṅ aentsu úuntriḡḡai tura penké aentsḡai Piratu ikiaanak tímiayi

14 “Jú áishmaṅ aentsu awajim̄tikiui tusarum itiantinrume. Túrashā átum ím̄prum̄niṅ anintrusan yajauch átum tárumna nuna penké nekarachjai.

15 Erutissha núnisaṅ yajauchin nekaachai. Warí, júi awaink̄ichmaka. Nuikia páantchakait jú aishmaṅ jakamnia tunaanka túrichuiti” tímiayi.

16-17 Túraitiat tuke túrutai asamtai, jísat jeakui sepunmaya chikichík áishmaṅkan Piratu an̄kant akupkatin ámiayi. Tuma asamtai, nii chichaak “juna asutián awematjai” tímiayi.

18 Tura aencha iruntrar ti unsumainiak “Atsá; júcha. Jú nakitaiji. Antsu Parapás akupkata” tiarmiayi.

19 Nu Parapássha akupniun nakitak mesetan najana asa tura maṅkartin asa sepunam en̄keamuyayi.

20 Piratuka Jesusan akupkattsa wakerak ataksha aentsun áujsarmiyai.

21 Túrashā nú arant unsumainiak “Atsá. Krúsnum mantamati” tiarmiayi.

22 Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias̄h tusan, aniasan penké nekarachjai. Asutián akupkatjai” tímiayi.

23 Tura niisha kakaram unsumainiak “Jesus mantamati” tiarmiayi. Kame aencha tura Patri úuntriḡsha ti unsumaina ásarmatai ni wakeramur̄i tsan̄katnakarmiyai.

24 Nii wakeriarmia nuna Piratu “túrattajai” tímiayi.

25 Tuma asa Parapásan, mesetan najanin tura maṅkartin amia nuna akupkamiayi. Tura Jesusnaka ni wakeramun túrawarti tusa íktusarmiyai.

*Jesusan krúsnum ajintrurarmiania nu*

*(Mateu 27.32-44; Márkus 15.21-32; Juan 19.17-27)*

26 Jesusan jukitiasa pujuiniaḡ Serini nun̄kanmaya Semuṅ ni pépruriya Jerusarénum yama jeamiayi. Nin achikiar, Jesusa krusr̄i ayantkar “ni ukur̄i wetá” tiarmiayi.

27 Untsur̄i aents Jesusan nemariarmiyai. Tura untsur̄i nuwasha ti kuntuts enentáimiainiak úutkiar tura wa-wa ajakiar wearmiayi.

28 Túmainiakui Jesus nin iis, “Jerusarénumia nuwatiram Winia enentáimtursarum úuttiirap. Antsu atumniak tura atum̄i uchir̄i enentáimtusurum úuttiarum.

29 Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsḡai nan̄kaamas péṅker pujuiniawai” tiartatui.

30 Nu tsawantaj aents chicharainiak “Náint in nekentmak yuturmaartai” tiartatui.

31 Warí, numi sameka áinis yajauch aya nánkamna ajnsha ju itirchat átsuk. Tura numi kukaru ainkiamtai iturak nú yajauch túrunachat<sup>1</sup>.” Tu timiayi Jesus.

32 Tura Jesusjaj krúsnum maatai tusar jímiar yajauch áishmankan júkiarmiayi.

33 Karawír nain tutainium jeawar Jesusan krúsnum ajintrurarmiayi. Tura Jesusa untsuurinj chikichík yajauch áishmankan tura ni menarinj chíkich yajauch áishmankan núnisan krúsnum ajintrurarmiayi.

34 Tura Jesus krúsnum ajintraku pujuram, chichaak “Apawá, tsankurarta. Nii áitkainia nuna nékainiatsui” tímiayi.

Tura suntar pujuarmiania nu, yaki Jesusa pushirj jukit tusar nakurusarmiayi.

35 Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwentikniuiti. Wats, yamá nekas Yusa anaikiamurj Kristu tútainkiunka imia Ninkj uwémpratí” tiarmiayi.

36 Suntarsha Nin wishikrarmiayi. Tariar churuínian aartai tusar awajiarmiayi.

37 Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi.

38 Tura muuknumaani, Kriaku chichamjaj, Rúmanmayá apach chichamjaisha tura Israer chichamjaisha ju áarar anujkamu ámiayi: *JÚTI ISRAER-SHUARA UUNT AKUPIN*

39 Chikichík yajauch áishman nuj ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwentikramprata” tímiayi.

40 Tura chíkich ni tsaniakmarin kakantar chicharuk “¿Amesha Niijjaj métek asutniátasa pujayatam, Yus ashamatsmek? tímiayi.

41 Iikia yajauch asar wáitsatniuitji; ii tunaarij akikmakur wáitijai. Antsu ju áishmanka yajauchin túrichuiti” tímiayi.

42 Nuyá Jesusan chicharuk “Amesha akupin ajasam wini-asha enentáimtursata” tímiayi.

43 Tutai Jesus chicharuk “Nekas tájame, jakar shiir puju-tainium yamá tsawant Wijjaj pujustatme” tímiayi.

### *Jesusa jakamurj*

(Mateu 27.45-56; Márkus 15.33-41; Juan 19.28-30)

44 Tutupin aj ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi.

45 Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímiapetek nakaakamiayi.

46 Nuyá Jesus untsumuk “Apawá, winia wakantrun Amiin ikiuajai” tímiayi. Nuna tinia jakamiayi.

47 Suntara kapitiántri nu túrunamun wáiniak, Yusa náarin shiir awajeak “Jusha imiá nekas péñker áishmañkuyi” tímiayi.

48 Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi.

49 Tura Jesusa amikrisha tura nuwá Kariréanmayá Nin nemariarmia nusha íkiañ wajasar ii wajarmiayi.

*Jesusan iwiarsarmiania nu*

*(Mateu 27.57-61; Márkus 15.42-47; Juan 19.38-42)*

50 Naka enentáimin péñker áishmañ ámiayi ni naari Jusé. Ari-matéa pepru Jutía núñkanam ana nuyayuyayi. Israer-shuara Uunt Iruntairin páchitkiauyayi.

51 Yus ju nuñkanam akupin ajasat tusa Jusé nakas puju-miayi. Tuma asa Uunt Iruntainium Jesusan túrawarmia nuna nakitmiayi.

52 Tuma asamtai Piratuí we Jesusa ayashin seamiayi.

53 Piratu “ayu” takui, Jesusa ayashin krúsnumiá jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi.

54 Iwiaratin tsawantai, ayampratin tsawant tsawastatuk ajasmatai túrunamiayi.

55 Tura nuwá Kariréanmayá jukiniutak Jesusan nemarsarmia nusha iwiarsamunam weriar, Jesusa ayashi itiuur ikiusmait nuna iisarmiayi.

56 Iisar ikiuak ni jeen waketkiarmiayi. Tura Jesusa ayashi mejeenin tusar kunkuinian iwiararmiayi. Tura ayampratin tsawantai, Israer-shuar akupkamun umikiar ayamprarmi-ayi.

## 24

*Jesus nantakmiania nu*

*(Mateu 28.1-10; Márkus 16.1-8; Juan 20.1-10)*

1 Tumintin káshik kunkuinian iwiamun júkiar nu nuwá Jesus iwiarsamunam weriarmiayi. Tura chíkich nuwasha atampriarmiayi.

2 Tura iwiarsamu kaya atutkamu urani aan wáinkiararmiayi.

3 Tura wayawar uunt Jesusa ayashin wáinkiacharmiai.

4 Wáinkiachu ásar ashankarmiayi. Tura “itiurkatjik” tiarmi-ayi. Tumaj jimiará áishmañkan pushin wincharpatniun entsaru nin ayaamach wajainian wáinkiararmiayi.

5 Nuna wáinkiar ti sapijmiainiak tsuntsumawarmiayi. Túmakui nu áishmaṅ chicharainiak “¿Iwiaakusha urukamtai jakaanumsha eṅrum? tiarmiayi.

6 Juṅ pujatsui. Antsu nantakni. Nékatsumek. Niisha Kariréanam tuke pujus

7 “Wi, Aents Ajasuitjiana nu, yajauch aentsnum surunk-attajai. Túran krúsnum mantamnattajai. Tura menaintiú tsawantai nantaktiatjai” turamchamkarum” tímiayi.

8 Nuna takui Jesus timian enentáimprarmiayi.

9 Tura iwiarsamunmaya wakетки taar, Jesusa unuini-amurṅ auntse armia nuna tura chikichnasha ashí nu túrunamun ujakarmiayi.

10 Jesusa unuiniamurṅ ujakarmia nu ju áiniawai: Mak-taranmaya Marí, Juánasha, Jakupu nukurí Marisha, tura chíkich nuwajai.

11 Tura Jesusa unuiniamurṅ nuna tu níakuisha nekasaiti tu enentáimtsuk “wáuruk tu níawai” tiarmiayi.

12 Túrasha Pítrusha jiinki Jesus iwiarsamunam tsékeṅki wer-imiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeṅ waketkimiayi.

*Emaús wetai jintianmaani túrunamia nu  
(Márkus 16.12-13)*

13 Nu tsawantaiṅ Jesusa nemarniurṅ jímíar Emaús péprunam wéarmiayi. Emaúska Jerusaréṅnumiṅ auntse kirumitru jeá pujawai.

14 Túrunamia nuna chichaki wearmiayi.

15 “Itiurkit” tu aujmatki weenai imia Jesus taa nuṅ páchiniak niijjai wearmiayi.

16 Tura wáinkiarat nekaashtin asantai yait nekaacharmi-ayi.

17 We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

18 Chikichik, Kreupas náartin chicharuk “Jerusaréṅnum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

19 Tutai Jesus tímiayi “¿Warí urukait?”

Tutai tiarmiayi “Entá, Nasaréṅnumiṅ Jesusa túrunamurṅ taji. Niisha Yúsnan etserin asa Yusa kakarmarijjai chichasmiayi tura nuna kakarmarijjai takasmiayi. Núnaka ashí aents nékainiawai.

20 Tura ii Pátrirṅ uuntriṅ tura ii péprurṅ uuntriṅ “tunáa jakam-nia túrayi” tusar “krúsnum mantamnati” tiarmiayi.



21 Tura ii Israer-aentstin uwentikrampratin tu enentáimsamji. Tura ni maamusha menaintiú tsawant nankaamasai.

22-23 Túrasha ii nuwá ni iwiarsamunam yamaí káshik weriar ni ayáshin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji.

24 Nuyá íi shuar iwiarsamun weriar, nuwá tiarmia tímiatrusan wáinkiarmai. Tura Jesusnaka wáinkiacharmai.” Tu ujakarmai Jesusan.

25 Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume.

26 ¿Yusa anaikiamurí, Kristu tutai, shiir awajnantsuk ti wáitsashtinkiait?” tímiayi.

27 Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurín áararmia nuna jintintiatasa nankamamiayi.

28 Ayu, nii wearmia nú peprunam jeawarmiayi. Tura Jesuska nuí nankaamaki wétaj tau ajamiayi.

29 Tura niisha chicharainiak “Weep. Iijíaj pujustá. Warí, nantu akaikiyi, kirit ajatemsai” tiarmiai.

Tutai Jesus niijíaj pujustaj tusa wayamiayi.

30 Tura niijíaj irunar misanam pujus, yurumkan achik, Yúsán yuminkias nincha puuk súsarmiayi.

31 Nu chichamaik, ni jii uranniuwa núnikiarmatai Jesusan nekaawarmiayi. Tura Niisha nú chichamaik menkakamiayi.

32 Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiai.

33 Nuyá, Emaúsnumiá wárik jíinkiar Jerusarénum waketkiarmiayi. Nuí Jesusa unuiniaturín auntse armia nuna tura chíkich shuar Jesusan nemariarmia nunasha iruntrar pujuinian wáinkiarmai.

34 Auntse armia nusha tiarmiai “Uunt Jesus nekas nantakni. Semun Nin wáinkiaiti.”

35 Tutai niisha jintiá túrunamun ujakarmiayi. “Jesus yurumkan ajaamakui nuí nekaamji” tiarmiai.

*Ni unuiniaturín Jesus wantintiu kmiania nu  
(Mateu 28.16-20; Márkus 16.14-18; Juan 20.19-23)*

36 Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

37 Nuna antukar, ti sapijmiakar, wakanchashit, enentáimsarmiayi.

38 Tura Jesus chicharainiak “¿Urukamtai sapijmiakrum wakanchashit, tu enentáimsarum?”

39 Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

40 Nuna tinia ni uwejéncha nawéncha iniaktusarmiayi.

41 Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi.

42 Takui, namaknasha, míshkincha súsarmiayi.

43 Tura Jesus nuna achik niisha íimiainiamunman yuamiayi.

44 Tura nin tiarmiayi “Winia túrutawarma nuna, Wi atumjai nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

45 Nuyá Yus-Papinium aarman jintintiawarmiayi.

46 Jintintiuk juna tímiayi: “Yusa anaikiamurí Kristu tutaí jaka menaintiú tsawantai jakamunmaya nantaktinia nu yáunchuk áarmauyayi. Tura Wi nú Krístuchukaitiaj.

47 Winia náarun pachisar, Jerusarénumiá nanakama ashí nunkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapajiatniuiti. Tura tu etserkatniua nusha yaunchu áarmauyayi.

48 Tura wi túrunamu neka asarum etserkatniuitrume, tímiayi.

49 Tura winia Apar, winia Wakantrun susartatjai, turamarumna nuna akuptuktatjarne. Tura nayaimpinmaya táatsain jui Jerusarénum péprunam pujústárum. Taa ni kakarmarin suramsattarme.” Tu tímiayi.

*Jesus nayaimpiniam wakamiania nu*

*(Márkus 16.19-20)*

50 Nuyá Jesus Jerusarénum péprunmaya júkiar Petania péprunam ejeniarmiayi. Tura nuí ni uweje takuí, “Yus yáinmakarti” tímiayi.

51 Nuna tu pujus, niyya kanakmiayi. Tura nayaimpiniam junakmiayi.

52 Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi.

53 Tura Yusa Uunt Jeen pujusar Yusa náarin shiir awajú pujuarmiayi. Áukete.

## Yúsan Shiir Chichamen JUAN aarmia nu

### *Chícham aents ajasmiania nu*

<sup>1</sup> Ashí nankamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tíminiaiti. Chichamsha Yusjai pujuyayi. Chichamsha Yúsauyayi.

<sup>2</sup> Yámakamtaik Niisha pujuyayi Yusjai.

<sup>3</sup> Ashí najanamu ainia nu Niijiai najanamuiti. Nii najanachmaka penké atsawai.

<sup>4</sup> Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniaiti.

<sup>5</sup> Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

<sup>6</sup> Áishman ámiayi, Yus akupkamu, ni naari Juan.

<sup>7</sup> Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi.

<sup>8</sup> Juansha nu tsáapninchauyayi. Áyatik akupkamuyayi tsáapnin chichaman etserkat tusa.

<sup>9</sup> Nu tsáapninkia nekas tsaapniniaiti. Ju nunkanam taa ashí shuaran enentáin tsáapniartiniaiti.

<sup>10</sup> Chichamsha taramiayi ju nunkanam. Tura nunkasha ni najanamu ain, nunkaya aents Nin nekaacharmiayi.

<sup>11</sup> Támiayi ni nunkén tura ni shuarsha ni enentáin itiaacharmiayi.

<sup>12</sup> Tuma ain chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsankatkamiayi.

<sup>13</sup> Niisha Yusa uchirí ajarar ataksha númpentin ayashímkiacharmai. Áentsnúmia akiiniachu áiniawai niisha. Áishman wakeramujajaisha akiiniacharmai. Antsu Yúsnumia akiiniawaru ásar Yusa uchirí áiniawai.

<sup>14</sup> Nú Chichamsha ayashtin ajas iijai núkap tsawant pujumiayi. Yusa anenkratairijai piakuyi. Aya nekasa nunak chichaamiayi. Núnisan ni penkerin, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji.

<sup>15</sup> Juansha Nin neka asa, étseruk tímiayi “Júiti wi tímiaj nu: “Winia ukuruini winittiana nu wíjainkia émkaiti. Maa, wi atsaisha tuke pujuyayi” tiniujai.” Tu etserkamiayi.

<sup>16</sup> Chichamsha ti anenkrartin asa ashí penker ana nuna iniaitsuk súramji.

17 Yusa akupeamurin Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti.

18 Chikichkisha Yúsan penké wáinkichuiti. Tura ni Uchirí chikichkia nu tuke Nijijai tsańaku asa Yúsan paant awajturmasuitji.

*Imiakratin Juan Jesukrístunun etserkamiania nu  
(Mateu 3.11-12; Márkus 1.7-8; Rúkas 3.15-17)*

19 Jerusareńnumia Israer-shuar ni Pátririncha Riwí-shuarjai Juanakai akupkarmiyai yákit tusar.

20 Inintruiniakui paant ujakmiyai. “Wikia Krístuchitjai” tímiyai.

21 Takui ataksha aniasarmiyai “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juańsha “Atsá, núchaitjai” tímiyai.

Nuyá ataksha aniasarmiyai “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiyai.

22 Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

23 Juańsha tímiyai “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiyai.

24 Juańjai chichainiakka Pariséu akupkarma áarmiayi.

25 Niisha tiarmiayi “Nuikia Krístuchitiatmesha, Eríaschaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

26 Juańsha tímiyai “Wikia entsajain imiakratjai. Tura átum írutramunam shuar átum nékatsrumna nu wajaawai.

27 Niisha winia ukuruini winiyat wíjiańkia ti nankaamantuiti. Nii ti péńker asamtai wisha ni sapatri jńkiamurincha atitrachminiaitjai” tímiyai.

28 Nuka Petapara peprunam túrunamiyai. Petaparasha Juan imiakratmia nuj Jurtań entsa amain amai.

*Jesus Yusa Murikrinti*

29 Nuyá kashin Juan Jesusan winian wáiniak tímiyai “Iistarum. Núiti Yusa Murikri ashí aentsu tunaarın júana nu.

30 Núiti wi timiaj nu, “Winia ukuruj winiana nu wíjiańkia nankaamantuiti. Tura wi atsaisha tuke pujuyayi” tímiajai.

31 Wisha Nin nekaachmajai. Tura ashí Israer-shuar Nin nekaawarat tusan imiakın támajai” tímiyai.

<sup>32</sup> Nuyá tímiayi “Yusa Wakanin yámpitsa núnin nayaimpin-mayan táarun wáinkíámjai. Tura ekemsamai.

<sup>33</sup> Nu túruntsain tuke Nin nekaachmajai. Tura Yuska winia imiakrattinian akuptak turutmai “Chikichik shuarnum Yusa Wakaní tara ekemsa wáinkiam, nujai nekaattame. Yusa Pénker Wakaníjjai imiakratniua núiti” túrutmiayi. Tura nujai Nin nekaamjai.

<sup>34</sup> Yamaikia wainkia asan ti paant nékajai tí nekas Yusa Uchirínti” tímiayi Juan.

*Jesusa unuiniamurí emka armia nu*

<sup>35</sup> Kashincha ataksha Juan nui wajasmiaiyi ni unuiniamurí jímiarjai.

<sup>36</sup> Jesssha nui nankaamakui Juan tímiayi “Iistarum, Yusa Muríkrí áuwiti.”

<sup>37</sup> Juanka unuiniamurí nuna antukar mai Jesusan pataatukarmiaiyi.

<sup>38</sup> Jesssha úkumur íimias nu jímiaran wininian wáinkíamiayi.

Tura tímiayi “¿Ya ēarum?”

Niisha “Uuntá, ¿tuí pujam?” tiarmiayi.

<sup>39</sup> Jesssha tímiayi “Wats, iitiarum.”

Niisha wear ni pujutairin wáinkiaromiaiyi. Tura áan\_kú ajas-matai nu tsawantai nui kintiamprarmiaiyi.

<sup>40</sup> Juanka chichamen antukar Jesusan pataatukaruka jímiar ármiaiyi. Chikichik Antresauyayi. Niisha Semun Pitru yachiyyayi.

<sup>41</sup> Antressha wárik ni yachi Semunkan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkíarat tusa Yus anaikiamuíti.

<sup>42</sup> Nuyá Antres ni yachi Semunkan Jesus pujamunam jukimiayi. Jesssha wáiniak tímiayi “Ámetme Semun, Junasa uchirí. Túrusha Sépas átatme.” Sépaska Israer-shuar chicham-num kaya tawai. Tura Kriaku chichamnum nuka Pítruiti.

*Jesus Jiripijiai tura Natanaérjai chichasmiania nu*

<sup>43</sup> Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

<sup>44</sup> Jiripisha Petsaitia péprunmayayuyayi. Antressha Pítrusha nu péprunmayayuyayi.

<sup>45</sup> Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsna et-serniusha ujakcharmakia. Nu shuar wáinkiaji. Jesusaiti, José uchirí. Nasarét péprunmayaiti.”

46 Natanaérs<sup>h</sup>a tímiayi “¿Nasarétnumiá pé<sup>n</sup>ker shuar áminkiait?”

Jiripisha “Winim ítiá” tímiayi.

47 Jesussha Natanaéran tíjiuch winian wáiniak tímiayi “Ju shuar iistarum. Ti pé<sup>n</sup>ker Israer-shuaraiti. Pe<sup>n</sup>ké anañkartichuiti.”

48 Natanaérs<sup>h</sup>a tímiayi “¿Itiur nékaram?”

Jesussha tímiayi “Jiripi tuke untsurmatsa<sup>n</sup> wáinkiaíjme ikiu numir<sup>n</sup> ejamkam wajamin.”

49 Natanaér nuikia tímiayi, “Uunta, nekas Yusa Uchir<sup>n</sup>me. Israer-shuar akupniuitme” tímiayi.

50 Tura Jesus tímiayi “¿Aya wi “Ikiu numir<sup>n</sup> ajamkam wajamin wáinkiaíjme” takui Winia enentáimturamek? Antsu nuna nan<sup>k</sup>aamas nekaachmin ana nusha wáinkiaíttame” tímiayi.

51 Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntar<sup>i</sup> Winin tara waka ajainia wáinkiaíttarme.” Tu tímiayi.

## 2

### *Nuatnaikiatin jísat Kaná péprunam ámiania nu*

1 Menaintiu tsawant nan<sup>k</sup>aasmatai nuatnaikiatin jísat Kaná péprunam ámiayi. Kaná péprusha Kariréa nun<sup>k</sup>anmauyayi. Jesusa nukur<sup>i</sup>sha nu<sup>i</sup> pujumiayi.

2 Jesussha ni unuiniamur<sup>i</sup>sha nu nuatnaiyamunam ipi-aamu ármiayi.

3 Umutai amuukamtai Jesusa nukur<sup>i</sup> tímiayi “Umutai amuukai. Pe<sup>n</sup>ké takakainiatsui.”

4 Tura Jesus tímiayi “Nukuá, ¿urukamtai Winia túrutam? Iniáitiústá. Winia kakarmar iniakmastin jeaatsui.”

5 Nuyá umutain wáinmainia nuna ni nukur<sup>i</sup> tímiayi “Ashí ni tana nu umiktár<sup>u</sup>m.”

6 Nu<sup>i</sup> kayajai najanamu yumi-yaraatai sais (6) ámiayi. Nu yaraatainmayá Israer-shuar ni ewejéncha ni nawéncha ni-jiamau ármiayi Yus shiir enentáimtursat<sup>i</sup> tusar. Chíkich chíkich yaraatainiam uchenta (80) rítrusha, sian<sup>n</sup> (100) rítrusha yumi wayamniauyayi.

7 Nuyá Jesus umutain wáinmaun “Ju yaraatai ámpratarum” tímiayi. Takui mete ámprarmiyai.

8 Ámprarmatai Jesus tímiayi “Pai, ishichik shikikrum námper chicharu suutarum.” Tutai nútiksa<sup>n</sup> túrawarmiyai.

9 Jista chicharusha nu umutai ajasun nekáprámiayi. Yaraatainmayá yumi jusamun nekaachmai niisha tura umutai ajamau jusaru ásar nékarmai. Jista chicharusha nuwátun untsuk

10 tímiayi “Jístanman̄ka péñker umutain emka suñiatsuk. Tura jémararmatain̄kia tímianchan suiniatsuk. Túrasha ámeke péñker umutai ikiusam yamáí jíkchamek” tímiayi.

11 Jesus túramu Kananum Kariréa nun̄kanam túrunamiayi. Nújain̄kia Jesus emka ni kakarmar̄in paant iniaktusmiayi. Nuna ísar ni unuiniamur̄isha Nin enentáimtusarmiayi.

12 Nuyá Kapernáum péprunam wémiayi. Ni nukur̄isha ni yach̄isha ni unuiniamur̄isha nemariarmiayi. Nuisha untsur̄í tsawant pujusarmiayi.

*Yusa Uunt Jeen suruktinian Jesus surimkiamiania nu  
(Mateu 21.12-13; Márkus 11.15-18; Rúkas 19.45-46)*

13 Israer-shuara namper̄i, paskua tutai, ishichik ajasmatai Jesus Jerusarén̄num wémiayi.

14 Nuj̄ jeá Yusa Uunt Jeen súruinian wáinkíamiayi. Turuncha murikniasha yampitsnasha súrin ármiayi. Chikichcha ni misar̄in pujusar kuitian yapaj̄niancha wáinkíamiayi.

15 Nuna wáiniak yaran̄ken chapikmar asutkiartutain najana nujai ashí waakartiuk murikrintiuk aa jíirmiayi. Kuitian yapajniu misar̄incha ayantar ni kuítrin nun̄ká utsan̄karmiayi.

16 Yampitsan súrinniasha tímiayi “Nuka juyá jíitiarum. Winia Aparu Jeen surutai jea najanawairap” tímiayi.

17 Nuna ísar ni unuiniamur̄i yaunchu Yus-Papinium áarman enentáimprarmiayi. Ju áarmaiti:  
“Ame Jeem shiir atí tusan ti wakerukuitjai.”

18 Nuikia Israer-shuara uuntri Jesusan aniasarmiayi “Juna túramniaitjai tusam ¿warí kakarmak iniakmastatam?”

19 Jesussha tímiayi “Ju Jea sáakiakrumin menaintiú tsawantaj̄ iniantaittaijai Wikia.”

20 Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantaj̄ jeamtámeash.”

21 Kame Jesus “Jea” chichayat ni ayash̄in tímiayi.

22 Tuma asamtai Jesus ukunam jakamunmaya nantakmiatai ni unuiniamur̄i ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

*Jesus ashí shuara enentáin nékawai*

23 Paskua námpertin ti untsur̄í Jerusarén̄num pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi.

24 Tuma ain̄ Jesus ashí neka asa ninkia enentáimtuscharmiaiyi.

<sup>25</sup> Nínki ashí shuara enentáin neka asa chíkich ujatkat tusa atsumchamiayi.

### 3

#### *Jesus Nikiutémujaí*

<sup>1</sup> Shuar ámiayi ni naari Nikiutému. Niisha Pariséu asa nii tuinia áintsan Yúsna takauyayi. Niisha Israer-shuara uun-triyayi.

<sup>2</sup> Niisha kashi Jesusai irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinkiaintme’ tímiayi.

<sup>3</sup> Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

<sup>4</sup> Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

<sup>5</sup> Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui.

<sup>6</sup> Ayashniumiá akiinia nuka ayashchakait. Núnisan Wakaniúmiá akiinia nuka wakanchakait.

<sup>7</sup> Wi “atak yamaram akiiniatniuiti” takui itiurchat enentáimpraip.

<sup>8</sup> Nase enentáimpratá. Nase nánkamsan umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniúmiá akiinia nu.”

<sup>9</sup> Tuma asamtai Nikiutémusha atak anias “¿Jusha itiurak áminiait?” tímiayi.

<sup>10</sup> Jesus áikmiayi “Ame Israer-shuara jintinniurintiatmesha ¿itiura nékatsmea?”

<sup>11</sup> Ti nekasan tájame. Nekas nékatur chichaaaji. Íismajnia nusha ujaaji. Tuma ain ii chichame ántatsrume.

<sup>12</sup> Aya ju nunkanmayá túramu ujaam ántachkurmeka ¿itiurak nayaimpinmayá túramusha antuktatum?”

<sup>13</sup> Shuar chikichkisha nayaimpiniam waka atsawai. Aya Wiki, nayaimpinmayá taran Aents Ajasu asan, túraitjai. Tura Wikia nayaimpinmayaitjai.

<sup>14</sup> Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijiai ti jáiniakui tuke tsuamarti tusa Muisais napin jirú najana yakí numiniam awajaimiyai. Núnisnak Wisha awajnitniuitjai.

<sup>15</sup> Nújainkia ashí Winia enentáimturna nuka jinium wétsuk Yusai tuke iwiaaku pujustatui.”

*Yuska ashí shuaran ti aneawai*



16 Yuska ashí shuaran ti anea asa, ni Uchirín chikichik ana nuna shuáran uwentikrarat tusa tsan̄katkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiaji.

17 Yus áentsun kajerak jinium surukat tusa ni Uchirín akupkachmiayi. Antsu uwentikrarat tusa akupkamiayi.

18 Yusa Uchirín enentáimtana nuka jinium penké surunkashtiniaiti. Tura Nin enentáimtatsna nuka, Yusa Uchirín chikichik ana nuna enentáimtachu asa, páchitsuk jinium surukmaiti.

19 Yusa Uchirí tsáapninia áintsan̄ ii tunaari paant awajtur-maji. Nu tsáapnisha jú nun̄kanam táraiti. Shuar tunáa ti tura ásar tsáapninian nakitrar kiritniun wakeriarmi. Nuna tura ásar jinium surunkaruiti.

20 Ashí tunaan túruinia nuka tsáapninian muíjainiawai. Túrawar yupitiainiawai ni tunáa túramu paant ajasai tusa.

21 Antsu ashí nekas túratniun umiiniana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

*Imiakratin Juan̄ ataksha Jesusnan chichasmiania nu*

22 Nuyá Jessusha ni unuiniamurijiaisha Jutía nun̄kanam wear nūj pujusar imiakratiarmiayi.

23 Juan̄sha Enun̄ nun̄kanam, Sarim tíjiuchia nūj, imiakratuk pujumiayi entsa nūj núkap aa asamtai. Tura aents táarmatai imiainiarmiayi.

24 Nusha Juán̄kan sepunam enkenatsaiñ túrunamiayi.

25 Tura Juan̄ka unuiniamurí Israer-shuarjai jianaiktinian nan̄kamawarmiayi. “¿Ya imiakratma imiá péñkerait?” tusar áujmatiarmiayi.

26 Juán̄kaī inintrustai tusar wéarmiayi. “Uunta, ame nuik Jurtan̄ entsa amain pujakum shuar nūj pujá “núiti Yusa Murikri” tíchamkum. Yamaikia imiakratui tura ashí shuar Nin nemarainiawai” tiarmiayi.

27 Tutai Juan̄ tímiayi “Ashí kakarmaka aya Yúsaiyañchakait.

28 Wisha paant tímiajai “Wikia Krístuchuitjai antsu ni jintin̄ iwiarat tusan emka akupkamuitjai.” Nusha antukmarme.

29 Kame shuar nuwan̄ nuatna nuna áishrinti. Nuatnaiyak áishman̄ nuwejaī áujnainiakui, ni amikrīsha nuna antuk ti waraatsuk. Wisha núnisnak aents Jesusaī wénakui ti waraajai.

30 Niisha tuke nan̄kaamaku uunt ajastiniaiti antsu wikia tuke tímiancha ajastiniaitjai.” Juan̄ tu chichasmiayi.

*Nayaimpinmaya tara nu*

31 Nayaimpinmaya tara nuka ashí nan̄kaamakuiti. Nun̄kaya nuka, nun̄kaya asa jú nun̄kanmayan̄ak áujmatui. Nayaimpinmaya tara nuka ashí nan̄kaamakuiti

<sup>32</sup> tura nuḷ antukmancha ísmancha áujmatui. Túrashā ni chichamēn ántuiniatsui.

<sup>33</sup> Antsu ni chichamēn ántana nuka “Yusa chichameḷ imiá nekasaiti” tawai.

<sup>34</sup> Yus akupkamuka Yusa chichamēn étserui. Yuska ni Wakanín ementutsuk susa asamtai tu étserui.

<sup>35</sup> Yus Apa ni Uchirín anea asa ashí ana nuna iistí tusa ataksaiti.

<sup>36</sup> Shuar Yusa Uchirín enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

## 4

### *Jesus Samaria nunkanmaya nuwajai chichasmiania nu*

<sup>1</sup> “Jesus untsurí shuaran ni nemanin awajeawai; kame Juanjai nankaamas untsurí imiaawai” taman Pariseu shuar antukarmiyai.

<sup>2</sup> Nekaska Jesus imiakratchamiyai, antsu ni unuiniamurí túrawarmiyai.

<sup>3</sup> Pariséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiyai.

<sup>4</sup> Wáketuk Samaria nunkanmaanḷ nankaamaktiniuyayi.

<sup>5</sup> Samaria nunkanam wéak Sekar péprunam jeamiyai. Nu pepru jeastatuk Jakupa nunke ámiyai. Jakupsha nu nunkan ni uchirín Jusēn tí yaunchu susamiyai.

<sup>6</sup> Nuḷsha yumirmat ámiyai. Jakup taurma asamtai “Jakupa yumirmatrḷ” tiarmiiai. Tutupin jeamtai Jesussha pimpiki winis yumirmat ayamach pujusmiyai.

<sup>7</sup> Nuḷ pujai Samarianmayaḷ nuwá yumí shikiktajtsa támiyai. Tura Jesus “Entsa surusta” tímiyai.

<sup>8</sup> Jesusa unuiniamurísha yurumkan péprunam sumaktajtsa wéaru asamtai aya Jesusak pujumiyai.

<sup>9</sup> Samarianmayaḷ nuwá Jesusan tímiyai “¿Itiura Israer-shuaraitatmesha Samarianmayaḷ nuwá aḷsha entsa seatam?” Kame Israer-shuar Samarianmayaḷ shuarjainkia penké chichachu ásar nuna tímiyai.

<sup>10</sup> Jesussha tímiyai “Yus súamu nékakmeka tura entsa surusta tájam nusha nékakmeka ame antsu seattínme tura Wikia iwiaaku entsan amasaintjai.”

<sup>11</sup> Nuwasha tímiyai “Uunta, entsasha ti initiaiti tura shikiktincha takaktsume. ¿Tuyaḷ iwiaaku entsasha surustam?”

<sup>12</sup> Ii uuntri Jakup juḷ yumirmatan taur juyanak niisha ni uchirísha ni waakarísha umararmiyai. Nuyá ikiurtamkimi-aji. ¿Amesha Jakupjai nankaamas kakarmakaitiam?”

13 Jesussha tímiayi “Ashí shuar jū entsan umarka ataksha kitiamtiatui.

14 Antsu Wi súajna nú entsan umarka penké kitiamchat-tawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

15 Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura jū entsancha shikiktinian táchataj” tímiayi.

16 Nuyasha Jesus tímiayi “Áishrum untsukam utitia, turam jui tata.”

17 Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai.

18 Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

19 Nuna antuk nuwasha tímiayi “Uunta, ame Yúsna etserni-uchukaitiam.

20 Ii úntrinikia tuke Samaritanam pujuarmia nu jú nainnium Yúsna tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

21 Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin.

22 Átum tikishmatrum nuka nékatsrume. Iikia tikishmatra-jnia nu nékaji. Israer-shuarnumiá Uwentikkiartin winiakui nékaji.

23 Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjai tuke enentáijiaisha awajitsuk tikishmatrartatui. Núnisañ tikishmatrurat tusa wakerawai Yus Apa.

24 Yuska Wakaniiti tura ashí Nin tikishmatainia nuka tuke wakanjjai tura tuke enentáijjai awajitsuk tikishmatratin áiniawai.”

25 Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaji.”

26 Jesus tímiayi “Wiitjai. Ámin chichaaajmena nú Kristuitjai.”

27 Nuiñ ni unuiniamurj táarmiayi tura nuwajaj chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajaj chichaa?” títinian arantukarmiayi.

28 Nuyanka nuwá ni yumirjñ ikiuki péprunam we ashí áentsun tímiayi

29 “Winiirum ítiarum, shuar ashí wi túramun túruta nu. ¿Juka Krístuittiya?”

30 Tutai péprunmayá jíinkiar Jesus pujamunam wearmiayi.

31 Jeiniatsañ ni unuiniamurj seak tiarmiayi “Uunta, yurumáta.”

32 Tura Jesus tímiayi “Wi yúatniunka takakjai átum nékachman.”

33 Ni uniuniamurisha nuámtak anniasarmiayi “¿Chíkich shuar yurumak itiarím tátsuash?” tiarmiayi.

34 Tura Jesus tímiayi “Winia akuptukua nuna wakeramurí túrakun tura ni takatrín takaakun Wíjiaínkia yurumátuia áintsan ikiakáatui.

35 Átumka “Tuke kuation nantu árak júuktin taasai” tátsurmek. Túrasa Wi tájarne, shuar wininia nu iistarum. Yus-Chicham ni enentáin araamuiti. Tura júuktin tsawant jeayi.

36 Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui.

37 Tiniu armia nuka nekasaiti: “Chikichik araawai chíkichcha júawai.”

38 Iis, chíkich arakmamu júuktinian akupkaitjarne. Átum araachiatrumek chíkich takasmanum atumsha pachiintiukuitrume” tímiayi.

39 Tura núwaka péprunam jeá “Ashí wi túramun ujat kayi” takui untsurí shuar Jesusan ti shiir enentáimtusarmiayi. Niisha Samarianmaya shuar ármiai.

40 Nu asamtai ashí Jesusai taar niijjai pujusát tusa seawarmiayi. Tutai Jesus jimiará tsawant nuí pujusmiayi.

41 Nú shuar untsurí ni chichamen antukar Jesusan ti shiir enentáimturarmiayi.

42 Nuyá nuwan tiarmiayi “Yamaikia aya ame chichamijjain Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

### *Jesus akupniu takarniuri uchirin tsuármiania nu*

43 Jimiará tsawant nankaasmatai Jesus Samaria nunkanmaya jiinki Kariréa nunkanam wémiayi.

44 Kariréasha Jesusa nunke asamtai, aínsha Jesus timia áintsan ámiayi: “Yúsnan etserniun ashí shuar pénker anturainiawai antsu nuna nunkeyanka nin anturainiatsui.”

45 Tuma ain Kariréa nunkanam jeamtai auya shuarsha Jerusarénum paskua námpernum wearu ásar tura ashí ni túramun nuí wainkia ásar ti shiir awajsarmiayi.

46 Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jesussha nuí pujaj yajá péprunam Kapernáumnum akupniu takarin ámiayi. Ni uchirísha jaa tepemiayi.

47 Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiai.

48 Jesussha tímiayi “Aya aents túrachminian túrakui íisrum aya nújain Winia enentáimtarme.”

49 Tura takarın tímiayi “Uunta, winia uchir jáatsain wari winitia.”

50 Nuınkia Jesus tímiayi “Jeemjin waketkitia. Yamaikia ame uchiram péńker ajasai.” Tutai nú aishman Jesus táman antuk wémiayi.

51 Ni jeen jeátemámtai ni takarniuri inkiun tiarmiayi “Yamaikia uchiram péńker ajasai.”

52 Apasha inintrusmiayi nantu urukaim péńker ajasma.

Niisha tiarmiayi “Yau, nantu pukuntamta, tsuemun michatramai” tiarmiayi.

Nuna antuk uchí aparísha enentáimsamai.

53 Nantu pukunta ai Jesus “Ame uchiram péńker ajasai” timia nuní ain michatraitai. Tuma asamta niisha ashí ni shuarísha Jesusan nekas enentáimturarmiayi.

54 Jesus nu túramujai ni kakarmarın jimiara iniakmasmiayi. Nunasha Jutíanmaja jiinki Kariréa nunkanam jeá túramiayi.

## 5

### *Petesta amia nu tampemarun Jesus tsuármiania nu*

1 Nu nankaasmatai, Israer-shuar namperan najanaini-akui Jesus ataksha Jerusarénum waketkimiayi.

2 Jerusarén yama wayamunam murik wayatin waiti tíjuuch amia nu entsa pajamta jeammauyayi. Nu pajamtain Petesta tiarmiayi. Nuna wáitirísha senku (5) ármiai.

3 Nu untsurí jáiniak nunkanam tepearimiayi. Kusurusha shutuapsha tampemakusha tepesar entsa miartukat tusa nákasarmiayi.

4 Kame ni tátaj taku Yusa suntari táuyayi entsan umuchki-atsta. Nuyanka emka shuar entsá wayá nu ni jáamuriya tsuámarmiayi.

5 Áishman traintiúchu (38) uwi jaa tepá nu ámiayi.

6 Jesussha nu shuaran nu tepan wáinkíamiayi. Tura untsurí uwitin jaa tepan nekáa aniasmiayi “¿Shiir ajastiniak wak-eram?”

7 Tutai jaasha tímiayi “Uunta, entsa muchitkiui ¿winia yaki enkétát? Kame wi enkemátaj tai chikich emka enkemáiniawai.”

8 Nuyá Jesus tímiayi “Nantaktia. Ame peakrum jukim wetá.”

9 Nu chichamtaik áishman shiir ajasmiayi. Tura ni peakrın jukí wémiayi. Nusha ayampratin tsawantai túrunamiayi.

10 Tuma asamta Israer-shuar shiir ajasun tiarmiayi “Yamá ayampratin tsawantaiti. Peakrum júkishtiniaitme” tiarmiayi.

11 Áishmansha tímiayi “Winia tsuara nu “Peakrum jukim wetá” turutni” tímiayi.

12 Nuinkia aniasarmiayi “¿Ya “Peakrum jukim wetá” túramam?” tiarmiayi.

13 Tura áishmansha Nin tsuárun nékachmiayi. Untsurí shuar nuí aa asamtai tura Jesus weu asamtai nin nekaachmiayi.

14 Atak Jesus Yusa Uunt Jeen áishmankan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi.

15 Nuinkia áishman Jesus nin tsuárman nekáa Israer-shuaran ujakmiayi.

16 Tuma asamtai ayampratin tsawantai túramtai Israer-shuar Jesusan maatai tusar áintrarmiayi.

17 Tura Jesus tímiayi “Wina Apar tuke yamaisha takawiti. Núnisnak Wisha takaajai.”

18 Tutai Israer-shuar nuna nankaamas maatai tusa wak-eriarmiayi. Ayampratin tsawantai takaakui kajerkarmiayi. Tura nu arantcha “Yus winia Aparuiti” takui Yusjai métek enentáimtumawai tusar nu arant kajerkarmiayi.

### *Yusa Uchirí túramnia nu*

19 Nuyá Jesus tímiayi “Ti nekas tájarme, Yusa Uchirínkia ni enentáijjain takaatsui. Antsu aya winia Apar takaana nuna íisan métek takaajai. Ashí winia Apar túramun Wisha ni Uchirí asan métek takaajai.

20 Ni Uchirí asamtai winia Apar anentui tura ashí tura nuna iniakturui. Tura nuna nankaamas tujinkiamnian iniaktur-sattawai Wisha túratniun. Tura nuna túrakui ashamkattarme.

21 Winia Apar jakamunmayan iwiaaku ajasat tusa Ni wak-erana nuna inianteatsuk. Núnisnak, ni Uchirí asan, Wi wak-eraj nuna iwiaaku awájsámniaitjai.

22 Winia Aparka súmamtiksui antsu shuar súmamtikiatniun ni Uchirín súsaiti.

23 Tuma asamtai ashí shuar Yus Apan shiir awajainia áintsan ni Uchiríncha métek shiir awajsatin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

24 ‘Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuiat jákauyi antsu yamá nekas iwiaakuiti. Tuma asa sumamashtatui.

25 Ti nekasaiti. Tsawant winittiana nu jeayi. Nu tsawant jaka ainia nu Wi unsumman antukar umirkarka iwiaaku ajasartatui.

26 Iis, winia Apar iwiaaku awajsatniun takakui. Tura Wini-asha, ni Uchirí asamtai, iwiaaku awajsatniun surusuiti.

27 Nu arantcha wi Aents Ajasu asamtai, shuaran súmamtikiatniun surusuiti.

28 “Ju chicham itiurchataiti” enentáimprairap. Atak tsawantaj wi untsunnan ashí jákaru ainia nu antukartatui.

29 Tura ashí iwiansamunmaya jínkiartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

*“Jesus nekas Yúsaiyaiti” tu áujmatainia nu*

30 ‘Imia Wíki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai.

31 Aya Wiki “Yúsaiyaitjai” tákunka winia chichamur ántar ainti.

32 Chikichcha awai. Niisha “Yúsaiyaiti” túrutui. Ni chichamesha imiá nekasaiti.

33 Atumsha Juan\_kaj wi túramu inintrusmarme tura nii timia nu nekasaiti.

34 Tuma aijn aents táman atsumatsjai. Antsu Juan\_ka chichame enentáimkiuram uwempratarum tusan tájarme.

35 Juan\_sha jiya núnis keemai. Atumsha ishichik tsawantin nú tsáapninnium warastin enentáimpramarme.

36 Tura Winia “Yúsaiyaiti” túrutna nu, Juan\_jai nan\_kaamas péñkeran takakjai. Wi takasma núiti. Winia Apar takastinian surusma nuna takaakun nuj\_jai páantaiti Yus Apa akupkamuitjai.

37 Winia Aparsha, akuptuku asa, ayamprutui. Túrasha átumka ni chichamesha antukchaitrume tura wáintiash wáinkiachuitrume.

38 Yus Apa akuptukuíti. Tuma asamtai Winia enentáimturchakrum winia Aparu chichamesha atumi enentáin wayachuiti.

39 Átumka Yus-Chicham yaunchu aarma nuj iwiaaku átinian wáinkiataj tusarum ti unuimiaruitrume. Nu chichamsha Wínian áujmatui.

40 Tuma aijn nekas iwiaaku átaj tusarum Winí tátin naki-tiarme” tímiayi.

41 “Shuar Winia “shíiraiti” túrutainiakuisha nuna páchiatsjai.

42 Maa, Wi nékajrume. Átumka Yus aneatsrume.

43 Winia Apar akuptukmatai táwitjai túrasha nakitrarme. Antsu chíkichka ní enentáijjiajn jeartamkuin\_kia nuka átum wakerarme.

44 Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Núj\_jain\_kia ¿jitiurak Yus enentáimtustam?

45 “Ti tunaarin Yusaj etserturmaktatji” turutiirap. “Muisais akupkamun umirkan uwemprattajai” tátsurmek. Antsu Muisais aarma nujaj atumí tunaari etsernaktatui.

46 Iis, Muisais Winia áatrurmiayi. Atumsha ni timia enentáimtakrumka Winisha enentáimturaintrume.

47 Tura ni aarma enentáimtachkurmeka çitiurak wi tama enentáimtustarum?” tímiayi Jesus.

## 6

*Jesus senku mir (5.000) áishmankan ayurawarmiania nu (Mateu 14.13-21; Márkus 6.30-44; Rúkas 9.10-17)*

1 Nu nankaasmatai Jesus Kariréa antumiannum amain katinmiayi. Nu antumiansha Tipirias antumianu tuiniawai. Jimiará náartini*aiti*.

2 Untsuri shuar Jesus ti jáinian timiá wárik tsuan wáinkiaru ásar Nin nemariarmiai.

3-4 Israer-shuara paskuanamperi ishichik ajasmatai Jesussha ni unuiniamurijjiai náinnium waka nui pujusmiayi.

5 Jesussha untsuri aents wininian wáiniak Jiripin tímiayi “Timiá untsuri shuar ayuratniusha çtuyan yurumak sumak-taj*’?*” tímiayi.

6 Kame Jesuska Nii túrattana nuna neka asa Jiripi warittin tusa tímiayi.

7 Jiripisha nuyá tímiayi “Timiá nukap kuitjaj tanta sumakmesha ashí ishichik susamsha jeachaintjia” tímiayi.

8 Nuyá chíkich unuiniamuri Antres, Pitru yachi, tímiayi

9 “Uchi jui senku (5) tantan jimiará namakjaj takakui. Ausha timiá untsurinmasha jeatpiash” tímiayi.

10 Nuyanka ““Ashí pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asamtai nuisha senku mir (5.000) áishmanu pujusarmiai.

11 Jesussha nu tantan achik Yúsan yuminkias ni unuiniamurin susamiayi. Niisha ashí nui pujuinian súsarmiai. Namaknasha núnisan ashí ni wakeriarmiania nuna súsarmiai.

12 Jémararmataisha Jesus ni unuiniamurin tímiayi “Ampirma júukrum chankinnium chumpiatarum. Wasúrnákain.”

13 Niisha senku (5) tantanmaya ampirman júukar tuse (12) chankinnium áimkiarmiai.

14 Nu shuarsha Jesus túramun ísar tiarmiai “Ju nekas Yúsnan etserin tátinia núchakait.”

15 Shuar Jesusan uunt akupin awajsataj tutai Jesus nekáa Ninki náinnium wémiayi.

*Jesus entsá páatek nanamas wekasamiania nu (Mateu 14.22-27; Márkus 6.45-52)*



16 Kíakui Jesusa unuiniamurí antumiannum wearmiayi.

17 Káshisha Jesus tuke táchantai uunt kanunam enkemáwar Kapernáum péprunam wéenak jíinkiar miayi.

18 Tura nase ti umpúakui chíchimi ti wajaimiayi.

19 Ajapén ajaras Jesus entsá pátatek nanamas tíjuuch winian wáinkiar ashamkarmiayi.

20 Tura Jesus “Wiitjai. Ashamprukairap” tímiayi.

21 Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

### *Shuar Jesusan eqk wekainiawai*

22 Kashincha chíkich shuar amain ayuramunam kanararu nekaawarmai. Jesusa unuiniamurí Jesusjainchu chikichik kanu amia nujai wéarun nekaawarmai.

23 Nui chichak matsatai Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjuuch táarmatai

24 nu shuar, Jesussha ni unuiniamurísha nui atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

### *Jesus apatkua áintsankete*

25 Entsa amain Jesusan wáinkiar aniasarmiayi “Uunta, ¿urutía juisha támam?”

26 Jesussha tímiayi “Ti nekas tájarme. Aents tujintiamu nekáa asarum éat surme. Antsu tanta yuarum jémaru asarum éat rume.

27 Juyá yurumak amuukatin asantai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniaiti” túrutui” tímiayi.

28 Tutai inintrusarmiayi “¿Warí túratniuitiaji Yus wakerana nu umiktin?”

29 Jesussha tímiayi “Yus akupta asa Winia enentáimtursarat tusa wakerawai.”

30 Tutai aniasarmiayi “¿Aentsti tujintiamuka warí túrattam ii íisar Ámin nekas enentáimtustin? Chikichcha túratá.

31 Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

32 Jesussha tímiayi “Wi tájana nu nekasaiti. Muisais atumí úuntrin nayaimpinmaya yurumkan súsachmiayi. Antsu winia Apar yamá nekas apatkun nayaimpinmaya súramui.

33 Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

34 Tutai “Uunta, nu apatuk tuke amasta” tiarmiayi.

35 Tura Jesussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai.

36 Túrasha wi túramu wáinkiumesha winia chichamur enentáimtatsrume.

37 Ashí shuaran winia Apar tsankatrुकarmiania nu, Wí shuar ajasartatui. Winin winiana núnaka penké nakitrashtatjai.

38 Wi wakeraj nuna túratniun táchaitjai antsu Winia akuptukmia nuna umirkatniun táwitjai.

39 Winia Apar akuptukuiti tura juna wakerawai. Ashí winia tsankatrुकman emenkátsuk amuukatin tsawantaj iniantkiarat tusa wakerawai.

40 Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

41 Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarmaiya.

42 Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya taraitjai” ta?” tiarmiayi.

43 Jesussha tímiayi “Tu áujmatrukairap.

44 Shuáran winia Apar akúpturkachuitkiuinikia penké wean-turkachainti. Tura Winia akupturna nuna amuukatin tsawantaj iniántkíttiajai.

45 Yúsnan etserniu áarmarin tawai “Ashí Yus jintintiamu ártatui”. Núnisan ashí Yusa chichamen antukar unuimiatainikka Winí táiniawai” tímiayi.

46 ‘Aya Wiki Yúsaiya tau asan Yúsan wáinkiaitjai. Chíkichka penké wáinkiachuiti.

47 Ti nekas tájarme. Winia enentáimturna nú shuarka yamaram iwiaakman amuukashtinian takakui.

48 Wikia iwiaakman súana nú apatkuitjai.

49 Iis, atumí uuntri aents atsamunam maná yurumkan yúawariatcha ashí jákarmiayi.

50 Antsu Wi tájana nú apatkun shuar yúakka jákachartatui.

51 Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

52 Nuyá nuámtak áujmattsar tiarmiayi “¿Itiurak ni ayashinkesha ayurtamattaj?” tiarmiayi.

53 Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume.

54 Winia ayashrun yúana nuka tura winia numparun úm akka yamaram iwiaakman amuukashtinian takakuí. Tura nu shuaran amuukatin tsawantaj iniántkítiajai.

55 Winia ayashruka nekas yurumkaiti tura winia numparsha nekas umutainti.

56 Winia ayashruncha yúaka tura winia numparnasha úm aka Wijiaj tsaniñ pujawai tura Wisha nu shuarjai tsaniñkian pujajai.

57 Yus Apa, Winia akuptukuka, nu iwiaakma nérenniuiti. Tuma asamtai ni iwiaakmariin iwiaaku pujajai. Núnisan Winia yurakka winia iwiaakmaruj iwiaaku pujustatui.

58 Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus.

59 Núnaka Jesus Israer-shuar iruntainiam unuiniarmiayi.

### *Iwiaaku chicham*

60 Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

61 Jesussha ni áujmatman nekáa tímiayi “Átum “ju chicham itiurchataiti” tárumek.

62 Wátsek, Wi nayaimpiniam pujumiaj nuj waketkimtaisha ¿urukawaintrumek?

63 Warí, aya wakanik iwiaakman súwaiti. Ayashkia penké áantrai nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus.

64 Tura Jesus Nin enentáimtachun tura Nin suruktatna nunasha yaunchu neka asa ni unuiniamurjñ tímiayi “Atumjíncha winia chichamprun enentáimtachu tuke awai.

65 Nu asamtai tímiajrume “Shuáran winia Apar akupturkach-maitkiuinjia penké weanturkachainti” tímiajai” tímiayi Jesus.

66 Nuyasha ni nemarniurj untsurj armia nu Jesusan ikukiar atakka Niijiaj wekasacharmiayi.

67 Nuyá Jesus ni tuse (12) unuiniamurjñ chicharainiak “¿Atumsha wétin wakerarmek?” tímiayi.

68 Semun Pítrusha áikmiayi “Uunta, ¿yáiniñ wetají? Ame chichammijiajn nekas iwiaaku áminiaiti.

69 Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

<sup>70</sup>Jesussha tímiayi “Ashí tuse (12) árumna nu achikiuitjiarme nekas Wíi shuar ajastin. Tuma ain̄ atum̄in̄ chikichik iwianchiiti” tímiayi.

<sup>71</sup>Nuna taku Jútassha ni unuiniamur̄intiat Jesusan ukunam surukmiayi.

## 7

### *Jesusa yach̄isha Nin enentáimtuscharmiaiyi*

<sup>1</sup>Nu nan̄kaasmatai Jesus Kariréa nun̄kanam wekaimiaiyi. Jutía nun̄kanam wéchamiayi Israer-shuara uuntrī nui máataj tutai.

<sup>2</sup>Tura Israer-shuar aak aakmatai namper̄i jeatemamtai

<sup>3</sup>Jesusa yach̄i wishikiainiak tiarmiayi “¿Urukamtai jūisha pujam? Jutía nun̄kanam wetá, āisha amé unuiniamuram túram nuna ísarat.

<sup>4</sup>Ashí shuar nekaawarat tákumka ú̄ukam túrawaip. Ti tujintiamu túriniaitkiumka ashí shuar ímmianum túratá” tiarmiayi.

<sup>5</sup>Ni yach̄isha ishichkisha Nin enentáimtachu ásar tiarmiayi.

<sup>6</sup>Tura Jesus tímiayi “Winia tsawantur nampernum wétin jeatsui. Atum̄jain̄kia nán̄kamas tsawant wétin pé̄nkeraiti.

<sup>7</sup>Jū nun̄kanmayā aents atum̄niaka kajertamatsrume. Antsu ni tunaar̄in̄ etsertin asam̄tai Wíniaka kajertuiniawai.

<sup>8</sup>Átumka nampernum wetarum. Wikia tsawantur jeachkui wéatsjai.”

<sup>9</sup>Juna tinia Jesuska Kariréa nun̄kanam juákmiayi.

### *Aak aakmatai nampernum Jesus timia nu*

<sup>10</sup>Ni yach̄i wearmatai Jesussha nampernum wémiayi. Tura nekarawar̄in̄ tusa ú̄umak wémiayi.

<sup>11</sup>Israer-shuara úuntrīsha námper irunturmanum eakar “Nu aishman̄sha ¿tuin̄ pujá?” tiarmiayi.

<sup>12</sup>Ashí shuarsha Nin áujmatiar̄miayi. Chíkich “pé̄nkeraiti” tiarmiayi. Tura chikichcha “Pé̄nkerchaiti. Aya anānkartawai” tiarmiayi.

<sup>13</sup>Tura Israer-shuara úuntrīn̄ ashamainiak ūuk áujmatiar̄miayi.

<sup>14</sup>Nampersha ajapén ajasmatai Jesus Yusa Uunt Jēen wayá shuáran unuiniamiayi.

<sup>15</sup>Israer-shuara úuntrīsha nuna ísar ti enentáimsar chichaak “Jūsha unuimiátrachiatcha ¿itiurak imiá neka?” tiarmiayi.

<sup>16</sup>Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai.

<sup>17</sup>Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaik̄iūn̄kia,

nuna nekaattawai. Aya wi enentáimmiájain chichaakuisha, nuna nekaattawai.

18 Ni enentáimmiájai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai.

19 Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

20 Nu shuarsha tiarmiayi “Wáurtsmek. ¿Ya mantamataj tusa wakera?”

21 Jesussha tímiayi “Ayampratin tsawantaj chikichki túramtai ti enentáimtsurmek.

22 Muisais ashí tsupirnaktinian akupkachmiayi. Antsu ni uuntrin<sub>ki</sub> nuna akupka áiniawai. Tuma ain átumka Muisais akupkamu umiktai tusarum ayampratin tsawantaisha uchi áishman tsúpirnaitrume.

23 Wátsek, Muisais akupkamu uminkiatu tusarum ayampratin tsawantaisha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamtsuk tsuármatai kajertarum?

24 Shuar túrana nu ísam wárik súmamtikiawaip. Antsu inintrúsam paant nekaam, nekasa nu enentáimtusta” tímiayi Jesus.

### *Jesus Yúsnumiá akupkamuiti*

25 Nuyá Jerusarénumiá shuar tiarmiayi “Maatai tuinia núchakait.

26 Tura nuj ashí ántamunam étserui tura suntar páchiniatsui. ¿Ii uuntrin<sub>sha</sub> “Nekas Krístuiti” tu enentáimtuiniawash?

27 Antsu nekas Kristu taa tuya<sub>n</sub> winiá nekanashtatui tura ju pujamuka ashí nékaji” tiarmiayi.

28 Jesus nuna antuk, Yusa Uunt Jee<sub>n</sub> waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume.

29 Antsu Winia akuptukuitkiui aiy<sub>a</sub> tau asan Wikia nékaji” tímiayi.

30 Nuyá sepunam enkeataj táyat achikcharmiayi ni tsawantri<sub>j</sub> jeachu asamtai.

31 Tura untsur<sub>i</sub> shuar Nin enentáimtusar “Kristu ta ¿nuna nan<sub>ka</sub>amas aentsti tujintiamun túratpiash?” tiarmiayi.

### *“Eátkáttarme tura wáitkiashtatrume” tímiayi Jesus*

32 Pariséusha Israer-patri úuntrin<sub>sha</sub> Jesusnan timian antukar suntaran akupkarmiayi Jesusan achikiar sepunam enkeawarat tusar.

33 Nuyá Jesussha tímiayi “Aya ishichik tsawant atumjai pujustatajai. Nuyá ataksha Winia akuptuku pujana nuĵi waketkit-tiajai.

34 Átumka eátkáttarme tura Wi wéajna nuĵi wéchamniaitkiuram wáitkiashtatrume.”

35 Israer-shuarsha nuamtak aniniaisarmiayi “Ĵuŷsha tuĵi wéakuin iisha wáinkiashtatajai. Israer-shuar apachnium pujuinia nuĵi we apachin unuiniartatuak.

36 Nii timia nu itiurkit. “Átumka eátkáttarme tura Wi wéajna nuĵi wéchamniaitkiuram wáitkiashtatrume” tana nu itiurkit?” tiarmiayi.

*Yamaram iwiaakman súana nú entsa*

37 Jista amúamunam ti shiir najanawarmia nu tsawantají Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkráti.

38 Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

39 Nuna taku Jesus “Ashí Yúsan enentáimtusarun Yusa Shiir Wakaní súatniuiti” tímiayi. Tura núnisanĵ Yus-Papiniumsha áarmaiti. Antsu Jesus tuke nayaimpiniam wéatsainĵ Yusa Wakaní shuar súasachmauyayi.

*Shuarsha niisháa niisháa enentáimprarmiania nu*

40 Chíkich shuarsha nuna antukar “Ĵu nekas Yúsnan etserin tátnia núiti” tiarmiayi.

41 Chíkichcha “Ĵuka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ĴKariréa nunĵkanmayá Kristu áminkiait?”

42 Yus-Papinium paant tawai “Krístuka yaunchu uunt akupin Tawit weeanmayá akiiniatniuiti, tawai. Tura Tawitia pépruriyá Pirinnumiá átiniaiti” tawai” tiarmiayi.

43 Tuma asantai shuar niisháa niisháa enentáimprar kanakiarmiayi.

44 Chíkich aiyá nuka “sepunam enĵeatai” tiarmiayi túrasha túracharmiayi.

*Israer-shuara uuntriĵ Jesusan enentáimtuscharmiania nu*

45 Suntarsha waketkiarmiayi. Tura Pariséusha Israer-patri uuntriŷsha “ĴUrukantai itiachuram?” tiarmiayi.

46 Suntarsha tiarmiayi “Chíkichkisha ĵu áishmanĵ chichaa áanis chichaschaiti” tiarmiayi.

47 Nuyá Pariséu tiarmiayi “Atumsha anannarume.

48 Pariséutisha uuntcha nuna enentáimtuiniawash.

49 Penĵké shuarka yaunchu akupkamun nékachua nuka ya-jauchiniam yuminĵkramu áiniawai” tiarmiayi.

50 Nikiutémusha, kashi Jesusan tarimia nu, Pariséuitiat tímiayi

51 “Ii shuartikia, shuar ni túramun etserkamu ántutsuk súmantikiachminiaiti” tímiayi.

52 Nuñkia niisha tiarmiayi “Wats, amesha Kariréanmayanchuashitiam. Yus-Chicham áujсам nekaattame. Kariréanmayá Yúsnan etserin penké táiniatsui” tiarmiayi.

*Nuwa wáinmakman Jesusan itiararmiania nu*

53 Nuyá ashí ni jeen waketkiarmiayi.

## 8

1 Tura Jesuska Uriwiu náinnium wémiayi.

2 Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi.

3 Nuyá Israer-shuara jintinniurisha Pariséusha nuwan wáinmakman Jesusan itiararmiayi. Tura ashí iruntramunam ajapén awajsarmiayi.

4 Tura Jesusan tiarmiayi “Uunta, ju nuwa tsanirma pujá achinkiyai.

5 Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi.

6 Aya mamikmar nekapsatai tusar tiarmiayi. Nin sumantiki-atniun wakeriarmiayi.

Nuyá Jesus tsuntsumá ni uwejéjai nunká áarmiayi.

7 Tura tuke iníam wajaki tímiayi “Ayu, atumiiya tunáa túrichu ákunka kayan achik nin emka tukuti” tímiayi.

8 Tura nuna ti, ataksha tsuntsumá nunká áimiayi.

9 Tura ni chichamen antukar ni enentáin sumamawar úuntnumiá jukí chikichik chikichik jiinki wéarmiayi.

Ashí wéarmatai Jesus Niñki nuwájai juákmiayi.

10 Jesussha wajaki aya nuwanak wáiniak tímiayi “¿Ámin súmantikramainia nusha tuiñ pujuinia. Chikichkisha áwak?” tímiayi.

11 Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmantikiatsjame. Yamaikia weme atakka tunáa túrawaip” tímiayi.

*Jesus tsáapninia áintsan\_kete*

12 Ataksha Jesus Yusa Uunt Jeen iruntrarun tímiayi “Ju nunkanam Wi tsáapninia áintsan shuara enentáin tsáapniajai. Ashí Wijiaj tsaniñ wekaana nú shuar ni enentáin kiritniunam wekasashtatui antsu tsáapnin yamaram iwiaakman súana nujai wekasattawai.”

13 Pariséu nuikia tiarmiayi “Ame pé<sub>n</sub>kerum tau asam támena nu áantraiti.”

14 Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia pé<sub>n</sub>kerun táyatnak tájana nu pé<sub>n</sub>keraiti.

15 Ju nun<sub>k</sub>anmayá aents enentáimmiajái enentáimtakrum ti súmamtikrume. Tura Wikia chikichkinkesha súmamtiksujai.

16 Tura súmamtikkiunka awajitsuk túrajai. Iis, Wiki shuar túramun pé<sub>n</sub>kerashit tusan enentáimtsujai antsu winia Apar Winia akuptukua nusha Wijíjái métek shuar túramun nékawai.

17 Atumí akupkamuri<sub>n</sub>in áarmaiti: “Jimiará shuar mai nú chichamnak táku<sub>n</sub>kia nu chicham nekasaiti.”

18 Wátsek Wishá winia Aparsha mai métek taji. Winia Aparsha akuptukuiti” tímiayi.

19 Tutai “¿Ame apasha tu<sub>j</sub> pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.”

20 Nuna Yusa Uunt Je<sub>e</sub>n Yusa kuítr<sub>n</sub>in suinia nu<sub>j</sub> tímiayi. Tuma ai<sub>n</sub> sepunam en<sub>k</sub>eatniun achikcharmiayi ni tsawantri jeachu asamtai.

*“Wi wéajna nu<sub>j</sub> wéchamniaitrome’ tímiayi Jesus*

21 Jesus ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaaríjái<sub>n</sub> jakattarme.”

22 Israer-shuarsha tiarmiayi “Wi wéamunam wéchamniaitrome” tutai, nu<sub>n</sub>kia máamatpiash” tiarmiayi.

23 Nu<sub>n</sub>kia Jesus tímiayi “Átumka nun<sub>k</sub>ayáitrome antsu Wikia nayaimpinmayáitjai. Ju nun<sub>k</sub>ayáitrome tura Wikia juyanchuitjai.

24 Tuma asamtai tájarme “Atumi tunaaríjái<sub>n</sub> jakattarme.” Nekas Wi tájana núitjai. Tura nu enentáimtachkurmeka atumi tunaaríjái<sub>n</sub> jakattarme” tímiayi.

25 Niisha aniasarmiayi “¿Amesha yáitiam?”

Jesussha tímiayi “Yaunchu tájarme.

26 Nu arantcha atumin súmamtikiatjarum tusan ti tíminiaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak taji” tímiayi.

27 Tuma ai<sub>n</sub> ni Apar<sub>n</sub>in áujmatman pen<sub>k</sub>é nekaacharmiayi.

28 Tuma asamtai tímiayi “Aents Ajasuitjiana ju, numiniam ajintruarum yakí takuriakrumin nújái<sub>n</sub>kia nekarattarme. Wi tájana núitjai tura winia enentáirjái<sub>n</sub> takatsuk aya winia Apar unuiturmanak tájai.

29 Winia akuptukua nuka tuke Wíjái<sub>n</sub>in pujawai. Winia Apar wakeramun tuke shiir túrakui ikiurkichuiti” tímiayi.



30 Tutai untsurí shuar Nin nekas enentáimtusarmiayi.

*Yus-shuarsha tura tunaanum emetamusha*

31 Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átatrume.

32 Nújajsha timiá nekas ana nu nekaattarme tura nekas ankant ajastatrume” tímiayi.

33 Niisha tiarmiayi “Isha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

34 Jesus tímiayi “Timiá nekasaiti, ashí shuar tunaan túruinia nuka nu tunaajaj emetamuiti. Tuma asa takarniua núnisan ajasuiti.

35 Takarniusha ajapnamnia asamtai Yus atumin ajapramanniaitrume. Tura Akupniu Uchirínkia ni Aparíjjai tuke pujawai.

36 Tuma asamtai Akupniu Uchirí ankant awajtamsamtainkia imiá nekas ankant pujustatrume.

37 Átum Apraám weeittrume nékajai. Túmaitiatrum winia chichamur ántachu asarum mantuataj tárume.

38 Winia Apar iniaktursamun áujmatjai. Átumka atumí uuntri timia túrarme” tímiayi.

39 Tutai niisha tiarmiayi “Iikia Israer-shuar asakrin ii úuntriñkia Apraámaiti” tiarmiayi.

Tura Jesus tímiayi “Nekas enentáimin Apraám weeitkiurmeke níya núnis túrawaintrume.

40 Nekas ana nuna Yus iniaktursamtai nuna ujakjarme, tuma ajñ mantuataj tarume. Apraámka nuní túrachmiayi.

41 Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparínti.”

42 Tura Jesus tímiayi “Yus nekas atumi Aparíntkiuñkia Winiasha anentíntrume Yúsnumiá tau asamtai. Wissha winia enentáimmiarjai jui táchaitjai antsu Yus akuptukuiti.

43 ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume.

44 Atumí aparíñkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níniunak chichaawai. Iis, waitia uuntri asa tuke wáitriniaiti.

45 Tura Wikia nekas takui átum enentáimturtsurme.

46 ¿Yaki chikichí tunaajaj súmamtikruamniait? Nuikia Wi nekasa nuna tau ajsha ¿urukamtai enentáimturtsuram?

47 Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

*Apraám akiintsain Jesus pujumiayi*

48 Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch áiniawai nusha. Nu arantcha iwianchrukuitme amesha” nekas taji” tiarmiayi.

49 Jesussha tímiayi “Iwianchrukchaitjai. Áyatik winia Aparun shiir enentáimtikijai. Tura átumka yajauch chichartarme.

50 Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai.

51 Ti nekasaiti. Wi tájana nuna enentáimta nú shuarka penké jákashtiniaiti” tímiayi.

52 Nuinkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi.

53 ¿Nuinkia ii uuntri Apraám nankaamaskaitiam. Niisha tura Yúsnan etserniusha jákacharuk áinia. Itiurak imiá nankaamantu enentáimtumam?” tiarmiayi.

54 Jesussha tímiayi “Wiki shiir enentáimtumaknaka penké áantrai. Antsu Winia shiir enentáimturna nu winia Aparuiti. Nusha átumka “winia Yúsruiti” tárugna núiti.

55 Nusha táyatrum Nin nékatsrume. Wikia Nin nékajai. “Nin nékatsjai” tákunka atumjai métek wáittrin áintjai. Tura Nin neka asan Nii tana nuna tuke túriniaitjai.

56 Apraámka, atumí uuntri, imiá yaunchu jákaitiat Wi ju nunkanam tátinian wararas nákasmiayi. Tura wáitiak ti shiir warartusmiayi” tímiayi.

57 Nuyá Israer-shuar Jesusan tiarmiayi “Warí, senkuenta (50) uwí takaktsume túmaitiatam Apraáman wáinkiamjai tame.”

58 Jesussha tímiayi “Ti nekas tájarne, Apraámka pujatsain Wikia pujajai” tímiayi Jesus.

59 Nuna takui kayan achikiar “Jesusan tukutai” tiarmiayi. Tura Jesus úumak ni matsatmanum ajapéniñ weak Yusa Uunt Jeñia jiinki wémiayi.

**9***Kusuru akiinian Jesus tsuármiania nu*

1 Jesus ni unuiniamurijjai wesa áishmankan kusuru akiinian wáinkiamiayi.

2 Ni unuiniamurisha aniasarmiayi “Uunta, jusha ¿urukamtai kusuru akiiniawit. Yana tunaarjiañ kusuru akiiniait. Niiniujaiimpiash, aparíniuajaiimpiash túrunawit?” tiarmiayi.

3 Jesus tímiayi “Ni tunaarjjiainchusha ni aparínuijainchusha túrunaiti. Antsu Yus ni ayashín túratniua nu paant atí tusa túrunaiti.

4 Tsawaikia takastiniaiti. Yamaikia Winia akuptukua nuna takatrín túratniuitjai. Kashi ajasmatai takastin atsuttawai.

5 Jú nunkanam pujakun shuara enentáin tsáapnimtikratniuitjai” tímiayi.

6 Nuna chichas nunká usukmi nunkejai pachimiar kusuru jijn yakarmiayi.

7 Nuyá chichaak “Siruí pajamtai entsanam nijiamauta” tímiayi. Siruísha nu chichamnum “akupkamu” tawai. Kuserusha we nijiamar péñker ímiar támiayi.

8 Nuyá ni írutkamurísha nuik wáinin ármia nusha tiarmiayi “Juka pujus tuke kuítian seamniuya núchakait.”

9 Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura niñki “Ee, wiitjai” tímiayi.

10 Tutai aniiniak “¿Itiurak yamaikia ímiam?” tiarmiayi.

11 Niisha tímiayi “Áishman Jesusa nu tsakusan jjiurun yakartur “Siruí pajamtai entsanam nijiamauta” turutmiai. Takui wena nijiamaran paant iimpranjai” tímiayi.

12 Tutai “Nu áishmansha tuin pujá” tiarmiayi.

Niisha “Cha, nékatsjai” tímiayi.

*Pariséu kusuru tsuárman inintrusarmiania nu*

13 Nuyá kusuru tsuárman Pariséunam júkiarmiayi.

14 Kame Jesus kusurun tsuarmia nuí ayampratin tsawantauyayi.

15 Tuma asamtai Pariséusha itiurak ímnum tusar anisarmiayi.

Niisha tímiayi “Jjiuin tsakusan yakaarámtai, nijiamaran paant iimjai.”

16 Nuyá chíkich Pariséu shuarnumiá nuamtak tunaiyar “Juna tsuáruka Yúsaiyanchuiti. Kame ayampratin tsawantai túraiti” tiarmiayi.

Tura chikichcha “Tunáa shuaraitkiuinikia júnisan túratniun tujinkiaayi” tiarmiayi. Nujai akannaikiarmiayi.

17 Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

18 Tura Israer-shuar nekas kusuruitiat yamá íimiui tu enentáimtuscharmiai Pariséu. Tuma ásar ni aparíncha untuskar

19 inintrusarmiayi “¿Ame uchiram kusuru akiinia tárugna nukait. Itiurak yamaikia iimia?” tiarmiayi.

20 Ni aparísha tiarmiayi “Ii uchirínkia kusuru akiiniama nu nékaji.

21 Tura iisha nékatsji itiurak yamaikia iimia. ¿Yátsuk pénker tsuáruit? Niisha úuntchakait, nii aniastarum. Niñki ujatmakarti” tiarmiayi.

22 Sapijmiak tiarmiayi. Israer-shuara úuntriñkia “Jesus Yus akupkamu asa nekas Krístuiti” tuinia núnaka Israer-shuara iruntainmaya jiki akupnakti tiniu ásarmatai tsuarma aparíashamkarmiayi.

23 Nu asamtai ni aparí “Niisha úuntchakait, nii aniastarum” tiarmiayi.

24 Nuñkia Israer-shuara uuntri kusuru tsuárman ataksha untsuk tiarmiayi “Yus íimmianum nekasa nu titiá, ju áishmanñka tunaarinniuiti nékaji” tiarmiayi.

25 Tutai tímiayi “Kame tunaarinchashit. Nékatshajai. Antsu junak nékajai. Yaunchu kusuruítian yamaikia íimjiai.”

26 Ataksha aniiniak “¿Itiurtámkama. Itiur ímtikrammia?” tiarmiayi.

27 Niisha tímiayi “Yaunchu tájarme tura anturtatsrume. ¿Urukamtai ataksha titi tusa wakerarum. Niiniu ajastin enentáimprurmek?” tímiayi.

28 Nuñkia katsekkar “Ámeke ní shuarinme. Tura iikia Muisaisa shuarintji, tiarmiayi.

29 Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

30 Áishman tsuarma tímiayi “¿Ausha itiuartsuk áminiait? Winia ímtikrurma nu átumka nékatsrume tuyankit.

31 Paant nékaji tunaarinniun Yus anturtsui. Tikishmatar ni wakeramun túruinia nunak anturui.

32 Yáunchusha kusuru akiinian tsuáruka tuke atsuwaiti.

33 Ju áishman Yúsaiyanchuitkiunñka penké túrachayai” tímiayi.

34 Nuñkia tiarmiayi “Ámeke tunaarintin akiiniaiatimesha ¿in jintintin átaj tamek?” Nuna tiar jiki awemarmiayi.

### *Wakanñin kusurua nu*

35 Kusuru tsuárman jiki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

36 Tsuarma tímiayi “Uunta, turuttia wisha nekaan enentáimtustaj.”

37 Jesussha tímiayi “Wainme. Wiitjai ámijiai chichaajna nu.”

38 Tutai, tikishmatar “Uunta, enentáimtajme” Jesusan tímiayi.

39 Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru aijn íimtiktinian tura anañmamuk “Yusnan nekaan paant iimjiai” tana nuna ukusurtinian táwitjai” tímiayi.

40 Tutai Pariséu shuar nu pujuarmia nu nuna antukar “¿Nuiñkia iikia kusurukaitiaji?” tiarmiayi.

41 Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjai” tau asarum sumamaitrume” tímiayi.

## 10

### *Iikia murikiua áintsar aji*

1 Jesus tímiayi “Wi tájana nu ti nekasaiti. Shuar murikiun takakna nu ni murikrñ wenuimiunam kashi ikiuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yaja wayawainti.

2 Antsu murikiu wáinniuka wáitiniam wayawawai.

3 Waiti wáinniuka nekas murikiun wáinniun wáitin uratui. Muriksha ni wáinniuri chichamen nékainiawai. Niisha ashí ni murikrñ chikichik chikichik náarin anaitius untsúawai. Tura tsawaiikia ni murikrñ jiki ayurtainiam yarumui.

4 Tura ashí ni murikrñ jir émtuki wéawai. Muriksha ni chichamen ántuiniak untsuam nemarainiawai.

5 Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.”

6 Nu métek-taku chichamnaka Jesus áujmatsamiayi tura shuar antukar nekaacharmiayi.

### *Pénker wáinniuka Jesusaiti*

7 Nuyá Jesus tímiayi “Ti nekasán tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin ániawai.

8 Wi táatsain ashí táaruka kasa ániak winia shuarun kasamkatai tusa wakeriarmiayi. Tura winia murikiur Wí shuar ániak nu shuaran anturkacharmiayi.

9 Wikia wáititjai. Ashí Winin wayaaka uwemprattawai. Tura murikiua áintsan wenuimiunmaya jinki péñker yurumáttawai tura atak wayá ayamprattawai’ tímiayi.

10 Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai.

11 Wikia péñker wáinniuitjai. Péñker wáinniuka ni murikrñ uwemtikrartaj tusa jakattawai.

12 Antsu aya kuitjai takauka ni murikrichu ániakui tura nekas wáinniuchu asa péñker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai.

13 Nu shuarsha akikiam takáa asa murikiun enentáimtatsui. Nu asamtai aya pisaawai’ tímiayi.

14-15 ‘Wikia pé<sub>n</sub>ker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwentikrataj tusan jakattajai.

16 Chíkich muriknasha takakjai. Nusha ju wenuimiun-mayanchu áiniawai. Nunasha itiattajai. Nu muriksha Winia umirtukar ashí métek matsamsar chikichík wenuimiummaya ajasartatui tura chikichik wáinin átatui’ tímiayi.

17 ‘Winia murikrun uwentikrataj tusan jakattajai turan atak nantaktiatjai. Nu asamtai winia Apar anentui.

18 Wi wakerakun jakattajai. Wi wakerachkuñka chíkichkia mantuachminiaiti. Jákatniuncha tura nantaktinniasha winia Apar surusuiti” tímiayi Jesus.

19 Israer-shuarsha nuna antukar niisháa enentáimprar kanakiarmiayi.

20 Untsurí tiarmiayi “¿Urukantai ántarum wáuruk tausha. Yajauch wakanin takaksuk?”

21 Tura chikichcha tiarmiayi “¿Yajauch wakantrinniusha núnisan chichasminkiait. Yajauch wakantrinniusha kusurun ímtikramniashit?” tiarmiayi.

### *Israer-shuarsha Jesusan nakitiarmaniania nu*

22 Micha nantutin Israer-shuar Jerusarénnum namperan najanainiawai. Nu nampernumsha Yusa Uunt Jee atak jeman enentáimtuiniawai.

23 Jesussha Yusa Uunt Jee áachiriam wekasamiayi Sarumúnka wáitirja nui.

24 Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

25 Tutai Jesus tímiayi “Yaunchu tiniu ain enentáimturachmarme. Winia Apar akupkamun takaajna nu ti paant awajtawai.

26 Tura átumka winia murikruchu asarum enentáimtursume.

27 Wisha winia murikrun untsuam anturtuiniak nemartuiniawai. Wisha winianak mash nékajai.

28 Tura yamaram iwiaakman tuke jákashtinian suajai. Nu asamtai niisha menkakachartatui antsu Wi wainkia asamtai ¿yaki jurutkit?

29 Winia Apar murikiun surusuiti. Niisha ashí nankaamas kakaram asamtai ¿yaki uwejéyan atankit?

30 Wisha winia Aparjai iisha aya chikichkiitji” tímiayi Jesus.

31 Tutai Israer-shuarsha atak kayan achikiar tukutaj tiarmiayi.

<sup>32</sup> Jesussha tímiayi “Winia Aparu kakarmarjijai ti untsurí péñkera nuna takasuitjai. ¿Tújajimpia mantuattarum?”

<sup>33</sup> Israer-shuarsha Nin tiarmiayi “Péñker túra asakmin máataj tátsuji antsu Yus yajauch chicharkumin túrattaji. Ámeke shuáraitiatam Yusa nuke enentáimtumame” tiarmiayi.

<sup>34</sup> Nuyá Jesussha tímiayi “Atumí akupeamuriin Yus timia nu áarmaiti: “Átum yúsaitrume” tawai.

<sup>35</sup> Kame Yus-Papinium aarma nu tuke nekaschakait. Tuma asantai ni chichamen antukarun Yuska “yúsaitrume” takui nuikia ti nekaschakait.

<sup>36</sup> Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitiaj. Nújajinkia wi “Yusa Uchiríntjai” takui ¿itiurak “Yusan yajauch chicharui” túrutrum?

<sup>37</sup> Winia Apar túramu túrachkuinikia enentáimtursairap.

<sup>38</sup> Tura nekas túrakuinikia enentáimtursatarum. Tura Winia nakitrakrumsha nuikia wi túramu enentáimtustarum. Nujajinkia winia Apar Winin pujamu ashí nekaattarme. Núnisnak Wisha Niin pujajai. Iisha chikichkiitji.”

<sup>39</sup> Tutai ataksha sepunam enkeatai tiarmiayi. Túrasha Jesus uwempramiayi.

<sup>40</sup> Nuyá Jesus Jurtañ entsa amain wé yaunchu Juan imi-akrattainium pujusmiayi.

<sup>41</sup> Ti untsurí shuar iyuwar tiarmiayi “Nekas Juanka aentsti tujintiamun túrachiat ashí Jesusnan tímia nu nekasaiti” tu tiarmiayi.

<sup>42</sup> Nuisha untsurí Jesusan enentáimtusarmiyai.

## 11

### *Rásaru jakamu*

<sup>1</sup> Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártajai pujumiayi.

<sup>2</sup> Niisha Rásaru umai ármiayi. Nu Marisha ukunmanka kunkuinian sumak Jesusan kuer ni intiashíjijai japirmiyai.

<sup>3</sup> Tura Rásaru jaaku ni umai Jesusan chichaman akup-tuiniak tiarmiayi “Uunta, ame amikrum jaawai.”

<sup>4</sup> Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.”

<sup>5</sup> Jesus Mártancha ni kaincha tura ni umai Rásaruncha nekas aneemiayi.

<sup>6</sup> Túmaitiat Rásaru jaawai taman antukiat ni pujamunam jimiará tsawant pujusmiayi.

<sup>7</sup> Nuyá ni unuiniamuriñ “Ataksha Jutía nunkanam wetái” tímiayi.

<sup>8</sup>Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nuì ataksha wétai támek?”

<sup>9</sup>Jesussha ju métek-taku chichaman tímiayi “Tsawajikia páantchakait. Tsawaj wekaana nu paant asamtai tukumkashatui.

<sup>10</sup>Tura kashi wekaana nusha kirit asamtai tukumkátawai. Núnisan Wíi tuke pujakun winia takatrun takastiniaitjai. Túraknasha itiurchatan wáinkiashtatjai.”

<sup>11</sup>Nuyásha Jesus atak tímiayi “Íi amikri Rásaru kanarai. Wi ishintiartatjai.”

<sup>12</sup>Tutai ni unuiniamuri tiarmiayi “Uunta, aya kanarka nuñkia péñker ajastatui.”

<sup>13</sup>Jesuska Rásaru jakamu nékayat “kanarai” tímiayi. Tura ni unuiniamuri Rásaru kajinmakua áintsan kanarai enentáimprarmiayi.

<sup>14</sup>Jesus nuikia ti paant tímiayi “Rásaru yamaikia jakayi.

<sup>15</sup>Tura nuì pujuscha asan kúntuts pujatsjai. Jean túrattajna nu ísrum ti nekas enentáimtursattarme. Nuna nekaan shiir enentáimjai. Wátsek, iyutai.”

<sup>16</sup>Nuyá Jimiampramu Tumas chíkich unuiniamuri nuì armia nuna “Íisha weri Niijjai métek jakatai” tímiayi.

*Iwiaaku átinniasha jaka nantaktinniasha Jesus nérenniuiti*

<sup>17</sup>Nuì taa, Rásarun kuaru tsawant ikusman wáinkiamiayi.

<sup>18</sup>Petania pépruka Jerusarénumia menaintiú kirumitru áinis tíjiuchiiti.

<sup>19</sup>Tuma asamtai untsuri Israer-shuar Mártasha Marísha, ni umaj jakamtai uutkui atsankrataj tusa weriarmiayi.

<sup>20</sup>Mártasha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi.

<sup>21</sup>Tura Marta Jesusan inkiun tímiayi “Uunta, Ame pujakinkia winia umar jákachaayi.

<sup>22</sup>Tura tuke nékajai ashí Yus seamna nuna súramui.”

<sup>23</sup>Jesussha tímiayi “Ame umaimisha nantaktiatui.”

<sup>24</sup>Mártasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

<sup>25</sup>Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui.

<sup>26</sup>Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

<sup>27</sup>Niisha “Ee, Uunta, ame Yusa Uchirínme. Krístuitme, uwentikkiartin jú nunkanam tátinia nu” tímiayi.

*Jesus Rásaru iwiansamunam taa úutmiania nu*



28 Mártasha nuna t̄i, ni kaj̄ Marin untsuk úukan̄ tímiayi “Uunt juī taa untsurmawaī.”

29 Marisha nuna antuk wárik wajaki Jesusa iyuttsa wémiayi.

30 Jesussha péprunam jeatsuk Marta in̄kiun̄manum pujumiayi.

31 Marí wari wajaki wématai Israer-shuar nu jeanam atsan̄krattsa pujuiniasha nuna íisar weriarmiayi. Iwiarsamunam úuttiasa wéatsuash tusa weriarmiayi.

32 Marisha Jesus pujamunam jeá tikishmatar tímiayi “Uunta, Ame pujakminkia winia umar jákach̄aayi.”

33 Jesussha Marinha tura niij̄aj̄i útuncha wáiniak wáitnentaimita asa ti kúntuts pujusmiayi.

34 Tura “Tuī iwiarsamarum” tímiayi.

Niisha “Uunta, iitia” tiarmiayi.

35 Jesussha útmiayi.

36 Israer-shuarsha “Ti aneatsuk” tiarmiayi.

37 Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

### *Rásaru iniantkimiu*

38 Jesussha ti kuntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi.

39 Tura Jesus “Kaya jurustarum” tímiayi.

Rásaru umāi Marta tímiayi “Uunta, kuaru tsawant jákaiti. Mejeatsuk’ tímiayi.

40 Tura Jesus tímiayi “Yus enentáimtakmeke Yusa kakarmarī wáinkiattame tíchamkajam.”

41 Nuikia kayarin̄ uratiarmatai Jesus nayaimpin iis tímiayi “Aparu, Winia anturtakmin yuminsajme.

42 Winiasha tuke anturtame tura jū shuaran pénker enentáimtikrataj tusan tajai. Ame akuptukuitmena nuna nekarmawarti.”

43 Nuna tinia kakaram untsuak “Rásaru jíinkitia” tímiayi.

44 Nujain̄kia penuarmartiuk jíinkimiayi. Yapinmasha jaanch̄j̄iāi ijamuyayi. Tura Jesus “Atirtarum. Wéti” tímiayi.

### *Jesusan achiktin chichaman jurusarmiania nu*

*(Mateu 26.1-5; Márkus 14.1-2; Rúkas 22.1-2)*

45 Untsur̄i Israer-shuar Marin nemariaru Jesus túramun íisar enentáimtusarmiayi.

46 Tura chíkichkia Pariséunam wear Jesus túramun ujakarmiayi.

47 Nuna antukar Pariséusha Israer-patri úuntrīsha ashí naamka uunt armia nuj̄aj̄i iruntrar tiarmiayi “¿Warí itiuirkamniait? Nu shuarka aentstī tujintiamun ti túratsuk.

48 Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

49 Nu uwitin Kaipias Israer-patri uuntriyyayi. Niisha tímiayi “Átumka nékatsrume.

50 ¿Ashí Israer-shuar mesertin péñkerkait. Antsu aya chikichik shuar jákatin péñkerchakaít?” tímiayi.

51 Kaipiaska aya ni enentáimmiajain tichamiayi. Antsu nu uwitin Israer-patri uuntri asamtai Yus nuna enentáimtikramiayi. Nújainkia Israer-shuar Jesus jaruktinian ukjamiayi.

52 Tura aya Israer-shuarnakcha antsu niijiaisha ashí nunkanam Yus-shuar ajasarun irurtajtsa jákatniuyi.

53 Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

54 Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jiinki atsamu nunkanam Eprain pepru tíjiuch wémiayi. Tura nuí pujusmiayi ni unuiniamurijiai.

55 Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsain Muisais timia núnisan ni ayashísha enentáisha iwiarnarat tusa wakeriarmiayi.

56 Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi.

57 Pariséusha Israer-patri uuntrisha akupainiak “Jesus pujá nekaamka uatkata” tiarmiayi. Jesusan sepunam enkeatai tusar tiarmiayi.

## 12

*Mari Jesusan kunkuinian kuérmiania nu  
(Mateu 26.6-13; Márkus 14.3-9)*

1 Paskua jisat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi.

2 Jesus jeamtai ayurawarmiayi. Rásarusha niijiai yurumámiayi. Mártasha yurumkan iwiasmakmiayi.

3 Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijiai japirmiayi. Jeasha nu kunkuinjai ti shiir kunkunmiayi.

4 Jútas Iskariúti, Semunka uchirí, nuí pujumiayi. Niisha Jesusa unuiniamurintiat ukunam Jesusan surukmiayi máawarat tusa. Niisha tímiayi

5 “¿Urukamtai nu kunkuinian ti kuitjaj surukchama kuítrinchan súsatniun?”

6 Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

7 Tura Jesus tímiayi “Iniaisata. Wi iwiarnakui kuératniun sumak ikiurtusuiti.

8 Kuítrincha tuke atumjaj íruntsuk. Antsu Wikia atumjaj tuke pujuschattajaj” tímiayi.

*Rásaruncha máataj tiarmiania nu*

9 Israer-shuarsha Jesus Petania péprunam pujan antukar Jesus ístaitсар weriarmiayi. Rásaruncha Jesus jakamunmaya iniantkimiua nusha iyutai tusar wearmiayi.

10 Túramtai Israer-patri uuntrinka chichaman jurusarmiyayi Rásaru maatai tusar.

11 Untsurí Israer-shuar Rásaru iniantkimiun nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

*Jesus Jerusarénum shiir wayamiania nu*

(Mateu 21.1-11; Márkus 11.1-11; Rúkas 19.28-40)

12 Paskua namperan pachiintiuktajtsa ti untsurí shuar Jerusarénum wearmiayi. Kashin tsawar Jesus nú peprunam tátinian nekaawarmiayi.

13 Niisha tintiuki nuké áinis nukan júurar Jesusan inkiuntai tusar jíinkiarimiayi. Túrawar untsumainiak “Shiir tati, tiarmiayi. Yusa kakarmarijijai winiana nu tí penkeraiti. Israer-shuara uuntri asa shiir ati” tu untsumiarmiayi.

14 Jesussha umpuurun wáiniak entsamkamai. Núnisan áarmaiti Yus-Chichamnum:

15 “Seun péprunmayá shuara, ashamkairap. Atumí Akupniuri umpuurunam entsamak winiawai.”

16 Nu chichamaik Jesusa unuiniamuri nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan túrunamiayi.

17 Jesus Rásarun iwiarsamunmayá iniantkimiun wáinkiarua nú shuar nuna áujmatiarimiayi.

18 Tuma asantai shuar Jesus nu tujintiamun túramtai nekaawar Jesusan inkiunktaj tusar jíinkiarimiayi.

19 Tura Pariséusha nuamtak tiarmiayi “Iis, penké tujinkiaji. Maa iista, ashí shuar Nin nemarainiatsuk.”

*Kriaku apach Jesusjaj chichastinian wakeriarmiania nu*

20 Paskua nampernum Yus shiir awajsatniun Jerusarénum weriaruka untsurí nunkanmayá shuar árimiayi. Kriaku apachcha árimiayi.

<sup>21</sup> Niisha Jiripin weantukarmiayi. Kame nu Jiripi Petsaitia péprunmayayayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichas-taitsar wakeraji” tiarmiayi.

<sup>22</sup> Jiripisha Antresan werí ujakmiayi. Nuyá niijjai métek tsaninkiar Jesusan weriar ujakarmiayi.

<sup>23</sup> Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai.

<sup>24</sup> Wi tájana nu ti nekasaiti. Jinkiaia ántsanketjai. Araach-maka ninki pujatsuk. Antsu araamka tsapain jinkiaichirí kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui.

<sup>25</sup> Shuarsha jinkiaia nuke aya ju nunkanam pénger pu-justinian enentáimkiunka ántar pujak nekas iwiaakmarin emenkaktatui. Tura ju nunkanam pénger pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui.

<sup>26</sup> Shuar winia átaj takunka nemartusti. Túranka Wi pu-jajna nuí Wíi shuar tuke átatui. Núnisan Wíi shuar winia takatron takáa nuna winia Aparsha shiir enentáimtustatui’ tímiayi.

### *Jesus ni jákatniun étserei*

<sup>27</sup> “Yamaikia enentáiruj ti itirchat pujajai. ¿Warittiajak. “Aparu, ju túrunatniunmayá uwemtikrurta” titiajash? Antsu jú túrunatniun táwitjai.

<sup>28</sup> Aparu, wí túramujai ashí shuar ame náarmin shiir enentáimturarti” tímiayi Jesus.

Tutai nayaimpinmayá chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

<sup>29</sup> Shuarsha nui pujuinia “ipiamtachuashit” tiarmiayi. Tura chikichcha “Nayaimpinmayá suntar Nin chichasai” tiarmiayi.

<sup>30</sup> Jesussha tímiayi “Wi antuktinian chichaschayi antsu átum nekaatarum tusa chichasai.

<sup>31</sup> Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai.

<sup>32</sup> Tura numiniam awajnaintai ashí nunkanmayanka shuar enentáimturartatui” tímiayi.

<sup>33</sup> Juna taku krúsnum jákatniun ujakmiayi.

<sup>34</sup> Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awaj-naitniuiti” tame? Aents Ajasuka Krístuchukait, Yus anaikiamu. Núchaitkiuinikia Aents Ajasuka yait?” tiarmiayi.

35 Nuinkia Jesus tímiayi “Wi tsáapninia áintsanketjai. Tsáapnisha atumin aya ishichik tsawantin tsáapniartatui. Tsáapin ana juik wekasatarum kirit ajatsain. Kame kiritniunam wekaana nusha nékatsui itiuranimpia wea.

36 Tsáapnin wáinkieuram nin enentáimtustarum. Túrakrum winia tsáapnintrui wekasattarme.” Jesussha nuna ti wémiayi uumak pujustaj tusa.

*Untsurí Israer-shuar Jesusan enentáimtuscharmiania nu*

37 Jesus aentsti tujintiamun ti untsurí túramtaisha Nin enentáimtuscharmiayi.

38 Yúsnan etserin Isayas yaunchu aarma uminkiatniuyi: “Uunta, ¿ya ii ujam antukuit. Yusa kakarmarisha yana iniak-tusuit?” tu áarmaiti.

39 Nuna uminiak Jesusan enentáimtuscharmiayi. Tura nu arantcha Isayas áarmiaiy:

40 “Yus nin kusuru awajsaiti tura ni enentáincha kátsum awajsaiti. Ni jijiai ímsain tusa tura ni enentájiai nekaawain tusa túraiti. Kame ni tunaari iisar enentáimtuiniakui Yus nin tsuárainti” tu áarmaiti.

41 Isayas yaunchu Jesusan nayaimpiniam ti shiir pujan wáiniak nuna tímiayi.

42 Tuma ain untsurí Israer-shuarsha tura ni uuntrinmayasha Jesusan nekas enentáimtusarmiaiy. Tura niisha Pariséun ashamainiak paant tícharmiayi. Israer-shuara iruntairiya jiki awetamaj tusa ashammiarmiayi.

43 Yus shiir enentáimtursati tutsuk antsu shuar shiir enentáimtursati tusar túrawarmiayi.

*Shuaran sumamtikiatniun táchaitjai antsu uwentikratniun táwitjai, timiania nu*

44 Jesus kakantar untsukum tímiayi “Winia enentáimturuk aya Winiak enentáimturtsui antsu winia Aparun Winia akup-tukua nunasha enentáimtawai.

45 Winia wáitkiusha Winia Aparnasha wáinui.

46 Wikia tsáapnin asan Winia enentáimturainia nuka kiritni-unam wekasain tusan ju nunkanam táwitjai.

47 Shuáran sumamtikiatniun táchaitjai antsu uwentikratniun táwitjai. Tuma asantai shuar winia chichamprun antuk umíachkuka sumamaiti. Tura Wikia sumamtikiachuitjai.

48 Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantaj nin sumamtikiattawai.

49 Wi enentáimmiajain chichaatsjai. Winia Apar akattur akuptukuiti. Tura chichastinia nuna surusuiti.

<sup>50</sup> Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asamtai winia Apar túrutmia núnisnak tajai” tímiayi Jesus.

## 13

*Jesus ni unuiniamuri nawen nijiatramiania nu*

<sup>1</sup> Paskua jísat jeatin chikichík tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Níiniun ju nunkanam pujuinian tuke anea asa amúamunmasha yapajitsuk tuke aneemiayi.

<sup>2</sup> Nu tsawantaisha murikiun yúatin ármiai. Tura yurumátin jeatsain, uunt iwianch Semunka uchiri Jútas Iskariúti enentain Jesusan surukat tusa enentáimtikramiai.

<sup>3</sup> Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa

<sup>4</sup> chíkich yurumuk pujuiniaj wajakmiayi. Tura pushirin áimiak awankéman emenmamamiayi.

<sup>5</sup> Nuyá nijiaamatainiam entsan yará ni unuiniamuri nawen nijiatramiai. Tura awankémjai japirmiayi.

<sup>6</sup> Semun Pítrunam jeamtai Pítieur tímiayi “Uunta, ¿Winia nawer nijiertaj tamek?”

<sup>7</sup> Jesussha tímiayi “Wi túrajna nu yamáí nékatsme tura ukunam nekaattame.”

<sup>8</sup> Tura Pítieur tímiayi “Penké winia nawer nijiarhattame.”

Jesussha tímiayi “Wi nijiaachkuinkia Wijiai tsaninkia pujushanniatme.”

<sup>9</sup> Tutai Semun Pítieur tímiayi “Nuinkia, Uunta, aya nawerkechu antsu uwejrusha tura muukarsha nijiatrurta.”

<sup>10</sup> Tura Jesus tímiayi “Yamáí mainkia ayashí shiir asamtai aya nawenin nijiamártiniaiti. Atumí enentain ashí péñkeraitrume. Túrasha ashí shuarcha” tímiayi.

<sup>11</sup> Kame Jútas Nin suruktinian nekáa “ashí shuarcha” tímiayi.

<sup>12</sup> Jesussha nijiar umik ni pushirin entsarmiai. Tura atak pujus tímiayi “¿Atumsha Wi túrajna nu nekaarmek?”

<sup>13</sup> Wi atumí Uuntri asamtai nekas “Uunta” túrutrume. Nusha péñkeraiti.

<sup>14</sup> Tura Jintinniuitiatan tura Úuntaitiatan atumí nawen nijiarhajak. Atumsha núnisrumek nuamtak náwem nijiatnairatarum.

<sup>15</sup> Atumin nekapruatsan túramjai. Atumsha núnisrumek tútarum.

<sup>16</sup> Ti nekasnak tajai. Takarniuka ni uuntri nankaamaschaiti. Akupkamusha akupea nuna nankaamaschaiti.

<sup>17</sup> Nu nekaarum túrakrumka shiir átatrume.’

18 “Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijjaj yurumna nu winia nemasur ajasai.”

19 Nuka túmatsajin ujaajrume. Nuyá túrunamtai Yusa Uchirintjai nusha paant nekaattarme.

20 Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

*Jesus Jútas Nin suruktinian étserui*

*(Mateu 26.20-25; Márkus 14.17-21; Rúkas 22.21-23)*

21 Nuna tj, Jesus ni enentáin ti itiurchat enentáimpramiayi. Tura paant tímiayi “Nekas tajai, chikichik juj atumjaj pujana nu Winia surutkattawai.”

22 Tutai ni unuiniamurj nuamtak íniaisar “¿Yanak ta?” tiarmiayi.

23 Chikichik unuiniamurj, Jesus ti aneamu, Nijjaj tsanin yurumuk pujumiayi.

24 Tuma asamtai Semun Pítiur ni uwejéjaj iniakmas “Ani-asta, ¿yanak áujmata?” tímiayi.

25 Tutai Jesusan áyanmatsan aniasmiayi. “¿Yait, Uunta?” tímiayi.

26 Jessusha ayak “Tantan túumnium ajunkan susattaj núiti” tímiayi. Nújajin tantan túumnium ajun Semunka uchirin Jútas Iskariútin susamiayi.

27 Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túrattamna nu wárik túrata.”

28 Tura ashí nuj yurumainiak pujuarmia nusha wariniak ta tusa nekaacharmiayi.

29 “Kuítrincha kuit súsarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi.

30 Jútas tantan yua kashi ajasmanum jíinkimiayi.

*Yamaram akupkamu*

31 Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarisha ti paant átatui.

32 Wi Yusa kakarmarin paant awajeakui Wisha ni Uchirj asamtai winia kakarmarnasha Yuska wárik paant awajsat-tawai.

33 Uchichiru, atumjaj ti untsurj tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia eátkáttarme tura wi wéamunam winishtarume.

<sup>34</sup> Ju yamaram akupeamun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitrume.

<sup>35</sup> Anenaiyakrumniñkia nujaj ashí shuar “Kristu unuiniamurí áiniawai” túramartatui.

*Pítiur Nin natsantratniun Jesus ujakmiania nu  
(Mateu 26.31-35; Márkus 14.27-31; Rúkas 22.33-34)*

<sup>36</sup> Semuñ Pítiur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuñ yamaikia winichmini-aitrume. Tura ukunam winittiarme.”

<sup>37</sup> Nuyá Pítiur tímiayi “Uunta, ¿urukamtai yamaikia winich-miniaitaj? Ámin yáintajtsan jakataj tajai.”

<sup>38</sup> Jesussha tímiayi “¿Nekasmek táme? Ti nekas tájame, atash shiniatsajñ Winia menáintiú natsantrurtatme” tímiayi.

## 14

*Jesus Yus-jintiaiti*

<sup>1</sup> “Kúntuts pujusairap. Yus enentáimtustarum, Winiasha enentáimtursatarum.

<sup>2</sup> Winia Aparuñ átum pujustin ti ankant awai. Tura nuna iwiarataj tusan Aparuñ wéajai, nekasaiti. Nekaschaitkiuñkia ¿itiurak ujakaajrum?

<sup>3</sup> Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan.

<sup>4</sup> Wi wéaj nu nékarme tura jintiasha nékarme” tímiayi Jesus.

<sup>5</sup> Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

<sup>6</sup> Jesussha tímiayi “Wi nekas jintiaitjai. Wíjiañchu wekaana nuka winia Aparuñ jeatniun penké tujintiawai. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiaakman tuke amuukashtinian súwitjai.

<sup>7</sup> Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

<sup>8</sup> Nuñkia Jiripisha tímiayi “Uunta, Apasha wáinkiarka maak.”

<sup>9</sup> Jesussha tímiayi “Jiripi, atumjaj ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame?

<sup>10</sup> Winia Aparjaj tsaniñkian pujakun tura winia Aparsha Wíjaj pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ní wakeramun takaawai.

<sup>11</sup> Nekaatarum. Wisha winia Aparjaj tsaniñkia pujakur nekas chikichkiitji. “Nu chicham itiurchataiti”



enentáimkiurmeka wi túramu nuikia enentáimpratarum. Wi túramujai chikichik ájinya nu páantchakait.

12 Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuí wéakui nuna nankaamas tujintiamun túrattawai.

13 Ashí Winia enentáimtursarum seatrumna nuna amastatjai. Nújainkia winia Apar shiir awajnastatui.

14 Winia enentáimtursarum seakrumniñkia ashí túrattajai' tímiayi.

### *Jesus Yusa Wakanín akupkattawai*

15 'Atumsha anentkurmeka winia chichamur umiktarum.

16 Tura wéakun winia Aparun chikichan akupturmakti tusan seattajai. Niisha atumjai tuke pujak atsañtamprartatui.

17 Nusha Yusa Wakaníinti. Yus-shuarcha Nin nekaachmin áiniawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui.

18 Mitiaikia áitkiasnak ikiukchattajrume. Atumíin atak tátatjai.

19 Ishichik tsawant nankaamasmatai chikich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatrume. Tuma asarum wáitkiattarme.

20 Tura nu tsawantai ju nekaattarme. Wisha winia Aparjai tsaniñkia pujakur chikichkiitji. Núnisnak Wisha atumjai tsaniñkian pujajai. Tura atumsha Wijjai tsaniñkia pujarme.

21 Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajai tura nekarati tusan iniaktustatjai." Jesus nuna tímiayi.

22 Chíkich Jútas, Iskariútichu, tímiayi "Uunta, ¿urukamtai ashí shuarnum iniaktutskesha aya in iniaktustatam?"

23 Jesus tímiayi "Winia anentuka tájana nuna enentáimtawai. Winia Aparsha nu shuaran aneattawai. Tura Wisha winia Aparnum nu shuarjai tsaniñkia pujustatji.

24 Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti' tímiayi.

25 'Atumjai tuke pujakun nuna tájarme.

26 Yus Apa ni Shiir Wakanin atumin yáinmak atsañtamprarat tusa akupturmaktatrume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui' tímiayi.

27 'Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmanka

warastin wáinkiashtatrome. Antsu itiurchatnum pujaya-trumkesha Wijjaj imiatkinchanum pujustatrome. Ashamt-suk pujustarum. Itiurchat enentáimprairap.

<sup>28</sup> Nuik timiaj nu antukmarme. Aparuĭ wena atak atumiĭn tátatjai. Winia Aparka Wijjaj nanĕaamas úuntaiti. Tuma asamtai ti nekas anentkurmeka “Aparuĭ wéajai” takui ashí warasaarme.

<sup>29</sup> Nuka túmatsain ujaajrume. Túrunamtai nuyá Winia enentáimtursattarme” tímiayi.

<sup>30</sup> ‘Jú nunĕanmayan akupin winiakui atumjai núkap chichaschattajai yamaikia. Winiaka nupettukchamniaiti.

<sup>31</sup> Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

## 15

### *Numi arakma áintsanĕetjai*

<sup>1</sup> ‘Winia iwiaakmarun amaakun numi arakma áintsanĕetjai. Wikia kampuĭntjai atumsha kanawentrume. Winia Aparsha arakan wáiniua núnisaiti.

<sup>2</sup> Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa.

<sup>3</sup> Wi ujakjarmena nujaj puruarmaitrome.

<sup>4</sup> Numí kanawesha kampuĭn áchitkiachĕunĕa niĕki nereĕchamniaiti. Núnisrumek atumsha Winí áchitkiachkurmeka nereĕchamniaitrome. Wi atumjai áchitkĭaj núnisrumek atumsha Winí tuke áchitkia atarum’ tímiayi.

<sup>5</sup> ‘Wikia kampuĭntjai atumsha kanawentrume. Kampuĭnĕia kanawen áchitkia núnisnak achiakjarme. Tura kanawe ni kampuĭniĕ áchitkia núnisrum Winí áchitkia atarum. Túrakrumka núkap nereĕtatrome. Antsu Wĭjĭainĕhuka péĕker túratin péĕké tujĭntiarume.

<sup>6</sup> Winí áchitkiachuka ajapam kukartatui. Kanawesha kukar-matai shuar irumkar áesawartatui’ tímiayi.

<sup>7</sup> ‘Tuke Winí áchitkĭaitkiurmeka tura winia chichamprusha kajĭnmattsuk emetarmeka átum wakerarmena nu seakru-min amastatjai.

<sup>8</sup> Átum núkap nereakrumniĕĕia ashí shuar “Nekas Jesusa unuĭniamurĭnti” túramartatui tura winia Aparnasha shiir awajsartatui.

<sup>9</sup> Winia Apar anenna nútĭksanak Wisha atumin aneajrume. Winia aneamur tuke atarum.

<sup>10</sup> Winia Aparu akupkamurĭn umiakun tuke ni aneamurĭntjai. Núnisrumek winia akupkamur umiakrumka tuke winia aneamur átatrome’ tímiayi.

11 ‘Wi waraajna áintsarmek warastarum tusan nuna tájarme. Tura ti shiir warastatrum.

12 Wi akupkamu júiti: “Wi aneajrumna nútiksarmek ashí anenaitiarum.”

13 Shuar ni amikrín yáintaj tusa jakańka ti anenkartichukait.

14 Wi akupeamu takaakrumka atumsha winia amikruitrum.

15 Takarniuka ni uuntri takaana nuna nékatsui. Tuma asamtai “winia takarniuruitrum” tátsujrum. Antsu ashí winia Apar táman ujaku asan “winia amikruitrum” tájarme.

16 Aya atumí enentáimsamurijiaín Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrum. Túrarum péńker túratniuitrum nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui.

17 Júnaka akupeajrum: Nuamtak mai anenai ajatarum’ tímiayi.

*Yus-shuarcha Jesusnasha Níniuncha nakitiainiawai*

18 Jú nunńkanmaya shuar Winia emka nakitrurar atumniasha nakitramarme.

19 Atumsha jú nunńkanmaya shuaraitkiurminkia niinia nútiksán anenmaintrume. Antsu Wíi shuar ajastarum tusan jú nunńkanmaya achikmajrum. Túramtai nekas jú nunńkanmayanchuitrum yamaikia. Nu asamtai nu shuar nakitramainiawai.

20 “Takarniuka ni uuntri nanńkaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui.

21 Winia Akuptukun nékachu ásar Winia enentáimturkurmin yajauch awajtamsartatui’ tímiayi.

22 ‘Wi tana Yus-Chichaman nin ujakchamtainkia tunaanum sumamacharaayı. Antsu ujakma ásar “Nékachkun túraitjai” tíchamin áiniawai.

23 Winia nakitruinia nuka winia Aparnasha nakitiainiawai.

24 Aents penké túrachman túrachuitkiuinķia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai.

25 Yaunchu Yus akupkamunam áarmaiti: “Penké ántar nakitrurarmai.”

Nu chicham uminkiatu tusa túrunaiti’ tímiayi.

26 ‘Tura atsanńtamprattsa yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekantikramprattarme.

27 Atumsha yaunchu Wijjaj̄ pujusu asarum nekamtikiat-tarme' tímiayi.

## 16

1 'Átum kanartukaj̄rum tusan júnaka tájarme.

2 Israer-shuar iruntainiumiā j̄iki akuptamkattarme. Nu arantcha mantamainiaksha “Yúsan shiir awajsattsan túrajai” tíártatui.

3 Nu shuar Winiasha tura winia Aparnasha nékachu ásar túrutmawartatui.

4 Núnaka yamáí tájame. Tura túrunamtai “núnisañ átiniaiti” timiaj̄ nu nekaarum iturchat enentáimprairap' tímiayi.

### *Yusa Wakaní túrana nu*

'Atumjaj̄ tuke pujá asan núnaka yaunchu ujakchamajrume.

5 Antsu yamaikia wáketjai winia Akuptukmia nujaj̄ pujustaj̄ tusan. Tuma áñ̄ wéajna nu inintratsrume.

6 Antsu nuna takuí ti kuntuts enentáimprarme.

7 Tura Wi wématai atumjain̄kia nuna nan̄kaamas péñker átatui. Iis, Wi wéaknaka atumin yainmaktinia nuna akupkat-tajai tura wéachkuñ̄kia táchattawai. Nuka ti nekasaiti.

8 Yusa Wakaní taa ashí j̄ú nuñkanmayā aentsun j̄u menaintiun nekamtikiattawai. Ni tunaarī aan nekamtikiattawai. Péñker tunaajain̄chu wekasamniana nunasha nekamtikiattawai. Tura Yus tunaanum súmamtikiamniana nunasha nekamtikiattawai.

9 Winia enentáimturainiachu tunáarintin ániawai.

10 Winia Aparuñ̄ wáketkui wáitkiashtatrume. Tuma asamtai ashí shuar wi péñker tunaajain̄chu wekaamun nekaawartatui.

11 Tura j̄u nuñkanam akupniunka Yus tunaanum súmamtikia asa shuarnasha súmamtikiamniami. Nuna paant nekaawartatui' tímiayi.

12 'Nu arantcha núkap tíintjiarme túrasha átumka nekaachaintrume.

13 Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiyaj̄i tíchattawai antsu winia Aparuñ̄ antukma nuna ujatmaktatui. Ukunam átatna nunasha ujatmaktatui.

14 Ashí Wínian ujatmak Winia shiir awajustatui.

15 Ashí winia Apar takakna nusha Wíniaiti. Nu asamtai “ashí Wínian ujatmaktatui” tajai' tímiayi.

### *Kúntuts pujuiniayat ukunam warasartatui*

16 'Ishichik pujusrum Winia wáitkiashtatrume. Nuyá ataksha ishichik pujusrum ataksha wáitkiattarme. Wisha winia Aparuñ̄ wéajai" tímiayi.

17 Nuyá ni unuiniamurí nuamtak aniniaisarmiayi “¿Jú chichamsha warimpait? “Ishichik pujusrum wáitkiashtatrumé tura ataksha ishichik pujusrum wáitkiattarme tura Aparuí wéajai” tátsuk.

18 “Ishichik pujusrum” tana nusha ¿warimpait? Nii tana nu ántatsji” tiarmiayi.

19 Jessusha nin aniaistai táman nekáa tímiayi “Ishichik pujusrum wáitkiashtatrumé nuyá ataksha ishichik pujusrum wáitkiattarme” tímiajai. ¿Núchakait átum inintrustin wakerarmena nu?

20 Ti nekas tájarme: Átumka kúntuts pujusrum úuttiatrumé tura Yus-shuarsha warásártatui. Tuma aĩnk<sup>i</sup> átum kúntuts pujayatrumek ukunam warastatrumé.

21 Iis, nuwasha jurertin tsawant jeamtaí najaimiak wáitiatsuk. Tura uchin jurerka ti waraak wáitsamunka enentáimtsui.

22 Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentáin warastatrumé. Nu warastinian jurutramkichminia áiniawai.

23 ‘Nu tsawantinkia penké ininsashtatrumé. Ti nekas tájarme Winia enentáimtsursarum winia Apar searum nuna ashí amastatui.

24 Yamaisha Winia enentáimtsursarum winia Apar seachurme. Seakrumninkia amastatui ti shiir warasaruk tusa’ tímiayi.

### *Jesus jú nunkanmayan nupetkaiti*

25 ‘Métek-taku chichamjai nakumkan nuna tímiajai. Tura ukunmanka nujai chichatsuk winia Aparnan paant ujaktatjarme.

26-27 Nu tsawantai átumka Winia enentáimtsursarum winia Apar seattarme. Winia Aparsha atumin anea asamtai Wi Nin áujsatin atumashtatrumé. Winia anentu asarum tura winia Aparuíya taman enentáimtakrumin Niisha anenmawai.

28 Winia Aparuíya jíinkin jú nunkanam táwitjai. Yamaikia jú nunkanmayá jíinkin ataksha Aparuí wáketjai” tímiayi.

29 Nuyá ni unuiniamurí tiarmiayi “Yamaikia métek-taku chichamjainchu chichaame.

30 Mash nékaitme. Shuar Ámin ininmatsajin péñker áimkiatin nékame. Nu nekaar Ame nekas Yúsnumiaitme tu enentáimtaji” tiarmiayi.

31 Tura Jesus tímiayi “¿Nekasash enentáimtarum?

32 Ti warik átumka ashamkarum niisháa tsakinmaktatrumé tura Winiak ikiurkittiarne. Antsu winia Apar pujakui Wiki pujatsjai.

<sup>33</sup> Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

## 17

### *Jesus ni unuiniamurin Yúsan áujtawai*

<sup>1</sup> Nuna ti Jesus nayaimpinmaaní íimias tímiayi “Aparu, yamá jeayi ame Uchiram shiir awajsatin. Núnisan ame Uchirmisha péñker awajtamsattawai.

<sup>2</sup> Ashí shuara Akupniuri najataitme. Nujainkia Winia surusumna nú shuaran yamaram iwiaakman tuke amuukashinian súsaitjai.

<sup>3</sup> Aparu, chíkich atsawai. Amek nekas Yúsaitme. Wisha Jesuskrítuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashinian takakui.’

<sup>4</sup> ‘Ashí túratniun akuptukmamna nuna amukuitjai. Túran jú nunkanam shiir awajsaitjame.

<sup>5</sup> Nuna túramtai, Aparu, ti yaunchu jú nunka atsáisha Ámijjai pujakui shiir awajtusmamna núnismek yamaisha shiir awajtusta.’

<sup>6</sup> ‘Ashí jú nunkanmaya surusmamna nú shuaran Ámin nekamtikiamjai. Áminiu áiniakui surusmame. Niisha ame chichammin umirtámkaruiti.

<sup>7</sup> Ashí Wi takaajna nu Amek surusuitme. Niisha nuna nékainiawai.

<sup>8</sup> Ame chichamem surusmam nuna ujakam niisha umirtámkaruiti. Ame akuptukakmin Amijníya táwitjai. Nu nekasaiti tu enentáimtuiniawai.’

<sup>9</sup> ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme.

<sup>10</sup> Ashí Winia ainia nuka Áminiuíti. Tura ashí Áminiu ainia nuka Winia áiniawai. Winia péñkerusha ni túramunam paant awajsaiti.’

<sup>11</sup> ‘Wikia yamaikia jú nunkanam pujuschattajai. Tura nu shuarka jú pujuartatui. Antsu Ámijjai pujustajtsan winiakui ashí surusumna nuka, Aparu, ti shiir asam ame kakarmarmijjai wáinkiata. Wisha Ámijjai chikichik ájinia núnisan niisha ashí iruntrar chikichik ajasarti.

<sup>12</sup> Jui niijjai pujakun ame kakarmarmijjai ti péñker wáinkiamjai. Antsu Yus-Chichamnum aarma uminkiatu tusa aya chikichik menkakaiti. Niisha tuke emesnartinia núiti.’

13 ‘Yamaikia Amijini winiajai. Tura juı tuke pujakun juna tájame. Niisha Wi waraajna núnisar ti shiir warasarat tusan tajai.

14 Wi jú nunkanmayanchuitjai. Niisha núnisan jú nunkanmayanchu áiniawai. Tuma asamtai ame chichammin Wi susamtai jú nunkanmaya shuarka nin nakitiainiawai.

15 Jú nunkanmaya jíiki tusan seatsjame. Antsu íwianch nin nupetkain tusan seajme.

16 Wi juyanchuitiaj áintsan niisha juyanchu áiniawai.

17 Ame chichammin ti nekasa nuna ántuiniakui péñker awajsata.

18 Juyá shuarnum akuptukmam áintsan Wisha nin chíkich shuarnum akupeajai.

19 Aya Áminiunak takastaj tusan enentáimtimjai. Túra asamtai niisha aya Áminiunak takastinian enentáimpratin áiniawai’ áujtak tímiayi.

20 ‘Aya níiniunkeka seatsjame antsu ashí ni chichamen antukar Winia enentáimtursartatna nusha ame yáinıkiarta tusan seajme.

21 Ashí niisha chikichkiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijjai iruntrar chikichik ajastai tusar seajme. Wíi shuar chikichik najanata tusan seajme. Nuyá ju nunkanmaya shuar akuptukuitmena nuna nekaawartatui.

22 Ame shiir awajtursamna núnisnak Wisha nin shiir awaj-saitjai. Iikia chikichik ájinia núnisan niisha chikichik ajasarti tusan túraitjai.

23 Wi ni enentáin pujakui Amesha Winin pujakmin penké chikichik ajasarti. Túramtai ashí shuar juna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.’

24 ‘Aparu, shuar surusmam nu, Wi pujustatjana nuı pujusarti tusan seajme. Tura ti shiir awajtusmamna nuna íisarti tusan nuna seajme. Ju nunka najanchamunman tuke anentin asam ti shiir awajtusuitme.

25 Aparu, ti péñker áminin ju nunkanmaya shuar nekar-mainiatsui. Antsu Wi nékajme. Ju shuarsha ame akuptukman nékainiawai.

26 Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui” áujtak tímiayi Jesus.

## 18

*Suntar Jesusan achikiarmiania nu*

*(Mateu 26.47-56; Márkus 14.43-50; Rúkas 22.47-53)*

<sup>1</sup> Jesussha nuna tinia amuk ni unuiniamurijjaj Setrun entsá katiñ numi arakmanum wémiayi.

<sup>2</sup> Jútassha Nin suruktajtsa pujumia nuka nu ajan nekaamiayi. Untsurí tsawant Jesus ni unuiniamurijjaj nuñ iruntramtai Jútas Jesusan nuñ wáinkiatniun enentáimpramiayi.

<sup>3</sup> Tura untsurí suntarjajsha Jesusan tariarmiayi. Pariséusha Israer-shuar Patri uuntriśha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi.

<sup>4</sup> Jesussha ashí átinia nuna neka asa jiiintiuki “¿Ya eāarum?” tímiayi.

<sup>5</sup> Niisha “Nasarénumiā Jesus” tiarmiayi.

Jesussha “Wiitjai” tímiayi.

Jútassha Jesusan surukua nu niijjaj pujuarmiayi.

<sup>6</sup> Tura Jesus “Wiitjai” takui ti ashamkar úkumur wake-tainiak iniaararmiayi.

<sup>7</sup> Ataksha Jesus “¿Ya eāarum?” tímiayi.

Niisha “Nasarénumiā Jesus” tiarmiayi.

<sup>8</sup> Nuñkia Jesus tímiayi “Wiitjai, tájarme. Winia eātkurmeka Wíi shuar ainia júka waketkiarti” tímiayi.

<sup>9</sup> Jesus nuik aujuk “Winia Apar surusma nu menkakacharai” timia nu uminkiat tusa Jesus “waketkiarti” tímiayi.

<sup>10</sup> Nuyá Semuñ Pítiur machitian jusa Marku kuíshin untsurnumaanñ tsupirkamiayi. Markusha Israer-patri uuntri takarniuriyayi.

<sup>11</sup> Túramtai Jesus Pítrun tímiayi “Machitrumka awaiñki ik-iusta. Winia Apar wáitsatniun surakuñkia ¿wáitsastinkaitiaj?”

*Israer-patri úuntriniam júkiarmiania nu*

*(Mateu 26.57-58; Márkus 14.53-54; Rúkas 22.54)*

<sup>12</sup> Nuñkia apach suntarsha ni kapitiantriśha Yusa Jeen wainniusha Jesusan achikiar jinikiawarmiayi.

<sup>13</sup> Nuyá Anasa jeen júkiarmiayi. Anassa Kaipiasa wearíyayi. Tura Kaipias nu uwitin Israer-patri uuntriyañ.

<sup>14</sup> Kaipiasa nuik “¿Ashí Israer-shuar mesertin penkerkait. Antsu aya chikichik shuar jákatin penkerchakait?” timia núiti.

*Pítiur Jesusan natsantramiania nu*

*(Mateu 26.69-70; Márkus 14.66-68; Rúkas 22.55-57)*

<sup>15</sup> Semuñ Pítiur chíkich unuiniamujaj Jesusa uku weriarmiayi. Israer-patri uuntri nú unuiniamunka nékauyayi.



Tuma asamtai ni jeen jeawar, suntar Jesusjaj̄ aa tanishnum wáiniakui niisha wayamiayi.

<sup>16</sup> Tura Pítiur aa wáitiniam wajaamiayi. Túramtai chíkich unuiniamu jiinki wáitin wánia nú nuwajaj̄ chichas Pítrun awayámiayi. Nuĵ nékanu asa yúpichuch awayámiayi.

<sup>17</sup> Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi.

<sup>18</sup> Tsetsek asamtai suntarsha tura nuĵ takarniusha jinia iki-apárar ni nawen anaak pujuarmiayi. Pítrusha nuĵ pachiiniak anamuk pujumiayi.

*Kaipias Jesusan aniasmiania nu*

(Mateu 26.59-66; Márkus 14.55-64; Rúkas 22.66-71)

<sup>19</sup> Israer-patri uuntrĵ Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

<sup>20</sup> Jessusha tímiayi “Ashí íimiainiaĵ tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuĵ arantutsuk tuke etserkaitjai.

<sup>21</sup> ¿Urukamtai Winia inintiam? Winia chichamprun an-tukua nu aniastarum. Wi timian nii ujatmakarti. Wi timiancha niisha nékainiatsuk.”

<sup>22</sup> Jesus nuna takui Yusa Jeen wáiniua nu nuĵ pujá Jesusan yapiniam awati tímiayi “¿Núnisañ nekas úuntnum chichastinkait?”

<sup>23</sup> Jessusha tímiayi “¿Warinmampa yajauch aa? Turuttia. Tura tájana nu péñkeraitkiuinĵia ¿urukamtai awattiniam?”

<sup>24</sup> Nuyá Anas Jesusan jinkiá Kaipias takaamunam akup-kamiayi Kaipias Patri uuntrĵ asamtai.

*Pítiur ataksha Jesusan natsantramiania nu*

(Mateu 26.71-75; Márkus 14.69-72; Rúkas 22.58-62)

<sup>25</sup> Tuke Anasa jeen chichainiaĵ Pítiur jinia anamuk puján shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” tímiayi.

<sup>26</sup> Chíkich takarin, Marku shuari, nuĵ pujumiayi. Pítiur Marku kuishĵin tsupirkamia nuna shuari asa tímiayi “¿Ajanam Jesusjaj̄ wekaamin wáinkiachmakajam?”

<sup>27</sup> Pítrusha ataksha “atsá” taiñ atash shiniukmiayi.

*Piratu Jesusan aniasmiania nu*

(Mateu 27.1-2, 11-14; Márkus 15.1-5; Rúkas 23.1-5)

<sup>28</sup> Nuyá Kaipiasajya Jesusan júkiar tsawant tsawaamunam apach kapitían Piratu takatai jeenam ejeniarmiayi. Israer-shuarsha ni uuntrĵ akupkama nunisar wapik ajasaj̄j tusar nu jeenam wayacharmiayi. Wayawarka paskua nampernum yurumáchmin ármiayi.

29 Nu asamtai Piratu niijjaj chichastaj tusa jíinki tímiayi “¿Jú áishmansha warí tunáa túrait?”

30 Niisha “Tunaarinchaitkiuñkia amijini itiachaaji” tiarmiayi.

31 Tutai Piratu tímiayi “Atumek júkirum atumí akuptammarijjaj ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.”

32 Yaunchu Jesus ni jákatniurin enentáimtus “Wi awajnaitniuitjai” tímiayi. Niisha krúsnum awajnain asamtai apach máataijjaj Nii timia nu uminkiamiayi.

33 Piratusha atak jeá wayá Jesusan untzuk “¿Ámeka Israera Uunt Akupniurinkaitiam?” tímiayi.

34 Jessusha tímiayi “¿Amekek nu ininram. Kame chíkich túramainiatsuash?”

35 Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjaj winin itiarmarai. ¿Warí tunáa túraitiam?”

36 Nuñkia Jesus tímiayi “Wi jú nunkanam akupniuchuitjai. Juyaitkiuñkia Winia nemartuiniana nu máanaikiarayyi. Túrawarmatai Israer-shuarnum surutkacharayyi. Antsu juyan akupniuchuitjai.”

37 Piratusha “¿Nuikia ame nekas uunt akupniukaitiam?” tímiayi.

Jessusha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

38 Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu  
(Mateo 27.15-31; Márkus 15.6-20; Rúkas 23.13-25)*

Piratusha nuna t̄j, atak Israer-shuarjaj chichastajtsa jíinki tímiayi “Jú aishmanka tunaarin penké wáittsujai.

39 Tura ashí uwitin paskua nampernum sepunmayá shuar ankant akupkatniuiti. Núnisrum tuke searme. Tuma asamtai, ¿yamaikia Israera Uunt Akupniurin ankant akupkattajak?” tímiayi.

40 Nuñkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

## 19

1 Nuyá Piratu suntaran akupkamiayi Jesusan asutiáwarat tusa.

2 Suntarsha Jesusan wishikrar tawasap jan̄ki najanamun etsenkrumtikiarmiayi. Yamakai pushincha uunt akupniua áintsan áentsrarmiayi.

<sup>3</sup> Nuyá “Israera Uuntrja, kakaram ajasta” tiar yapiniam awatiarmiayi.

<sup>4</sup> Nuyá Piratu atak jiinki tímiayi “Átum wáinkiarum nekaatarum tusan Jesusan jǐk̄tiatjai. Wikia tunaarǐnkia penk̄é wáittsujai.”

<sup>5</sup> Tímiatai Jesussha jaṅkin etsenkruku tura pushin yamakairman entsaru jǐnkimiayi. Tura Piratu nuǐ káunkarun tiarmiayi “Pai jǐiti, íistarum.”

<sup>6</sup> Israer-patri uuntrisha suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarǐn penk̄é wáittsujai” tímiayi.

<sup>7</sup> Tura Israer-shuar tiarmiayi “Nu shuar “Yusa Uchirǐntjai” takui jákatniuiti. Iiniu akupeamu aarma nuǐ núniskete” tiarmiayi.

<sup>8</sup> Nuna antuk Piratusha nu naṅkaamas ashamkamiayi.

<sup>9</sup> Ataksha init wayá Jesusan aniasmiayi “¿Tuyampaitiam?” Tura Jesussha penk̄é áikchamiayi.

<sup>10</sup> Nuyá Piratu tímiayi “¿Urukamtia winia aǐrtsum. Wi jeajna nu nékatsmek? Wakeraknaka krúsnum máatniuncha tura aṅkant akupkatniuncha jeajai.”

<sup>11</sup> Tutai Jesussha tímiayi “Yus nuna amaschaitkiuǐnkia penk̄é tujinkiaintme. Nu asantai amiǐn surutka nu ámin naṅkaamas tunaarinniuiti.”

<sup>12</sup> Piratusha nú chichamtaik Jesusan aṅkant akupkattsa wakerimiayi. Antsu Israer-shuar untsumainiak tiarmiayi “Ju aṅkant iníakmeka ame úunt akupniu amikrǐnchuitme. Juka “úunt akupniuitjai” taku atumí uunt akupniurǐ nemasrinti” tu untsumkarmiayi.

<sup>13</sup> Piratusha taman antuk akupin pujutainium pujus Jesusan untsukmiayi. Nuǐ kaya ukatkamu asantai Israer-shuara chichamen Kapata anaikiarmiayi.

<sup>14</sup> Paskua jisat jeatsaǐn nantu tutupin ajatsaǐn Piratu Israer-shuaran tímiayi “Uunt akupniuram íistarum.”

<sup>15</sup> Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurǐn krúsnum máattajak?” tímiayi.

Tura Israer-patri uuntrǐ tiarmiayi “Atumí uunt kapitántrumek in akuptamji. Chíkichka atsawai.”

<sup>16</sup> Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

*Jesusan krúsnum máawarmiania nu*

*(Mateu 27.32-34; Márkus 15.21-32; Rúkas 23.26-43)*

17 Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai.

18 Nui krúsnum ajintrurar awajainiarmiayi. Tura mai pae jimiara shuaran chikichik chikichik awajainiarmiayi. Tura Jesus ajapén ámiayi.

19 Piratusha Jesusa krúsrin uunt áarman anujkamiayi.  
*NASARETNUMIA JESUS, ISRAERA UUNT AKUPNIURI*  
Tu áarmauyayi.

20 Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusaréñ pepru tíjiuch asamtai Israer-shuar ti untsurí áujiarmiayi.

21 Nu asamtai Israer-patri uuntri Piratun jeariar “Israera Uunt Akupniuri” áaraip. Antsu “Israera Uunt Akupniurintjai tawai” tu aarta” tiarmiayi.

22 Tura Piratu nincha áikiar “Wi áaraj nuke átatui” tímiayi.

23 Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirin apatsuk najanamu asamtai jáaktinian nakitrarmiayi. Kame yakíya nunkaani apaiyiachma takamtsukuyi.

24 Tuma asamtai suntar tiarmiayi “Juka jáakchatai. Antsu nakurakin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi” áarmaiti.

25 Krúsnumsha Jesusa nukurisha Kriúpasa nuarí Marisha tura Máktaranmaya Marisha wajaarmiayi.

26 Jesus ni nukuríncha tura ni ti aneamu unuiniamuríncha nui wajan wániak ni nukurín tímiayi “Nukuru, ju ame uchirmea áintsan atí.”

27 Nuyá ni unuiniamuríncha tímiayi “Ju ame nukua áintsan atí.” Nu tsawantaik nu unuiniamuri ni jeen jukí awayámiayi.

### *Jesusa jakamuri*

*(Mateu 27.45-56; Márkus 15.33-41; Rúkas 23.44-49)*

28 Nuyá ashí uminkiamtai Jesus nuna nekáa yaunchu Yus-Papinium aarma uminkiat tusa “kitiamajai” tímiayi.

29 Nujsha pininnum churuín ámiayi. Tura shuar nuna uruchjai ejampar sapapjai ijiu mukunaati tusa susamiayi.

30 Jesussha churuínian najekaa “ashí túrunatniua nu mash uminkiai” tímiayi. Nuna ti, muuken nená jakamiayi.

### *Suntar Jesusan paenam nanjijiai ijiumiania nu*

31 Nu tsawantai, kashinkia paskua námper uunt tsawantri asamtai tura ayampratin tsawant aa asamtai, Israer-shuar jaka ayashí nui paant ain tusa nakitrarmiayi. Nu asamtai

Piratun seainiak “Krúsnum ajintrurma ainia nuna kaṅkajin suntar kupirkarti. Nuyá wari jákarmatai krúsnumiá júkiarti” tiarmiayi.

<sup>32</sup> Nuyá suntarsha weriar emka krúsnum amia nuna kaṅkajin kupirkarmiayi. Nuyá chikichnasha Jesusjaj at-sankiar ajintrurma nuna kaṅkajincha kupirkarmiayi.

<sup>33</sup> Tura Jesusan weantuk yaunchu jákai tusa kaṅkajin kupirtsuk

<sup>34</sup> suntar aya paenam ijiumiayi. Ijiumtaisha nu chicham-taik numpa yumijjai puarmiayi.

<sup>35</sup> Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi árajna nu nekasaiti nékajai.

<sup>36</sup> Yaunchu Yus-Chichamnum aarma uminkiat tusa túrunaiti:

“Ni ukunchin kupirkachartatui” tu áarmaiti.

<sup>37</sup> Tura chikichcha:

“Ijiuarmiania nuna wáinkiertatui” tu áarmaiti.

*Jesus iwiarsamu amiania nu*

*(Mateu 27.57-61; Márkus 15.42-47; Rúkas 23.50-56)*

<sup>38</sup> Nuyá Arimatéanmaya Jusé Jesusa ayashin jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrin ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashin jukimiayi.

<sup>39</sup> Nikiuté musha Jesusjai chichastaj tusa kashi tarimia nu jimiara kunkuin pachimpramun ti nukap sumak itiamiayi. Mira kunkuinniasha arui kunkuinniasha sumakmiayi.

<sup>40</sup> Nuyá Jusé Nikiuté mujai Jesusa ayashin júkiar kunkuinian kuérar jaanch esarmajai penuararmiayi. Israer-shuar tuke nunisar ikiúu ármiai.

<sup>41</sup> Jesus krúsnum maamua nuí aja tíjiuch ámiayi. Nu ajan-masha waá náinnium paka taurma ámiayi. Nusha yama taurma asamtai jaka nuí ikiuschamuyayi.

<sup>42</sup> Nu waasha tíjiuch asamtai tura Israer-shuara ayam-pratin tsawantri jeatemamtai Jesusa ayashin nuí iwiarsarmiayi.

## 20

*Jesus nantakmiania nu*

*(Mateu 28.1-10; Márkus 16.1-8; Rúkas 24.1-12)*

<sup>1</sup> Tumiñtincha káshik kirit aín Máktaranmaya Marí Jesus iwiarsamunam ístajtsa wémiayi. Jesusan iwiarsar kaya uuntjai waan atutkarmiayi. Tura Marí nuí jeá nu kaya uraimiun wáinkiamiayi.

<sup>2</sup> Nuna wáiniak Semun Pítiur pujamunam tsékeṅki wémiayi. Chíkich unuiniamurí Jesus ti anemia nusha nuṣha pujumiayi. Tura Marí tímiayi “Iwiarsamunmaya ii Úuntrin júkiarai. Tura ¿tuíntuk ikiusara?”

<sup>3</sup> Pítrusha chíkich unuiniamuríjjai jíinkiar iwiarsamunam iyuwarmiayi.

<sup>4</sup> Mai métek tsékeṅkiar Pítiur jeatsain chíkich unuiniamurí iwiarsamunam emka jeamiayi.

<sup>5</sup> Niisha wayatsuk tsuntsumá iis penuarmarinkia nuṣ tepan wáinkiamiayi.

<sup>6</sup> Nuyá Semun Pítiur ukunam jeá iwiarsamunam wayá penuarmari nuṣ tepan wáinkiamiayi.

<sup>7</sup> Chíkich jaanchcha Jesusa muuken penuarma nusha nanerma niisháa tepan wáinkiamiayi.

<sup>8</sup> Nuyá chíkich unuiniamurí emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi.

<sup>9</sup> Nuna wáintsuk Yus-Chichamnum “Jesus jakamunmaya nantaktiniaiti” áarman áujariat nekaacharmiayi.

<sup>10</sup> Nuyá mai ni jeen waketkiarmiayi.

*Máktaranmaya Marincha Jesus wantintiu kmiania nu (Márkus 16.9-11)*

<sup>11</sup> Tura Marikia iwiarsamunam juak úutu pujumiayi. Niisha úutiataṅ tsuntsumá iwiarsamunam ímsamiayi.

<sup>12</sup> Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaani tura chíkichka nawenmaani pujumiayi.

<sup>13</sup> Nayaimpinmaya suntarsha “¿Urukantai úutam?” tiarmiayi.

Marísha tímiayi “Winia Úuntrun jurutkiarai tura ¿tuíntuk ikiusara?”

<sup>14</sup> Nuna ti ayanmar Jesusan wáiniak Nin nekaachmiayi.

<sup>15</sup> Jesus aniak “¿Urukantai úutam. Ya eḡam?” tímiayi.

Marisha ajan wáinnia nuiti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

<sup>16</sup> Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israerchichamnum “Uuntá” tawai.

<sup>17</sup> Jesussha tímiayi “Emetruawaip. Winia Aparuṣ wáatsjai. Antsu weme Wíi shuar titiá “Winia Aparuṣ nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

18 Nuyá Máktaranmaya Marisha Jesusa unuiniamurin wáiniak “Wi Úntan wáinkiajai, tímiayi. Niisha juna mash túrutui” tu ujakarmiayi.

*Jesus ni unuiniamurin wantintiu kmiania nu*

*(Mateu 28.16-20; Márkus 16.14-18; Rúkas 24.36-49)*

19 Nu tsawantai, tumintin, ni unuiniamuri Israer-shuara úuntrin ashamainiak kashi iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shiir pujustarum” tímiayi.

20 Nuna ti, nuyá ni uwejen ajintruamuncha ni paen ijuumuncha iniakmasmiayi. Ni unuiniamurisha Úuntrin wáinkiar shiir warasarmiayi.

21 Ataksha Jesus “Shiir pujustarum, tímiayi. Winia Apar akatar akuptukma núnisnak Wissha akatran akupeajrume” tímiayi.

22 Nuyá ni matsatmanumaan̄i umpuí tímiayi “Yusa Shiir Wakan̄i atumí enentáin wayati.

23 Shuara tunaar̄inkia átum “asakártí” tákurminkia tsan̄kurnartatui. Tura nu shuar “sumamati” tákurminkia tukē sumama pujawai” tímiayi Jesus.

*Tumas Jesus nantakniun wáinkiamiania nu*

24 Tura chikichik unuiniamu, Jímiampamu Tumas, Jesus tamia nūi pujuchmiayi.

25 Tura ukunam chikich unuiniamuri ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamuri wáinkian uwejr̄un aw̄aintiuatniuitjai. Tura paenumsha aw̄aintiuatniuitjai. Pen̄ké jaka asamtai aya nujaī iniantkimiun enentáimtustatjai” tímiayi.

26 Chíkich tumintin ataksha Jesusa unuiniamuri iruntrararmiayi. Nuinkia Tumassha niijjaī pujuarmiayi. Tura waiti epenmianumañ Jesus wayá ajapén wajas “Shiir pujustarum” tímiayi.

27 Nuyá Tumasán tímiayi “Winia uwejr̄ur íisam ame uwejr̄em aw̄aintiuata. Núnismek winia paeruī uwejr̄em aw̄aintiuam íistá. Tura arantutsuk nekas enentáimtursata.”

28 Nuyá Tumas “Winia Úuntruá, nekas winia Yúsruitme” tímiayi.

29 Jessussha tímiayi “Winia wáitkiam nuin̄ enentáimtursame. Antsu Winia wáittsuk enentáimturaru nekas shiir ániawai” tímiayi.

*Shuar Yusa Uchir̄in enentáimtusarti tusa ju papi áarmaiti*

<sup>30</sup> Aentsti tujintiamuncha Jesus túramu ti untsurí jü papiñium áarchamu áiniawai. Tura ni unuiniamurí mash wáinkiarmai.

<sup>31</sup> Antsu Jesuska Kristu asa Yusa Uchirínti tu enentáimtustarum tusan júnaka áarmajai. Tura enentáimtakmin Jesus ni iwiaakmarín yamarma nuna amastatui.

## 21

*Entsá yantamnum Jesus siati (7) unuiniamurín wantintiukmiania nu*

<sup>1</sup> Tipirias antumianka káanmatkarín Jesus ni unuiniamurín wantintiukmiayi. Júnisan ámiayi.

<sup>2</sup> Semuñ Pítrusha Jímiampramu Tumassha Kananmaya Natanaérsha Sepetéu uchirísha tura chíkich jímíar unuiniamurísha métek iruntrar pujuarmiayi.

<sup>3</sup> Semuñ Pítrusha “Namakan nekajai nankiattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi.

<sup>4</sup> Káshik ajn Jesus entsá káanmatkarín wantinkiamiayi tura ni unuiniamurísha Jesusan nekaacharmiayi.

<sup>5</sup> Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

<sup>6</sup> Tutai Jesus tímiayi “Neka untsuurnumaanj ajunkatarum. Nuj achiktatrome.”

Nii timia núnisan túrawar namakan ti achikiar nekan júsatniun tujinkiarmai.

<sup>7</sup> Nújainkia Jesusa unuiniamurí Jesus ti aneemia nu Pítrun tímiayi “Ii Úntrínti.” Takui Pítrusha áimiaku asa ni pushirín entsar entsá inianmiayi yukuak jeataj tusa.

<sup>8</sup> Chíkich unuiniamurísha jeachat pujuiniachuk nekan japiki kanujai káanmatkanam jeawarmiayi.

<sup>9</sup> Káanmatkanam jeawar ji kajir ámanum namakan jámun wáinkiarmai. Tantanha wáinkiarmai.

<sup>10</sup> Jesussha “Átum achikiurmena nuyá játin itiatarum” tímiayi.

<sup>11</sup> Tutai Semuñ Pítiur kanunam we nekan nekartiuk káanmatak japiki itiamiayi. Itiar namaknasha sianču senkuenta nuyá tres (153) nekapmararmiayi. Ti untsurí áyat nekasha jáankachmai.

<sup>12</sup> Nuyá Jesussha “Yurumáitiarum” tímiayi. Ni unuiniamurísha “aya ii Untrí áminiaiti” tusar inintrustinian natsantiarmiayi.



13 Nuyá Jesus wajakí tantan jukí súarmiayi. Núnisan̄ namak-nasha súarmiayi.

14 Jesus jakamunmayā nantaki jujaī menaintiu ni unuiniamur̄in wantintiukarmiayi.

*Jesus Semun̄ Pítrujaī chichasmiania nu*

15 Nuyá yurumáwar Jesus Semun̄ Pítrun aniasmiayi “Junasa uchirí Semun̄ka, ¿jū shuar nan̄kaamas anentmek?”

Pítrusha tímiayi “Ee, Uunta, wi wakerajam nu Ame nékame.”

Jesusha “Nuiñkia winia murikiur ayuratniua áintsam Winia enentáimturainia nu yaiñtá” tímiayi.

16 Ataksha aniasmiayi “Junasa uchirí Semun̄ka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiayi.

Jesusha “Winia murikiur wáinkiatá” tímiayi.

17 Nú ataksha aniasmiayi “Junasa uchirí Semun̄ka, ¿winia wakerutamek?”

Pítrusha menaintiu iníam kúntuts enentáimiar tímiayi “Uunta, ashí nékame. Wi wakerajam nu Ame nékame.”

Jesusha tímiayi “Winia murikiur ayurata.

18 Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakmin chíkich aentstamp Prattawai tura ame wétin nakitiam nū juramkiartatui.”

19 Jesus nújain̄kia Pítiur máatniun ujakmiayi. Tura núnisan̄ jakamtai shuar Yúsan shiir awajsatniun ujakmiayi. Nuyá Pítrun “Nemartusta” tímiayi.

*Juan̄ túrunatniun Pítiur Jesusan aniasmiania nu*

20 Pítrusha ayanmar chíkich unuiniamur̄in Jesus ti anea nuna némarun wáinkiamiayi. Kame nu unuiniamuka nuik Jesus jáatsain̄ yurumáiniakui “Uunta, ¿ya surutmaktata?” timia núiti.

21 Nincha Pítiur wáiniak Jesusan aniasmiayi “Uunta, ¿jusha warí urukatniuit?”

22 Jesusha ayak̄ “Wi wakeraknaka iwiaaku pujain̄ tátatjai tíminiaitjai. Nuna tákuisha ¿warí itiurtama? Ámeka nemartusta” tímiayi.

23 Nújain̄kia “Nu unuiniamurí jákashtatui’ tusa Yushuarnum áujmatiamiayi. Túrasha Jesus “jákashtatui’ tíchiamiayi antsu áyatik “Wi wakeraknaka iwiaaku pujain̄ tátatjai takuisha ¿warí itiurtama?” tímiayi.

24 Wikia nú unuiniamur̄intjai. Jū papincha aaru asan “mash nekasaiti’ tajai. Ashí shuarsha núnisarañ tuñiawai.

25 Nu arantcha jūi áarchamusha ti awai. Kame ashí áamka ti untsurí papí asa ashí nuñkanam ikiuschamnia ainti. Nuke atí.

## Jesusa Akatramurí Yusa Wakaníjiaí

### TÚRAMU

*Yusa Wakanín nákasarmiania nu*

<sup>1</sup> Amikiur Tiúpiru:

Nuik akupkamaíj nú papinium ashí Jesus túramia nuna áatramiajme. Tura unúitiampramaíj nunasha áatramiajme. Yámankamtaiknumia,

<sup>2</sup> nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmaríjiaí túratniua nuna ni akatramurín jintintiawarmiayi.

<sup>3</sup> Tura jaka nantaki, Jesus tímiajajik wantintiukmiayi ni akatramurín. Tura kuarenta (40) tsawant nin wantintiukarmiayi. Nuna tura nekas iwiaakjai tusa iniakmasmiayi, nekaawarat tusa. Tura Yusa akupeamurí urukukit nuna mash ujakmiayi.

<sup>4</sup> Jesuska ni akatramuríjiaí tuke pujus, nin chicharuk “Jerusarénumia wéerap, tímiayi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiayi.

<sup>5</sup> Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentáimiantin áintsankete” tímiayi.

*Jesus nayaimpiniam wakamiania nu*

<sup>6</sup> Tura Jesusjai irunar matsamas anintriarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmiayi.

<sup>7</sup> Jesus áimiuk tímiayi “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmaríjiaín túrattawai.

<sup>8</sup> Tura atumsha Yusa Wakaní kakarmarín sunastatrome. Nii taa enkemprutmamtaí kakaram ajasrum, Wíi túramu etserkattarme. Emka jui Jerusaréñ péprunam etserkattarme. Nuyá ashí Jutía núñkanam, tura arant Samaria nuñkanmasha, tura nú arant ashí núñkanam werum, Wíi túramu etserkattarme” tímiayi Jesus.

<sup>9</sup> Nuyá chichas amir, ashí ni akatramurí ii wajainiaí, Jesus nayaimpinmaani junakmiayi. Wéa-wéakui yurankim mash Nin amuámiayi. Tuma asantai ni akatramurí Nin wáinkicharmiayi.

10 Tura Jesus waakkui ni akatramurisha yakí ii wajainiaj, jimiara áishman puju entsaru nuj wantintiukarmiayi. Tura ayamach wajattsarmiayi.

11 Nu áishmansha Jesusa akatramurin tiarmiayi “Kariréanmaya áishmanka, zurukantai nayaimpinmaani imiá ímprum? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

*Matíasan anaikiarmiania nu*

12 Tuasua amikmatai Jesusa akatramurj Uriwiu náinniumia akaikiar Jerusarennum waketkiarmiayi. Uriwiu naincha Jerusarennumsha tíjjuchiiti, chikichik kirumitrua núnisan.

13 Tura Jerusarennum jeawarmiayi. Nu jeawar, jea wayawar yakí wakararmiayi. Nu Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachí Jútassha, tímian wayawarmiayi.

14 Jusha mash tuke iruniarmiayi Jesusa yachijjai. Tura Jesusa nukurí Marijiai, nuyá chikich nuwajajisha tuke iruniarmiayi, Yus áujstatai tusar.

15 Nu siántu painti (120) aents iruntrarmia nuj Pítur chichastaj tusa wajakmiayi.

16 Pítur juna tímiayi “Yatsurtírmesha, umarutírmesha antuktatum. Yuska yaunchu ni Papirijn Jutasnan áamtikramiayi. Jutas akiintsain Tawitkia, Yusa Wakanj jintintiam Jutasnan áarmiayi. Jesusan achik surukarmia nú shuaran nekaprumia núiti. Kame Tawitia áarmari Yus-Chicham asa tímianak uminkiatniuyi.

17 Nú Jutaska ii írutramuitiat, ii takaamurj páchitkiaitiat,

18 tunáa tura nujai kuítian achik nunkan sumakmiayi. Tura piniakum iniaan tantane páttimiayi.

19 Tuma asamtai ashí Jerusarennum pujuarmia nu, nuna nekaawar nú nunkan “Numpa Nunka” anaikiarmiayi.

20 Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmanka penké pujuschartí.” Tura

“Ni takatrj chikich atankiti.”

Tu aarmaiti’ tímiayi.

21 “Tuma asamtai yamaikia chikich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijjai pujumia nuj tuke Nin nemarsamia nu atí.

22 Juan Jesusan imiaimiania nú tsawantnumia jukí, Jesus nayaimpiniam wémiania nú tsawantan tímianu ejé tuke Nijjai wekaimia nu atí. Nu shuar enentámtusar, chikichik achiktaí. Iisha iruntrar Jesusa nantakmiarij etserkamí tusar túramí” tímiayi Pítur.

23 Tura nuyá jimiará shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naari Parsapas, tura apach náarin̄kia Justu, nunasha anaikiarmiayi.

24-25 Tura nuyá Yus-shuar Yúsan áujainiak juna tiarmiayi “Ti Uuntri, Amesha ashí shuara enentái nekame. Jui awai jimiará áishman. Jútas tunáa túrak jákatniunam wéak akatramu takatan ikiukmiayi. Yamaikia Jútas takatri achikiat tusam, ¿tuá achikium, Uunta? Paant iniakmasta.” Tu aujsarmiayi.

26 Tura Israer-shuara túrutairi núnisan, wats yaki nupet-makat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

## 2

### *Yusa Wakaní taramiania nu*

1 Pintikiustís náartin jísat jeamtai, chikichík jeanman nuin Yus-shuar tuakarmiayi.

2 Tumai aya aneachma nayaimpinmaya nasea áintsan téter ajaki winian antukarmiayi. Ashí mash jeá pujuarmia nuka antukarmiayi.

3 Tura nu pujuiniaj ji waja kea áaniun wáinkarmiayi. Túruna ankant ankant puunak tarurarmiayi.

4 Tuma asamtai Yusa Wakaní ashí ni enentáin pimiutkarmiayi. Túram chichasarat tusa Yusa Wakaní ni nekatairi súsarmiayi. Tuma asamtai nujaj niisha chíkich chichaman chichasarmiayi.

5 Nui Jerusarénum Yus táman umirin Israer-aents ármiai. Ashí nunkanmaya Jerusarénum taar matsamarmiayi.

6 Tura túrunamia nuna antukar káunkarmiayi. Tura ashí shuar ni chichamejain chichaamun antukarmiayi. Tuma ásar, warinkit, tu enentáimsarmiayi.

7 Nekaachar ashamkarmiayi. “Warinkit, tunaim ajarmiayi. Ju aents chíkich chíkich chichaman chichainia nu, ashí Kariréanmayanchukait, tiarmiayi.

8 Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiayi.

9 Jui ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha,

10 Príjianmayasha, Pampirianmayasha, Ejiptunmaya tura Áprikanmaya Serinia nú nankaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar jui matsatainiawai. Chikichcha take Israer-shuar áiniawai. Tura chikichcha Israer-shuar ajastaj tusa Israer túrutairin mash túruiniawai.

11 Kritianmayasha Arapianmaya pujuiniaji. Tura ashí mash ii chichamejaisha Yusa péñker túramurí ántaji” tiarmiayi.

12 Ashí aents nuna nékachu ásar ashankarmiayi. Tura nuámtak aniniaisarmiayi “¿Warinminiait ju?”

13 Tura chikichcha wishikiarmiayi. “Nampeku ániatsuash” tiarmiayi.

*Pítur ujakmia nu*

14 Nuñkia Pítur, chíkich áuntse Jesusa akatramurijjai wajaki, kakantar chichasmiayi. Chichaak tímiayi “Jutíanmaya shuartiram, Jerusaréñnumiatirmesha antuktarum. Wi títiatjana nu antukrum péñker enentáimpratarum.

15 Ju áishman, nampekarai, tárumba nu, nampekcharai. Warí, nantu imiá ishichik takuni. ¿Aisha itiuurak?

16 Antsu Yúsnan etserin, ni naari Juér, yaunchu áarmia nu, yamá túrunayi, tímiayi.

17 Juna áarmiaiyi: “Yus tawai “Jú nuñka amuukatin jeatemantai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmatartatui. Tura nátsaka íimiarartatui. Tura uuntka mesekrariartatui.

18 Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmatartatui.

19 Yaki nayaimpiniam, aents túrachminian iniakmastatjai. Tura nuñkanmasha winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai.

20 Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui.

21 Nuñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiaiyi’ tímiayi Pítur.

22 Tuke chichaak: ‘Israernumia shuartiram, wi títiatjana nu antuktarum. Nasarénumia Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakarmiayi. Tura Jesusjai aentsti túrachminian Yuska túramiaiyi, átum íimmianum. Nuka ti paant nékarme, tímiayi.

23 Tura Jesus surunkamia nuna Yuska yaunchu, túruntsain, paant nekaamiayi. Túrasha Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme.

24 Túramunak Yus Jesusan jákatniun nupetmamtik iniantkimiayi, tuke jákachmin asamtai.

25 Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamu áhattajai.

26 Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

27 Winia wakaniur, Yusru, jákatniunam ikiurtuschattame. Wi ame Uchirmetjai, Tunaaríncha. Túmaitkui anentu asam ayashur káurtin tsankatrukchattame.

28 Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

29 Pítiur tuke chichaak: 'Páantchakait. Ii uuntri Tawit yaunchu jákai. Tura iwiarsamuiti. Ni iwiarsamuri ini pujatsuk.

30 Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi.

31 Neka asa, túruntsain Tawit, wainkia nútiksā, Kristu nantaktintriñ áarmiayi. Kristu túrunatniuriñ chicharuk tímiayi "ni wakaníncha jákatniunam ikiukchatniuyi. Ayashíncha káurtinian tsankatkashtiniuyi."

32 Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji.

33 Yuska, Jesus nankaamantuiti tusa ni untsuuriñi apujsaiti. Tura ni Wakanín Jesusan súsaiti, Nii yaunchu tímia nútiksā. Tuma asamtai jusha átum antukurmena nuna, tura ísurmena nunasha Yus suramsaiti.

34 Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úuntrun tímiayi "akupin pujutainium, winia untsuuriñi pujustá.

35 Ame nemasrumin nupetkattajai. Nu túruntsain jui pujustá' tímiayi."

Nuní áarmaiti Jesusnan, tímiayi.

36 Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwemtikkiartin Krístuiti. Ashí áentstíram nu pénker nekaatarum” tímiayi Pítiur.

37 Nuna antukar wake mesekarmiayi. Tura Pitruncha chíkich akatramuncha aniasarmiayi “Yatsuru, ¿nuiñkia itiurkatjik?” tiarmiayi.

38 Tutai Pítrusha chichaak “Atumí tunaarj ikiuktiaj tusarum Yus nekas enentáimtustarum. Tura ashí shuurtiram Jesukrístu naarj pachisrum imiantiarum. Nuiñkia atumí tunaarj Yus tsan\_kurtamprattarme. Túrunawakrumin Yuska ni Wakanin suramsattarme, tímiayi.

39 Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai” tímiayi.

40 Nú chichamjai tura nuyasha Pítiur tuke jintintiuk tímiayi “Yajauch shuara asutiátniurj átatna nuyá uwempratarum” tímiayi.

41 Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi.

42 Ashí nu shuar Jesusa akatramurj jintintiarmia nuna tímiatrusan antukarmiayi. Tura irunar shiir enentáimtunaisar yurumin ármiai. Túrawar, Kristu enentáimtustin namperin najanin ármiai. Túrawar Yúsan áujiarmiayi.

### *Yus-shuar pampararmiania nu*

43 Tura Yuska aentsti túrachminian Jesusa akatramurijjai túramiai ni kakarmarj iniakmastaj tusa. Tuma asamtai ashí aents nuna wáinkiar ashamkarmiayi.

44 Yúsan umirkaruka ashí métekrak pujuarmiayi. Tura ashí niiniu armia nuna sunaisarmiayi.

45 Ni nunken surukar, ni takakmarincha surukar, atsumainia nuna súarmiayi.

46 Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin ármiai. Tura nankaamantu enentáimtumatsuk, yurumkan ajamnainiarmiayi.

47 Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwemtikiar Yus-shuar írunmanum íkiaun\_ki wémiayi.

## 3

### *Wekaicha wekasamiania nu*

1 Chíkich tsawantaj, nantu nunkaach ajasmatai, Pítiur Juanjaj, Yusa Uunt Jeen Yus áujstatai tusar wearmiyai, Israershuar tuke turin armia nútiksaran.

2 Tura áishman, ni akiiniamuriniá wekaicha amia nu, nuí aa wáitiniam tuke tsawant pujumiayi. Nu áishmannasha ni shuari entsakí júkiar nú wáitiniam apujin ármiai, nuí shuar wayan kuítian seat tusar. Nú wáitisha, Shiir Waiti, tutajyayi.

3 Tura nú shutuapsha Pitrun Juanjaj wayan wáinkiamiayi. Wáiniak kuítian seamiayi.

4 Tura Pítiur Juanjaj apajas ísarmiai. Tura nú áishmannasha chicharuk “Íirsata” tímiayi.

5 Aishmansha, surustatuapi, tu enentáimias, ímsamiayi.

6 Nuyá Pítiur chichaak “Kuítrusha atsawai, tímiayi. Kurisha atsawai. Antsu kuitjaj nankaamas takakjana nuna amastajaj. Wats, Nasarénumiá Jesukrístu kakarmaríjjaj wajakim wekasata” tímiayi.

7 Tinia iniais, Pítiur ni untsuuriní achik awajkimiai. Túram ni nawesha, wanusesha kakaram ajasmiai.

8 Tura niisha wajakí nantent ajakmiayi. Nuyasha wekasamiayi. Tura Pítrujajsha Juánjajsha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi.

9 Ashí aents pujuarmia nu, nin wekaan wáinkiarimiayi. Tura ni chichamen anturkarmiayi.

10 Tura chichainiak “Nuik Yusa Uunt Jeen wáitirin, Shiir Waiti tutainium, nu áishman tuke pujuuya núchakait” tiarmiayi. Tura ni túrunamurin nekaawar, ti ashamkar nusháa enentáimsarmiayi.

### *Pítiur ujakmiania nu*

11 Shutuapka péñker ajasu asa Pítrujaj Juánjajsha penké tsurachmiayi. Tura aents nuí pujuarmia nu, warinkit tusar, jeáshkirí tsékenki wearmiyai. Nuka Sarumúnna tiniu ármiai.

12 Aents káunkarun Pítiur wáiniak, chicharuk “Israershuartiram, ¿urukamtai winiasha imiá írum? tiarmiayi. ¿Iisha péñker asarik<sup>i</sup> tsuarmaj<sup>i</sup>? ¿Ii kakarmaríjjainkik<sup>i</sup> ewekamsamaj<sup>i</sup>?”

13 Atsá. Antsu Yuska ni Uchirin Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajaj. Átumka Jesus nakitrarum kapitián Piratú surukmarme. Tura Piratu akupkataj tau atumsha suritkiamarme.

14 Jesus péñker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme.



15 Túrurum iwiaaku átinian Amaana nu maamarme. Tuma aih̄ Yuska Nin jakamunmaya iniantkimiayi. Nuka iisha neka asar étsereaji.

16 Tura jū aishman̄ jūi wajaana jū tura nékarmena jū, Yusa Uchir̄i naarī enentáimta asa kakaram ajasuiti. Jesus enentáimtusú asa nekas péñker ajasuiti. Nusha wáinniu asarum nékarme' tímiayi.

17 'Wats, yatsurtiram, wi nékajai. Atumsha atumí úntrijjaī Jesusan túramarmena nu nékatsuk túramarme.

18 Tura nu túramurmijjaī Yus yaunchu tímia nu tímianak umikiurme. Ni Krístur̄i wáitsatniuya nuna Yuska ashí ni etserniur̄in áamtikramiayi.

19-20 Wats, yamaikia tunaaruminiã kanaktiarum. Túrurum Yúsnumaanī ayantártarum, tunaarun asakárat tusarum. Túrunawakrumniñkia, atumin uwentikramprarat tusa Yus yaunchu anaikiamia nuna akupturmaktatrome. Nusha Jesukristuiti. Tura Nijjaī enentáimin ayampratin átatui.

21 Tura yamaikia Jesukristu nayaimpiniam pujustiniaiti, ashí iwiarnatsaiñ. Yuska ukunam ataksha nuñkan shiir awajsattawai. Nuna ni etserniur̄in tsáapin enentái takaku armia nuna yaunchu áamtikramiayi.

22 Tuma asa Muisais ii apar̄in tímiayi:

“Atumi Uunt Yusr̄i ukunam etserniun akupturmaktatrome, winia akuptukmia núnisañ. Nuámtaktirminiã achik akupturmaktatrome. Tura nii títiatna nu umirkatarum” tímiayi.

23 Nánkamas aents nu etserniun chichamen umíachkuñka emesnartatui. Tura Israer-shuarum páchitkia áchattawai. Núnisañ áarmiayi Muisaissha' tímiayi.

24 Pítiur tuke chichaak 'imiata, Yúsnan etserin Samuer jū tsawantin túratniur̄i etserkamiayi. Nuyá ashí Yúsnan etserniusha tuke nuna etseriarmiayi.

25 Etseriarmia nuka atumin túramprume. Tuma asa átum péñker pujustinian Yuska ii uuntrī Aprááman jū chichaman susamiayi. “Nekas tájame, ame shuarum akiiniattana nujai ashí áentsnasha shiir awajsattajai' tímiayi. Tura ii úntr̄in tímia núnaka incha túramji, tímiayi.

26 Imiata, Yus ni Uchir̄in iniantkimia nūj, atumin emka akupturmakmiarme. Atumsha, atumí tunaar̄iya kanaktiarum tusa, tura atumin shiir awajtamsatniun wakerak túramiayi.” Nunak tímiayi Pítiur.

## 4

*Pitruncha Juáñnasha kajerkarmiania nu*

1-2 Pítrusha Juanjaj Yusa chichamen áentsun jintintiainiak pujuarmiayi. Jesus nantakin asamtai aencha nantaktin áiniawai, tiarmiayi. Tura chichaak pujuiniaj Israer-patri táarmiayi. Tura Yusa Uunt Jeen wainniu úuntriŝha Satuséu aentcha táarmiayi. Taar Pitruncha Juánnasha kajerkarmiayi, niisha Jesusa nantakmiarj chichaman jintintinia asamtai.

3 Yamaikia kġawai, kashin iismí tusar achik sepunam enġkea iniaisarmiayi.

4 Tura Pitrun nuik anturkarmia nú aents untsurj Yus-shuar ajasarmiayi. Nuik Yus-shuaraim tura yamaiyaim iruram ti untsurj ajasarmiayi. Aya áishmanġkak, senġku mir (5000) aents áarmiayi.

5 Kashin tsawarmatai Israer-shuara akupniurj, ni úuntriŝha, tura ni jintinniurjsha Jerusarénum iruntrarmiayi.

6 Nuġsha Anassha, Israer-patri uuntri anaikiamu amia nu, tura Kaipiassha, Juansha, Arejantrusha, tura Israer-patri kapitiántri shuarjsha tímian iruntrarmiayi.

7 Iruntrar Pitruncha Juánnasha utitiarum tusar akupkarmiayi. Tura itiarmatai, ajapén awajsarmiayi. Tura aniasarmiayi “Kame ġyana kakarmarjġġaj, yana chichameġaj túrarum?” tiarmiayi.

8 Tutai nuyá Pítiur, ni enentáin Yusa Wakanj pimiutkamu asa tímiayi “Akupniutiram, tura úuntirmesha antuktarum.

9 Ju áishman nuik shutuap amia nu péñker ajasmari anintrarme. Kame itiurak péñker ajasuit tátsurmek.

10 Urukamtia úuktataj. Anintrakrumin iisha paant títiatji, Israernumiġ shuar ashí nekaawarat tusar. Ju áishman Jesukrístu kakarmarjġġaj péñker ajasuiti. Nasarétnumiġ Jesukrístun, átum máamurmena nuna, tura Yus jakamunmaya iniantkimiania nuna tajai, tímiayi.

11 Nú Jesuska kayaa áintsanġkete. Atumsha jeamniutiram, nú kaya yajauchiiti, tímiarme Jesusna. Túrasha túramaitiatan Niisha jeanam emka apujsamua núnisan ajasuiti, tímiayi.

12 Tura chíkichġaj uwempratin penġké atsawai. Ju nunġkanam ii chikicha naarj pachisar uwempratin atsaji. Jesuskete ii uwentikrampratniun Yus suramsamġaj nu” tímiayi Pítiur.

13 Pítrusha Juansha nánġkamas shuara áintsan áarmiayi. Núkap unuimiarcharu áarmiayi. Tura unuimiarġhaitiat, arantutsuk etseriarmiayi. Aentsu uuntri núnaka nekaawar “Nékachuitiat, itiura sapijmiatskesha chichainia” tiarmiayi. Tura, juŝha Jesusa nemarkin ármia núiti tiar nekaawarmiayi.

14 Nuyasha áishman péñker ajasmia nu niġġaj nuġ wajamiayi. Tuma asamtai, niisha aj wajaku, Israer-shuara úuntriñkia, péñker ajasġhaiti títai tukamá tujinkiararmiayi.

15 Tuma ásar, iik nuamtak áujmatsatai tusar, Pítrusha Juansha shutuapsha aa awemartai, tiarmiayi.

16 Tura áujmatainiak tiarmiayi “Ju Pítrusha ju Juansha itiurkatjik. Ju uunt túrunamun Jerusarénum matsatainia nu ashí nékainiatsuk. Wáitaiiti titin tujintiaji, tiarmiayi.

17 Tura, ashí aents nekaawarain tusar yamaik jiaktai. “Ju Jesusa naari pachisrum penké jintintiawarairap,” titiai” tiarmiayi.

18 Tura árusan Pitruncha Juánasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiairap” tiarmiayi.

19 Tutai Pítiur Juanjai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji? tiarmiayi.

20 Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

21-22 Shutuáp penker ajasmia nu kuarenta (40) uwi nankaamas takakuyayi. Ni penker ajasmarin aents nekaawar, “juka aentsti túrachminiaitji” tusar Yusa naarin uunt awajsarmiayi. Tuma asamtai aentsu uuntri Pitruncha, Juannasha asutiátai tukamá aentsun ashamainiak áyatik chicharkar iniaisarmiayi.

### *Yus-shuar Yusa kakarmarin seawarmiania nu*

23 Pítiur Juanjai ankant ajasar ni írutramuriin waketkiarmiayi. Tura jeawar Israer-patri uuntri tura aentsu úuntri sha nin tiarmia nuna mash etserkarmiayi.

24 Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nunkasha najanaitme. Nayaantsasha tura juí írunna nusha najanamiamie, tiarmiayi.

25 Tura Tawit ámin umirtamin amia nu ju áantikramiamie: “¿Urukamtai ashí nunkanmayá aents charaatum ajainia? ¿Tura Israer-shuarsha urukamtai ántar chichaman enentáimiainia?

26 Uunt kapitían ármia nuka chichaman jurusarmiayi Uunt Yúsan.

Tura pepru úuntri sha iruntrar Uunt Yúsan kajerarmiayi. Ni anaikiamurin Krístun nútiksán kajerarmiayi.”

27 Tu áarmaiti, Uunta, tura nekasaiti. Erutis apachi kapitíantri Punsu Piratujai jú péprunam iruntrararmiayi. Niisha yajaya shuarjai tura Israernumia shuaraim nuim iruntrararmiayi. Ame Uchirmin Jesusan tunaarinchán kajerarmiayi. Jesuska Ame anaikiamiamie, winia takatrun túrat tusam.

28 Tura ame enentáimjaj*̄* iwiaramamna nu uminkiatniuiti. Tura apachcha Jesusan kajerainia ásar, Ame iwiaramamna tímianak umikiarmiayi.

29 Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta.

30 Tura ame kakarmarmijjaj*̄* jaasha tsuártin amasta. Ame Uchiram Jesus tunaaríncha nujaj*̄* ii aentsti túrachmin túratniusha amasta. Aents Yusa kakarmarín nekaawarat tusam túrata” tiarmiayi.

31 Tura Yúsan tú áujas umikmatai nuin irunar pujuiniain úurkamiayi. Túrunamtai ashí shuara enentáin Yusa Wakaní pimiutkarmiayi. Túmaitkiui ashamtsuk Yusa chichamen etserkarmiayi.

### *Wíniakete, tícharmiania nu*

32 Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, jusha ashí iiniu ainiawai, tiarmiayi.

33 Tura Jesusa akatramurísha, Yus ti yayamu ásar, Yusa kakarmaríjjaj*̄* Uunt Jesusa nantakmiarín tuke etseras pujuarmiayi.

34 Tura ashí Yus-shuarka nunkan takakusha jean takaku armia nusha, núnaka surukar kuítian itiariarmiayi.

35 Tura itiaar Jesusa akatramurín súarmiayi. Akatramusha susam, niisha atsumainia nuna súarmiayi. Tuma asamtai shuar atsumaka penké atsuarmiayi.

36 Chikichík shuar, ni naarí Jusé, nunkan takakuyayi. Jesusa akatramurísha Jusén chíkich náarín apujtusarmiayi, Pirnapín. Nu náarísha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamurí núnkenka Chípriiyayi.

37 Niisha ni nunken surukmiayi. Tura nu kuítian itiá Jesusa akatramurín súarmiayi.

## 5

### *Ananíasa tunaari*

1 Tura chíkich áishman, ni naarí Ananías, ni nuwe Sapirjaj*̄* ni nunken surukarmiayi.

2 Niisha nunkan suruk kuítian emeenak akanak jukí Jesusa akatramurín werí takamtsukea nútikias susamiayi. Ni nuweshá, Sapir, nuna túran nekaamiayi.

3 Túramtai Pítiur chichaak “Ananíasa, ¿urukamtai uunt iwianch enentáimin enkemturmatai, Yusa Wakanín anañkataj tusam nunka surukam kuit achikumna nu akankam ikiurmasam? tímiayi.

4 Entá, nuinka nunka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpram? Amesha aya áentsnum wáitruachume. Antsu Yus-numsha wáitruame” tímiayi Pítur.

5 Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiaiy.

6 Nú turunamtai áishman tariar Ananías jakan penuararmiayi. Túrawar iwiarsatai tusar júkiarmiayi.

7 Tura Ananíasa nuwe arur, menaintiú ura nankaamasaji támiayi. Túrasha ni áishri jakanka nekaachmiayi.

8 Támatai Pítur nuwan tímiayi “Turuttia. Átum nunka surukurmena nuj, ¿kuit itiarumna núnikik surukuram?” tímiayi. Tutai nuwan tímiayi “Ee, núnik surukj.”

9 Tutai Pítur tímiayi “¿Urukamtai atumsha Uunt Yusa Wakani nekapkamsatai tusarum imiá enentaímprarum? Pai, iisiá. Ame áishrumin iwiarsatai tusar júkiaria nu wininiawai. Tura yamaikia amincha juramkiartatui” tímiayi.

10 Tutai nu chichamaik niisha imia Pitru wajamunam jaka iniaantmiayi. Aishman wayaj tukamá jaka tepan wáinkiarmaiy. Túramtai júkiar ni áishrinin ayamach iwiarsarmiayi.

11 Tura ashí Yus-shuar armia nu tura ashí aencha nuna antukarmia nu ti ashamkarmiaiy.

### *Yusa kakarmariiai túrawarmiana nu*

12-14 Tura ashí Yus-shuar Yusa Uunt Jen shikirin irunin ármiayi. Nu shikirisha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiayatan, ti pénker áiniawai, tu wearmiayi. Tura Yus-shuar Yusa kakarmarin iniakmasarmiayi. Túra asamtai imiá untsuri aents Yus-shuar ajasarmiayi.

15 Tura chíkich aents ni shuari jainia nuna jintiá amantikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítur nankaamak ni wakaninsha enkemprutmawainti tusar nu shuar túrawarmiayi.

16 Núnisan arantiá shuarsha ti untsuri ni shuari jáinian tura iwianchrukuncha nuj Jerusarenum itiarmaiy. Tura ashí nuj táaruka tsuámararmiayi.

17 Israer-patri uuntri, tura Satuséu aencha niijai pujuarmia nu suiir iiniak

18 Jesusa akatramurin achikiar enkeawarmiayi.

19 Túrasha kashi Uunt Yusa suntari nayaimpinmayan tara sepú wáitirin uraimiaiy. Tura Jesusa akatramurin aa júkiarmiayi.

20 Tura tímiayi “Wetarum. Tura Yusa Uunt Jeen wajasrum Yusjaj tuke iwiaaku átinia nu etserkatarum” tímiayi.

21 Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiaj Israer-patri uuntri, tura niijiaj pujuarmia nusha iruntrarmiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramurj sepunmaya itatarum tusar.

22 Tura suntarsha sepunam jeariar Jesusa akatramurj wáinkiacharmiayi. Atsawai tukam táarmiayi.

23 Taar chichainiak “Sepú waiti asakamua tímianisañ aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayajj tukamar atsá wáinkiaji” tiarmiayi.

24 Israer-patri uuntri, tura Yusa Uunt Jeen wainniu úuntrisha, nu chichaman antukar, “tsej ausha ¿urutiak nunasha iniaisarar?” tiarmiayi.

25 Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

26 Túrunamtai Yusa Uunt Jeen wainniu uuntri ni suntarijjiaj wear achik itiararmiayi. Túrasha penké aents kayajaj tukumarajj tusar, yajauch awajtsuk itiararmiayi.

27 Tura achik itiaar Israer-shuar naamka pujamunam naka awajsarmiayi.

28 Tura Israer-patri uuntri tímiayi “Iisha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátсурmek. Nusha in makuutai tusarum tárume” tiarmiayi.

29 Nuyá tutai Pítiur chíkich Jesusa akatramurijjiaj chichainiak “Iikia aentsjainkia iniankasar Yus emka umirkatniuitji, tiarmiayi.

30 Jesus atumek krúsnum máamurmena nuna ii iwiaaku Yusri Nin iniantkimiayi.

31 Yus ni kakarmarijjiaj Nin nankaamantu awajsamiayi. Tura nekas Akupniuiti tusa ni untsuurinj apujsamiai. Tura áentsun Uwemtikniuiti. Israer-shuar enentái yapajiáwar tunaariniá uwemprarat tusa Yus túraiti.

32 Nu tuma asamtai iisha nu nekar étsereaji. Tura Yusa Wakanisha nuna étsereawai. Túrasha aya Yusa umirkarua nunak ni Wakanin súsaruiti” tímiayi Pítiur.

33 Tutai nuna antukar ti kajerkarmiayi. Túrawar, maatai tusar wakermiayi.

34 Tura nuĭ Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajaki tímiayi “Ju áishman̄ aā ishichik wajasarti” tímiayi.

35 Nuyásha irunar matsarmia nuna chicharuk “Israer shuartiram, ju áishman̄ tú túratai tu enentáimsarumna nu aneartarum.

36 Enentáimsatarum. Nuik áishman̄ Tiútas wantinkiachmakia. Niisha kapitániitjai takui, kuaru siántu (400) shuar nemarkarmiayi. Tura ukunam nin maawarmatai, ni némarkamurisha pisararmiayi. Túrunawar nuní amuukamiayi.

37 Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksān ti untsurĭ nemarkarmiayi. Túman máawarmiayi. Nu túrunamtai nútiksān ni némarkamurisha pisararmiayi.

38 Jes, tuma asamtai nu áishman̄ aā wajainia nu iniaisatarum. Auka pachisairap. Au tumainia nu aya áentsnaketkuĩkia amuukattawai.

39 Tura antsu Yúsnaikuiĩkia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjai máanikchattarmeash” tímiayi Kamarír.

40 Tú tutai tímianak umikiarmiayi. Túrusha Jesusa akatramurĭn untsukar asutiáwarmiayi. Tura chicharuk “Jesusa naari pachisrum penké ishichikisha etserkairap” tiarmiayi. Tú tiar akupkarmiayi.

41 Jesusa akatramurisha Israer-shuara uuntri pujamunmaya jíinkiarmiayi. Tura wáitsamniaitrome tusa Yuska Jesusa naari pachia asakrin ii natsantin wáitsatniun tsānkatramkaitji tusar ti shiir enentáimsar wearmiayi.

42 Tura Jesukrístunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

## 6

### *Yus-shuaran yainian siati anaikiarmiania nu*

1 Nú tsawantin Yusan umirkaru ti kawenkar ármiai. Tura tuke tsawant yurumak súsatin ámiayi. Túmakui Yus-shuar Kriaku chichaman chicharmia nu, Israer-shuaran kajermiayi. “Tuke tsawantin yurumak súarmena nuĭ atumí waje ti nukap súarme. Tura íniuka ishichik súarme” tiarmiayi.

2 Túruinia Jesusa tuse akatramurĭ ashí Yus-shuaran irurar tiarmiayi “Iisha Yus-Chicham etserkatin iniaisar yurumak súasachminiaitji.

3 Tuma asamtai yatsurtiram, atumíniá siati áishmaṅ eáktárum yurumkan súsarát tusarum. Péṅker wekainia nu, tura neka shuar, Yusa Wakaṅí pimiutkamú ainia nu achiktarum.

4 Iikia antsu Yus áujkir unuiniakratkir Yusa chichameṅ etserkir wétatṅí” tiarmiayi.

5 Akatramu tiarmia nuna ashí aents enentáimsar pujuarmiayi. Túmainiak Estepaṅkan anaikiarmiayi. Estepaṅsha Yusaṅ tuke enentáimtiniuyayi. Tura Yusa Wakaṅísha pimiutkamuyayi. Chíkich áishmaṅkan anaikiarmiayi, niisha Jiripi, tura nuyá Purukuru, Nikianúrsha, nuyá Temuṅ, Parmenasha, Nikiurássha. Nikiurássha Antiukía nuṅkanmayaitiat Israer-nancha ashí umirniuyayi.

6 Tura nu siati áishmaṅkan Jesusa akatramurṅ itiarmiayi. Táarmatai, akatramusha, Yus áujtusar, anaikiaṅ tusar múuknumsha ni uwejeṅ awantsarmiayi.

7 Túrasha Yusa chichameṅka tuke pampaṅki wémiayi. Nuṅ Jerusaréṅnumsha Yus-shuar ti kawenṅkarmiayi. Tura imia Israer-patrisha untsurṅ Yus-Chichaman umiriarmiayi.

### *Estepaṅkan Israer-shuara uuntriṅin júkiarmiania nu*

8 Estepaṅsha Yusa waitnenkartutairṅ pimiutkamuyayi. Tura Yusa kakarmarṅisha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmarṅ nekaawarat tusa túramiayi.

9 Israer-shuar iruntai jeá, ni naari Anṅkantin, ámiayi. Nuyá áishmaṅsha tura Serini nuṅkanmayá áishmaṅsha, tura chíkich nuṅka Arijiantrianmayásha, Serisianmayásha, Ásianmayásha, tímian Estepaṅjaṅí áujmatsatai tusar káutkarmiayi.

10 Estepaṅ Yusa Wakaṅí nekatairṅijaṅí tímianak chicháa asamtai, nu áishmaṅ Estepaṅjaṅí inṅkunaikiar nupetkataj tukamá tujinkiarmiayi.

11 Tuma asamtai suiir enentáimtuiniak chíkich áentsun Estepaṅkan tsanumprurarát tusar eáṅkarmiayi. Estepaṅ Muisaisnasha Yúsasha yajauch áujmatui, titiarum tusar akikiarmiayi.

12 Peṅké áentsun, tura uunt ainia nunasha, jintintin ármia nujáisha chichaman júsar yajauch enentáimtikrarmiayi. Tura Estepaṅkan jintiá akirtuawar achikiarmiayi. Túrawar Israer-shuar naamka matsamarmia nuṅ júkiarmiayi.

13 Tura wait chichamtinian itiarmiayi. Niisha taar chicharainiak “Yusa Uunt Jeṅ ti péṅker ana nu, tura Yusa akupkamurṅincha ju Estepaṅ tuke yajauch chicharui, tiarmiayi.

14 Nú arantcha ju Estepaṅ tímia nu antukṅji, tiarmiayi. Estepaṅ chichaak “Nasaréṅnumiá Jesuska Yusa Uunt Jeṅ



sáaktiatui, tura nuyá Muisais in ikiurtamkimiaj nunasha yajáttawai” tímiayi. Nusha Estepañ tímia nu antukji” tiarmiayi. Tura nunasha penké ántar tsanumprurarmiayi.

<sup>15</sup> Nuyasha ashí Israer-shuar naamka iruntramunam pujuarmia nu Estepañkan iiyaj tukamá ni yapin nayaimpinmaya suntara yapiya nuní íran wáinkiararmiayi.

## 7

### *Estepañ etserkamiania nu*

<sup>1</sup> Tuma wáiniak Israer-patri uuntri Estepañkan aniasmiayi “¿Ju tuinia nu nekaskait?” tímiayi.

<sup>2</sup> Tutai niisha áimkiamiayi “Winia úuntrutirmesha, yatsurtirmesha anturtuktarum. Ii Waantu Yusri ii úuntrin Apraáman wantintiukmiayi. Apraámka Misiuputámia-Kartea nunkanam pujai, Aran nunkanam wéatsain, nu wantintiukmiayi.

<sup>3</sup> Tura wantintiuk tímiayi “Ame nunkemsha áminiurmesha ikiukim nunka Wi iniaktustatjamena nuj wetá” tímiayi Yus.

<sup>4</sup> Tutai Apraám Misiuputámia-Kartea nunkan ikiuki Aran nunkanam pujustaj tusa wémiayi. Nuyá ni aparj jakamtai “Arant wetá” tímiayi Yus. Nuna taku ju nunkan ii pujajnia ju pujsamiayi.

<sup>5</sup> Túrayat nunkan ishichkisha súsachmiayi ju nunkanam. Antsu “Ukunam amastatajai. Ame jakakmin ame uchirmin susattajai” tímiayi. Tura Apraama uchirj penké atsan nuní tímiayi Yus.

<sup>6</sup> Nuyasha Yus tímiayi “Ame uchirmesha írara núnisarañ chíkich nunkanam pujusartatui. Nuisha emetamu itit awajtai pujuartatui. Kwatru siántu (400) uwí, tímianu uwí wáitsartatui, tímiayi.

<sup>7</sup> Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtursartatui ju nunkanam’ tímiayi.

<sup>8</sup> Yus tuke Apraámnasha chicharuk ‘Yamaikia Wíi-shuar asarum tsupirnaktiniaitrume. Tuma asam amesha uchiram áishmankach akiiniamtai, Wi tímiajna núnismek, sirkunsisiún tutai, shunichirj nuape tsupirkata, tímiayi. Tura chícham Wi yamaikia ámijjai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirj Isak akiiniamtai, uchu tsawant nankaasmatai, Apraám nin tsupirkamiayi. Tura Isaksha ukunam ni tuse (12) uchirin ii uuntri armia nunasha nútiksañ túramiayi.

<sup>9</sup> Tura niisha ni yachin Jusen suiir íyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi.

10 Tuma asa, ashí ni itiuurchatrijiniá uwemtikramiayi. Tura waitnenkartutairincha nekatairincha susamiayi. Tuma asamtai Ejiptunam uunt akupin Paraún Ejiptu nunkaa akupniuri ajasat tura ni jeen wáinniuri ajasat tusa anaikiamiayi.”

11 “Tímiatam tsuka tura itiuurchatcha ámiayi Ejiptu núnkanam. Tura jui Kanaan nunkanmasha núnisan ámiayi. Tuma asamtai ii uuntri yurumkan penké waincharmiayi.

12 Tura Jakup, Ejiptunam yurumak ikusma awai taman antuk ni uchirin akupkarmiayi. Túrasha wekaicha wearmiayi. Wats, ii úntriniun ujaajrume.

13 Tura ii uuntri atak Ejiptunam wéenak Jusesha, wítjai takui ni yachi Jusen nekaawarmiayi. Tura Jusé “Yatsur áiniawai” takui Paraun, antuk “au shuarapitia” tímiayi.

14 Nuyanka Jusé ni yachin chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsarmiamiayi.

15 Nuní tutai Jakupsha ni shuarijjai Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirisha ii uuntri ainia nu, núnisanan nú nunkanman jákarmiayi.

16 Tura atak ukunam ni shuari Sikiam nunkanam ni ukunchin júkiar iwiarsarmiayi. Kame Sikiam nunkanam Apraámka yaunchu játsuk Amura uchiri nunken sumakmiayi. Túramtai nu iwiarsarmiayi’ tímiayi.

17 Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nunkanam Israer-aents pampanki ti kawenkarmiayi.

18 Nu tsawantincha Ejiptunam chíchich akupin naamka ámiayi, tura Jusen nekaachmiayi nii.

19 Nu akupin ii yaunchu úntrin anankawar yajauch awajarmiayi. “Atumí uchiri kuirchich ana nu ajapa ikiuktiarum” tu wémiayi. Pampankarain tusa tímiayi.

20 Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi.

21 Tura nuyá ajapa ikiuktin jeamtai entsá apujsamiayi. Uunt Paraunka nawantri Muisaisan wainiak jukimiayi. Achik, ni uchirinia tímiatrusan júki tsakatmarmiayi.

22 Tuma asa Muisais unuimiátrauyayi ashí Ejiptu aents nékarmia nuna. Túramurisha chichamesha kakarmauyayi.’

23 Estepan tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuari asamtai.

24 Nuyá we Ejiptunmaya áishman ni shuarin máatasa pujurun wáinkiamiyai. Tura Muisais ni shuarin ayamprak Ejiptunmaya áishman kan máamiyai.

25 Wíi turamujai Yuska Israer-aentsun uwentikrattawai, tu nekaamiyai Muisais, Yus timia asamtai. Tura Israer-aencha áintsaran nekainiawai tu enentáimsamiyai. Túrasha niñkia nekaacharmiayi.

26 Kashin tsawar Muisais ni shuari jímíar maani pujuinian wáinkiamiyai. Tura nawamnaikíarat tusa “¿Urukamtai nuamtak yatsumjaisha yajauch awajniarum?” tímiyai.

27 Tutai emka nankaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam?”

28 ¿Winiasha maantuátaj tusam wakeramek, ya Ejiptunmaya áishman máamamna nútiksamkea?” tímiyai.

29 Nuna antuk Muisaiska Matian nunkanam pisar, nú nunkanam kuarenta (40) uwí yajaya áintsan pujumiyai. Nú nunkanam pujus, nuatak, jimíará uchin yajutmarmiayi.’

30 ‘Kuarenta uwí nankaamas, nu atsamu nunkanam Senai náinnium tíjítuch Yusa suntari nayaimpinmaya taa Muisaisan wantintiukmiyai. Numi uchich ukat-ukatin keamunam wantinkiamiyai.

31 Muisais, nuna kean wainiak ashamkamiyai. Tura weantuk iistaj tukamá Uunt Yusa chichamen antukmiyai.

32 Yus tímiyai “Wiitjai Yus. Ame úntrumí Apráama Isaka, Jakupa Yúsríntjai” tímiyai. Tutai antuk Muisaiska ti kuraimiyai sapijin. Tura íistinian tujinmiyai.

33 Nuyá Uunt Yus tímiyai “Úntrun shiir awajsataj tusam, ame sapatrum ukuíñkiam ikiuktia, wajamna nuí Wi pujakui.

34 Nuyá nekaata, tímiyai. Wíi-aents Ejiptunam wáitias pujuinia nuna wáinkiajai. Tura útainia nunasha antukjai. Tuma asamtai uwentikrataj tusan tarajai. Wats, akupkatjame ámin. Ejiptunam waketkitia” Yus tímiyai Muisaisan.’

35 Estepañ tuke étseruk: ‘Ju Muisaisan ni shuari “¿Ya amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anaik uwentikrarat tusa awainki akupkamiyai. Numiniam ni suntari wantintiukmia nuna chichamejai Yuska Muisaisan akupkamiyai, tímiyai.

36 Muisaisaiti Israer-aentsun Ejiptunmayan uwentikramia nu. Yusa kakarmarin nekaawarat tusa, aentsti túrachminian untsurín túramiyai Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiyai.

37 Jú Muisaisak Israer-shuaran chicharuk “Atumíñiñak etserniun Yus ukunam anaikiattawai, winia anaitiukma

áintsan. Tuma asamtai nu shuarsha umirkamniuram” tímiayi.

<sup>38</sup> Jú Muisais Israer-aentsjai atsamunam pujumiayi. Senái nainnium Yusa suntari níjijai sha pujumiayi. Tura Muisaiska ii úntrijjai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiai.’

<sup>39</sup> “Túrasha ii yaunchu uuntri Muisaisan umirkatniun naki-tiarmiayi. Áaniuk imiá umirtaint tusar Ejiptunam waketkit-niun wakeriarmiayi.

<sup>40</sup> Túmainiak Muisais Yusjai chichastajtsa murá wématai nu shuar Muisaisa yachin Arunkan tiarmiayi “Ii yusri najanata, ii nemarsatin. Áaniusha Muisaissha Ejiptunmaya in juramkiy-atcha tútsuk weruma” tiarmiayi.

<sup>41</sup> Nuyá wáakachia áaniun najanawarmiayi. Túrawar, júiti ii yusri tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi.

<sup>42</sup> Nuna túruinian wáiniak Yus, iniaisajai taku, niya kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri juní áarmiayi:

““Israer-aentsu, kuarenta (40) uwitin atsamunam wekaimi-armena nu, ¿Winiak kuntin maanturtuamarum? Winia surustai tusarum penké túrachurme, tímiayi Yus.

<sup>43</sup> Antsu, Muruk naartin ántar-yusa pujamurin jukimiarme. Tura chíkich ántar-yussha, ni naarí Rempan, yaa áanin najanarum nusha jukimiarme. Júkin asakrumin atumí nunkeya jukin, tímiai Papirúnia nunkan nankaiki akupkatjarne” tímiayi Yus.”

Nuní áarmaiti’ tímiayi.

<sup>44</sup> Estepan tuke étserek: ‘Yus Muisaisan tímiayi “Wi aku-peamu chicham ikiunsatin jeá áaniun Wi iniaktusjamna tímiatrusmek atsamunam najánata” tímiayi. Tutai Muisais Yus tímianak umikmiayi. Nu jean ii uuntri yaunchu takaku ármiayi.

<sup>45</sup> Nu jean ni uchiri akintkiar akintkiar wearmiayi. Uku-nam, jú nunka achiktin jeamtaí, Yuska kapitían Jusuejai jú nunkanmaya aentsun jiki akupkarmiayi. Tura ii uuntri kapitían Jusuejai winiarmia nu, nu jeancha jú nunkanam itiarimiayi. Tura Tawit uunt akupin náamtsain, ii úntrisha nu jean takaku ármiayi.

<sup>46</sup> Kame Yus Tawitian yájau enentáimtichmiayi. Tuma asam-tai Tawit Yus shiir pujustinian jean jeamtinian seamiai.

<sup>47</sup> Túrasha antsu Tawitia uchirí Sarumún Yusa jeen jeammi-ayi.

<sup>48</sup> Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia.

49 Juna áarmiayi:

“Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarme tarum? tímiayi Uunt Yus.

Tura Wi ayampratniusha, ¿tuj aa?

50 Wiki winia uwejruijain ashí najanachmakiaj” tímiayi.’

51 Estepan tuke étseruk: “Tura átumka Israer-shuartirmeka atumí enentájjiai tuke umichuitrume. Atumí kuishisha weaktsui tura Yus nékachua núniniaitrume. Yusa Wakaníjjiaisha tuke nemasnaikaitrume. Tura atumí yaunchu úuntriijiai métek túrarme’ tímiayi.

52 ‘Iisia, atumí úuntrisha Yusa etserniurin tuke kajerin áarmiayi, tímiayi. Tura nú arant atumí úuntrisha Tunaaríncha tátatui tu etseru wekaan, máacharmakia. Jes, nútiksarmek yamaisha, Tunaaríncha támania nusha atumek anañkarum máachmakuram, tímiayi.

53 Tura Yusa suntari nayaimpinmaya Yusa chichamen susamuitatrum atumsha penké umikchamarme” tímiayi Estepan.

### *Estepanka jakamuri*

54 Israer-aencha Estepan tu chichaamu antukar imiá kajerkar nain kátetete awajiarmiayi.

55 Tura Estepansha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharin, tura Yusa untsuurinini Jesusan wajan wáinkiamiayi.

56 Tumá wáiniak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai” tímiayi.

57 Támaiat niisha kuishin akiriarmiayi, tura achiktai tusar charáa tiar ashí wajatkiarmiayi.

58 Túrawar, péprunmaya arant júkiarmiayi. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiayi. Tura máawartai tusar kayajai tukurrarmiayi Estepankan.

59 Tura Estepanka tukamaitiat Yúsan áuj samiayi. Tura áujuk “Uuntru Jesúsá, winia wakantrusha jurutkitia” tímiayi.

60 Tura tikishmar áujuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

## 8

### *Sauru Yus-shuaran kajerkarmiania nu*

1-2 Estepankan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepanka ayashincha iwiarsarmiayi, tura aneenak ti uutiarmiayi. Tura

nú tsawantaj Yús-shuaran Jerusarénum pujuarmia nuna ti kajerkatin nan̄kamnamiayi.

<sup>3</sup> Sáuruka Yús-shuaran kajerak ti pataat wémiayi. Túmak nūj jeá wayá, nūj wayá áishman̄nasha nuwancha wáinkian̄ka japiki juki sepunam en̄keataj tusa túrimiayi. Tumakui Yús-shuar Jerusarénumiá pisarar Jutía nuñkanam, tura Samaria nuñkanmasha jeawarmiayi. Jesusa akatramur̄n̄kia antsu Jerusarénuman̄ juakarmiayi.

*Samaria nuñkanam etserkarmiania nu*

<sup>4</sup> Túrasha Jerusarénumiá aents pisararmia nu, arant wénaksha tuke Yusa chichamen̄ etserkini yujarmiayi.

<sup>5</sup> Tura Jiripi Jerusarénumiá we tura ch̄ikich péprunam Samaria núñkanam ámiania nūj jeá, chichaak “Yus anaikiamu ana nu Jesusaiti” tu etsermiayi.

<sup>6</sup> Túrakui aents iruntrar chikichík enentáij̄i Jiripi étseamun titiú pujusar antukarmiayi. Yusa kakarmar̄in nekaawarat tusa aentsti túrachminian túrimia nunasha wáiniarmiayi.

<sup>7</sup> Ti untsur̄i aents iwianchruku ármia nuna Jiripi nu iwianchin j̄irki akuptiarmiayi. Tura íwianch j̄iniainiak kakan-tar charáa tiar j̄iniarmiayi. Tura ti untsur̄i emearusha shutu-apsa péñker ajasarmiayi.

<sup>8</sup> Tuma asamtai nú péprunmayān̄ka ashí shuar ti warasar pujuarmiayi.

<sup>9</sup> Tura nú nuñkanam uwishin Semun̄ pujumiayi. Nuikkia wí ímianait̄jai tusa Samarianmayā aentsun anañniuyayi.

<sup>10</sup> Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semun̄sha Yusa kakarmar̄ij̄i áitkiawai.”

<sup>11</sup> Tura ti untsur̄i uwí wawekratmar̄ij̄i anan̄karta asam-tai, umirkarmiayi nu aents.

<sup>12</sup> Túrasha Jiripi Yusa akupeamur̄in, tura Jesukrístununcha shiir chichaman̄ etserkamiayi. Tura, nuna antukar nuwasha áishman̄sha umikiar imian wearmiayi.

<sup>13</sup> Semun̄sha imia uwishniuitiat Yús-Chichaman enentáimtus ímianmiayi. Tura Jiripij̄i tsanin̄ wekaimiayi. Yusa kakarmar̄in shuar nekaawarat tusa Jiripikia aentsti túrachminian túrimiayi. Nuna wáiniak Semun̄ ti enentáimsamiayi.

<sup>14</sup> Tura Jesusa akatramur̄isha Jerusarénum pujuarmia nūj Samarianmayā aents Yusa chichamen̄ umirainiawai taman nekaawarmiayi. Tuma asamtai Pitruncha Juán̄nasha nekáa ikiuutarum tusa akupkarmiayi.

<sup>15-16</sup> Tura Samarianmayā Yús-shuarsha aya Uunt Jesusa náar̄in imianiarmiayi. Yusa Wakan̄n̄kia tárachmiayi. Tuma

asantai Pítrusha Juanjaj nu jeawar Samarianmaya Yushuara enentáin Yusa Wakaní pimiutkarat tusan Yusan áujtusarmiayi.

17 Tura áujtua umikiar Pítiur Juanjaj ni uwejen nú Yushuara awantsarmiayi. Nuiñkia Yusa Wakaní taramiayi.

18 Jesusa akatramurí uweje awasmanum Yusa Wakaní taramtai, Semunsha nuna wáiniak, kuitjai nu kakarman sumaktaj, tímiayi.

19 Tura Jesusa akatramurín chicharuk tímiayi “Winiasha kuitjai surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi.

20 Tutai Pítiur tímiayi Semunkan “Ámeke kuítrumjai métek menkakatniuitme. Warí, Yus amaana nu ¿kuitjai sumaktinkitait?

21 Yus esetram enentáimtachu asam nu túramu pachistincha penké tujinkieme, tímiayi.

22 Enentáimprata. Túram Yus seata. Enentáimtamna nuna Yus tsankurtamprashtimpiash.

23 Nékaime, tsaankeka áintsan yapá enentáimin pimiutramkaiti. Tura tunaarmijn jinkiámua núninaitme” tímiayi.

24 Tutai Semun áimkiamiayi “Uunt Yus aujtursatarum. Túrutrumna nuna túrunawaj tusan tajai” tímiayi.

25 Nuyasha Jesusa akatramurí Jesusa túramurín nú áentsun ujakarmiayi. Tura wésar Samaria nunkanam pepru ámunmanka Yus-Chichaman nuí etserkiar, nuí etserkiar Jerusarénum wakеткиarmiayi.

### *Jiripi Yus-Chichaman etserkiania nu*

26 Tura Yus ni suntarín nayaimpinmayan Jiripincha akup-tukmiayi. Niisha chicharuk tímiayi “Wátskea. Juyá jünkim Jerusarénumia jintia Enkasa péprunam wea nuní weme, anaraaní wetá. Nú jintiaka atsamu nunkanam nankaamawai” tímiayi.

27 Tutai Jiripisha wémiayi. Jintiá wesa Itiupianmaya áishmankan wáinkiamiayi. Nú áishmansha Itiupia nunka akupniurín, ni naarí Kantasen takarniuyayi. Kantaseka núwauyayi. Tura nu áishman ti neka asa nuna kuítrin írniuyayi. Nú áishmansha Yusan áujstataj tusa Jerusarénum wéu wáketmiayi.

28 Karetanam enkemar wesa, Yusa etserniurí Isayas aarmia nuna aujki wémiayi.

29 Wats, Jiripi nú jintianam wéakui, Yusa Wakaní nin tímiayi “Nú kareta amayanta.”

<sup>30</sup> Tura Jiripisha amayán, Yusa etserniurī Isayasa áarmarīn áujun antuk, chicharuk “¿Aujeamna nu nékamek?” tímiayi.

<sup>31</sup> Tutai nú áishman tímiayi “¿Itiurak nekaataj? ¿Yaki jintin-truat?” tímiayi. Tura antsu iijjaj wetái tusa, Jiripincha enker jukimiayi karetanam.

<sup>32</sup> Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, ure tsúpiram chichaatsna núnisan niisha chichakchamiayi.

<sup>33</sup> Nincha iniatsárarmiayi. Túrasha penké chichamnaka tútsuk tsankamakmiayi. Niisha nunkanam iwiaaku pujá maamu asamtai, ¿yaki nuna áujmatkat’?” Nuní aarma ámiayi.

<sup>34</sup> Kantase takarniurī Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurī níñkik túmama? ¿Chikichnash ta?” tímiayi.

<sup>35</sup> Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

<sup>36</sup> Nuyá entsa ámanum nankaamak áishman Jiripin chicharuk “Jui entsá jeaji. Wikia jui imianchamniakaitiaj” tímiayi.

<sup>37</sup> Tutai Jiripisha tímiayi “Tuke enentáimjaj Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi.

<sup>38</sup> Tura, karetan awajas mai jíinkiar entsá wearmiayi. Nui Jiripikia Kantase takarniurīn imiaimiayi.

<sup>39</sup> Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurīsha Jiripin wáinkiachmiayi. Túrasha ninikia waras wémiayi.

<sup>40</sup> Jiripisha jeachat Asutu péprunam wantinkiamiayi. Tura nuyá jiinki péprunam nuí wayá, nuí wayá Yus-Chichaman etserki we, Sesaria peprunam jeamiayi.

## 9

### *Sauru Jesusan umirkamiayi*

*(Túramurī 22.6-16; 26.12-18)*

<sup>1</sup> Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi.

<sup>2</sup> Tura jeari tímiayi “Papí ame naarmijjaj áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajaj. Túran nú papijjaj Jesusan umirkaru ainia nuna, nánkamsan achikiartatjaj. Túran áishmannasha nuwancha achikian jinkian, jui Jerusarénum enkeataj tusan ikiaankattajaj” tímiayi.



3 Tura papí susam Sauru jintiá wéaj, Tamasku péprunam nuntumsaj nui aya aneachma nayaimpinmaya tsáapin jii-sumir téntakmiayi nin.

4 Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajtustaj tusam imiá pataaturam?” tímiayi.

5 Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nui, amek enentáimin yajauch awajmamsame, waaka sankanmiak numin ijiuna núnismek” tímiayi.

6 Nuyanka Sauru sapijin kuranki tímiayi “Nuinkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nui jeawakmin ame túratamna nuna turamiartatui” tímiayi.

7 Tura Sáurujai irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi.

8 Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwenum enkekiar júkiarmiayi Tamaskunam.

9 Nui jeá menaintiu tsawant íimtsuk tura yurumtsuk penké úmutsuk pujumiayi.

10 Nui Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

11 Nuyá Uunt Jesus tímiayi “Wajakim jintia, Naka tutaiya nui wetá. Nuisha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsan áujuk pujawai.

12 Tura juna mesekranam ipiatkamjai Sáurun. Aishman wayá ni uwejéjai ántiawai, ataksha íimit tusa. Nú áishmanka ámetme, Ananías” tímiayi Jesus.

13 Táman antuk Ananías chichaak “Túrasha Uunta, ju áishman ame áentsrumin Jerusarénnum ti yajauch awajchakait. Ni yajauch túramurín ti untsurí aents ujataniawai, tímiayi.

14 Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

15 Tutai Uunt Jesus tímiayi “Áankisha wetá. Ju áishman winia etserniur atí tusan achikjai Wi. Niisha Israer-shuarchancha tura kapitiánniasha tura Israer-shuarnasha wínian etserin átatui, tímiayi.

16 Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

17 Tura Jesus táman umirak Ananíás Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantinturmakmamna nusha ame ataksha ímiat tusa, tura Yusa Wakanísha enentáimin pimiutramkat tusa winia akuptukai” tímiayi.

18 Nu chichamaik ni jiiya namaká saepeya áanin iniaarmiayi. Túrunamtai ataksha ímimiayi. Túruna wajaki we imianmiayi.

19 Nuyasha yurumámiayi. Tura yurumásha kakaram ajasmiayi. Tura Yus-shuarjái Tamaskunam wárumchik tsawant pujusmiayi.

*Sáuruka Tamasku péprunam Yus-Chichaman etserkamiania nu*

20 Nuyanka Sauru Israer-shuara iruntairin wayá Jesusa túramurin etserkamiayi. Etseruk tímiayi “Nekasaiti, ju Jesus Yusa Uchirinti” tímiayi.

21 Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímijajasha nuna achik Israer-patri akupniuriin jukitiaj tusa tamia núchakait” tiarmiayi.

22 Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarimiayi.

23 Tura ukunam, Israer-aents Sáurun maatai tusar chichaman jurusarmiayi.

24 Tura Sáurusha nu chicham jurusman nekamamiayi. Israer-aents pepru jínmanum tuke tsawajasha, káshisha achikiar maatai tusar jintian akirtiarmiayi.

25 Nuna antukar Yus-shuar Sáurun chiiknium kashi enkeawar itiararmiayi. Pepru tanishnum itiarar awemarmiayi.

*Sáuruka Tamaskunmaya Jerusarénum wémiania nu*

26 Tura Sauru Jerusarénum jeá Yus-shuarjái iruntratts wakerimiayi túrasha ninikia ashamiarmiayi. Sáurusha nekas Yus-shuar ajaschaiti tusar ashamiarmiayi.

27 Túmainiaín Pirnapí Jesusa akatramurí matsatmanum jukimiayi Sáurun. Tura nuí ejé tímiayi “Ju Sauru jintiá wesa Uunt Jesusan wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi.

28 Tura Sauru Jerusarénum juákmiayi. Tura Yus-shuarjái irunar pujumiayi.

29 Nuyasha Yus, etserkata tutai, sapijmiatsuk Jesusa túramurin etsermiayi. Tura Israer-shuar Kriaku chichaman chichau ármia nu, nuĵ pujuarmiayi. Sáurusha nu shuarĵai áujmatsarmiayi. Túrasha nu shuar Sáurun itiur máatjik tusar chichaman juriarmiayi.

30 Tura Yusaj yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi.

31 Tura Jutíanmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsan ashamainia ásar, tura Yusa Wakaní yayamu ásar kawenki kawenki wearmiayi.

### *Pítur Eneasan yáinmiania nu*

32 Tura Pítur Yusaj yachi armiania nuĵ iráa wekaimiayi. Wekaak Yus-shuar Rítianam matsamarmia nuĵsha iraumiayi.

33 Nuĵsha Rítianam jeá áishmanĵkan Eneas náartinian wáinkiamiayi. Niisha emearu asa wekaicha uchu uwí aya tépenuyayi.

34 Tura Pítur chicharuk “Eneasa, Jesukrístu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi.

35 Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

### *Nuwa Túrkas nantakmiania nu*

36 Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamĵainkia Túrkas tuiniawai. Nu nuwasha nuĵ pujus tuke penker túriniuyayi. Tura niisha nútiksān yaĵ wémiayi.

37 Nu tsawantinik Túrkas sunĵkuran jateemak jakamiayi. Túrunamtai ayashin nijiarar yakí tesaamunam áepsarmiayi.

38 Jupe péprusha Rítianmaya tíjĵuch ámiayi. Júpenmaya Yus-shuar Rítianam Pítur puĵan nekaawar jimiará áishmanĵkan akatrar akupkarmiayi, Júpenam wari winití tusar.

39 Nuĵ tutai Pítur niĵĵai wémiayi. Tura támatai jaka tepemia nuĵ awayáwarmiayi. Nuĵ wayamtai waje pujuarmia nu útĵkiar Pítrun téntakarmiayi. Túrawar pushirĵn, Túrkas iwiaaku pujus najankamia nuna iniaktusarmiayi.

40 Nuyanka Pítur aĵ akupkarmiayi ashí. Tura niisha ninĵki tikishmar Yúsan áujsamiai. Nuyasha nuwan jaka tepaan iis tímiayi “Tapitia nantaktia.” Tutai niisha íimi Pítur wajaan wániak nantaki pujusmiayi.

41 Tura Pítrusha nuwan uweĵnum achik awajkimiai. Tura iniais Yus-shuar ármia nuna tura wajencha untsukar Túrkas iwiaaku ajasun iniaktusarmiayi.

42 Nu túrunamun ashí aents Jupe péprunmaya nekaawarmi-  
ayi. Túrawar untsurí aents Uunt Jesusan umirkarmiayi.

43 Tura Pítruka Jupe péprunam untsurí tsawant nuapen-  
iwiarin Semunka jeen pujusmiayi.

## 10

### *Pítiur Kurniriujaí*

1 Sesaria péprunam Kurniriu naartin suntara kapitiántri  
pujumiayi. Ni suntari Itiaria nunkanmaya ármiai.

2 Nu kapitián Kurniriu ni shuarijiaí, Yuska  
nankaamantúiti, tu enentáimtiarmiayi. Tuma ásar Yúsan  
enentáimtin ármiai. Tura nútiksañ kuítniasha takakchan  
yáíntaj tusa Israer-shuaran súuyayi. Tura tuke tsawant Yúsan  
áujtiniuyayi.

3 Chíkich tsawantaj, nantu aanku ajasaj Kurniriu  
ímiarmiayi. Yusa suntari Yus nayaimpinmaya akupkamu,  
ni pujamunam utuá “Kurniriuá” tímiayi.

4 Kurniriuá tutai, Yusa suntarin ashamak ímia pujumiayi.  
Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai.  
Tura atsumainia nu yayakmin Yus shiir enentáimturmawai’  
tímiayi.

5 Tura Yusa suntari Kurniriun tuke chicharuk “Wats,  
áminiuram Júpenam akupkata. Semun, chíkich naari Pítiur, tatí  
tusam akuptukta, tímiayi.

6 Nu Semunsha chíkich Semunjaj pujawai. Nuka nuapen-  
iwiarin Semunkaiti. Tura ni jeesha nayaantsanam ayaamach  
pujawai, tímiayi. Nui jeawakmin, ame túratamna nuna Semun  
Pítiur turamtatui” tinia ikiukmiayi.

7 Tura Yusa suntari waketkimtai, Kurniriuka ni takarni-  
urin jímiaran itiamiayi. Tura suntaran chikichkiniak ne-  
marsat tusa itiamiayi. Nu suntar ni írutramuriyayi. Tura Yúsan  
enentáimtiniuyayi.

8 Kurniriusha ni túrunamurin ashí ujáa-já awajas Jupe  
péprunam akupkarmiayi.

9 Kashin tsawantaj Kurniriu suntari Júpenam nuntumsaraj,  
tutupin aj Pítiur jea yakí wáakunam Yúsan áujsatajtsa wakami-  
ayi.

10 Pítrusha ti tsukamak yurumátaj tusa wakerimiayi.  
Túrasha yurumkan iniarainiaí Pítiur íkiajtiusmak,

11 nayaimp uranmianum wan̄karam tarachia áanin tura  
nuna tsakarín jin̄kiakman tárún wáinkiamiayi.

12 Nu tarachnium yajasma irunmiayi. Wekainiusha,  
nanamtincha, tura napisha en̄kemiarmiayi.

13 Tumaj Yus Pitrun chicharuk “Pitru, wajakim maam yu-ata” tímiayi.

14 Tutai Pítiur tímiayi “Atsá Uunta. Ii Israer-shuartikia ya-jauch yajasma áinia nu tura yúatin surimkiamu ana nuka penké yúchaitji. Tuma asamtai júnaka wikia yuashtatjai” tímiayi.

15 Túrasha Pitrun atak Yus chicharuk “Wi, péñkeraiti, tájana nu, yajauchiiti, tiip” tímiayi.

16 Nuka menaintiú túrunamiayi. Tura nuyasha tarach ataksha nayaimpiniam wakamiayi.

17 Nuna túrunan wáiniak Pítiur wariniak áaniuncha wáinkiaj tusa enentáimia pujaj kapitían Kurniriu ayakma armia nu, anintruniak jeawariayi.

18 Tura jeawar kakantar untsummiar “¿Semuñ, Pítiur, juin pujá?” tiarmiayi.

19 Tura Pítruka ímiarmarin tuke enentáimia pujaj Yusa Wakaní chichaak “Menaintiu áishman untsurmainiawai, tímiayi.

20 Wajakim akaikim arantutsuk au nemariarta, Wi akupkamu asamtai” tímiayi.

21 Nuna antuk Pítiur taramiayi. Tura áishmankan Kurniriu akupkama nuna wajainian wáiniak “Wiitjai Pítiur. Átum eátrumna núitjai. ¿Warí tarintrum?” tímiayi.

22 Tutai niisha tiarmiayi “Iisha kapitían Kurniriu akupkamu taji. Kurniriuka áishman péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Níiya winiaji, tiarmiayi. Kame nuik, Yusa suntari, nayaimpinmaya akupkamu, ii kapitíantrin tímiayi “Pitrun untsukát akupkata. Nii tatí. Tura nii títiatna nu péñker anturkata” tímiayi. Nuna ii kapitíantrin takui iisha winiji” tiarmiayi.

23 Tutai Pítiur jeá awayámiayi. Tura nu kashi nuñ kanararmiayi.

Kashin tsawarar Pítiur níijaj wearmiayi. Túrasha Júpenmaya Yus-shuarsha nin nemariarmiayi.

24 Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarin tura ni nekas amikrin, nekaatarum tusa untsuk ikiaankamiayi.

25 Tura Pítrusha jeamtai Kurniriu aa jüintiuki Pitrun tikishmatramiayi.

26 Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi.

27 Tura chichasar jeá wayawarmiayi. Tura wayá, untsurí aents matsatun wáinkiamiayi.

28 Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashtiniaitruma in jintintramin tura-mainiaji, tímiayi. Túrasha Yuska ni enentáimsamurín wíniaka paant iniaktursayi. Túmaitkiui wikia nánkamas áentsun ya-jauchiiti, tura auka wapikiaiti, tíchamniaitjai, tímiayi.

29 Tuma asamtai, untsurkurmin, páchitsuk winimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

30 Tutai Kurniriu tímiayi “Kuatru tsawant nankaamasaj tura nantusha juni ai, wikia yurumsuk Yúsan áujsamjai, kjaraj áujsatina ana nuna. Túran chichaj, áishman, ni entsatairi win-charpatniun, naka wajatran wáinkiamjai, tímiayi.

31 Niisha chichartak turutmiaiji “Kurniriu, Yus ame áujman anturtamkayi. Tura shuar atsumainia yáinmamna nunasha nekarmayi, turutmiai, tímiayi.

32 Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjai pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi.

33 Túrutkui, wi umikian áentsun wárikmasan ámin akuptukjame utitia tusan. Tura nékasen taume. Tuma asamtai iisha jui Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

### *Kurniriu jeen Pítiur etserkamia nu*

34 Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi.

35 Antsu ashí nunkanam nánkamas aents Yúsan umirak pénger tura nuna, Yus nú aentsun shiir enentáimtawai, tímiayi.

36 Yuska shiir chichaman Israer-aentsun akuptukmiaiji. Nui chichaak “shuar Jesukrístu naarin páchiakka, Yusjai nawamnaikiatin átiniaiti, tímiayi. Nú Jesukrístu ashí shuara Úuntrinti’ tímiayi Yus.

37 Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan imiaak etserak amukmia nú tsawantin nankamamiaiji.

38 Tura jusha nékatsrumek, tímiayi. Nasarénumia Jesus, Yus Anaikiamu asa, Yusa Wakaní kakarmaríjjai pénger túriniuyayi. Iwianchruku wáitias pujuarmia nuna pénger awajsamiaiji. Yus Niin pujurma asa ashí nuna túriniuyayi.

39 Tura Israer-aents matsatkamunam tura imia Jerusaren péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi.

40 Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaji, tímiayi.

41 Ashí áentsnumka wantinkiachmiayi. Antsu íniak nuik, etserin atarum tusa Yus achirmakmiaj nú áentstiniak wantinturmakmiaji, tímiayi. Au nekas jakamunmaya nantakmiatai iisha Nijjaj tsaniñkiar yurumámji, tímiayi.

42 Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki títiniaitjai. Kame ashí áentsun, jaka áinia nuna tura iwiaaku áinia nunasha, Wikiitjai nuna títinian” tímiayi Jesus. Nusha átum werum ujatruktarum, Jesus turamaji, tímiayi.

43 Ya shuarak Jesusa náarín pachia nú shuarnaka tunaarín tsan̄kurattawai, nuna ashí Yúsna etserniusha yaunchu etseriarmiayi” tímiayi.

### *Israer-shuarchan Yusa Wakaní tarurarmiania nu*

44 Tura Pítiur tuke chichaak pujaj, tura chikichcha antúu pujuiniaj Yusa Wakaní tarurarmiayi.

45-46 Tuma ásar an̄kant an̄kant chíkich chichamjaj chichasarmiayi. Túmainiak, Yus ti péñkeraiti, tiarmiayi. Tura Israer-shuar, Yus-shuar armia nuka Pítrujaj táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi

47 Túmakui Pítiur chichaak “¿Yaki surimkiat ju aents imi-antinian? Warí nincha ínia áintsan̄ Yusa Wakaní tarurcharaik” tímiayi.

48 Nuyá Pítiur, Jesukrístu náarijn imiantiarum tusa akupkarmiayi. Tura nuyasha Pitrunka, nijjaj ishichik tsawant pujustinian seawarmiayi.

## 11

### *Ni túrunamurín Pítiur ujakmiania nu*

1 Israer-shuarchasha Yusa chichamen umirkarai táman Jesusa akatramurísha tura Jutíanmaya Yus-shuarsha antukarmiayi.

2 Túmainiak Pítiur Jerusarénum jeamtai, Israer-shuar Yus-shuar ármia nu chichainiak

3 “¿Urukamtia Israer-aents áiniachusha iyumam? ¿Tura aujaj tsaniñkiam urukamtai yurumámum?” tiarmiayi.

4 Tutai Pítiur ashí yámankamtaiknumia túrunamun ujakmiayi.

5 Chichaak tímiayi “Wikia Jupe péprunam pujumjai. Tura nuj Yusan auju pujusan ímiarmajai. Tura wan̄karam tarachia áanin kuatru tsakarín jin̄kiakma, nayaimpinmaya táarun wáinkiamjai. Tura wi pujamunam jeartimiaj, tímiayi.

6 Tura nuĵi iyaj tukaman inít yajasman, napincha, nanamtinniasha enketainian wáinkiamjai, tímiayi.

7 Tura chichaman antukmajai “Pitru wajakim maam yuata” túrutun antukmajai, tímiayi.

8 Túrutkui “Atsá, Uunta, áanin wapiknaka, Israer-aents yuatin surinkiamu ana núnaka tuke yúchaitjai” tímiajai, tímiayi.

9 Atak nuyá túrutuk “Wi, péñkeraiti, tájana nu, ámeke, ya-jauchiiti, tiip” turutmiai, tímiayi.

10 Nunasha menaintiú túrunan wáinkiamjai. Túruna nayaimpiniam mash waketkimiai, tímiayi.

11 Nuĵi túruna pujai menaintiú áishmañ Sesarianmaya akupkamu, winia eatainiak wi pujamunam tarutiarmiai, tímiayi.

12 Tura nuĵi Yusa Wakanĵi chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashinkiar Kurniriu jeen wayamji, tímiayi.

13 Niisha chichaak “Jearuĵi Yusa suntariĵi nayaimpinmaya taa wajan wáinkiamjai, tímiayi. Tura niisha chichartak “Jupe péprunam Semuñ Pítiur tatí tusam áishmañ akatram akupkata.

14 Pítrusha taa, itiura amesha tura áminiurmesha tunaarminiá uwemprattam nuna turamtatui.” Yusa suntariĵi nuní turutmiai” tu ujatkamiayi Kurniriu’ tímiayi.

15 ‘Wi chichastasan júarai, Yusa Wakanĵi tarurarmiayi, yámankamtaik in tarutrampramiaiĵi nútiksañ, tímiayi.

16 Nuñkia Uunt Jesus timian enentáimpramjai. Niisha tíchamka “Juanĵi entsajainĵi imiakratmiayi. Tura antsu Yusa Wakanĵi imiantiniá áintsañ atumí enentáin enkemprutmattarme.” Nu timian enentáimpramjai, tímiayi.

17 Atumsha enentáimpratarum. Uunt Jesukrístu umirkamiaiĵi nuĵi, incha Yuska ni Wakanĵin suramsamiaiĵi. Tura in suramsamiaiĵi núnisañ Yus nincha ni Wakanĵin súsararmiayi. Nuna tura asamtai, wikia, túrashtiniaiti, Yúsan títinkiaitiaĵi” tímiayi Pítiur.

18 Tura Pítiur taman antukar mitiat wáinkiar “Nekasaiti, Israer-shuarchancha ni enentáin yapajjáwarmatai tuke iwiaaku átinian Yuska nin súsaruiti” tiarmiayi. Tusar Yusa náarĵin ti shiir awajsarmiayi.

### *Yus-Shuar Antiukía péprunam wearmania nu*

19 Estepañkan máawarmia nuĵi, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nuñkanam, Chipri nuñkanmasha, tura Antiukía péprunmasha wearmiayi. Tura nuĵi jeawar Yus-Chichaman chikichnaka ujatsuk aya Israer-aentsnak ujakarmiayi.

20 Tura niijjaiĵi Chipri nuñkanmayaĵi pisararmia nu Serini nuñkanmayasha Yus-shuar áirmiayi. Nuka Antiukíanam jeawar Israer-shuarchan Uunt Jesusa túramurĵin ujakarmiayi.



21 Tura Uunt Jesus ikiakárma ásar, nú nun<sub>kan</sub>maya aents ti untsur<sub>i</sub> yaunchu túrutair<sub>in</sub> iniaisar Jesusan enentáimtuiniak Yus-shuar ajasarmiayi.

22 Tura nu chichaman antukar, Jerusaré<sub>n</sub>numi<sub>a</sub> Yus-shuar, ame iyutá tusar, Pirnap<sub>i</sub>n Antiuk<sub>i</sub>anam akupkarmiayi.

23-24 Pirnap<sub>i</sub>sha jeá, Yus nú shuaran uwemtikrarma nuna wáiniak warasmiayi. Pirnap<sub>i</sub>sha pé<sub>n</sub>ker áishma<sub>n</sub>kauyayi. Yusa Wakan<sub>i</sub>sha pimiutkamuyayi. Tura Yús<sub>a</sub>n nekas umirkauyayi. Tuma asamtai nu shuaran mash jintintiainiak chicharuk “Tu<sub>ke</sub> enentáim<sub>ja</sub>i umirkarum Yus nemarsatarum.” Tu chicharak ikiukmiayi. Tura nu<sub>j</sub>sha nú arant untsur<sub>i</sub> aents Yus<sub>a</sub>i kawen<sub>k</sub>karmiayi.

25 Nuna turasua amik Pirnap<sub>i</sub> Tarsu pé<sub>r</sub>prunam wémiayi Sáurun wáinkiat<sub>a</sub>j tusa. Tura wáiniak Antiuk<sub>i</sub>a pé<sub>r</sub>prunam jukimiayi.

26 Tura nu<sub>i</sub> jeawar, nú pé<sub>r</sub>prunmaya Yus-shuar<sub>ja</sub>i iruntrar chikich<sub>i</sub>k uw<sub>i</sub> pujusarmiayi. Yus-Chichaman untsur<sub>i</sub> shuá<sub>r</sub>an ujaak pujuarmiayi. Tura nu<sub>i</sub> Antiuk<sub>i</sub>a pé<sub>r</sub>prunma<sub>n</sub>ka Yus-shuaran émkaka, Kristu shuar<sub>i</sub>, tiarmiayi.

27 Nuyá Yusnan etserin Jerusaré<sub>n</sub>numi<sub>a</sub> táarmiayi Antiuk<sub>i</sub>anam.

28-30 Túmaini<sub>a</sub>i chikich<sub>i</sub>k etserin, ni naari Akaapu, Yus-shuar matsatmanum ajapén wajaki chichasmiayi. Tura Yusa Wakan<sub>i</sub> nekatair<sub>i</sub>ji<sub>a</sub>i chichaak “Ti tsuka ashí nú<sub>n</sub>kanam átatui” tímiayi. Tuma asamtai Antiuk<sub>i</sub>anamaya Yus-shuar chichainiak “Jut<sub>i</sub>a nun<sub>kan</sub>maya Yus-shuar ainia nu yáin<sub>t</sub>ai” tiarmiayi. An<sub>k</sub>ant an<sub>k</sub>ant ni wakeriarmia núnik sú<sub>s</sub>armiayi. Tura nú kuít<sub>n</sub>iasha Jut<sub>i</sub>anmaya Yus-shuara úun<sub>t</sub>ri<sub>n</sub> akup<sub>t</sub>ukarmiayi. Pirnap<sub>i</sub>sha Sáurusha nú kuít<sub>i</sub>an júkiarmiayi. Tura Akaapu tímia nú<sub>n</sub>isa<sub>n</sub> túrunamiayi, akupin Krautiu pu<sub>ja</sub>i.

## 12

### *Pitrun sepunam enkeawarmiania nu*

1 Nu tsawant<sub>a</sub>i akupin Erutis Yus-shuaran máataj tusa chichaman jurus áents<sub>r</sub>i<sub>n</sub> ishiakmiayi.

2 Tura Ju<sub>a</sub>nka yach<sub>i</sub>n Jakupun su<sub>e</sub>n tsupirkar máawarmiayi.

3 Nuna tura máawarmatai Israer-aents wáinkiar “ju<sub>k</sub>a pé<sub>n</sub>keraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Nú<sub>n</sub>aka wakapruachu tanta yuatin nampertin túrawarmiayi.

4 Pítruncha achik itiarmatai, Erutis sepunam en<sub>k</sub>eata tusa akupkamiayi. Tura sepunam suntarsha an<sub>k</sub>ant an<sub>k</sub>ant, ku<sub>a</sub>tru kuaru, ashikia tiasisáis (16) irunar Pitrun téntakarmiayi. Tura, ju<sub>i</sub> jísat na<sub>n</sub>kaasmatai, mantamnatí tusan jii<sub>k</sub>tiat<sub>ja</sub>i aents iruntramunam, tu enentáimsamiayi Erutis.

5 Túramu asa Pítruka sepunam pujumiayi. Tura suntarsha mijiatrutsuk iiyarmiayi. Túramunak Yus-shuarka, Pitrun yáin<sup>u</sup>kiat tusar iniaitsuk Yúsan ti áujiarmiayi.

*Yusa suntari Pitrun uwentikramiania nu*

6 Wats, Erutis, kashin jíiktiajai takui, nú kashi Pítruka jimiará suntar wajamunam etema tepes kanarmiayi. Tura jimiará jirujai jínkiamuyayi. Tura chíkich suntarka jínmanum ii wajarmiayi.

7 Tumai aya aneachma Yusa suntari nayaimpinmaya taa ajapén wjasmiayi. Túrunamtai jeanmanka tsáapin ajasmiayi. Tura Yusa suntarisha Pitrun páenum antiñ ishintiarmiayi. Tura jirusha Pitru uweyéya sayat atiniamiayi.

8 Tura Yusa suntari tímiayi “Kaki emenmamata. Túram sapatrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi.

9 Tutai Pítiur nemarsamiayi. Túrasha Pítruka, mesekranmaapi júniaja, tu enentáimsamiayi.

10 Túrasha emka suntar ímia wajan nan<sup>u</sup>kaikiarmiayi. Tura nuyasha chíkich suntar ímia wajan nunasha nan<sup>u</sup>kaikiarmiayi. Tura nuyasha jíintiainium jiru waiti ámanum jeawarmatai, nú wáitisha ímia-niñki kuat uranmiayi. Túrunamtai jíinkiarimiayi. Tura jintiá ishichik wésan, Yusa suntari Pitrun níniak ikiukmiayi.

11 Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarñ nekas akupturkayi. Erutis mantuataj tusan pujurtana nuyá Yusa suntari winia uwentikrurai. Tura Israer-aents túrutatajtsa wakeriarmia nuyasha uwentikrurai” tímiayi.

12 Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainai Pítiur jeamiayi.

13 Tura jeá aa wáitin tuntuimiayi, wayataj tusa. Túmakui nuwá uchich, ni naari Ruti, yákit tusa iyumiayi.

14 Tura jeari, Pitru chichamen anturak ti shiir enentáimsamiayi. Túmak wáitin urattsuk ikiuki, inít matsatainian werí “Pítiur taa wáitiniam wajaawai” tímiayi.

15 Tutai “Wáurtsumek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

16 Tu chichainiañ Pítruka tuke tuntuí wjamiayi. Tura wáitin uraj tukamá Pitrun wáinkiar ashamkarmiayi.

17 Ashamak chichainiakui Pítiur, uweje takui itiatmamtikiarmiayi. Tura nuyá Uunt Yus sepunmayan uwentikramun ujakmiayi. Tura “Ju chicham Jakupu tura

chíkich Yus-shuarsha ujaktarum” tímiayi. Nuna t̄i iniais jiinki arant wémiayi.

18 Kashin tsawar̄ suntarsha Pitrun atsá wáinkiar “Chuwa urukakua men̄kaka. Áyawa urukattajia” tiarmiayi. Pítiur túrunamun nékachu ásar nuna tiarmiayi.

19-20 Túrunamtai Erutis chichaak Pítiur eaktarum tusa akupkarmiayi, túrasha wáinkiacharmiayi. Túrunamtai Erutis sun-taran untsukar, Pítrun ísarmia nuna aniasarmiayi “¿Pítiur itiura men̄kakama?” tímiayi. Niisha áimiainiachkui, nu sun-taran mantámnatí tusa akupkamiayi.

### *Erutis jakamiania nu*

Erutissha Tirunmaya tura Setúnmaya áentsjaisha nemasnaikiarmiayi. Túmayatan̄ Jutía nun̄kan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nun̄keyan yurumkan súmainia ásar, Erutisjai nawamnaikiatniun wakeriarmiayi. Tuma asamtai métekrak enentáimsar, Erutisa takarniur̄ pen̄ker̄, ni naar̄ Parastu, niijjai emka amikmawar nuyá Erutisan weriar shiir matsamsatniun seawarmiayi.

21 Tuma asamtai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaan̄ak áujmatmiayi.

22 Nūj pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi.

23 Tumaj̄ nuyaj̄k Yusa suntar̄j̄ nayaimpinmaya tarí Erutisan jaa awajsamiayi. Tuma asamtai nussha aka yuam jakamiayi. Erutissha Yusan waantu awajtsuk niñki waantu enentáimtuma asa túruna jakamiayi.

24 Túrunamtaisha Yusa chichamen̄ka nú arant pampan̄ki wémiayi. Túmak̄j̄ ashí núñkanam anturamiayi.

25 Tura Pirnapísha Sáurusha ni takatr̄in amukar Jerusarénnumiã Antiukíanam waketainiak Juan̄ Márkusan júkiarmiayi.

## 13

*Yus-Shuar Pirnapíncha Sáuruncha Yus-Chichaman etserkarat tusar akupkarmiania nu*

1 Antiukíanmaya Yus-shuarnum Yusnan etserin páchitra ármiayi. Nútiks̄an̄ Yus-Chichaman jintinniur̄isha ármiayi. Pirnapísha tura Mukusa Semun̄sha, nuyá chíkich, Serinianmaya Rúsiusha tura akupin Erutisa tsakatkesha, ni naar̄ Manaen, Sáurusha tímianu ármiayi.

<sup>2</sup> Tura chíkich tsawantaj niisha yurumtsuk Yúsan áujeak pujuiniaj Yusa Wakanj tímiayi “Pirnapísha, Sáurusha akanturki-tiarum, tímiayi. Wi takatan súsaitjiana nuna takasarat tusarum túratarum” tímiayi.

<sup>3</sup> Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiukíanmayá akupkarmiayi.

*Chipri nunkanam jeawarmiayi*

<sup>4</sup> Tura nuyanka Yusa Wakanj akupkam Pirnapísha Sáurusha jinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi.

<sup>5</sup> Juansha yáintaj tusa némarkauyayi. Nuj Saraminia péprunam jeawar Israer-shuar iruntai jeanam wayawar Yus-Chichaman etseriarmiayi.

<sup>6</sup> Tura Chipri nunkanam pepru ainia nuj wáirkutak Papus péprunam jeawarmiayi. Nuj jeawar Israer-aents uwishin ni naari Parjesúsan wáinkarmiayi. Ni chíkich náarinkia Erimi-asauyayi. Niisha uwishniuiat, Yúsnan étserajai, tíniuyayi.

<sup>7</sup> Akupin Serjiu Páurujaí pujuyayi. Nu akupniusha ti péñker enentáimniuyayi. Tura Pirnapín Sáuruncha chichaman akup-tukmiayi, taarti tusa. Kame Yus-Chichaman antuktaj tusa wakerak untsukmiayi.

<sup>8</sup> Tura uwishin Erimias nuna nakitiak “Auka péñkerchaiti” tímiayi. Akupniusha Yúsan umirkain tusa nuna tímiayi.

<sup>9</sup> Nuyanka Sauru, ni chíkich naari Papru, Yusa Wakanj pimiutkamu asa, nu uwishniun úmamkemas iis tímiayi

<sup>10</sup> “Ámeke wáitaitme. Anañkartiniaitme. Yajauchiitme. Maaj, iwianchiitme. Tura ashí péñker ana nuka imiá nakit-niuitme. Tsej, ¿urukantai Yusa jinti naka ana nu emeskim weam?

<sup>11</sup> Paij, yamaikia Uunt Yus asutiámattawai. Yamaikia amesha jimi kusurmatai untsurj tsawant tsáapnin penké íschattame” tímiayi. Tura nú chichamaik jii kusurmatai kirit ímiuk chikichan eamiayi enkeki jurukit tusa.

<sup>12</sup> Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

*Chíkich Antiukíanam etserkarmiania nu*

<sup>13</sup> Nuyá Juan waketki Jerusarénnum wémiayi. Tura antsu Pápruka ni tsaniakmarijiai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai.

<sup>14</sup> Nuyá Pirji péprun nankaikiar Antiukía péprunam jeawarmiayi. Nú Antiukíasha Pisitia nunkanam pujawai. Nuj jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi.

15 Tura nuĭ Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintátin chicham takakkurmeka yamaik titiarum. Antukarmi” tiarmiayi.

16 Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi.

17 Ii Yusri ii yaunchu uuntriñ Israer-shuartin achikmiayi. Tura niisha írara núnik Ejiptunam matsatainiaĭ Yuska nin páchiniak uunt awajsarmiayi. Yus ni kakarmarĭĭiaĭ nú nuñkanmaya ii yaunchu uuntriñ uwentikrarmiayi.

18 Túrasha atsamu nuñkanam ii uuntriñ kuarenta (40) uwitin Yuska aya kátsuntramiayi.

19 Tura nuyanka siati áentsun mátsatkainian, Kanaan nuñkanam matsamarmia nuna amukarmiayi. Nú nuñkan ii yaunchu úuntriñ susataj tusa Yus túramiayi.

20 Nuyanka ii uuntri akupniuriñ, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus.

21 Tura nuyanka áencha juísan nakitiainiak, uunt akupin náamkat tusar Yúsan seawarmiayi. Tuñiakui Yuska Sesa uchiriñ Saúran anaikiamiayi. Nú Saúra úuntriñkia Piñjamínkiauyayi. Tura Saúrsha kuarenta (40) uwí nú áentsun akupkat tusa Yus tsanĭatkamiayi.

22 Tura Saúr náamkan ataksha Yus awainĭkimiayi. Tura nuyá iiksau nú nuñkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchiriñ Tawitian winia enentáir jeamtai achirmakjai. Tura Winia umirtin átatui” tímiayi.

23 Wats, Tawit weeanmaya Jesusaiti. Tura Yuska Israer-aentsun Uwentikrartinian Jesusan anaitiukmiayi, yaunchu timiarin uminkiat tusa.

24 Jesuska táatsain Juan ashí Israer-shuaran tunaarinia enentáimtumar imiantinian ujakmiayi.

25 Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamuri, Kristu tutai, náarmena núchaitjai. Antsu Niñkia winia ukunmarui winittiwai. Tura Niisha wĭĭiaĭñkia ti nanĭkaamantu asamtai wikia sapatrincha atitrataj tíchamniaitjai” tímiayi.

26 ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiayi.

27 Iis, Jesusa túrunatniuriñ Yuska yaunchu ni etserniuriñ áamtikrachimakia. Tura ukunam Jerusaréñnumia shuar

ni akupniurijjaj tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirinti tícharmiayi. Tura, jakatí, tiarmia nuí, Jesusa túrunatniurin, Yus yaunchu chichakmia nuna, tímiatrusaran umikiarmiayi, tímiayi.

28 Jesuska penké tunaamkachunak yamaikia mantamnatí tusar Piratun seawarmiai, tímiayi.

29 Tura Yusa Papirjin ashí Jesusnan tímia nuna tímiannak umikiarmiayi. Tura nuyá krúsnumiá itiarar iwiarsarmiayi.

30 Túramanak Yus jakamunmayan iniantkimiayi.

31 Jesuska jakamunmaya nantaki, yaunchu Kariréanmaya Jerusarénum Niijjaj irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamurin etserainia nu' tímiayi.

32 'Iisha núnisrik shiir chichaman Yus yaunchu ii apachrin tiarmia nu étsereaji.

33 Iisha Israer-weeá asakrin, Yuska Jesusan iniantkimia nujaj ii apachrin anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

34 Tura Yuska Jesusa nantakmiarin jintintiak, tura ni ayashí káurchatniun jintintiak, chíkich Sarmu papinium juna áantikramiai:

“Nekas pénkeran Tawitian anajmatramaj nuna atumin amatatjai.”

35 Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashí káurtincha tsankatkashtatme.”

36 'Nekaatarum, yatsurtiram, Yuska Tawitia ayashin tíchamiayi nuna. Tawitkia Yus tímian amuk jakamiayi. Túrasha ni ayashinikia káurmiayi.

37 Tura antsu Yus iniantkimia nuna ayashinikia penké káurchamiayi.

38 Tuma asamtai, yatsurtiram nekaatarum. Jesusjainkete tunáa asakártin.

39 Tura Muisais yaunchu akupkamia nujaj tunáa tsankurnarchamnia nu, yamaikia Jesusjai tsankurnartiniaiti.

40-41 Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrurum menkatumpratarum. Wi Yus asan, átum pujarmena nuí, aents túrachminian túratajna nusha

penkesh nekaashtatrome, chíkich ujatmainiakuisha.”

Tu áarmaiti.

Tuma asamtai yatsurtiram, aneartarum atumin nuna túrutmawairum, Yusnan etserin aarma tana nútiksān.” Nuna chichaak amukmiayi Papru.

42 Tura nuyá Papru Pirnapíjjai jiinki wéenakui aents chichainiak “Chíkich sáwartincha jútiksarmek etserkatarum” tiarmiayi.

43 Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairi enentáimtusrum kakartarum” tiarmiayi.

44 Tura chíkich sáwartinchia nu péprunmaya ti untsurí aents Yus-Chicham antuktai tusar tuakarmiayi.

45 Tura Israer-shuarka ti untsurí áentsun tuakarun wáinkiar, suir iiniak, ti kajerarmiayi. Tuma asamtai Páprun katsekkar “Jú chichaana júka ántar tawai” tiarmiayi.

46 Támaitiat Pápruka Pirnapíjjai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwiaaku pujuschamnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiayi.

47 Nu túratarum tusa, Uunt Yus akuptamtsujik. Jes, ni Papiriin júna tawai:

“Israer-shuarcha Winia nekarawarat tusan anaitiukjame.

Tura ashí nunkanmaya aents uwemprarat tusan akuptajme.”

Tu áarmaiti” tímiayi.

48 Nú chichaman antukar Israer-shuarcha ti wararsar “Uunt Yus tana nuka imiá penkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi.

49 Tú tumaki Yus-Chicham nú nunkanam ashí jamarmiayi.

50 Túrasha nuwan, Yúsan penker enentáimtuinian tura penker wekainian, Israer-shuarka yajauch enentáimtikrarmiayi. Áishman penkeri ármia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ni nunkeya jiki awemarmiayi.

51 Túram Papru Pirnapíjjai, jú aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmiayi.

52 Yusa Wakanísha pimiútkamu ásar Yus-shuarka ti warasarmiayi.

## 14

### *Ikiuniu Péprunam túrunamia nu*

<sup>1</sup> Ikiuniu péprunam Papru Pirnapíjjai jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi.

<sup>2</sup> Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi.

<sup>3</sup> Tuma asamtai Papru Pirnapíjjai nú núnkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitnenkratairin etserkarmiayi. Tura, etserinia nu winia kakarmarjainti tusa, Yuska aents túrachminian najanmamtikiawarmiayi.

<sup>4</sup> Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi.

<sup>5</sup> Tura nuyá Israer-shuarchajai Israer-shuarka chichasar pepru uuntrijjai chichasarmiayi. Tura Papru Pirnapíjjai katsekkar tura kayajai tukurar, yajauch awajsatniun nankamawarmiayi.

<sup>6</sup> Túrasha Papru Pirnapíjjai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nunkanam pujuiniawai.

<sup>7</sup> Tura Yus-Chichaman etserkarmiayi.

### *Ristra péprunam Páprun kayajai tukurarmiania nu*

<sup>8</sup> Ristra péprunam tunamaru áishman pujumiayi. Ni akiinia-muriya tuke wekaichauyayi.

<sup>9</sup> Nú áishman Papru chichaamun antúu pujumiayi. Túman Papru úmamkemas nin ísmiayi. Niisha, Yusa kakarmarjjai tsuamartatajai, tu enentáimiun Papru nekaamiayi.

<sup>10</sup> Tura Pápruka kakantar chicharuk “Wajakim wewe ajasam wajasta” tímiayi. Tutai áishman wiut kutsuar wajaki wekaimiayi.

<sup>11</sup> Papru túramia nuna aents wáinkiar Rikiaunia chichamjai unsumainiak “Yuska áishmanka áanin ajasaru in tarutramarji” tiarmiayi.

<sup>12</sup> Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi.

<sup>13</sup> Nú pepru jeamunam Júpitir náartin yusa jeen pujumiayi. Tura Júpitir náartin yusa pátriri kukujin iwiarkamun, wáakajai itiamiayi. Tura niisha ni áentsrijjai wáakan maatai tusar pujuarmiayi. Tura tikishmatrar ajamsatai, tiarmiayi.



14 Tura Jesusa akatramuri Pirnapísha Páprusha nuna nekaawar, auka nakitiaji tusar, ni pushirin jaararmiayi. Túrawar aents írunmanum pachiniawarmiayi.

15 Tura tiarmiayi “Shuara, çurukantai áitkiarum? Iisha yúschaitji. Atumea áankiitji, tiarmiayi. Penké ántrorum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nunkancha, nayaantsan-cha, tura ashí nuí írunna nunasha najanaiti, tiarmiayi.

16 Jes, aents ni enentáimmarijiaín wekasarat tusa Yuska yaunchu tsankatkamiayi.

17 Tuma ain shuaran péñker awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmaya aupturmaji. Tura ejemamar warasarmi tusa yurumak nerektinniasha súramji” tímiayi.

18 Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

19 Tura nuyá Antiukíanmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmaya japiki júkiar arant áepsarmiayi.

20 Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiaí Tirpi péprunam wearmiayi.

21 Tírpinium pujasar uwempratín chichaman etserkar-matai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi.

22 Waketainiak “ashí Yus tana nu tímiatrusumek tuke umirkatarum” tuíniak Yus-shuaran ikiakárarmiayi. Tura nin tiarmiayi, “Yusa akupeamuriín pachiinkiatájtákurkia ti wáitsatniuitji.”

23 Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áujsar chicharainiak, “umirkarumna nú Yus iirmasarti” tiar ikiukiarmiayi.

*Yaunchu jíinkiarmla nú Antiukíanam waketkiarmiayi*

24 Nuyá Pisitia nunkanam nankaamakiar Pampiria nunkanam jeawarmiayi.

25 Nuí jeawar Pirji péprunam Yus-Chichaman etserkar nuyá Ataria péprunam wearmiayi.

26 Nuí kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsainú Antiukíanmaya Yus-shuar chichainiak, Yusa takar-tri túrattarmena nuna Yus waitnentramak yáinmakarti, tiar akupkarmiayi nuik<sup>i</sup>.

27 Nú Antiukíanam jeawar, Yus-shuaran irurar, ashí Yus nin yáinkíarmia nuna ujakarmiayi. Tura nútiksáñ Israer-shuarchan Uunt Yus uwentikrataj tusa untsukmia nunasha ujakarmiayi.

28 Tura nuyá Yus-shuarjaj Papru Pirnapíjjaj núkap tsawant pujusarmiayi.

## 15

### *Jerusarénum Yus-shuara úuntrijjaj iruntrarmiania nu*

1 Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprash-tatrome” tiarmiayi.

2 Tuma asamtai Papru Pirnapíjjaj, núchaiti tusar, nú áishmanjaj ti kakaram chicharnaikiarmiayi. Túrusha nuu enentáiniak enentáimsatniun tujinkíarmiayi. Tuma asamtai Antiukíanmaya Yus-shuar Páprun Pirnapíncha, atumsha chíkích áentsjaj Jerusarénum wétarum tusar akupkarmiayi. “Tura nuj Jesusa akatramurisha Yus-shuaran wáinniusha ini-asrum iturmainkit tusarum péñker nekaatarum” tiarmiayi.

3 Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

4 Tura Páprusha Pirnapísha Jerusarénum jeawarmatai Jesusa akatramurisha Yus-shuara wáinniurisha tura penké Yus-shuarsha itiawarmiayi. Tura niisha túrunamia nuna mash etserkarmiayi.

5 Túrusha Pariséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi.

6 Nuyasha Jesusa akatramurisha Yus-shuaran wáinniusha nu chichaman nekaatai tusar iruntrarmiayi.

7 Chichasua umikiarmatai Pítiur wajaki tímiayi, “Yatsur-tiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme.

8 Tura Yus Niñki ashí aentsu enentáin neka asa, Wí shuar ajasmin áiniawai tusa, ni Wakanin Israer-shuarchancha susamiayi, in suramsamiaj nútiksáñ.

9 Yus incha aushatka awajtamsachmaji, tímiayi. Antsu métekraketji. Tuma asamtai niisha Yúsan enentáimtuiniakui, Yuska enentáiyān ni tunaarīn japirarmāi, tímiayi.

10-11 Tura iikia nékaji niya áantsarik Jesukrístu waitnenkar-tutairijjiai uwempraitji. Nuinkia çurukamtia Yus uwempraru ániawai tajsha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsançhakait. Warí, ii úuntriçsha tura iisha ashí Muisais tímia nu umiktin tujinkiamji. Tuma asamtai, çurukamtai nú káarkasha Israer-shuarchasha áentskatin wakerarum?” tímiayi Pítiur.

12 Pítiur nuna tutai Pirnapísha Páprusha chichainiak, “Israer-shuarchasha ni kakarmarín nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi.

13 Nuna ujasua amikmatai, Jakupusha tímiayi “Yatsurú, an-tuktarum.

14 Nuik túrachman Yus túramia nuna ii yachi Semuñ Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiayi.

15 Jusha Yúsnan etserin yaunchu áarmia nu tímiatrusan túrunayi. Júiti aarma:

16 “Israer-aents meserar, jea sáanakniua áintsan ániawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai.

17 Ashí nunkanmaya aents, Israer-shuarcha ainia nu, winia náarun pachinia nu, Winia eatkarat tusan túrattajai.

18 Uunt Yus nuna yaunchu ujakmiayi.”

Tu áarmaiti’ tímiayi.

19 “Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajsachmi.

20-21 Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarín jintintiainiatsuk. Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajentikramua nu yuawairap. Tura numpasha umairap.” Tu áatratai’ tímiayi Jakupu.

22 Nuyá Jesusa akatramurísha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjjiai wéakui, shuar niijjiai nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áarmiayi.

23 Tura niijjiai ju papin áarman akupkarmiayi: “Tisha Jesusa akatramurí tura Yus-shuara wainniurí tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji.

24 Juyá aents ii chichamejainchu atumiin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarne. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume.

25 Tuma asamtai nu nekaar, iisha métekrak enentáimsar, jimíará áishman akupkatin anaikiamji. Ju áishman ii aneamu yachi Páprujai Pirnapíjiaisha atumin írmasarat tusar akupeaji.

26 Papru tura Pirnapísha ii Uuntri Jesukrístunam surumakarmiayi, ni takatrisha tsumai ain túrami tusar.

27 Niijjai Jútassha tura Sérassha akupeaji. Ii chichaaunia nuna niisha ni wenejai atumin ujatmakartatui.

28-29 Kame túratin asamtai iisha Yusa Wakaníjjai ju áartin enentáimsaji. Naman ántar-yus susamu ana nu yuawairap. Tura numpasha umairap. Kajentikramu ana nusha yuawairap. Tura penké tsanirmawairap. Nuyasha chíkichkia nú nankaamas tíhattaji. Tura antsu nu iniaisarmeka, pénger átatrume. Ayu, Yus wáitmakarti.” Tu áarman akupkarmiayi.

30 Tura Antiukíanam akupkam wearmiayi. Nu jeawar Yus-shuaran irurar, papin súsarmiayi.

31 Tura Antiukíanmaya Yus-shuarsha nu papin áujсар, pénger jintíamu chichaman áarman wáinkiar, ti shiir enentáimsarmiayi.

32 Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi.

33 Tura nu ishichik tsawant pujusarmatai, Yus-shuarka, pénger waketkitiarum, tiar akupkarmiayi.

34 Tura Séras juáktinian wakerukmiayi.

35 Páprusha Pirnapíjjai juakarmiayi Antiukíanam. Niisha chíkich aentsjai Yus-Chichaman étseruk pujuarmiayi.

*Papru atak Yus-Chichaman ipiampártasa wémiania nu*

36 Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nu Yusa ii yachi ainia nusha urukák pujuinia iyutai” tímiayi.

37 Pirnapíkia Juan Márkusan ijjai winiti tusa wakerimiayi.

38 Tura Pampiria nunkanam Juan Márkussha niisháa weu asamtai tura Yusa takatrín iniaisa asamtai, Pápruka ayatniun nakitramiayi.

39 Papru Pirnapíjjai ti kakannairar kanakarmiayi. Tura Pirnapíkia Márkusan ayaki Chípriniam wémiayi.

40 Pápruka Sérasan ayaki wéakui Yús-shuar Yus yáinmakarti tinia akupkarmiayi.

41 Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

## 16

### *Páprusha Sérasjai Timiutéun júkiarmiania nu*

1 Papru Sérasjai Tirpi pepru írikutak Ristra péprunam jeawarmiayi. Tura nuĵ Rístranam Yus-shuaran wáinkiarmaiya, ni naari Timiutéu. Ni nukurínkia Israer-shuar Yus-shuarauyayi. Tura ni aparínkia Kriaku áentsuyayi.

2 Tura Ristra péprunmaya Ikiuniu péprunmayasha Yus-shuar ármia nu, Timiutéu péñker wekaawai, tiarmiayi.

3 Kame Pápruka Timiutéun uyuuntusat tusa wakera asa, Timiutéu aparĵ Kriaku-apachin nekaawarmatai Israer-shuar nuĵ pujuarmia nu yajauch enentáimpraraĵ tusa tsupir-mantikiamiayi.

4 Tura nuyá Papru Timiutéujai ashí péprunam nuĵ sétur nuĵ sétur wéenak Jesusa akatramurĵsha Yus-shuaran wáinniusa Jerusaréñnum nuik jintintian umiktarum tusa ujarkutak wearmaiya.

5 Tu ujamu ásar Yus-shuar nú arant Yúsan enentáimturar kakararmiayi. Tura ashí tsawant kawenĵki wearmaiya.

### *Papru iimiarmia nu*

6 Tura Yusa Wakanĵkia Páprun Yus-Chichaman Asia nuñkanam ujaktinian tsanĵkatkachmaiya. Tuma asamtai Pirĵia nuñkanam tura Karasea nuñkanam aĵrikutak,

7 Misia nuñka jeatniunam jeawarmiayi. Túrunawar “Pitinia nuñkanam wetai” tiarmiayi. Túrasha Yusa Wakanĵ nuĵsha wétinian suritkiarmiayi.

8 Tuma asamtai Misia nuñkanam menantki Truas péprunam pachiniawarmiayi.

9 Nuĵ jeawar Papru kashi iimiarmiayi. Masetúnia nuñkanmaya áishmanĵkan wajan wáinmaiya. Nu áishman Páprun chicharuk “Winitritia. Yáingtkiamnium” tímiayi.

10 Nuyañka tu iimiarmatai, wisha Páprujai wetai tusar iwiarnarmiaĵi. Tura Yus incha nú nuñkanam ni chichameĵ etserkat tusa ti nekas untsurmakrin wéajĵi, tímiaĵi.

### *Jiripius Péprunam túrunamia nu*

11 Tura nuyañka kanunam enĵkemprar Truas péprunmaya ĵĵinkir Samutrásia nuñkanam jeamiaĵi. Tura kashin tsawar nuyañka katĵarar Niápuris péprunam jeamiaĵi.

12 Tura Niápurisnumĵ náwek Jiripiusnum jeamiaĵi. Nuĵ Jiripius péprunmanka Rúmanmaya aents matsamsa ármiaiya. Tura nú péprusha Masetúnia nuñkanam nekas uunt pepruyayi. Tura nuĵsha seturmajĵi.

13 Nuyá sáwartin tsawarmatai pepru ikiukir entsá supichik wémiaĵi. Yus áujsatniun iruntrarmia nuĵ pujusar, nuwa iruntrarmia nu Yus-Chicham uĵakarmiayi.

14 Nuí Tiatira péprunmayá nuwá, ni naari Ritia wáinkiamiaji. Niisha tarach yamakain péńkeran súriniuyayi. Yúsasha shiir awajniuyayi. Yus-Chichaman Papru etserkamia nuna niisha péńker anturkamiayi. Túman, Uunt Yus Papru chichaamun umirkat tusa ni enentáin takasmiayi.

15 Túruna nú nuwá níniurijiaj imianmiayi. Tura nuyasha chichaak “Yus-shuar nekas ajasai túrutkurmeka winia jearuí winitiarum” tímiayi. Tura nuí jeawakrin setumtikramprami-aji.

16 Tura nuyá ukunam Yus aujsatai tusar wekaamar nuwách nekaamin-iwianch enkemtuamu inkiunmakmiaji. Nu nuwáchikia misatkauyayi. Niisha nékamkui nérenniurisha ti kuitriniawarmiayi.

17 Tura nú nuwách incha Pápruncha pataaturmamiayi. Tura kakantar untsukum “Ju áishmansha nekas Uunt Yúsan umirkaru ániawai. Tuma asa niisha atumin uwempratin chichaman ujatmarme” tímiayi.

18 Tura nú nuwáchisha ti núkap tsawant tu wekaimiayi. Titmakui, Papru ayanmar iwianchin chicharuk “Jesukristu naarijiaj tájame: jíinkitiá ni enentáiyá” tímiayi. Tutai íwianchkia nú chichamaik jíinkimiayi.

19 Tura nuwáchia nérenniurisha, íwianch jíiki awematniun nekaawar, Páprun Sérasnasha kajerak achikiar pepu uuntri íisarar tusar ajapén júkiarmiayi.

20 Tura pepu úuntriin ejeniar tiarmiayi “Ju áishman Israer-shuar ániawai. Tura in páchim enentáimtikramainiaji.

21 Tura iisha Rúmanmayá aents árin, ii túrachminian, iikia asumprachman jintintramainiaji” tiarmiayi.

22 Tura nuyanka ashí aents Páprun Sérasnasha kajerkarmi-ayi. Túramtai pepu uuntri chichainiak “Pushiri áitkiarum numijiaj asutiátarum” tiarmiayi.

23 Tura nuyá ti asutsua amikiar sepunam enkeawarmiayi. Tura sepú-iinian chicharuk “Ti péńker iistá pisararain” tiarmi-ayi.

24 Nu chichaman antuk, sepú-iin ti init awayámiayi, tura nawen numi najanamujaj tee chanuntamiayi. Tú tura ikiuk-miayi.

25 Tura kashi ajapén Papru Sérasjaj Yusan áujainiak kantam-priarmiayi. Tura chíkich enkeamusha nuna antúu pujuarmi-ayi.

26 Tu pujuiniaj aya aneachma ti kakantar uurkamiayi. Tura sepusha muchitramiayi. Túrunamtai sepú wáitirisha ashí urantrarmiayi. Tura aents jirujaj enkekar jíinkiamusha mash atiniakarmiayi.

27 Túrunamtai sepú-iin shintiarmiayi. Tura wáitisha mash uranar aan wáiniak, enkeamusha jiiniar shiákchariash tusa ni puniariniak ukuiniak máamattsa pujumiayi.

28 Tura Papru untsuak “Amek yajauch awajmamsaip. Ashí pujuiniaji” tímiayi.

29 Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuraŋki jearmiayi.

30 Tura aa jiki aniasmiayi “Uunta, ¿warí itiuirkattaj uwem-prataj tusana?” tímiayi.

31 Tutai niisha tiarmiayi “Uunt Jesukrístu nekas enentáimtustá. Túrakmeka amesha, tura áminiurmesha uwemprattarme” tiarmiayi.

32 Tura nuyá ashí ni jēen pujuarmia nunasha Yus-Chichaman ujakarmiayi.

33 Tura tsawant irankai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarjijai uchirijiai imianiarmiayi.

34 Túramtai nuyasha ni jēen júkiarmiayi. Tura nuisha ayurawarmiayi. Tura sepú-iincha niiniurjijai Yus-shuar ajasu ásar ti shiir warasarmiayi.

35 Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi.

36 Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asam-tai yamaikia péŋkerak jíinkitiarum” tímiayi.

37 Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar ímiainiaiŋ asutiámamji. Túrawar sepunam enketmamji. Tura ¿urukamtai yamaikia uuk akuptamkataj tusa wakeruinia? Atsá. Antsu uuntcha niŋki taar jiiirmaktiai” tímiayi.

38 Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar.

39 Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya júkiar “Yamaikia wáitneasrum wetarum” tiarmiayi.

40 Papru Sérasjai nuyá jíinkiar Ritia jēen wearmiayi. Tura Yus-shuaran ikiakárar ikiukiarmiayi.

## 17

### *Tisarúnikianam charaatum ajarmia nu*

1 Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nui Israer-shuara iruntai jēe ámiayi.

<sup>2</sup> Tura Pápruka nuna tuke túrin asa nu jeanam wémiayi. Tura nujsha menaintiu sáwartin Yus-Chichaman paant etsermiayi.

<sup>3</sup> Tura Páprusha Yus-Chicham tana tímiatrusan jintintiarmiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

<sup>4</sup> Nuna takui Israer-aents chikishtarchik umikiarmiayi. Túrawar Paprujai Sérasjaisha tsaniñkiarmiayi. Tura Kriaku aencha ti untsurí Yúsan umirkarmiayi. Tura nuwá penkeri armia nusha nútiksaran umikiarmiayi.

<sup>5</sup> Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntriñ suruktai tusar Jasunka jeen árenkarmiayi.

<sup>6</sup> Túrasha Páprun Sérasnasha awetrar, Jasunkan tura chíkich Yus-shuarnasha achikiar japirkutak júkiarmiayi. Tura pepru úuntriñ juñiak tiarmiayi “Ju áishmansha ashí nunkanam charaatum ajá wekarmia nu yamaikia tímiajai tarutramarji.

<sup>7</sup> Tura ju Jasun ni jeen itiaarmiayi. Tura niisha ashí mash Rúmanmaya uunt akupniu chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi.

<sup>8</sup> Nu chichaman antukar, aents nuj pujuarmia nu, úuntriñmiak charaatum ajarmiayi.

<sup>9</sup> Tura Jasun chíkich Yus-shuarjai Papru nekas awemattaji tusar, paj, kuit ikiuaji, tiarmiayi. Nuna takui pepru uuntriñ akupkarmiayi.

### *Piríanam*

<sup>10</sup> Nuñkia nú kashi Yus-shuar Páprun Sérasnasha Piría péprunam akupkarmiayi. Tura nuj jewar Israer-shuar iruntai jeanam wearmiayi.

<sup>11</sup> Piríanmaya aentska Tisarúnikianmaya áentsjainkia nankaamas penker enentáimkia ármiai. Tuke enentáijiai Yus-Chichaman ántiarmiayi. Túrawar tuke tsawant imia niñkisha Papru tana nuna nekasashit tusar Yusa papirin ii wearmiayi.

<sup>12</sup> Tuma ásar untsurí shuar Yus-shuar ajasarmiayi. Tura Kriaku aents nuwá penkeri armia nusha áishmansha umikiarmiayi.

<sup>13</sup> Túrasha Tisarúnikianmaya Israer-shuarka Papru Yus-Chichaman Piría péprunam étserun antukar nuj weriar charaatum awajarmiayi.



14 Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujai nuin Piríanam juakarmiayi.

15 Tura Páprun nemariarmia nu Atenas péprunam nin eje-yarmiayi. Tura niisha waketainiakui, Papru chichaman akatar akupkamiayi, Sérassa Timiutéusha wárik winiartí tusa.

### *Atenasnum*

16 Tura Papru Atenas péprunam pujus Sérasnasha Timiutéuncha nákamiayi. Nuí nú péprunam ántar-yus ti írunkui Páprusha kúntuts enentáimmiayi.

17 Tuma asa Israer-shuar iruntai jeanam Israer-shuarjai tura chíkich aents Yúsan enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiayi.

18 Nuyá chichaman jintin chíkich naari, ipikiuriu, armia nu, tura chikichcha, ní naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha júsha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurín tura aents jakamunmaya nantaktinian étserkui nuna tiarmiayi.

19 Nuyanka aents iruntainiam, naari Ariupaku támanum Páprun júkiarmiayi. Nuísha tuke irunin áirmiayi. Nuí Páprun aniasarmiayi “Iisha ame yamaram támena nu nekaatai tusar wakeraji, tiarmiayi.

20 Amesha nusháa chicham jintiniaitme. Túmaitkiui jú chichamsha warintiuak tusar nekaatai tusar wakeraji” tiarmiayi.

21 (Atenasnumiá aencha tura chíkich nuñkanmaya shuar nuí pujuarmia nusha aya yamaram chicham amia nunak ántiarmiayi. Tura aya nunak áujmatiararmiayi.)

22 Nuyanka Papru Ariupakunam ajapén wajaki tímiayi “Ate-nasnumiá áishmantiram, wi nékajai, atumsha atumi yusrí ainia nuyá tsurakchamniaitrome, tímiayi.

23 Kame wi nuik atumí yusrí enentáimtutainiam ístaj tukaman nuí jeachin iwiamun, JU NEKAACHMA YUSNAITI, tu áarman wáinkiamjai. Wátsek, jú Yus átum nékachiatrum tikishmatrumna nuna ujaktajrume’ tímiayi.

24 ‘Nekaatarum, nu Uunt Yuska ashí nuñkan tura nuí írussa nuna najanaiti. Tura Niisha nayaimpin nuñkancha nérenniurinti. Tura aents najanamu jeanam nú Yuska pu-juchuiti.

25 Niisha aents yáinkiat tusa atsumatsui. Warí, imia-niñki Niisha ii iwiaakmarín, ii mayattairíncha tura ashí írussa nunasha súramtsujik, tímiayi.

26 Nekaatarum. Nu numpanmayanak ashí áentsun najamiayi ashí nuñkanam matsamsarat tusa. Tura Yuska ii tsawantrin nekapmaiti; ii pujustinniasha nútiksā nakakmiayi.

27 Winia eátkar wáitkiarat tusa Yus nuna túrayi. Túrasha Yus jeashtaka pujurtamtsuji, tímiayi.

28 Jes, iisha Yusjaj iwiaakji. Yusjaj muchitiaji. Tura Yusjaj ii kakarmari takakji. Nútiksā atumí papí-aintri tíchamka “Ashí incha Yus najatmaitji.”

29 Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi.

30 Aents Yúsā nekainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiā enentáimpratarum” túramji, tímiayi.

31 Yuska áishmañkan anaikiaiti. Nú áishmañ ashí aentsti, yáki péñkeran túriniait, yáki yajauchin túriniait núnaka nekar-mattaji. Nú áishmañ Yus akupkamun tuke enentáimtakui Yus nin anaikiaiti. Tura tsawant nú túrunatin átatna nuna Yus Niñki achikiuiti. Túrasha nekas anaikiajai tusa, tura ashí áentstiram nekaatarum tusa nú áishmañkan jakamunmaya iniantkimiayi” tímiayi Papru.

32 Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi.

33 Tutai Papru iniaisamiayi.

34 Tura chíkich aentska Papru táman umikiar nin nemsarmiai. Nuisha Tiuníseu páchitkiauyayi. Niisha Ariu-paku áentsuyayi. Tura nuyasha nuwā, ni naarj Támaris, tura chíkich aencha nútiksarañ nemariarmiayi Páprun.

## 18

### *Kurintiu péprunam*

1 Nuyānka Papru Atenas péprun ikiuki Kurintiu péprunam wémiayi.

2 Tura nuj Israer-shuaran ni naarj Akiran wáinkiamiayi. Akiraka Puntu nuñkanam akiiniauyayi. Tura ukunam Itiaria nuñkanam pujaj uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nuñkanmaiti. Nuñ awemamu ásar Akira Kurintiunam nuik támiayi nuwē Pirisírajaj. Tura Pápruka Akiran chichastaj tusa werimiayi.

3 Akirasha Páprusha mai juna takau ármiayi, tarach ti núparman jea najantain najanin ármiayi. Tuma asamtai Papru Akiraj seturmiayi nu takat túrawartai tusa.

4 Tura tuke sáwartin Papru Israer-shuar iruntai jean wéuyayi. Nuisha Israer-aentsun Kriaku-aentsnasha nútiksarañ Yus-Chichaman ujakar enentáimtikrarmiayi.

5 Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmenta nu Jesusaiti” tímiayi.

6 Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuñkia ikiuajrume tusa, ni pushirñ pear tímiayi “Atumek makuumarme. Tura wikia Yusaj makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

7 Tura nuyanka Israer-shuar iruntai jeanmaya jiinki, Yusan enentáimtin áishman Justu jeen wémiayi. Ni jeenka Israer-shuara iruntai jeen ayamach pujumiayi.

8 Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuarijjai uchirijjaisha Yusan umirkamiayi. Tura chíkich aencha Kurintiunmaya armia nu nútiksarañ Yus-Chichaman antukar, Jesusan enentáimtusar imianiarmiayi.

9-10 Nuyá Uunt Yus Páprun mesekran ipiatkamiayi. Chicharuk “Peñké ímiatik awajtamsachartatui Wi ámijjai pujakui. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

11 Tura nuñ Kurintiu peprunam jimiará uwí ejesattuk Yus-Chichaman étseruk pujumiayi.

12 Tura Kariun, Akaya nunka akupniuri anaikiamu aj, Israer-aents Páprun kajerarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi.

13 Tu túrawar akupniun chicharainiak “Ju áishman Yusan umirkatniun Muisais akupkamia núnaka íkias ausháa jintíawai” tiarmiayi.

14 Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuiñkia, tura akupniun umirchakuñkia, tárugna nuna anturkaintjarme.

15 Túrasha aya chichamnak tura aya náariniak atumí uuntri akupkamia nunak tau asamtai, atumek nuámtak íistarum tájarme. Wikia nu chichamnum pachinkiatniun nakitiajai” tímiayi.

16 Taku aa jíikmiayi.

17 Tura nuyanka Kriaku aents Israer-shuar iruntai jea úuntriñ Sústinisian achikiar awatiarmiayi akupniusha

íimmianuman. Túrasha akupin Kariunka túranak penké pachischamiayi.

*Papru Antiukíanam waketki, nuyá atak Yus-Chichaman ipi-apartasa wémiania nu*

<sup>18</sup>Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusaí yachi ármiania nuna áujas ikiuak Pírisírajai ni aishri Akirajai Senkrea péprunam wearmiayi. Nuí Israer-shuar túrutain umíak Papru ni intiashin awampramiayi, nuik Yúsan tímiaj nuna yamá umíajai tusa. Nuñkia kanunam enkemprarmiayi Siria nunkanam waketkitiai tusar.

<sup>19</sup>Tura nuyá Ipisiu péprunam jeawar Pápruka Pírisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi.

<sup>20</sup>Tura niisha Páprun juin pujustá tusar seawarmiayi. Túrasha támaitiat, tujintiajai, tímiayi.

<sup>21</sup>Nuyanka áujas ikiuak “Wisha Jerusarénum námper átatna nuna pachiiintiuktiniaitjai. Tura Yus akuptakuñkia atak tatajai atumin íistaj tusan” tímiayi. Tura kanunam enkemar Ipisiunmayá jíinkimiayi.

<sup>22</sup>Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuí áujsataj tusa. Tura nuyá Antiukíanam wémiayi.

<sup>23</sup>Tura Antiukíanam ishichik pujus ataksha weak Karasea nunkanam tura Pírijia nunkanmaani wekaráktak wémiayi. Tura weak Yus-shuar matsamarmia nuna chicharak iki-akáramiayi.

<sup>24</sup>Tumáa pujai Arijiántria péprunmayá Israer-aents Apurus Ipisiu péprunam jemiayi. Niisha Yusa yaunchu papirin ti péker nekaamiayi. Etserkatniuncha ti nékauyayi.

<sup>25</sup>Uunt Yus tímia nunasha unuimiátrauyayi. Tura tuke enentáijjai chichasmiayi. Jesusa túramurin péker jintinniuyayi. Túrasha aya Juan imiakratmanak nekaamiayi.

<sup>26</sup>Ju Apurus arantutsuk Israer-shuar iruntai jeanam chichamiayi. Tura Pírisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintinrarmiayi.

<sup>27</sup>Nuyá ukunam Apurus, Akaya nunkanam wétaj takui, Ipisiunmayá Yus-shuar yainkiar papí áarar atakas akupkarmiayi. Nú áentsnum pékerak jeat tusar túrawarmiayi. Tura Akayanam jeá, nú áentsun Yusa waitnenkratairijiai uwempraru ármia nuna ti yainkiarmiayi.

<sup>28</sup>Tura Apurus Israer-aentsjai paant chichasmiayi. Túrasha Yusa Papirijiai, Jesussha nekas Yusa anaikiamurinti tusa paant jintiak nincha nupetkamiayi.

## 19

*Papru Ipisiunam jeamiayi*

1 Tura Apuruska Kurintiunam pujájí Pápruka náinniumaani wekaráktak, Ipisiunam jeamiayi. Tura nuísha Yus-shuaran wáinkiamiayi.

2 Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

3 Tutai Papru aniasmiayi “Entá, ¿nuikia atumsha warí enentáimsarimea imianmiarum?” tímiayi.

Tutai niisha tiarmiayi “Juan jintinramamiaj nu iisha enentáimsar imianmiaji” tiarmiayi.

4 Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

5 Nuna antukar niisha Uunt Jesusa náarin enentáimtusar ataksháa imianiarumiayi.

6 Tura Papru ni uwejejai nin antiñmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarumiayi.

7 Nusha tuse (12) áishman árumiayi.

8 Tura nuísha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi.

9 Tura chíkichka ni enentáin ti ikiatsuararmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirariin tuke tsawant Yus-Chichaman ujaarmiayi.

10 Nuna túruki jimiara uwí etserkamiayi. Túramu asamtai ashí Asia nunkanmayá aents Israer-shuar tura Israer-shuarcha Uunt Jesusa túramurin antukarmiayi.

11 Tura aentsti túrachminian túrat tusa Yuska ni kakarmarin Páprun susamiayi.

12 Jáanchniasha pushincha Papru antiñman júkiar, nánkamas jaa shuaran etejim, nú jaa shuarsha nuna antiñkiar péñker ajaarmiayi. Iwianchrukusha nuna antiñkiar, iwianch jíinkimtai ankant ajaarmiayi.

13 Tura chíkich Israer-aents uwishin árumiayi. Tura niisha chíkich chíkich péprunam wear iwianchrukun iwianchrin jíirki akuptin árumiayi. Tuma asa niisha Jesusa náarijjai

iwianchin jíktiai tusar, iwianchin chichartuiniak “Nu Jesus Papru ujaana nuna náarjíjiai jíinkitiarum tájarme” tiarmiayi.

<sup>14</sup> Tura Israer Patri uuntrí Esewia náartin, siati uchirí ármia nu, nuna túriarmiayi.

<sup>15</sup> Túrasha Jesusa náarjíjiai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi.

<sup>16</sup> Nuna tinia iwianchruku áishman tsékeñki nú áishmankan kakaram katsumak nupetkarmiayi. Túram ti katsumam ni-isha misú tura numpamnawar jíinkiar pisararmiayi.

<sup>17</sup> Nusha Ipieniu péprunam túrunamiayi. Túrunamtai Ipieniu péprunmaya Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarin shiir awajsarmiayi.

<sup>18</sup> Túmainiai untsurí shuar Yúsan umirkaru Yus-shuar ajat-suk tunáa túrawarmia nuna paant ujakarmiayi.

<sup>19</sup> Tura untsurí uwishniunawarmia nu, wawekratai papí ármia nuna itiarmiayi. Itiar, júka iniaiyaji tusar, ashí íimiainiain áesawarmia. Nú papí áesawarmia nuna kuítrisha senkuenta mir (50.000) nankaamasauyayi.

<sup>20</sup> Tu túrunamtai Uunt Yusa chichamep pampanki tura nupet-maki wémiayi.

<sup>21</sup> Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénnum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi.

<sup>22</sup> Masetúnia wétin asa Papru ni tsaniakmarin Masetúnia nunkanam emka akupkamiayi. Timiuteun Erastujai akupkarmiayi. Tura ninkia Asia nunkanam seturmiayi.

### *Ipiasiunam ti charaatum ámiania nu*

<sup>23</sup> Pápruka tuke Ipiasiunam pujai, nuyá aents Yus-Chichaman nakitiainiak charaatum ajarmiayi.

<sup>24</sup> Iis, nui Ipiasiunam kaya-yusa jee ámiayi. Nu yus núwauyayi, Tiana naartin. Tura áishman, Timitriu naartin, nú jean nakumak uchichin najanniuyayi kuitjai. Tura niisha nú takatjai ti kuítrintin ajasmia. Tura chíkich áishman nú takatan takarmia nunasha ti kuítrintin awajsarmiayi.

<sup>25</sup> Timitriusha niijjai takarmia nuna ikiaanak, chikichnasha niijjai métek-taku takarmia nunasha ikiaanak niijjai charaatum ajarmiayi. Timitriusha tímiayi “Winia írutramutiram antuktarum. Iisha ju takat takaajnia jujai ti kuit achíatsjik.

<sup>26</sup> Tura atumsha ju Papru wáintrumna nu tura ántarmena nu chichaak “Ashí aents najanamu yuska ántar áiniawai” tatsuk. Nuna tau asa, jui Ipiasiunam, tura arant ashí Asia nunkanam,

ni yúsrin iniaisarat tusa enentáimtikrarai. Tuma asamtai untsurí aents, ii yusrí Tiánan ikiuiniak, Papru tana nuna umirainiatsuk.

<sup>27</sup> Papru tu étserkui, iisha itiurchat pujuschattajik. Kuit ii achiaj nuka menkakashtatuak. Tura nú arantcha ii yusrí Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusrí Tiana shiir awajainia nuna yapajíáwar aun nakitrachartatuak” tímiayi Timitriu.

<sup>28</sup> Nuna antukar aencha ti kajekar charaatum ajarmiayi. Túmainiak “Ipisiu shuartikia, aya Tianak wakeraji” tu untsummiarmiayi.

<sup>29</sup> Nuiñkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemanin ármia nuna achikiar japirkutak iruntai jeanam júkiarmiayi.

<sup>30</sup> Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi.

<sup>31</sup> Tura Asia nunkanmaya uuntri, Páprun amikri ásar, aijnkia wayawain tusar chichaman akuptukarmiayi.

<sup>32</sup> Túrasha irunar pujuarmia nu, páchim enentáimprar, chíkichka nusháa untsummiarmiayi. Tura chikichcha nútiksaran ausháa untsummiarmiayi. Tura chíkichka ti untsurí, nekaachar “wariniak irunturara” tiarmiayi.

<sup>33</sup> Chíkich nuj wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimiayi.

<sup>34</sup> Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipisiu shuartikia aya Tianak wakeraji” ímia-imiatainiakua tí nukap pujursarmiayi.

<sup>35</sup> Ipisiu pepru papí-aintrisha áentsun itiatmamtik tímiayi “Ipisiu shuártiram antuktarum. Ii uunt yusrí Tiana jee ístinia íchukaitiaj<sup>i</sup>. Tura ni nakumkamurisha nayaimpinmaya iniarmiania nusha íschatniukaitiaj<sup>i</sup>. Tura nunasha ashí aents paant nékainiatsuk, tímiayi.

<sup>36</sup> Warí, núnaka ashí aents nékainia asamtai atumsha itiatkatarum. Túrarum enentáimtsuk yajauch túrawairap, tímiayi.

<sup>37</sup> Ímiatarum. Ju áishman átum itiarumna nu, ii yúsrin yajauch chicharkacharai. Tura ni jeen yajauch awajsacharai.

<sup>38</sup> Wats, Timitriu tura niijjai takainiana nu tunáa túramun ujaktai tusar wakeruiniakka pepru penkerin werishtinkiait. Nuiñkia máimtek iwiainiakartí.

<sup>39</sup> Tura chíkich chicham ákuñkia péñker iruntrarum iwiatarum.

40 Kame jū yamáí túrunamun nekaawar Rúmanmaya kapitián “Íi uunt kapitiántri yajauch awajsatai tusarum túrachurmeash” turamchatjias. Warí, niisha “¿Urukamtai charaatum ajarum?” takuisha, áimkiatin penké tujinkiattaji” tímiayi.

41 Tura papí-aint nuna tuasua amik “Áukete. Wétarum” tímiayi.

## 20

*Papru Masetúnia nunkanam Krisia nunkanmasha wémiania nu*

1 Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiaiyi. Tura áujas ikiuki Masetúnianam wémiayi.

2 Nú nunkanam wekaráktak, Yus-shuaran jintintrar iki-akárarmiaiyi. Tura nuyasha Krisia nunkanam jeamiayi.

3 Nuí menaintiu nántuk pujusmiayi. Tura nuyanka kanujai Siria nunkanam wétasa pujus Israer-shuar chícham jurusman anturmamak “antsu nunkan Masetúnianmaani wetajai” tímiayi.

4 Tura Piríanmaya áishman Súpater naartin Páprun atamprimiaiyi. Tura Tisarúnikianmaya Aristárkusha Sekuntusha Tírpimaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriarmiaiyi.

5 Túrawar niisha emki wear Trúas péprunam jeawarmiaiyi.

6 Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enkemprar Masetúnia nunkanmaya jíinkimji. Tura senku tsawant nankaamasmanum emki wearmia nu amaiyankarmiaji Trúasnum. Tura nuisha siati tsawant pujusarmiaji.

*Trúas péprunam túrunamia nu*

7 Tura tumintin kíarai Jesukrístu enentáimtusar yurumátai tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi.

8 Tura yakí menaintiu pátaranam, tesaamu ámia nuí iruntrarmiaji. Nuisha ji ekemarma untsurí irunmiayi.

9 Tura nuisha natsa Eutikiu, áankamunam ayamas pujusmiayi. Tura Papru ti esaram chíchaakui nu nátsasha kari pujumiayi. Tumáa pujus kanaki yakí pátanmaya akaiki ini-aamiayi. Tura penké jakan júsarumiayi.

10 Tura Papru akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi.



11 Nuyá ataksha Papru wakamiayi. Tura tañtan puukar yurumáwarmatai, tuke chichaa-chichaakua tsawantmarmiyai Papru.

12 Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

*Miritiunam wearmiayi*

13 Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum.

14 Nui Asunnum inkiunaikiar, Páprusha kanunam enkemprantai, Mitiríniniam jeamji.

15 Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji.

16 Pápruka Jerusarénum wari wétajtsa wakerimiayi, pinitiustís naartin jístatin pachiinkiatay tusa. Tuma asamtai, Asia nunkanam ti núkap pujustinian nakitiak “Ipisiunam wéhattajai” tímaiya.

*Papru Ipisiunmaya úuntrin áujsamiania nu*

17 Túrasha Papru tuke Miritiunam pujus, Ipisiunmaya Yusshuara úuntrin winitiarum tusa untsukarmiayi.

18 Ni taarmatai Papru tímiayi “Atumsha wi Asia nunkanam pujusan itiura túraj nu nékarme.

19 Atumjai tuke tsawant pujumaj nui, nankaamantuchu enentáimtumasan, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiajn tuke takasmiajai.

20 Ashí péñker ana nu nekaatarum tusan mijjatruitsuk jintintiamjarme. Iruntramarmena nui tura ankant ankant atumí jeen pujumarmena nuisha Yus-Chichaman ujakmarume, tímiayi.

21 Tura Israer-shuarnasha Israer-shuarchancha nútiksanak, enentai yapajiarum Uunt Jesukrístu umirkatarum, tímiajrume.

22 Tura yamáí Jerusarénum wéajai, Yusa Wakaní túrutkui. Nuisha túrunatana nunasha nekamatsuk wéajai.

23 Tura Yusa Wakaní iniakturkui juna nékajai, ashí pepu wi jeattajna nui enketátai tusar nákarainiawai. Tura ti wáitsatniun nekapsattajai.

24 Kame wikia jákashtajash. Túrasha warí winia itiurtawa. Wikia Yusa jintijn warasan wekasataj tusan wakerajai. Yusaj wea-wéakuan jáakun iniaisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

<sup>25</sup> Tura, yatsurtiram, ashí Yúsna atumin paant ujakjarme. Yamaikia wíniaka atakka wáitkiashtatrome.

<sup>26-27</sup> Nekaatarum, ashí Yusa wakeramurin wisha penké úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia penké makuumashtatjai.

<sup>28</sup> Tuma asamtai emka atumek ímiastarum. Túrarum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait.

<sup>29</sup> Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan.

<sup>30</sup> Túrasha nemartusarat tusar wakeruiniak atumiinian wáit chichaman unuikiartin wantinkiertatui.

<sup>31</sup> Tuma asamtai yatsurtiram, aneartarum. Wisha menaintiú uwitin tsawajsha káshisha úutchim ankant ankant unuinia-majrumna nu kajinmatkiirap' tímiayi.

<sup>32</sup> 'Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuṛar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nui pachiinkiattarme.

<sup>33</sup> Wats, wisha chikichík shuara kuítrin wariríncha wakerutkachuitjai.

<sup>34</sup> Antsu winia uwejrujai takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme.

<sup>35</sup> Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. "Achiana nujainkia nankaamas, súana nuka shiir waraawai" tíchamka" tímiayi.

<sup>36</sup> Nuna tuasua amik Papru tikishmarmiayi. Tura ashí niijjai iruntrarmia nú shuar Yúsna áusarmiayi.

<sup>37-38</sup> Tura Papru nuik chichaak "Atakka wáitkiashtatrome" tiniu asamtai, ti kúntuts pujuiniak, úutchim Páprun miniak-sarmiayi. Túrawar kanunam ejeniarmiayi.

## 21

### *Papru Jerusarénum wémiania nu*

<sup>1</sup> Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawṛar Rútas péprunam jeamji. Tura nuyanka Patara péprunam jeamji.

<sup>2</sup> Tura nui Pataranam pujusar, chíkich kanu Pinisia péprunam wea wáinkiamji. Túmakui nui enkemprar wémaji.

<sup>3</sup> Nuj wésar Chipri nun̄kaka wáinkiamji. Chíprikia menanmaanj aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jínkir péprunam wayamji.

<sup>4</sup> Nuj Yus-shuar wáinkiar nuin̄ siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi.

<sup>5</sup> Tura siati tsawant nan̄kaasmatai jínkimji. Ashi Yus-shuar ármia nu núwentuk uchirtiuk nemartamkamji, péprunam inian̄katmaktiai tusar. Káanmatkanam jear tikishmarar Yus áujsamji.

<sup>6</sup> Tura nu amikiar nuin̄kia áujnaisar ikiukiarmaji. Tura iikia kanunam en̄kemprakrin nin̄kia ni jeen waketkiarmiayi.

<sup>7</sup> Iisha Tirunmaya entsak wea-wéakuar Turumáitianam nuin̄ jíntramji. Tura nuj jearsha Yusaj yachí ármia nu chichasar nuin̄ chikichkí tsawant pujusmaji.

<sup>8</sup> Kashin tsawarar nuyá jínkir nun̄kan̄ weri Sesaria péprunam jeamji. Nui Jiripi jeen jear pujusmaji. Jiripikia Yus-Chichaman etserniuyayi. Nuik Jerusarénum siati áishman̄kan Yusa takatr̄in wáinkiarat tusar anaikiarmia nú Jiripiiti.

<sup>9</sup> Jiripisha kuaru nawantr̄in yarumkauyayi nuatnakchan. Niisha Yusa chichamen̄ etserin̄ ármiai.

<sup>10</sup> Tura iisha Jiripi jeen wárum tsawantak pujarin Jutía nun̄kanmaya aents Yusa etserniur̄i, Akapu náartin támiayi.

<sup>11</sup> Niisha taa Papru emenmamkar̄in achikmiayi. Tura achik nin̄ki ni nawen̄ tura uwejéncha jin̄kiamamiayi. Nuna tura tímiayi “Yusa Wakaní tawai, juna emenmamka nérenniur̄in Israer-aents jútikia jin̄kiáwar Israer-shuarchanum surukartatui, tawai” tímiayi.

<sup>12</sup> Iisha nu antukar Papru tímiayi “Jerusarénumka weep.” Sesarianmaya Yus-shuarsha núnisan̄ Páprun tiarmiayi.

<sup>13</sup> Tutai Papru tímiayi “¿Urukamtai útkuram winia enentáiruj kúntuts awajtarum? tímiayi. Wi Jesusna asamtai Jerusarénum jin̄kiataniakuisha mántuiniakuisha ashamatsjai” tímiayi.

<sup>14</sup> Tura iisha Papru emetatai tukamar tujinkiar “wats, nuin̄kia Uunt Yus wakera nu tímianak atí” tiarmaji.

<sup>15</sup> Nu tiri iniaisar iwiarnarar Jerusarénum wémaji.

<sup>16</sup> Chíprinmaya yaunchu Yus-shuar Manasun̄ ni jeen Jerusarénum takakuya nuna ikiatmastinian wakerimiayi. Tuma asamtai Sesarianmaya ishichik Yus-shuar nemartamainiak Manasun̄nasha júkiarmiayi.

*Papru Jakupu jeen irastajtsa wémiania nu*

17 Tura iisha Jerusarénum jeawakrin, nuĵ warasar Yus-shuar ti shiir áujtamsarmiaĵi.

18 Tura kashin tsawar Papru íimiak Jakupu jeen wémiaĵi. Nuĵsha Yus-shuara uuntri matsamarmiaĵi.

19 Páprusha áujas amik, Israer-shuarchanum ni étsermajai Yus túramia nuna yámankamtaikniumiá jukí chikichkimas uĵakar uĵakar awajsamiayi.

20 Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú, túrasha Israer-shuar timiá untsurí Yus-shuar aĵasu áiniayat, “ashí Muisais akupkamia nu umiktiniaitji” tuiniawai.

21 Nú arant yajaya aents taar, chichartamainiak “Pápruka nusháa jintintiui, turamainiawai. Israer-shuar chíkich nunkanam pujuinia nuna Muisaisa akupkamurĵ umirkashtin Pápruka jintintiui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.”

22 Wátsek, yatsuru, nuñkia itiurmainkit. Ame tátintrumin aents nekaawarka juĵ kajertamainiak káutramkachartatuak.

23 Wats, antsu nuñkia, ju túrata yatsuru. Juĵ kuaru áishman Yúsan yaunchu tiarmia nuna umiktasa pujuiniawai.

24 Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashĵin awampratin áchattawak. Nu áishmanka intiashĵin awampran Israer-aents wáinkiar, antur-tamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.

25 Túrasha yatsuru, nekaata, Israer-shuarcha Yus-shuarka papí yaunchu akuptukmiaĵi. Israer-shuarti túratin ana nu ashí mash túratarum tátsuji, tu áatramji. Tura antsu namañken máawar ántar-yusan susamu yúashtiniaitrume, tímiaĵi. Tura numpasha umarchatniuitrume, kajentikramusha yúashtiniaitrume. Tura tsanirmashtiniaitrume. Tu áatramji” tiarmiayi.

### *Páprun achikiarmiania nu*

26 Nuyá tiniu asantai Papru nú kuaru áishmankan júkiarmiayi. Tura kashin tsawarar níimiak nijiaamararmiayi, Muisais tímia nútiksaran. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi.

27 Túrasha nu siati tsawant amusattuk ajatemsaj, Ásianmaya Israer-aents Paprun Yusa Uunt Jeen pujan wáinkiarmaiya. Túrawar charaatum ajakiar Páprun achikiarmaiya.

28 Achikiar untsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmaiya. Warí, Kriaku áentsun awayáshtinia nuna awayá nujaj yamá ju Jeencha yajauch awajturmajj” tiarmaiya.

29 Jes, nuik Ipsiunmaya Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmaiya.

30 Tuiniakui aents ashí mash charaatum ajakiar tseke táarmaiya. Túrawar Páprun achikiar japirkutak Yusa Uunt Jeeya jíkjarmaiya. Túrawar wáitíncha nú chichamaik epentrarmiyi.

31 Tura maatai tusar matsamtuiniáj suntara kapitiántri Jerusarénnumiá aents ashí charaatum ajainian antukmaiya.

32 Kapitiáncha ni suntarín tura sarjentuncha irur tseke weriarmiyi aents pujuarmia nuj. Aencha suntaran tura kapitiánin wáinkiar, Páprun asutíniayat iniaisarmiyi.

33 Kapitiánka Páprun jeari achikmaiya. Tura jimiará jirujaj jínkjarmaiya. Nuyasha aniasmaiya “¿Niisha yait? ¿Warinia túrait?” tímaiya.

34 Túrasha aencha untsurí chichaman untsummiarmaiya. Túmainiakui kapitiáncha penké nekaachmaiya. Tuma asamtai Páprunka suntar pujamunam júkjarmaiya.

35 Tura suntar pujamunam wáitíniam jeawar Páprun entsaki júkjarmaiya aents imiá kajerainia asamtai.

36 Tura aencha ukunmaanij pataakar, mantamnatí, tu untsummiarmaiya.

### *Papru chichastinian seamiania nu*

37 Tura Papru suntarnum awayám, Páprusha kapitiánin Kriaku chichamjaj chichaak “Wi ishichik chichasaintjame” tímaiya.

Tutai kapitián chichaak “Warí, ¿amesha Kriaku chicham chichastin nékamek? tímaiya.

38 Nuínkia amesha ¿Ejptunmaya shuárchakaitiam? ¿Nuik ku-atru mir (4000) aents, mankartin tutai atsamunam yaru-akchamkam? ¿Kapitiánjaj meset najanataj tusa túrachmakum?” tímaiya.

39 Tutai Papru tímaiya “Núchaitjai. Antsu wikia Israer áentsuitjai. Sirisia nunkanam uunt pepru Tarsu náartin ana nuj akiiniaitjai. Tura waitneasam ju aents chichastin tsankatrukta” tímaiya.

40 Tura kapitián, ayu, tutai, Papru watainiam wajas, mitiat pujustarum tusa uwején takuimiayi. Tura aents itiatkarmatai Israer-chichamjai chichasmiayi.

## 22

### *Papru áentsun timia nu*

1 Papru chichaak juna tímiayi: “Yatsurtiram, tura úuntur árumna nu antuktatum. Wikia Pápruitjai. Kíishtumaktaj tusan títiatjana nu waitneasrum anturtuktatum” tímiayi.

2 Tura Papru Israer chichaman chichaaku, aents nuna antukar nú nankaamas itiatkarmiayi.

3 Nuj Papru chichaak “Wikia Israer-shuaraitjai. Tarsu pepru Sirisia nunkanam ana nu akiiniaitjai. Túmaitatnak ju Jerusarénum tsakaruitjai. Tura unuikiartin Kamaríran chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijai wakerukitjai.

4 Tura Jesusan umirkaru ármia nuna máataj tusan pataatukni wekaimiajai. Túran áishman kan nuwancha achikian sepunam enkeataj tusan túrimiajai.

5 Israer-patri uuntrisha Israer-shuara uuntrisha Tamaskunam í-shuar susatá tusar papin ataktusar akuptukarmia nuna nin kía nékainiawai. Jesusan umirkarun achikia ikiaankan ju Jerusarénum asutniáwarat tusan werimjai’ tímiayi.

*(Túramuri 9.1-19; 26.12-18)*

6 ‘Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi.

7 Túrunamtai wisha nun ká iniaarmajai. Nuyanka chichamun antukmajai. Chichartak “Sauru, Sauru, ¿urukamtia imiá pataaturam?” turutmai.

8 Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena núitjai” turutmai.

9 Wijjai pujuarmia nu, newaat wajantun wáinkiar ti ashamkarmai. Túrasha nin kía túrutun antukcharmai.

10 Tura wi tímiajai “¿Nuin kía, Uunta, warí itiurkattaj?” tímiajai.

Tutai Uunt chichartak “Wajakim Tamaskunam wetá. Nuisha ame túrattamna nuna ujatmakartatui” turutmai, tímiayi.

11 Kame wikia nú newaat ajakun íisan jjiiru kusurmai. Tuma asamtai winia tsaniakmar enkeki jurukiar Tamaskunam ejetiarmai' tímiayi.

12 Papru tuke aujmatki wéawai. "Tura nuí Tamaskunam áishman Ananías pujumai. Niisha Yúsan aneak, Muisais akupkamia nuna umirkauyi. Tura nú péprunmaya Israer-shuar ármia nu nin péñker enentáimtiarmiai.

13 Nú Ananías winia íirsataj tusa támai. Taa turutmai "Yat-suru Sauru, péñker iimtia." Túrutkui nú chichamaik péñker íimmiajai. Túrunan Ananíasnasha wáinkiamjai.

14 Tura Ananías chichaak "Iwiaaku Yus, winia wakeramurun nekartuat tusa winia Uchirnasha, tunaarinchaa nuna, íisat tusa, winia chichampruncha antukat tusa ámin yaunchu Yus anaitiamkaiti.

15 Amesha Papru, Yusna ana nu íisumna nusha antukumna nusha ashí aents ujakartatme.

16 Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia" turutmai.'

17 "Tura Jerusarénum waketkin Yusa Uunt Jeen wémajai Yúsan áujstataj tusan. Nuí íimiarmajai.

18 Nuí Jesus chichartak "Juí Jesusarénum Wíi túramur etserkattamna nuna antukchartatui. Tuma asamtai wari jíinkim wetá" turutmiái.'

19 "Túrutkui wi tímiajai "Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí matsatun achikian awatin sepunam enkeawarmia nuna nékainiawai.

20 Tura nuyá Áminiu etserniun Estepañkan máiniakuisha wisha wajamjai. Túruiniakui, "péñkeraiti" tímiajai. Nú arantcha ni pushirín íirsamjai" tímiajai.'

21 "Túrasha Uunt Jesus winia turutmai "Wetá. Israer-shuarcha matsatainia nuí akupkatjame" turutmai" tímiayi Papru.

### *Suntara kapitíántriin túrunamia nu*

22 Nuí matsamarmia nu, núnaka antukarka untsumtan juáriarmiayi. "Juka mantamnatí. ¿Urukamtaik iwiaakusha pujusat?" tiarmiayi.

23 Tura aentska Paprun kajerainiak, ti untsumainiak pushirín tujaat ajapawar nunkancha nan kimkiamaikia ajarmiayi.

24 Tura kapitíán nuna wáiniak Páprun suntar pujamunam awayámiayi. Tura suntaran chicharuk "Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum" tímiayi.

25 Tura Páprun asutiátai tusar jin̄kiárar awajsam Pápruka kapitiánin chicharuk “¿Rúmanmayā aents áyatik asutiámniakait, ni túramur̄i nekartsuk?” tímiayi.

26 Nuna táman antuk kapitiáncha uunt kapitiánin ujaktaj tusa werí chichaak “Maaj, túrataj tamena nu anearta. Ju áishman̄ Rúmanam pachitkaiti” tímiayi.

27 Nuna antuk uunt kapitián Páprun werí aniasmiayi “¿Ame-sha nekasmek Rumanam pachitkaitiam?” tímiayi.

Tutai Papru “Ee” tímiayi.

28 Tutai “Wikia ti kuítian akikmakmiajai Rúmanam pachinkiatniun” uunt kapitián tímiayi.

Tutai Papru tímiayi “Túrasha winia aparka Rúmanam pachitkia asamtai, wisha Rúmanam pachinkian akiiniaitjai” tímiayi.

29 Nuna takui Páprun asutiátaj tiarmia nuna wárik iniaisar jiniar wearmiayi. Tura imia uunt kapitiáncha Rúmanam pachitkian jin̄kiá asa ashankamiayi.

30 Tuma asa kashin tsawar uunt kapitián, urukamtaik Páprun imiá kajerainia, nekaataj tusa wakerak Paprun werí jin̄kiámun atirmiayi. Tura Israer-patr̄i uuntr̄in chíkich naamka armia nújajsha ikiaankamiayi. Tura nuin̄kia ni matsatmanum Páprun itiar ajapén awajsamiayi.

## 23

### *Israer-aentsu Úuntr̄in Papru timiania nu*

1 Papru Israer-patr̄i naamkar̄in úmamkes iis “Wíi shuar-tiram antuktaram. Úchichik tuke yamaisha Yus íimmianum péñker wekainuitjai” tímiayi.

2 Papru nuna takui Israer-patri uuntr̄i Ananías, ni suntar̄in Paprūi ayamas pujuarmia nuna “Wenunam awatiarum” tímiayi.

3 Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umi-atsui tusam yajauch turutattsam pujame. Entá, ¿nuin̄kia urukamtia Muisais tímia nuka iniaisam ame suntarum winia asutiátarum tame?” tímiayi.

4 Tura nuna takui nūj wajarmia nu Páprun tiarmiayi “¿Maaj, amesha Patri uuntr̄i imiá yajauchisha chichaream?”

5 Tutai Papru tímiayi “Yatsuru, wisha Patri uuntr̄i áutskaitia tíchamjai. Nékaitkiunka núnaka tíchajjai. Kame wisha nékajai, Yus-Chichamnum tawai “Atumí uuntr̄i yajauch chicharkairap” tawai” tímiayi.

6-8 Israer-aentsu úuntr̄iya jimiará írutka áirmiayi. Sat-uséu aents tura nuyá Pariséu aents nusháa írutkan Pápruka



nekaamiayi. Kame Satuséu aentska, jakamunmayá nantak-tincha Yusa suntarisha aentsu wakanisha tura iwianchcha atsawai, tiniu ármiayi. Antsu Pariséu aentska, nuka ashí awai, tiniu ármiayi. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmayá ukunam nantaktin átatuí tu jintiamun, nekaatai tusar itiararmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi.

<sup>9</sup> Nuiñkia ashí aents charaatum ajararmiayi. Tura Israer-shuara jintinniuri Pariséunam írutka armia nu wajakiar tiarmiayi “Ju áishman tunaan penké túrichuiti. Yusa suntari chíkich wakancha nin nekas chichaschamashi. ¿Ya neka?” tiarmiayi.

<sup>10</sup> Ti charaatum ajainiakui suntara kapitíantri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayátarum” tímiayi.

<sup>11</sup> Nuyá kashi Papru Uuntri mesekra ipiatuk “Kakaram ajasta, Papru. Jui Jerusarénum winia ujakarumna núnismek Rúmanmasha ujaktatme” tímiayi.

### *Páprun máatniun wakeriarmiania nu*

<sup>12</sup> Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajau-chiniam yuminkramu atai” tiarmiayi.

<sup>13</sup> Nuna tiarmia nuka kuarenta (40) nankaamas ármiayi.

<sup>14</sup> Tura Israer-patri úuntrin tura Israer-aentsu úuntrincha weriar “Papru máachkurkia penké yurumtsuk pujustatji. Máachrikia yajauchiniam yuminkramu atai” taji.

<sup>15</sup> Tuma asamtai ashí Israer-patri naamkarijiai suntara kapitíantri seatarum, Papru tatí tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niñkia táatsain náaktatji” tiarmiayi.

<sup>16</sup> Tura Papru awe nú chichaman antuk suntar pujamunam taa Páprun ujakmiayi.

<sup>17</sup> Tuma asamtai Pápruka suntara kapitíantrin untsuk “Ju uchi uunt kapitíannium jukitia. Niisha chichaman takakui” tímiayi.

<sup>18</sup> Kapitíancha uchin uunt kapitíannium ejé tímiayi “Papru enkeamu pujana nu winia untsurak “Ju uchi uunt kapitíannium jukitia. Chichaman takakui” túrutui” tímiayi.

<sup>19</sup> Uunt kapitíancha nú uchin enkeki arantach juki chicharuk “¿Warí turuttiaj tame?” tímiayi.

20 Tutai uchi tímiayi “Israer-aents Páprun chichaman jurusarai. “Papru túramurí ti paant nekaatai tusar kashin Israer-shuara uuntriin ejetarum” turamartatui.

21 Tura amesha nuna takui anturkaip. Kuarenta (40) nan̄kaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin tití tusa nákarmainiawai” tímiayi uchi.

22 Tura uunt kapitiáncha uchin chicharuk “Ame túrutmena nu chíkich aents penké ujakaraip’ tímiayi. Nuna ti, uchin akupkamiayi.

### *Akupin Piriksai ejetiarmiania nu*

23 Nuyanka uunt kapitiáncha chíkich kapitiánin jímiaran itiá chichaak “Urum, kashi ajapén ajastatuk ai, untsurí suntar ikiaankarta. Jimiará sián (200) aya náwek, setenta (70) kawainium eketka, nuyá chíkich jimiará sián (200) nánkijiaín Sesaría nunkanam wétin iwiarata.

24 Páprusha kawainium ekemkatin iwiarturta. Túrarum péñkerak ejetarum akupin Piriksai” tímiayi.

25 Tura niijiaí ju chichaman áatrar akuptukmiayi:

26 “Ti péñker akupin Píriks, wikia Krautiu Rísias ju papin áatjame.

27 Israer-aents ju áishman̄kan maatai tusar wakeruuniak achikiarmiayi. Tura niisha Rúmanmayá áentsuitkui wikia nuna nekaan suntarjai werin jukimjai.

28 Wikia ¿urukamtaik achikiaruit? tusan Israer-patri naamkarin jukimjai nin.

29 Páprunka ii uuntri akupkamurin umiatsui tusar nin kaje-riarmiayi. Pápruka yajauch túrachu asa mantamnachminiuyayi. Sepunmasha en̄kemachminiuyayi.

30 Tura wisha Israer-aents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksai werum átum warinma kajerarum nu títiarum” tajai. Ayu. Júchiniak tájame.” Nuna tu áatar akuptukmiayi.

31 Tura suntarsha ni uunt kapitiántri tímia nútiksaran̄ Páprun kashi júkiarmiayi Antipatris péprunam.

32 Kashin tsawarar suntar aya náwek wearmia nuka wake-trarmiayi. Tura kawainium eketrainiaka Páprujai wearmiai.

33 Sesaría péprunam jeawar papin Piriksan súsarmiayi. Tura Pápruncha nuí ejeniarmiayi.

34 Akupniusha papí aajsua amik Páprun aniasmiayi “Amesha, ¿tuí akiiniaitiam?”

Tutai “Sirisia nunkanmayaitjai” tímiayi.

<sup>35</sup> Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyañka uunt akupin Erutisa jeen awayá apujсамиyi, suntar ísarat tusa.

## 24

### *Papru Píriksjaj áujmatsamiania nu*

<sup>1</sup> Tura senku tsawant nankaamasaj Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujaj táarmiayi. Ju aents Páprun kajerainia ásar akupniunam wearmiayi.

<sup>2</sup> Nuj Páprun itiar matai Térturu chichatan juármiai. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai.

<sup>3</sup> Tuma asakmin iisha ashí matsatmanum tuke tsawant ti shiir yuminsamajme, uunta.

<sup>4</sup> Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi.

<sup>5</sup> Ju áishman Papru, sunkura utsukratniua núniiaiti. Niisha ashí nunkanam mesetan najanatniun Israer áentsun ikiakániiaiti. Tura Jesusa aentsri, Nasarénu tuinia nuna úuntriinti.

<sup>6</sup> Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujaj métek asutiátaí tusar wakerimji.

<sup>7</sup> Túrarin nuyañka kapitián Rísias taa tapit achik juru-tramkimiaji.

<sup>8</sup> Tura atumek akupin Píriksaj werum nuj aujmatkatarum, turamaji, tímiayi. Tuma asamtai amesha Píriks, Papru aniasta. Nuinkia ii tájinia nu nekasaiti, nu nekaattame” tímiayi Térturu.

<sup>9</sup> Tura Israer-aents pujuarmia nu “Nekasaiti ashí ni tana nu” tiarmiayi.

<sup>10</sup> Nuyá Píriks, uwejejaj, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsuri uwitin pujusuitme. Tuma asamtai nuikia shiir enentáimsan páchitsuk chichastatjai.

<sup>11</sup> Wats, wi túramur nekartuata. Yúsan áujmataj tusan Jerusarénum wi wémajna nu tuse (12) tsawant nankaamasaj.

<sup>12</sup> Nuisha yajauch áujmatki weaj wáitkiacharmai. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaaj penké wáitkiacharmai, tímiayi.

<sup>13</sup> Ju aents juj matsatainia nu wíniaka penké turutchamnia áiniawai.

14 Túrasha juna paant ujaajme. Jesus yamarman jintíana nuna umíajai. Kame Israer-aentska wáitíaiti tuinia nuna wikia umíajai. Túrasha nuna túran ii uuntri Yusrí akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiaitjai.

15 Tura jakaasha nantaktin átatui, tajai. Warí, péñker aents nútiksarı́ yajauch aencha nantakiartatui imia Israer-shuar tuiniatsuk. Tura wisha nútiksarı́n túrunatniuiti tajai.

16 Tura wisha tiniu asan, wikia winia enentáiruı́ Yus íimmianum makuumatsuk wekasataj tajai. Tura áentsnumsha nútiksarı́n penké makuumatsuk wekaajai' tímiayi.

17 "Tura, uunta, untsurı́ uwitin chíkich chíkich nunkanam wekaasuan amikian winia shuaruı́ támajai. Kuítrınchan kuítian susataj tusan tura Yusa kuítrıncha nin susataj tusan támajai.

18 Túran wisha, Muisais jintinmia nútiksarı́n nijiaamaran, Yusa Uunt Jęen pujumiajai. Untsurı́ aents charaatum ajainiasha atsumiayi. Nuı́ wiki pujáı́ Ásianmayá Israer-aents wáitkiarmiayi.

19 Tura wi yajauch túraitkuı́nka winia wáitkiarainia nu táchatniukait ámin ujatmaktasa.

20 Túrachkuı́nka juı́ pujuinia nu, Israer-patrı́ naamkarı́ matsatmanum wi pujumajna nuı́ yajauch túramun nékainiakka turutiarti.

21 Kame, "“jakamunmayá nantakminiaiti” tau asamtai makuurtiajtsarum pujarme” matsatmanum tímiaj nujáı́ turutchartimpiash. Nú arantka yajauch túramun penké nekar-tuacharmaı́” tímiayi Papru.

22 Táman antuk Pírıks, Kristu shuarı́ túramun paant nekáa, áanik iniaisamiayi. “Antsu kapitián Risias támatáı́ nuı́nka nu chichaman nekaatjai” tímiayi.

23 Tura nuyá suntara kapitiántrın chichaak “Ju Pápruka tuke emetnati. Tura ishichkikia ankant apujsatarum. Tura nuyá ni amikrı́ taa yáı́ntaj takui suritkiairap” tímiayi.

24 Tura nuyá chíkich tsawantaj ataksha Pírıks ni nuwejai Tursirajáı́ támiayi. Núwenka Israer-shuarauyayi. Pírıkska “Papru itiatarum’ tímiayi. Papru Jesukrístunun étserkui antimiyai.

25 Tura Pápruka yajauchiniam wekasashtıncha naka wekasatniuncha, tura ukunam Yus tunáa áentsnaka asutiátniuiti takui Pírıkska ashamak tímiayi “Antsu yamaikia máakete. Tura ataksha wi ankant pujakun untsukmijiam” tímiayi.

26 Tura, ankant ajastaj tusa Papru kuítian akirkashtimpiash, tu enentáimias, Pírıks tuke untsúu wémiayi,

chichastai tusa.

<sup>27</sup> Tura nuy<sub>ḅ</sub>ḅka jimiará uwí naḅkaamasmatai Píríks akupin náamkamu ajapnamiayi. Tura chíkich aents, ni naari Pursiu Jistu akupin náamkamiayi. Tura Píríkska, Israer-aents p<sub>ḅ</sub>ḅker enentáimtursarat tusa wakerak, Páprun sepunam tuke ikiukmiayi.

## 25

### *Papru Jístujai áujmatsamiania nu*

<sup>1</sup> Jístusha akupkatin takatan naḅkaamataj tusa Sesaria péprunam támiayi. Tura menaintiú tsawant naḅkaamasmatai nuyá we Jerusaréḅnum jeamiayi.

<sup>2</sup> Nuḅsha Israer-patri uuntri tura Israer-aentsu penkerisha Páprun tsanumprurtai tusar Jístun weriarmiayi.

<sup>3</sup> Tura tiarmiayi “Waitneasam Páprusha Jerusaréḅnum akupkata” tiarmiayi. Jintiá maatai tusar wakeruiniak nuna tiarmiayi.

<sup>4</sup> Tutai Jistu tímiayi “Atsá. Páprusha Sesaria péprunam sepunam enkeamu pujawai. Tura wikia nuḅ wárik waketkit-tiajai” tímiayi.

<sup>5</sup> Nuyá nin tímiayi “Atumsha penkeri árumna nu, wijiai Sesarianam wétiniaitrumé. Tura nú áishmaḅka tunaari ákuḅkia nuḅsha títiniaitrumé” tímiayi.

<sup>6</sup> Jístuka Jerusaréḅnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesarianam waketkimiayi. Tura nuḅ jeá kashin tsawar, akupin pujutainium pujus “Papru itiatarum” tímiayi.

<sup>7</sup> Tura Papru wayamtai, Israer-aents Jerusaréḅnumia taarmia nu káunkarmiayi. Túrawar ti nukap chichainiak “Tunáa túraiti Pápruka” tu tiarmiayi. Túrasha penké uyumantikiacharmiayi.

<sup>8</sup> Pápruka chichamprumak tímiayi “Wisha tunaan penké túrachuitjai. Israera uuntri áarmarincha umirkaruitjai. Tura Yusa Uunt Jeencha yajauch awajsachuitjai. Tura uunt kapi-tiánniasha yajauch penké chicharkachuitjai” tímiayi.

<sup>9</sup> Jístuka Israer-aents p<sub>ḅ</sub>ḅker enentáimtursarat tusa wakerak, Páprun tímiayi “Wakerakmiḅkia Jerusaréḅnum wemí. Wisha nuḅ ame túramurmin nekaatjai” tímiayi.

<sup>10</sup> Tutai Papru tímiayi “Amesha paant nékame, Israer-áentsnum tunaan penké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekar-tuati tusan.

<sup>11</sup> Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuḅkia wíniaka Israer-shuarnum surunkachminiaitjai tajai. Tuma

asantai seajme, wíi túramun uunt akupin Sésar nekartuati” tímiayi.

12 Tutai, nuyá ni írutramurijjái chichasua amik, Jistu Páprun tímiayi “Uunt akupniuj wétaj tusam seame. Tuma asantai nuí wétatme” tímiayi.

*Papru uunt akupniujái áujmatsamiania nu*

13 Tura ishichik tsawant nankaasmatai akupin Akripia ni nuwejai Pirinísejai Jístun áujsatat tusa Sesarianam wearmiayi.

14 Tura untsurí tsawant pujusarmiayi. Tura nuí pujuiniaí Jístuka Papru túrunamun akupniun ujaak tímiayi “Juí áishman pujawai. Píriks nin achik enkea ikiukmiayi, tímiayi.

15 Kame wikia Jerusarénum pujái Israer-patri uuntri tura Israer-aentsu úuntri sha, Papru yajauchin túraití tusar káutrukarmiayi, tímiayi. Mantamnati tusam akupkata, tu seatiarmiayi.

16 Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsain mantamnati tusar akupeatsji iisha” tímiajai.

17 Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai.

18 Tura Páprun tsanumprurtaí tusar taar chichainiaksha, wi enentáimmiajna núnaka tícharmiayi.

19 Antsu áyatik Yus umirkar túmatairín Papru nuna túrachai, tiarmiayi. Tura nuyasha áishman Jesus naartin nantaki iwiaakui tawai Pápruka, tiarmiayi. Nunak tiarmiayi.

20 Tura wikia nú chichaman túratniun nékachu asan, Páprun aniasmajai “¿Amesha Jerusarénum wétaj tusam wakeramek? Nuí nu chichaman nekartamawarti” tímiajai.

21 Túrasha “Atsá. Juín pujustajái. Rúmanmaya uunt akupin Akustu Sésar nekartuati” tímiayi Papru. Takui, “nuiñkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

22 Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”.

23 Tura kashin tsawar Akripia Pirinísejai taar, iwiaa-iwiarmamu ajas wayawarmiayi. Suntara úuntri jái tura nú péprunmaya úuntri jái wayawarmiayi. Tura nuí Jistu, “Papru itiatarum” tímiayi.

24 Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents Jerusarénumsha tura juí Sesarianmasha ju

áishmankan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai.

<sup>25</sup> Túrasha wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai.

<sup>26</sup> Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaat-jai.

<sup>27</sup> Warí wisha, ni yajauch túramurin áattsuk, uunt akupniunam akupkashtiniaitjai” tímiayi.

## 26

### *Papru Akripiai chichamprumakmiania nu*

<sup>1</sup> Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi.

<sup>2-3</sup> Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamá*i* wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam pénker anturtukta’ tímiayi.

### *Papru ni yaunchu túrutairin ujakmiania nu*

<sup>4</sup> ‘Wi úchichik winia nunkarui tura Jerusarennumsha pujusan wi túramajna nuna ashí wíi aents Israer ainia nu nékainiawai.

<sup>5</sup> Pariséu ajasan, ni akupeamurin itiurchat ain ashí takamt-suk tuke umirniuitjai. Nunasha nékainiawai tura wakeruini-akka etserkamnia aintui.

<sup>6</sup> Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi.

<sup>7</sup> Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkur<sup>i</sup>, tsawaisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia.

<sup>8</sup> Warí, atumsha “Yus jakancha iniantkimniaiti” tátsumek’ tímiayi.

<sup>9</sup> ‘Tura wisha yáunchuka Nasarennumiá Jesusnan umirkaruka kajerkatniuiti, tu enentáimniuyajai.

<sup>10</sup> Tura Jerusarennum Yus-shuar ármia nuna kajerkarmia-jai. Israer-patri uuntri chichamejai untsuri áentsun Jesusnan

umirkarmia nuna sepunam enkeamijai. Tura nú shuaran máiniakuisha wikia péñkeraiti tu wémijai.

<sup>11</sup> Tura Israer-shuara iruntai jeen wayan ti asutiármijai, Jesusnan umirkatniun iniaisarat tusan. Tura imiá kajerkan chíkich nunkanmasha pataatu wearmijai achiktaj tusan' tímiayi.

*Tamasku jintianam túrunamun ujakmiania nu*  
(Túramuri 9.1-19; 22.6-16)

<sup>12</sup> “Tura Israer-patri uuntri tsankatrukmatái, papin ni susarmia nujai, Tamasku péprunam wétaj tusan jíinkimijai.

<sup>13</sup> Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantruramiayi. Tura wijjai wearmia nunasha núnisaran etsantrurarmiayi.

<sup>14</sup> Tura túrunamtai ashí nunká tepetar wáinkiarmitai. Wiki Israer-chichamjai túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka sankanmiak numin ijiuna núnismek. Wíi aents kajera asam túruname” turutmai.’

<sup>15</sup> “Túrutkui wisha “¿Amesha yáitiam, Uunta?” tímiayi.

Tutai Uunt turutmai “Wisha Jesusaitjai, ame pataatamna núitjai.

<sup>16</sup> Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamnium, turutmai.

<sup>17</sup> Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai.

<sup>18</sup> Péñker jintintiata tusan akupeajme. Kame aencha kiritniumiá jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarjin tsankurattajai. Nuna túran Yusna ajasaru áiniana nujai apujsattajai.” Nuna Jesus turutmai’ tímiayi.

*Papru mesekrampra umikman ujakmiania nu*

<sup>19</sup> “Tuma asamtai, uunt Akripia, Uunt Jesus nayaimpin-maya wantintiurak turutmia nuna umirkataj tusan pujajai.

<sup>20</sup> Enentai yapajíawar Yus-shuar ajastinian, emka Tamaskunam pujuarmia nuna ujakarmijai. Tura nuyasha Jerusarénumian, Jutiá nunkanmayancha tura nútiksanak Israer-shuarchancha nuna ujakarmijai. Tura ujainiakun “Yus-shuar ajasmarum paant ajasat tusarum, péñker túratarum” tímiayi ashí shuaran.



21 Tura wi Yusa Uunt Jeen pujáj, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai.

22 Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaishsha, Yúsnan etserniusha tiarmia nunak étsereajai. Nú arantka tátsujai.

23 Krístuka wáitsatniuyayi, tura jakasha émak nantaktiniuyayi, ii uuntri tiniu ármiayi. Tura Krístuka nantaki Yusa chichamen íi áentsun tura Israer-shuarchancha nútiksaj ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

*Papru Akripian Yus-shuar awajsataj tusa wakerimiania nu*

24 Tura nuna takui Jistu kakantar tímiayi “Maaj, Papru, wáurme. Imiá unuimiatu asam wáurkame” tímiayi.

25 Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti.

26 Wi tájana nuna, uunt Akripia juí pujana nuka nékawai. Tuma asamtai arantutsuk nin chichareajai. Kame ju túrunamu ti paant asamtai niisha nékawai, tajai” tímiayi.

27 Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

28 Takui Akripia chichaak “Maaj, ishichik awajtame Papru, Yus-shuar ajastin” tímiayi.

29 Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia anturtukurmena nu, wijiaí métek ajasúk tusan wakerajai. Tura antsu wia núnisaj jiníkiámua núnaka wakeratsjai” tímiayi.

30 Papru nuna tuasua amikmatai akupniusha, uunt kapi-tiáncha, Pirinísesha, tura nuí ashí pujuarmia nu wajakiarmiayi.

31 Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

32 Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

## 27

*Páprun Rúmanam akupkarmiania nu*

1 Tura Páprun Ruma péprunam akupkatniun enentáimsarmiayi. Rúmaka tímiaí, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai

suntara kapitiántrijjaj nenakar akupkarmiayi. Nú kapitiáni naari Júriuiti.

<sup>2</sup> Tura Atramitiunmaya kanu Asia nunkanam pepru ármia nuí wétasa pujumia nu enkemprarmiaji. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti.

<sup>3</sup> Nuí enkemprar kashin tsawarar Sitiun péprunam jeamiaji. Nuí jeawakrin kapitián Juriu, Páprun waitnentak tímiayi “Ame amikrumijn wetá. Au írmasarti” tímiayi.

<sup>4</sup> Tura Sitiunnumia jíinkir, kanujaj wesar nase tukumpramprakin Chipri núnkaka menanmaani aa ikiukmiaji.

<sup>5</sup> Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti.

<sup>6</sup> Nuí jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitiántri, enkempratarum, turammiaji.

<sup>7</sup> Tura untsurí tsawant yáitmataik we-wémiaji tura ti wiántkar Nítiumam jeastatuk ajasmiaji. Tura nuísha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji.

<sup>8</sup> Tura Kritia nunkanam ayamchik wesar itiurchat akui wáitsar wea-wéakuar “Shiir Pujutai” tutainium jeamiaji. Nusha Rasea péprunam tíjiuchiiti.

<sup>9</sup> Yáitmataik wea asar ti táasmaji. Tura yumi yututai jeatema asa ti tsúumainiuyayi nayaantsanam wétin.

<sup>10</sup> Tura Papru chicharuk “Amikru antukturum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjiash” tímiayi.

<sup>11</sup> Suntara kapitiántrin\_kia Páprunka anturtsuk, kanú wianniur\_in kapitiántrin\_cha tura kanú kapitiántrin\_cha chichamen anturkarmiayi.

<sup>12</sup> Tura nuí Shiir Pujutai tutainium yumitin pujustin pé\_nkerchaitkui “Nuín\_kia juy\_anka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

### *Tsúumainium wekasarmiania nu*

<sup>13</sup> Tuma asamtai ukunam nase nunkaaniá tápiriri ajakui, ii wétin yamaikia pé\_nkeraiti, tu enentáimsarmiayi. Túmakui kanu emetai jiru júusar jíinkir Krítianam ayamchik wearmiaji.

<sup>14</sup> Túrasha árusan arakiá kakaram nase, Nuristi tuinia nu tukumpramiayi.

15 Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisami-aji.

16 Tura Kritia nunkanam áawinini nankaamakur nuñkia nase ishichik mijiantmatai, uchich kanu japikir wémiaj nu ti takasar uunt kanunam enkermiaji.

17 Tura enkerar chapikjai uunt kanun jinkiáarmiaiyi wewe najanatai tusar. Tura náikim mukutniunam, Serti tutainium nase juramkishtajiaish tusar, kanunam yakí tarach aan itiararmiaiyi. Nu tarach nase útsuktin tusar nenarma ármiaiyi. Túrawar áyatik nase juramkitiai, tiarmiaiyi.

18 Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiaiyi.

19 Menaintiú tsawant nankaamasmatai iisha ii uwejéjain kanunam káarak iruniarmia nusha entsá utsankarmiaji.

20 Tura untsurí tsawant tsawajisha etsantrachmiaiyi tura káshisha yaasha tsaparcharmiaiyi. Tura nasesha ti kakantar tukumpramkurin “Yamaikia uwempratín atsawai” tiarmiaji.

21 Tura iisha ti untsurí tsawant yurumtsuk matsatu asakrin, Papru ajapén wajaki tímiyai “Amikru winia nuik Kíritianmayaanka jíintsuk anturtukuítkiurminkia yamá ju ititurchatnum pujutsuk tura emenkatmatsuk pujuaaji’ tímiyai.’

22-24 ‘Yamá kashi winia Yusru suntari nayaimpinmaya wantinturkayai. Nú Yúsan umirkaitjiana nu akupturkayai. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikich-nasha ámijiai kanunam enketainia ásarmatai uwempratniun Yus tsankatkarai” turutui. Tuma asamtai, amikru, shiir enentáimsatarum. Atumsha mash uwemprattarme. Túrasha kánuka mesertatui.

25 Wisha winia Yúsrún nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum.

26 Tura chíchimisha nunka uchich pújakmanum nu patatmitiaji” tímiyai.

27 Ayu, katurse (14) tsawant nankaamasmatai nú kashi Atria nayaantsanam jeamiaji. Nu nase nánkamas juram wémiaji. Nuyanka kashi ajapén wiantin armia nu nunka ámunam jeateman nekaawarmiaiyi.

28 Tura urutmá kúnakit tusa nekapmamiyai. Túram tráinta sais (36) mítruuyayai. Nuyasha ékemsan ataksha nekapmamiyai. Nuñkia painti siati (27) mítru nekapmamiyai. Tuma asa nunká anumsatuk ajasun nekaawarmiaiyi.

29 Tura kayanam ijiukaj̄i tusar ashamainiak kuaru jirun kijinian chapikjaj̄i kanú senkarin jin̄kiáwar entsá ajun̄karmiayi. Kijin̄ asamtai, in̄it tepeámtai nase juramkichmi tusar túrawarmiayi. Tura wake mesekar, tsawar̄ti tusar matsarmiai.

30 Tura matsatainaij̄i wiantin armia nu, iikia uchich kanunam en̄kemprar pisarchatj̄iash tu enentáimsarmiayi. Túmainiak kanú nujinia chíkich jirun ajun̄tai tawa nútiksaran̄ uchich kanun ajun̄tai tusar pujuarmiayi.

31 Tura tuma wáiniak Papru suntara kapitántr̄in tura ni suntar̄incha ujakmiayi. “Ausha uunt kanunman̄ en̄ketainiachkuin̄kia atumsha uwemprashtatrumē” tímiayi.

32 Tutai suntarsha uchich kanú chapikr̄in tsupirkar entsá ajun̄karmiayi.

33 Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme.

34 Seajrume, ishichkisha yurumárum kakaram ajastarum, uwemprataj̄i tusarum. Iimiata, nekaatarum, imiatkisha túmatsuk péemkattarme” tímiayi.

35 Nuna tuasua amik Papru apatkun achik Yúsan yu-miñsamiayi ashí íimmianuman̄. Tura puuk yuamiayi.

36 Tura apatkun yuan wáinkiar, ashí aents shiir enentáimsar yurumáwarmiai.

37 Nusha ashí aents irurmaka jimiará sián̄ nuyá ataksha setenta sais (276) ármiai.

38 Yurumáwar ejemakar, yurumkanka entsá utsan̄karmiayi, uunt kanu wampú ajasat tusar.

### *Kanu pen̄ké mesermiania nu*

39 Tura tsawarmatai wiantin armia nu, nun̄kan nekaacharmiayi. Túrasha en̄kentamunam káanmatak aan wáinkiar “Aj̄ kanu anun̄tai” tiarmiayi.

40 Nuyá jiru entsá ajun̄man chapikr̄in tsupirkar entsá ik-iukiarmiayi. Tura kanait jin̄kiárma ármia nuna chapikr̄in tsupirkarmiayi. Tura tarach kanú nujiin̄ amia nuna ne-nakarmiayi. Túram kanu káanmatkanam anumsatuk ajasmi-ayi.

41 Tura wainchi jímiar ámunam jeá kanu entsá wayá te-peamiayi. Tura kanú senkarin̄kia chíchimi yakí takuir ajíamu asa kupintramiayi.

42 Suntarsha, achik júamu armia nú shuaran máataj̄i tusa wakeriarmiayi, yukuak pizararain̄ tusar.

43 Tura kapitán̄cha Páprun uwemtikrataj̄i tau asa nuna túratniun tsan̄katkachmiayi. Antsu chichaak “Emka yukuak-tin̄ nékarmena nu yukuakrum péemkatarum, tímiayi.

44 Nuyá chíkichkia kanunmayá numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

## 28

### *Marta nunkanam túrunamia nu*

1 Tura ashí iwiaakuk jíintrar, nu nunka Marta naartin nekaamiayi.

2 Tura nuj matsamin armia nu, shiir awajtamsarmiaiji. Tuma asamtai iisha tsetsema asakrin, tura yumisha yútakui, uunt jinia ikiapárrarmiayi. Tura “anamaitiarum” turammaji.

3 Pápruka jinia kukarun ikiaanak jinium pataamiayi. Túmawaj napi tsuéran ashamak jiinki, Papru uwején nemaramiayi.

4 Tura nú nunkanmayá aents, Papru uwején napi nemanan wáinkiar “Ju áishmansha shuáran maichuashit, tiarmiayi. Nayaantsanmayá uwempraitiatan ni yusrí iwiaaku átinian suritiawai” tiarmiayi.

5 Páprusha ni uwején pear napin jinium awanmiayi. Tura penkesha yajauch ajaschamiayi.

6 Tura niisha eárchatpiash tusar ii pujuarmiayi. “Túmatkesha jaka inianchatpiash” tiarmiayi. Túrusha ti núkap pujussha penké najaweachmiayi. Túrunamtai, nuiñkia nusháa enentáimprar “Pápruka yúschashit” tiarmiayi.

7 Nú nunkanam aentsu penkerí ámiayi ni naari Pupriu. Nú Pupriu ni jeen in itiaarmiamiayi. Tura menaintiú tsawant yurumkancha suramsarmiaiji.

8 Tura nuj pujarin Pupriu aparí tsuer, numpajají ijiarki jáamiayi. Túmakui Papru werí iyumiayi. Tura Yúsan áujtus amik uwején nin awantkamiayi. Túram péñker ajasmiayi.

9 Nu túramun nekaawar, nú nunkanmayá aents jaa armia nu tariar, niisha péñker ajasarmiaiji.

10 Túram incha ti shiir enentáimturmasar núkap ajampramsamiayi. Túram ukunam ii wétin jeamtai ashí ii atsumamun suramsarmiaiji.

### *Rúmanam jeawarmiania nu*

11 Ii wétsuk nú nunkanam menaintiú nantu pujusmiayi. Tura nuyá chíkich kanunam enkempramiayi. Nu kanusha Arijiántrianmayá yaunchu tau menaintiú nantu yumi yútakui nuj pujumiayi. Nú kanu nujiin numi-yus najankamu jímiar ekemiarmiayi, ni náarinñkia Kástur tura Púruks.

12 Iisha nuj enkemprar weri Serakúsa péprunam jeamiayi. Nuñ menaintiú tsawant pujusarmiaiji.

13 Tura jíinkir nuyañka nayaantsa ayamach weri Rijju péprunam jeamiayi. Nuñ kanarmiayi. Tura kashin anariá nase

suut umpuunti támiayi. Tuma asamtai nú kashinkia Putiuri péprunam jeamiayi.

<sup>14</sup> Nuj jeawakrin Yus-shuar pujuarmia nu, ni jeen juramkimiayi. Tuma asamtai nuñ chikichkí tumin pujusmiayi. Tura nuyañka nunkan Rúmanmaani wémiayi.

<sup>15</sup> Tura Rúmanmaya Yus-shuar, ii jeatniurin neka ásar jintiá inkiunmaktai tusar winiarmiayi. Chikichkia Apiu pepru támanum táarmiayi, tura chikichkia, Menaintiu Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

<sup>16</sup> Tura ii Rúmanam jeawakrin kapitián Juriu achikia yaruman Rúmanmaya uunt kapitiánin ejetimiayi. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

*Rúmanam Papru Yus-Chichaman etserkamiania nu*

<sup>17</sup> Nuyá menaintiú tsawant nankaamasmatai Pápruka Rúmanmaya Israer-aentsu penkerin untuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi.

<sup>18</sup> Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asamtai.

<sup>19</sup> Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaarin kapitiánin ujaktinian táchaitjai.

<sup>20</sup> Tuma asamtai, yatsurtirmin, atumin untukjarme chichastaj tusan. Yusa anaikiamurj, Israer-shuarti nákaunia nu táwiti wi tu étserkui, juí achikiar jinjámu pujajai” tímiayi Papru.

<sup>21</sup> Tutai niisha tiarmiayi “Iisha Jutía nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraiti” tu ujatmakcharmaji.

<sup>22</sup> Túrasha ashí nunkanam yamaram chichaman jintinian yajauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

<sup>23</sup> Nú tsawantaj iruntrami tiarmia nú tsawant jeamtai, ti untsurj aents Papru pujamunam iruntrarmiayi. Papru jintintianiak Muisais yaunchu aar akupkarmia nujaj tura chikich Yúsnan etserniu aarmarijiaisha, Jesus nekas Yusa Anaikiamurinti tusa paant jintintiawarmiayi. Nuna tura káshik nankaama Yus akupeamunam pachiinkiatniun étse-étserkua kjaraj iniaisamiayi.

<sup>24</sup> Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiayi.

<sup>25</sup> Chikichkí enentaik' enentáimsatin atsá asamtai, jiinki weartasa pujuarmiayi. Túmainiakui Papru chichaak “Nékasen Yusa Wakaní yaunchu Yúsnan etserniu, Isayas naartin áarmarijiaí ii úuntriñ chicharuk juna tímiayi:

<sup>26</sup> “Ame weme au aents ju titia:

“Ánutka ántakrumsha nekaashtatrumé,

Íitkia iyakrumsha wáinkiashtatrumé.

<sup>27</sup> Warí, au shuara enentáí katsuurai;

Kuishjiaí ántaksha ántichua núnin ániawai,

Jiisha epetkamua áanin ániawai,

Iyaksha wáinkiaíñ tusa, ántaksha antukaiñ tusa

Enentáimkiusha nekaawaiñ tusa,

Winí uwempraiñ tusa, tura Winí tsuamaraiñ tusa túrunayi”.

Nuní áarmaiti.

<sup>28</sup> Tuma asamtai, nekaatarum. Yamaikia Yusai uwempratin ana nuna Israer-shuarsha susamuiti. Tura niñkia nekas umikiartatui” tímiayi.

<sup>29</sup> Tura Papru nuna ti iniaisamtai Israer-shuar nuamtak núkap chicharnaiyasua wearmiayi.

<sup>30</sup> Tura Pápruka nuñ jea ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeen itiaamiayi.

<sup>31</sup> Tuma asamtai Papru arantutsuk urukuk Yus akupeamunam ati, Uunt Jesukrístu túramuríncha ashí etserkamiayi. Nútiksañ etserkatniuncha Páprun penké suritkiacharmiayi.

## Papru RÚMANMAYA SHUARAN papí akuptukma

*Papru Rúmanmaya Yus-shuaran áatramania nu*

<sup>1</sup> Wi Papru Jesukrístu takarniuitjai. Núnisañ Yus achirak ni Shiir Chichamen etserkat tusa akatar akuptukmiayi.

<sup>2</sup> Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi.

<sup>3</sup> Nu Chichamnum Yus ni Uchirín áujmatui. Ayashíjjaiñkia Tawit weeanum akiiniamiayi.

<sup>4</sup> Tura ni tishiir wakaníjjaiñkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiría nu, paant nekanamiayi. Niisha ii Uuntrí Jesukrístuiti.

<sup>5</sup> Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisañ ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi.

<sup>6</sup> Atumsha nuyá shuaraitrume. Tura Jesukrístunu ajasarat tusa Yus achirmakuitrume.

<sup>7</sup> Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yusha ii Uuntrí Jesukrístusha waitnen-tramainia ásar imiatkinchanum ti shiir pujustinian yainmakarti.

*Papru Ruma péprunam irautinian wakerimiania nu*

<sup>8</sup> Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsan ti shiir yu-miñsajai.

<sup>9</sup> Tuke enentáirjai Yusa Uchirín ashí shuarum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui.

<sup>10</sup> Ashí tsawant ni wakerutakuñkia íitjarum tusan Yúsan seajai.

<sup>11</sup> Nekas íitniun wakerajrume. Nuí jean wakanmin yaiñkian Yusjai kanakchamin ajasúk tusan wakerajrume.

<sup>12</sup> Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

<sup>13</sup> Yatsurú, tuke íitjarum tusan wakerimjarme. Túrasha iyatsjarme. Kame Yus-Chichaman ujaakun chíkich shuaruma áintsan atumíincha Yus kakaram takasman wáinkiatniun wakerajai.



14 Wikia Yus akuptuku asamtai ashí shuaran ujákártiniaitjai. Unuimiaruncha tura unuimiaruncha, ti nékainia nunasha tura nékachuncha, métekrak ujakartiniaitjai.

15 Tuma asan atumniasha Rúmanam pujarmena nunasha Uwempratin Chichaman ujaitjarum tusan pujajai.

### *Uwempratin Chicham kakarmaiti*

16 Nu Shiir Chicham Yusa kakarmarijjai ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisan uwemtikramniaiti.

17 Nu chichamnum Yus enentáimsamia nu páantaiti. Júiti: Áyatik Yúsan nekas enentáimtuiniakui Yuska “pénkeraitme” tíminiaiti. Yus-Papiniumsha núnisan tawai: “Yúsan nekas enentáimta nuna Yus “pénkeraitme” tutai tuke Yusjai shiir wekasattawai.” Tu áarmaiti.

### *Aentsu tunaari*

18 Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti.

19 Tura nu shuarka ashí Yusna nekaamnia nuna Yus paant awajsa asamtai pénger nékainiawai.

20 Kame yámankamtaikniumiá Yus wáinchataitiat ni najanamurijjai juka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui.

21 Yúsan nékainiyat shiir awajsacharmiayi tura yuminsacharmiayi. Tuma ásar aya ánta nunak enentáimtuiniak ni enentái tunaajai piakai.

22 Tura ti nekajai tuíniyat enentáimcha núnin ajarai.

23 Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinnisha napincha kuntinnisha yajasmancha nakumkar nuna shiir awajenawai.

24 Nu asamtai imiá yajauch enentáimiainiakui “ánik asati” tímiayi Yus. Túramtai ti natsanmainian túrunainiawai.

25 Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

26 Nuna túrin ásarmatai Yus natsanmainia nuna wakeruktinian tsankatkarmiayi. Túramtai nuwasha áishmanjai tsanintinian nakitrar nuamtak yajauch awajnainiawai.

27 Núnisan̄ áishman̄sha nuwajaj̄i tsanint̄inian iniaisar nuamtak áishman̄kak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayash̄i wáitsatniunak sumamawarmiayi.

28 Tura tuke Yúsan nakitiainia asamtai ti yajauch enentáimiainiak pen̄ké túrachminia nuna túrawarti tusa Yus tsan̄katkarmiayi.

29 Nu shuar ti tunaajaj̄i piaku áiniawai. Tsanirmausha aya kuítniak wakerincha tura yajauch awajin̄ áiniawai. Nu arantcha awakmakun kajerniusha man̄kartincha tuke máanaincha anan̄kartincha pen̄kercha awajkartincha, tsanumniusha áiniawai.

30 Nu arantcha chikichnasha yajauch áujmatin̄ áiniawai. Yúsnasha nakitiainiawai. Áimniusha áiniawai. Tura “pen̄keraitjai” tiar nan̄kaamantu enentáimtumainiawai. Tunáa túratniun eainiawai. Apar̄incha nukur̄incha umirainiatsui.

31 Enentáincha áiniawai. Tana nuna umichu áiniawai. Aneñkartichu ásar waitneñkartichu áiniawai. Tsan̄kurcha áiniawai.

32 Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chíkich yajauch túramtai ti shiir wararenawai.

## 2

### *Shuar tunáa túramun Yus paant nékawai*

1 Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame.

2 Yuska nu tunaan túrin ainia nuna súmamtikiashstinkiait.

3 Amesha nuna túrin “imiá yajauchiiti” táyatam amesha métek túrakminkia Yus sumamtikiattana nuyá çitiurak uwemprattam?

4 Yus ti waitnentrama asa nu tunáa ikiukim Nin enentáimtustinian katsuntramuk nákarmawai. Tura pen̄ker asa wárik asutiámchakui sumamashtiniaitjai çtu enentáimtumamek? Tu enentáimkium ni waitnentrammari ántar awajsaitme.

5 Tura tunaarum enentáimtutsuk tuke túrakmeka súmamtikiatin tsawantaj̄i ti tunáa irutmampramujaj̄i ti asutniáttame.

6 Nu tsawantaj̄i ni túramujaj̄i métek Yus ashí shuaran akirartatui.

7 Shuar tuke pen̄ker túrak ashí shiira nunasha tura tuke amuukachmin̄ ainia nunasha wakeruiniana nuna Yus tuke iwiaaku Niijaj̄i shiir pujustinian sústartatui.

8 Antsu pen̄kera nuna wakerutsuk antsu aya yajauchin wakeruiniak Yúsan nakitiainia nuna Yus ti kakerak asutiáwartatui.

<sup>9</sup> Nekas Israer-shuarsha tura núnisaṅ Israer-shuarchasha tunaan túrin áiniakka ti wáitsartatui.

<sup>10</sup> Antsu nekas Israer-shuarnasha tura núnisaṅ Israer-shuarchancha péṅker túrin áinia núnaka Yus ti shiir ímiatkinchanum apujsartatui.

<sup>11</sup> Yus ashí shuaran akantsuk mai metek iyawai.

<sup>12</sup> Shuar Muisais akupkamun nékatsuk tunaan túraka aya júnisaṅ sumamawartatui. Tura shuar Muisais akupkamun nékayat tunaan túraṅka nu akupkamujai sumamawartatui.

<sup>13</sup> Akupkamun aya antukarua nuka Yusaj péṅker áiniatsui antsu antukar umirainia nuna Yuska “péṅkeraiti” tawai.

<sup>14</sup> Israer-shuarchaka Muisais akupkamun takakainiachkusha aya ni enentájjiai nu akupkamun umirainiak

<sup>15</sup> nu umireamujai Yus nu akupkamun ni enentáin ikiursarua nuka paant nekaamniaiti. Nujai métek túruiniak shiir enentáimiainiawai. Tura métek túruiniachkuṅka péṅkercha enentáimiainiawai.

<sup>16</sup> Wi Uwempratin Chichaman étsereaj nuṅ ashí shuar uuṅkrisha túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantaj tunaan túrin sumamawartatui.

*Israer-shuarsha Muisais akupkamun umircha áiniawai*

<sup>17</sup> Ámeka “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash.

<sup>18</sup> Yus wakeramuncha nékajai. Tura akupkamun nekaan péṅkera nuna wakerajai, tátsumeash.

<sup>19</sup> Wakannium kusuraru áinia nunasha jintintiamnaitjai. Tura tsáapninan nekamtikiawarminiaitjai, tátsumeash.

<sup>20</sup> Akupkamu ti peṅker neka asan nekasa nuna unuimiaruitjai. Tuma asan nékachuncha ántuiniachuncha jintintiamnaitjai” tátsumeash.

<sup>21</sup> Pai, chíkichka unuiniatimesha ¿urukamtai imia ámeka unuimiatsum? “Kasamkashtiniaiti” tu étsereatsmek. Táyatmesha ¿urukamtai ámeka kasamam?

<sup>22</sup> “Tsanirmashtiniaiti” tátsumek. Enta, ¿urukamtai ámeka tsanirmam? “Ántar-yusan nakitajai” tátsumek. ¿Urukamtai ámeka nu yusa jeeniā kasamam?

<sup>23</sup> Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek.

<sup>24</sup> Yus-Papiniumsha núnis áarmaiti: “Átum péṅker umirchamujai Israer-shuarcha Yúsan yajauch chicharainiawai.”

<sup>25</sup> Muisais akupkamia nu ashí umireakmekaa nii timia núnismek tsupirnaktin péṅkeraiti. Tura takamtsuk umireachkumka tsupirnakcha núnisketme.

26 Chíkich shuarsha tsupirnakchaitiat Muisais akupkamun umireakka tsupirnatskesha tsupirnakua áintsan<sub>ket</sub>e.

27 Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui.

28-29 Kame nekas Israer-shuarka aya pátatkechu antsu tuke enentájjai Yúsnan wakera núiti. Núnisan<sub>ñ</sub> nekas tsupirnak<sub>tink</sub>ia aya ayashíjjai<sub>n</sub>chuiti antsu enentáiniam shiir átinia núiti. Nekas akupkamu aya áarchamuiti antsu nekas enentájjai<sub>n</sub> umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

### 3

1 Núnis a<sub>n</sub>sha Israer-shuar ainia nu ¿warí pé<sub>n</sub>kernak takakainia? Tura tsupirnak<sub>tinch</sub>a ¿wariniak yayá?

2 Ti pé<sub>n</sub>keraiti. Warí, émkaka, Yus ni chicham<sub>en</sub> Israer-shuaran súsacharmakia.

3 Kame chíkich chíkich umichu áiniakui Yus tsan<sub>kat</sub>kamia nuna nú shuaran súsachmata<sub>n</sub>kia nuikia “Yus umichuiti” ¿títinkiait?

4 Pé<sub>n</sub>kea. Antsu Yuska nekas túratniua nujai métek ashí túriniaiti. Shuar umichu áiniakuisha ni támar<sub>n</sub> mash umiktatui. Ni tamajai shuáran wáitrin awajeakka nusha pé<sub>n</sub>keraiti. Núnisan<sub>ñ</sub> atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

5 Nu arantcha, “Wi tunaan túramujai Yus imiá pé<sub>n</sub>kerana nuna paant awajeakka ¿urukam<sub>tai</sub> winia asutiua? ¿Nuka pé<sub>n</sub>kerkait?” tíchatapash. (Kame aents chichainia núnisnak tajai.)

6 Warí, Yus pé<sub>n</sub>kerchaitkiun<sub>ka</sub> ¿itiurak ashí shuara tunaar<sub>n</sub> súmamtikiawarat? Kame imiá pé<sub>n</sub>keraiti.

7 Núnisan<sub>ñ</sub>, “Wi umirkachmajai Yus tuke umiiniana nuna paant awajeak<sub>naka</sub> nuikia nujai in shiir awajsam<sub>tai</sub> ¿urukam<sub>tai</sub> “tunaitme” túruta?” tíchatapash.

8 Warí, “tunáa túramujai Yúsan pé<sub>n</sub>ker awajeajai,” tú nekas enentáimpramniaitkiu<sub>n</sub>kia shuar nu<sub>ik</sub>ia “Wats, ashí pé<sub>n</sub>ker áti tusar tunáa túratai” tímin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin áiniawai.

*Ashí shuar tunáa túraitji*

9 Nuikia Israer-shuartikia chikichjai nan<sub>ka</sub>amas ¿pé<sub>n</sub>kerkaitiaj? Pe<sub>n</sub>kesha. Warí, Israer-shuartisha Israer-shuarchajai<sub>n</sub>sha ashí métekrak tunaan túrin áiniawai. Núnaka jú áarmajai paant awajsaitjai.

10 Yus-Papisha núnisan<sub>ñ</sub> tawai:

“Pénkeran túrin chikichkisha atsawai.

11 Yúsnan nekaatniun nakitiainiawai. Yusnasha eainiatsui.

12 Yusnumiã kanakiar menkakatniunam wénawai. Chikichkisha pénkeran túrin penké atsawai.

13 Ashí yajauch chichainiak iwiarsamu yama urainiua núnisañ áiniawai. Ni chichamejai tuke anañkartin áiniawai. Chichame napía áintsañ najamin áiniawai.

14 Aya yajauchin kakaram áujmatin áiniawai.

15 Máataj tusa wárik yujarin áiniawai.

16 Aya ti itiurchat ti yajauch awajin áiniawai.

17 Shiir pujustinian nékainiatsui.

18 Ishichkisha Yúsán ashamenatsui.”

19 Yaunchu akupkamun umirkatin ainia nú shuar aya tákamtak umirkatin áiniawai. Tuma asamtai ashí shuar umirkachu ásarmatai Yus nujají súmamtikiawartatui. Túrakui niisha pachischamin áiniawai.

20 Akupkamuka aya ii tunaarín paant awajturmají. Tuma asamtai akupkamu pénker umirkatniujají Yus “pénkeraitme” turamchamniaitjí.

*Aya Yus shiir enentáimtusar uwempramniaitjí*

21 Yus-Chicham yaunchu áarmanum itiura Yus in “pénkeraitme” túramminiaitíaj nuna paant tawai. Kame akupkamujainchuití.

22 Antsu iisha ashí shuarsha núnisañ aya Jesukrístu shiir enentáimtakrin Yus “pénkeraitme” túramminiaitjí.

23 Kame ashí shuarti tunáa túraitjí. Tuma asar Yusjají métek pénker ajastin penké jeatsjí.

24 Tura Yus in waitnentráma asa kuítchajají “pénkeraitme” túramjí. Jesukrístujají uwemtikrampra asa túramjí.

25 Tura Krístun akupkamiayi ní jakamujají ashí tunaan asakátratniun. Túramtai shuar Nin nekas enentáimtuiniakuí Yus tsañkuramniaití. Yaunchu tunáa túramun katsunteak enentáimtuschamiayi. Yamái tsañkuramnia nuna yaunchu nekáa, nuna túramniuyayi.

26 Tura yamaiya tunaancha tsañkureak ashí shuar Jesusan nekas enentáimtuinia nuna “pénkeraitme” tuke tímíniaití. Krístu jakamujají nuka paant ajasái.

27 Nújainkia ii pénker ajasjínia nu “winia kakarmarjají túrunajají” tíchamnia asar ¿nañkaamantu enentáimtumarminkaitíají? Penkesha. Warí, akupkamu umitsuk aya Krístu nekas enentáimtakrin Yus “pénkeraitme” túramjí.

28 Nujají páantaití. Akupkamu umirtsuk aya Jesukrístu shiir enentáimtakrin Yus “pénkeraitme” túramminiaitjí.

29 Warí, Yuska Israer-shuarnasha tura núnisan̄ Israer-shuarchancha mai ni Yúsriñchukait.

30 Kame aya chikichik Yúschakait. Tura tsupirnakuncha tsupirnakchancha mai metek aya Jesukristun nekas enentáimtuiniakui “pénkeraitme” tíminiaiti.

31 Shuar Yúsan shiir enentáimtamujai péñker ajastin áiniakui nujai ¿akupkamu ántar awajsamukait? Atsá. Antsu nuna nan̄kaamas umirkatin awajsamuiti.

## 4

*Apraámsha Yúsan shiir enentáimtamujai péñker ajasmiania nu*

1 Ashí Israer-shuara uuntri Apraám enentáimtustai. Niisha ¿itiurak Yusjai péñker ajasma?

2-3 Ni péñker takasmajai Yusjai péñker ajasuitkiun̄ka nan̄kaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus íimmianum nan̄kaamantu enentáimprachminiaiti.

4 Shuar íniamna nu takasmatai ¿aya tsan̄ka asam akiktatmek? Warí, ni takasmanum páchitsuk akikchatniukait.

5 Antsu shuar ni péñker turamuri enentáimtsuk áyatik “Yus tunáa shuaran péñker awajniuiti” tu enentáimtakui Yuska tsan̄ka asa “pénkeraitme” tawai.

6 Tura péñker túrachunak Yus “pénkeraitme” takui nu shuar shiir warasminiaiti. Núnisan̄ tawai uunt akupin Tawit:

7 “Shuar ashí ni tunaar̄in Yus asakátar tsan̄kuramu ana nuka shiir enentáimpramniaiti.

8 Uunt Yus ni tunaar̄in enentáimtachma asa ti warasminiaiti.”  
Tu tímiayi Tawit.

9 ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi.

10 Tura Apraám tuke tsupirnatsaiñ Yus nuna tímiayi. Emka Yus “pénkeraitme” timia nú ukunam Apraám tsupirnakmiayi.

11 Apraám tsupirnatsuk Yúsan shiir enentáimtusmatai Yus “pénkeraitme” tusa “tsupirnaktiniaitme” tímiayi. Nújaiñkia ashí Yúsan shiir enentáimtuinia nú shuar tsupirnatskesha Apraám weeá ániawai. Tura nu shuaran Yus “pénkeraitme” tawai.

12 Tsupirnakusha aya tsupirnakusa asa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnatsuk Yúsan shiir enentáimtusmiayi.

*Yus shiir enentáimtamujai Nii timia nu uminkiattawai*

13 Yaunchu Apraáman Yus chicharuk “Amincha amée weeá shuarnasha jú nunkan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku nuna tsan̄katkamiayi.

14 Kame aya akupkamun umirniun súsatniuitkiuñkia nuikia Yus enentáimtustin ántraiti. Tura Yus Apraáman timia nusha ántraiti.

15 Akupkamu akui shuar umirkachka ti asutniáshtatuak. Tura atsakuñkia ¿asutniátniukait? ¿Itiurak umirtsuk ikiuktiñ?

16 Tuma asamtai Yus ti anenkartin asa Nin nekas enentáimtuinian ashí tsan̄katkai. Nújain̄kia Apraám weeasha Yus Apraáman timia nuna páchitsuk wáinkíártatui. Iisha Apraámjají métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji.

17 Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjají métek Yus shiir enentáimtakrinkia Yus incha Apraám weeá áintsan̄ írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútiksān̄ nájani.

18 Yus “ti pampañtatme” takui Apraám ti uuntach áyat Yus timian enentáimtak yajutmartinian nákasmiayi. Nujají untsurí shuar ní weeá ajasarmiayi, Yus timia áintsan̄.

19-20 Apraámsha sian̄ (100) uwí takakuitiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiai. Nujajísha nuna nan̄kaamas kakaram ajasmiai.

21 Tuma asa “nekas Yus tana nuna páchitsuk umiktatui” tu enentáimpramiayi.

22 Nu asamtai Yus “pénkeraitme” tímiayi.

23 Tura Yus nekas enentáimtamunam Yus “pénkeraitme” tana nu aya Apraámnak áatrachmaiti.

24-25 Antsu incha túramji. Iisha núnisrik ii Uuntri Jesús nekas enentáimtakrinkia Yus incha “pénkeraitme” turamtatji. Jesuska ii tunaar̄in jarutramkatniun surunkamiayi. Tura nujají Yus in “pénkeraitrume” taku Jesusan ataksha iniantkimiai.

## 5

### *Yus “pénkeraitme” túramkurin shíiraiti*

1 Tuma asamtai Yus nekas enentáimtakrin Yus “pénkeraitme” túramji. Nujají iisha Yusjají shiir nawamnaikiar pujaji. Núnaka ii Uuntri Jesukrístu ni jakamujají sumartamkamiai.

<sup>2</sup> Tura Nii shiir enentáimtakur Yusaj weankaitji. Tura Kristu jarutramkakrin Yus ti anenmaji. Tura tuke anenma asakrin Nijjaj métek shiir ajastin nákakur waraaji.

<sup>3</sup> Nu arantcha yamá itiurchat pujayatrik nu itiurchatjaj unuimiartatji tusar waraaji. Katsuntratniuncha unuitiamji.

<sup>4</sup> Tura nu unuimiarar ii katsuntramu paant átatui. Tura nuyá Yus ti shiir awajtamsattajnia nuka shiir enentáijjaj nákastatji.

<sup>5</sup> Nu ti shiir enentáimsar nákamujaj ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmajj. Tuma asamtai Yus túratin nákaajnia nu imiá nekas wainkiattaji.

<sup>6</sup> Iikkia penké uwemprachmin asakrin tsawant jeamtai Kristu ashí shuara tunaarjin jarukmiayi.

<sup>7</sup> Shuar chíkich shuaran uwentikratniun ¿jaruktatuak? Péñker shuar ain jarukchattawai. Kame ti penkeraitkiuinjia jarukchaintiash.

<sup>8</sup> Antsu ii tuke tunáa árinin Kristu jarutramkamiajji. Nujaj in ti anenmajnia nuna ti paant iniakturmaji.

<sup>9</sup> Tura ni numpejaj tunaarinja awajsamu asar imiá nekas Yus asutiámatniua nuyá uwempraitji.

<sup>10</sup> Yusa nemasri áyatar Yusa Uchirí jakamujaj yamaikia Yusjaj shiir nawamnaikiar pujaji. Nu arant nuikia Kristu tuke iwiaaku asa iijjaj tsaninjiu asa ashí yajauchinmaya uwentikramar tuke shiir awajtamsattaji.

<sup>11</sup> Ii Uuntri Jesukristu jakamujaj Yusjaj shiir nawamnaikia asar ti waraaji.

### *Atansha tura Krístusha túrawarma*

<sup>12</sup> Ayu. Yámankamtaik emka áishman Atan ninji tunaan túramtai nú tunaajaj ashí shuar tunaarintin ajasarmiayi. Tura ashí tunaarintin ajasar mash jákatin áiniawai.

<sup>13</sup> Akupkamu atsakuinjia umirkachma nekaachminiaiti. Tuma ain Muisais akupkamu atsaisha tuke tunaan túrin áirmiayi.

<sup>14</sup> Atan pujumia nuyá Muisais tuke akupeatsain shuara tunaari paantcha ain ashí shuar tunaan túrawar jákarmiayi. Kame ni tunaari Atanna áintsachauyayi. Atanka Yus akupkamu paant ujakman umirkachmiayi. Antsu nu shuar Yus akupkamu paant nekainiachiatan tunaan túrin áiniak jákarmiayi. Tura Atanka Krístujaj apatkar enentáimpratai.

<sup>15</sup> Atan tunáa túramia nujaj apatka iisam, Yus in tsankatramaj nuka nankaamas péñkeraiti. Kame Atan ninji tunaan túramujaj ashí aents untsurí armia nu, tunaarintin áiniak jákarmiayi. Tura Yus in ti anenma asa chikichik áishmanjaj



nuna nan̄kaamas tí shiiran tsan̄katramaji. Jesukrístujaīn̄kia untsurí shuaran uwemtikrar ti shiiran tsan̄kateawai.

<sup>16</sup> Atānka tunaarī imiá yajauch aīn̄ nuna nan̄kaamas pé̄nkeran Yus tsan̄katramkaitji. Iis, aya chikichik tunaan túramujaī aents sumamawarmiayi. Antsu Yus uwempratniun tsan̄katramaj nújaīn̄kia ti untsurí tunaan asakárui, tura “pé̄nkeraitme” túramji.

<sup>17</sup> Chikichik áishmān̄ tunaan túramujaī aents jákatin áiniawai. Tura nuna nan̄kaamas chikichik áishmān̄ Jesukrístu túramujaī ti shiir pujustatji. Kame Yus ti anenma asa ii pé̄nker túratsrinīn̄ “pé̄nkeraitrume” túramji. Nu asamtai yamaram iwiaakmanum kakaram ajaji.

<sup>18</sup> Atān tunaan túramujaī ashí tunaarintin ajasar jákarmiayi. Núnisān̄ Jesukrístu pé̄nker túramujaī ashí shuar Yus “pé̄nkeraitme” timia nuka yamaram iwiaakmajaī tuke pujusartatui.

<sup>19</sup> Núnisān̄ chikichik áishmān̄ umirkachmajaī untsurí tunaarintin ajasarmiayi. Tura chikichik áishmān̄ umirkamujaī untsurí shuar pé̄nker awajnasarmiayi.

<sup>20</sup> Wats, tunáa ti paant atí tusa Yus ni akupkamur̄in̄ susamiayi. Túrasa ti tunáa pampaakui Yus nuna nan̄kaamas waitnentramak nu tunaan asakátramji.

<sup>21</sup> Shuar tunaan túrin ásar jákatin áirmiayi. Tura núnisān̄ ii Uuntrī Jesukrístu túramujaī Yus in “pé̄nkeraitrume” túramkurin iisha tuke iwiaaku pujustiniaitji.

## 6

*Krístujaī jaka asar tunáa túrachminiaitji tura Krístujaī tsanīn̄kiu asar iwiaakuitji*

<sup>1</sup> Núnisaitkiūn̄kia Yus nan̄kaamas waitnentrampratai tusar ¿tunáa túratjajik?

<sup>2</sup> Pé̄nkea. Warí, iikia tunáa túrashtin jákaitji. Jáka ¿itiurak tunaan túramniait?

<sup>3</sup> Imianniutikia Krístujaī tsanīn̄kiu asar imianir Niijiaī métek jaka áintsar aji.

<sup>4</sup> Tura imianir Krístujaī jaka áintsar métek iwiarnasuitji. Tura Yus ti kakaram asa Krístun jakan iniantkimia núnisān̄ incha nu kakarmajaī yamaram enentáijjaī pé̄nker wekasatniun iniantamkimiaji.

<sup>5</sup> Krístujaī tsanīn̄kiu asar Niijiaī métek jaka áintsan̄ketji. Tura núnisān̄ Niijiaī métek nantaktiniaitji.

<sup>6</sup> Yaunchu enentáimtaīn̄kia Krístujaī métek jaka asamtai ii yajauch wakerutain emen̄kátrutmakuitji. Tuma asamtai ya- maikia pen̄ké umirkashtiniaitji.

7 Kame ¿jákaka ititurak tunaan túrat? Yamaikia ankant ajasuitji.

8 Iisha nekas Krístujai jákaitkiurkia Niijjai métek tuke iwiaaku pujustin enentáimji.

9 Kame Krístuka chikichkí jaka nantakin asa atakka jákashtatui. Túmaitkiui atakka ajakrachminiaiti.

10 Kristu chikichkí jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsán shiir awajsatniun pujawai.

11 Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsaniñkiu asarum iwiaaku pujakrum Yus shiir awajsatarum.

12 Nu asamtai tunaaka ayashmiiin akuptamkashtinaitrume. Ayashí wakeramuri umirkashtinaitrume. Ankantaitrume.

13 Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum.

14 Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrume. Tuma asamtai yamaikia tunaaka nupettamkachminiaiti.

### *Tuke umireajnia nuna takarniurintji*

15 Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péñkea.

16 Tuke umireajnia nuna takarniurintji. Nuka nékatsrumek. Tura ni takarín ajasam umirkatniuitme. Tuma asamtai tunáa umirkurkia ni takarniurintji tura umirkar jakattaji. Tura Yus umirkurkia péñker wekasattaji.

17 Atumsha yáunchuka tunáa umirniuitiatrum ikiukrum yamaikia nekas chicham antukurmena nu nekas atumí enentáijjai umirkaitrume. Tuma asamtai Yus ti yumĩnsatniuiti.

18 Yamaikia tunaanumiã ankant ajasu asarum ti péñker wekasatniunam pachĩinkiaitrume.

19 Paant nekaak tusan takarniun pachisan tájarme. Wats, yaunchu atumí ayashí mujjmiainian tura ashí yajauchin túrat tusarum tsan̄kamakmarme. Núnisrumek yamaikia atumí ayashí péñkeran túrat tusarum tura tuke Yusjai shiir wekasat tusarum tsan̄kamaktarum.

20 Atumsha tunáa umirniuyarme nuikia péñker wekaichauyarme.

21 Tura nújajsha ¿warí péñkerna yáinmakmarum? Iista, yamáí natsanmainchakait. Nushá jákatniunam júawai.

22 Antsu yamaikia, tunaanumiá uwempra asarum Yus umirniuitrume. Antsu júka Yusjái shiir wekasatniunam júawai tura nuyá tuke iwiaaku pujustatrume.

23 Tunáa takarkumka tuke jákatniun akirmaktatui. Antsu Yuska iikia takaatsriniñ penké ántar tuke iwiaaku pujustinian suramsattaji. Ii Uuntrí Jesukrístujái tsaniñkia pujá asakrin nuna túrutmattaji.

## 7

### *Akupkamujái ankantaitji*

1 Enentáimpratarum yatsuru. Jákaaka akupkachminiaiti. Aya iwiaakna nu akupkamniaiti. Nu paant nékatsrumek.

2 Wats, nuwá nuátkamu ni aishrí iwiaakkuí niijjái tsaniñ pujustiniaiti. Tura aishrí jakamtai ankant ajawai.

3 Tuma asantai aishrí iwiaakain chíkich áishmanjái tsaniákka tsanirmawai. Tura ni aishrí jakamtai chíkich áishmanjái páchitsuk nuatnakminiaiti tura nuikia tsanirmatsui.

4 Núnisrumek atumsha, yatsuru, Kristu ayashí muchit-mari ajasu asarum akupkamu emettachmin jáka áintsarum ajasuitrume. Túrakrum Krístujái nuatnaikiatin áintsarum ankantaitrume. Niisha jakamunmaya nantakniuiti. Yamaikia Krístunu ajasu asar Niijjái tsaniñkiar Yus wakeramu péñker túratniuitji.

5 Yaunchu wakerutai umirniuyaj nuí akupkamu enentáimtusar nuna nankaamas yajauchia nu wakerimji tura jákatniunam juramkimji.

6 Antsu yamaikia akupkamu emettachmin jáka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakanjijái tsaniákur yamaram iwiaakmajái péñker wekasamniaitji.

### *Winia enentáirui tunáa ana nu*

7 Núnisaitkiuñkia “Akupkamu yajauchiiti” ¿titiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuñkia wakerukchaajái.

8 Tura nu akupkamun enentáimtakui winia enentáirui tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai.

9 Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaamjai tura jáka áintsanak ajasjai.

10 Tuma asantai akupkamujái péñker wekasatniuitiatan umirkatniun tujintiakuí aya jákatniunam jurukni.

11 Kame tunáa wakerutainkia nu akupkamujai anan̄krua péñker iwiaaku pujustinian surutsuk nu akupkamujai jákatniunam jurukmiayi.

12 Tuma asamtai akupkamuka Yusna asa ti penkeraiti. Ya-jauchichuiti.

13 Nuikia ¿pénkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi.

14 Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai.

15 Kame túrajna nuna itiurchat enentáimtajai. Péñker túratniun wakeraj nuna túratsjai. Antsu nakitiaj nuna nekaska túriniaitjai.

16 Akupkamu péñkeran nekaan umirkatniun wakerajai. Túrayatnak umirchaitjai.

17 Tuma asamtai wíchaitjai tunaan wakerakun túrajna nuka. Antsu winia enentáirui tunáa wakerutai pujá asa nu túrumtikriniaiti.

18 Yaunchu enentáimtai winia enentáirui pujana nu penké yajauchiiti. Nuna ti paant nékajai. Tuma asamtai péñker túratniun wakerayatnak penké tujintiajai.

19 Péñker túratniun wakerayatnak túratsjai. Antsu tunaan nakitiaj nuna túrajai.

20 Nu asamtai nakitiaj nuna túrakun wíchaitjai antsu winia enentáirui tunáa wakerutai pujana nu túriniaiti.

21 Júnisaiti. Péñker túratniun wakerakun aya tunaan ínkiuajai.

22 Nekas enentáijjai Yusa akupkamur̄in wakerajai.

23 Tumai yaunchu enentáimtai winia enentáirui pujurtak nupettawai tura nekas wakeraj nuna akirturui.

24 Maa, ti waitiajai. Jú ayash wakeramujai jákatniunmaya ¿yaki uwemtikrurat?

25 Yuska ii Uuntri Jesukristujai túrutmamniaitji. Tuma asamtai Yúsna ti yum̄inkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

## 8

### *Yusa Wakan̄ijai péñker wekasatin*

1 Jesukristujai tsan̄inkiarun Yuska “tunaan túrawar jákatniunam wémin áiniawai” tatsui. Nu shuar ni ayashi wakerana nuna umirtsuk Yusa Wakan̄i wakerana nuna umirainiawai.

2 Jesukrístujaj tsaniñkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmayá tura jákatniunmayasha ankant ajasuitji.

3 Ayash wakerutañkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujaj ayash tunáa wakeramun nu-petkamiayi.

4 Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji.

5 Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsnañ enentáimtuiniawai.

6 Ayashnia nuna enentáimtuinia nú shuar jákatniunam wénawai. Antsu Yúsnañ enentáimtuinia nuka Yusjaj shiir nawamnaikiar tuke pujusartatui.

7 Aya ayash wakeramun enentáimtuinia nú shuar Yusa nemasrj áiniawai. Yus akupeamun nakitiainia ásar ni taman umirkatniun penké jeainiatsui.

8 Tuma asamtai shuar ni ayashí wakeramurj warareakka Yúsnañ shiir awajsachminiati.

9 Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitruma. Ashí shuar Krísturtin ainia nu ni Wakanin takaku áiniawai. Takachaitkiunka nuikia Krístunuchuiti.

10 Tura Kristu atumin pujurtamkurminkia atumí ayashí tunaajaj jakamnia ajñ Yus “pénkeraitme” túramu asamtai atumí wakaníñkia nekas tuke iwiaakuiti.

11 Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimiá núnisañ nu Wakanjaj yamaram iwiaakmajaj iniantamkittiarne.

12 Tuma asamtai, yatsuru, ayash wakeramu penké umirkashtiniaitji.

13 Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka péñker wekasarum nekas iwiaaku áatrume.

14 Ashí shuar Yusa Wakaní timiajaj métek wekainia nu, nu shuar nekas Yusa uchirínti.

15 Yusa Wakaní in pujurtamkurin Yusa uchirí ajasar sapijmiatsuk Yusaj weamkar “Aparú” tímimniaitji.

16 Nu Wakan “nekas Yusa uchirínme” ii enentáin túramji.

17 Tura ni uchirí ajasu asakrin Yus tímia núnisañ ashí Níniun suramsattaji. Krístun ashí susattana núnisañ incha suramsat-

taji. Yamái Krístunu takaakur wáitiakrikia ukunam Krístujai métek ti shiir awajnastatji.

<sup>18</sup> Maa, yamá ti wáitiakrishá ukunmańka nayaimpiniam ti shiir pujakur nu wáitsamu kajinmatkittiaji.

<sup>19</sup> Tsawant jeamtai Yus ashí ni shuarin Niijjai métek ti shiir awajsartatui. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu íranna nu ti nákainiawai.

<sup>20</sup> Ashí Yus najanamia nuna yámankamtaik ti péńker najanamiayi. Túrasha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsan̄katkamiayi. Tuma asamtai iwiarnartin tsawantan nákwai.

<sup>21</sup> Nu tsawantai ashí Yus najanamu emesnartinniumia uwemprattatui. Tura ashí Yus najanamuka shuar Yusa uchirí ajasarua nujai métek shiir awajnasar an̄kant ajasartatui.

<sup>22</sup> Yamaisha ashí Yus najanamu ainia nu, nuwá jatema wáitia nuni ti wáitiainiawai.

<sup>23</sup> Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákwai. Nuisha ii ayashísha an̄kant awajnastatui.

<sup>24</sup> Nu tuke enentáimtuki wéakur takamtsuk uwemprattaji. Yamái nu wáinchiatar tuke nákwai. Warí, ¿wáinjinia nu nákwai?

<sup>25</sup> Tuma asar tuke waincha asar katsuntrar nákwai.

<sup>26</sup> Nu arantcha ii kakarmachu nekapeakrin Yusa Wakaní yáinmaji. Kame Yus áujsatniusha nékachkurin in yáinmaji. ¿Warí seattaji tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmajia.

<sup>27</sup> Tura Yus ii enentáin enentáimtaj nuna nékaiti. Tuma asa ni shuarí asakrin ni Wakaní ni wakeramujai métek seatramkurin ántawai.

### *Ti nupetmakuitji*

<sup>28</sup> Yus anea asakrin ashí nan̄kaatamjinja nujai Yus pujurtamji. Tura nujai péńker awajtamji. Nu paant nékwai. Tura Ni wakerimia núnisañ Ní shuar awajtamaitji.

<sup>29</sup> Yámankamtaiknumia in nekarmak ni Uchirí Jesukrístujai métek ajasat tusa achirmakmiayi. Nujai Yusa uchirí untsurí ajasji. Tura Kristu ii iwiajrinti.

<sup>30</sup> Tura Yus achikmia nuna Niiniu awajsamiayi. Tura nu shuaran “péńkeraitrume” tímiayi. Tura ti shiir awajsamiayi.

<sup>31</sup> Wats, nuikia Yus in yáinmakrin ¿yaki in nupettamkattaji?

32 Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjiaí métek ti shiira nuna ashí suramsashtatjik.

33 Yus achikmia nú shuaran ¿yaki sumamtikiat? Yus Ápaka “pénkeraitrume” tiniu asa penké túrashtatui.

34 Tura ¿yaki “jinium apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuuriní ekemas in áujturmaji.

35 Kristu ti anenma asakrin in akantamkitin atsawai. Wáitiakrishá, itiurchat ínkiuakrishá, shuar áintramkurnisha, tsukamakrishá, entsatai atsakuisha, tsúumainjaísha, tura mantamnakrishá, nujai “Kristu anentsui” tíchamniaitji. Nuka Kristu anenkrattairiya akantamkitin jeatsui.

36 Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmají.”

Tu áarmaiti.

37 Tuma aín Kristu in anenma asakrin Niiijai ti nupetmakuitji.

38 Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nunkanmasha akupin ainia nusha, yamá írunna nusha, ukunam átatna nusha,

39 yaki írunna nusha, nunká írunna nusha, kame ashí Yus najanmu írunna nusha Yusa anenkrattairiya penké akan-tamkichminiaitji. Yusa anenkrattajsha ii Uuntrí Jesukrístu túrunamujai paant wainji.

## 9

*Yus Israer-shuaran ni shuari arti tusa achikiarmiania nu*

1 Yamái tájana nu Kristu shuari asan imiá nekasán wáitrutsuk tájai. Winia enentáirsha tura Yusa Wakanísha “nekas tawai” turutainiawai.

2 Israer-shuaran waitnentakun ti kuntuts enentáimjai.

3 Wíishuar áiniakui Krístunmaya kanakin yuminnaraintjai nujai wíishuaran yáinminiaitkiunka.

4 Israer weeá shuar áiniawai. Tura ni uchiría áinis Yus achikiaruiti. Yusa wincharísha níijiaí pujumiayi. Yaunchu Chicham ni weatrijiaí iwiamuncha tura Muisais akupka-muncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsan\_katkattana nunasha ujakmiayi.

5 Ni weatrín Yúsan ti péñker enentáimtin ironmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisan atí.

6 Kame Yus ashí Nii timia nuna Israer-shuaran súsachmataisha nujaj “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá áiniyatan Yusjaj íismaka ashí nekas Israer-shuar áiniatsui.

7 Núnisan Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampanma amee shuarum ártatui.”

8 Nujaj páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajaj métek akiinia nu nekas Apraám weeá shuar áiniak Yus timian wainkiattawai.

9 Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

10 Nu arantcha, ii weatri Isaka nuwe Ripikia jimiamprami-ayi.

11-13 Nu uchisha akiiniainiatsain pénkernasha tura ya-jauchincha túruiniatsain Yus Ripikian tímiayi: “Iwiairia nu ni patain umirkattawai.” Ataksha núnisan Yus ni Papirijn chichak “Jakupan aneakun Esaun nakitramjai” tímiayi. Nujajinkia páantaiti. Yus wakerak aya ni enentáijjain shuaran achikminiaiti. Nu shuar túrunamu enentáimtutsuk túramniaiti.

14 Túriniaitkiui “Yus pénkercchaiti” ¿titiyajash? Atsá.

15 Yus Muisaisan júnis tímiayi:

“Wi wakerajna nunak waitnentrattajai.”

16 Tuma asamtai shuar ti wakerakuisha tura kakaram takaakuisha aya nujaj Yus waitnentatsui. Antsu aya ní enentáijjain wakerak waitnentawai.

17 Ataksha Yus-Papininum tawai “Yus Ejiptu nunka akupniurin tímiayi

“Ámijjai ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

18 Tuma asamtai Yus Nii wakera nuna waitnentawai. Túrasha Ejiptu akupniurin túramia núnisan Nii wakera nú shuaran enentáin kátsuram awajtawai.

19 Tura “Núnisaitkiuinikia ¿urukamtai shuaran Yus súmamtikia? turutchatapash. Nii wakerakuinikia ¿itiurkattajik?” turutchatapash.

20 Warí, aents asam Yusjaj ¿tunaiminkiaitiam? Nuwá pininkian nájankui núweka “¿urukamtai júnis najatam?” tíminkiait.

21 Nuwá wakerakka nu nuwejaj amamkuncha tura yukun-nasha nusháa takakmastinian mai najanachminkait.

22 Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarın iniaktustaj tayat ti katsuntramiayi.



23 Tura katsunteak ni anenkrattairin iniakmasmiayi. Nú arant nuikia in waitnentramak shíir enentaijjai péñker awajtamkur ni anenkrattairi ti paantchakait. Nekas shíir enentaijjai péñker ajasat tusa yaunchu iwiartampramijai.

24 Tura incha, Israer-shuarnumiasha Israer-shuarchanumiasha, ni shuarí ajasat tusa achirmakmijai.

25 Núnisan yaunchu Yúsnan etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

26 Tura Yus “Wíishuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti.

27 Antsu Isayas Israer-shuaran páchis tímiayi:

“Israer weeá ti nankaamas untsurí áiniayat penké ishichik uwemprartatui.

28 Kame Yus yajauchin akupkataj timia nuna takamtsuk wárik umiktatui.”

29 Núnisan Isayas ataksha tawai:

“Ashí akupeana nú Yus in waitnentramachkurninkia Sutama péprusha Kumura péprusha takamtsuk jákarmia núnisan jákaaji.”

*Israer-shuar uwempratin chichamjai tujinkiarmiania nu*

30 Wátsek, Israer-shuarcha, Yus iisam ni túramurijjai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi.

31 Antsu Israer-shuarka péñker akupkamun umiktinian wakeruiniyatan tujintiainiakui nujai péñker ajastinian tujinkiarmiayi.

32 ¿Urukamtai tujinkiarma? Yúsan enentáimtutsuk aya ni péñker túramujai péñker ajastinian enentáimtuiniak tujinkiarmiayi. Krístun enentáimtustinian nakitiainiak shuar kankapen awankekemtuktinia núnisan iniararmai.

33 Tura kaya tukumkar iniarhamniakait. Nu asamtai Yus-Papinium Krístun pachis tímiayi:

““Seun péprunam kayan ikiujai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai.” Tu áarmaiti.

## 10

1 Yatsuru, Israer-shuar uwemprarat tusan ti wakerakun Yúsan áujtajai.

2 Maa, uwempratniun nékachiatan Yúsan shiir awajsatniun ti wakeruiniawai.

<sup>3</sup>Túmaitiat shuáran Yus pé<sub>n</sub>ker awajsatniun nékachu ásar aya ni pé<sub>n</sub>ker túramujai<sub>n</sub> pé<sub>n</sub>ker ajastinian wakeruiniawai. Tuma ásar Yus pé<sub>n</sub>ker enentáimtamujai<sub>n</sub> pé<sub>n</sub>ker ajastinian jeacharai.

<sup>4</sup>Aya Kristu enentáimtamujai<sub>n</sub> pé<sub>n</sub>ker ajastin asamtai akupkamu umirkatniujai<sub>n</sub> pé<sub>n</sub>ker ajastin ántrai<sub>n</sub>.

<sup>5</sup>Akupkamujai<sub>n</sub> pé<sub>n</sub>ker ajastinian pachis Muisais tímiayi: “Nuna takamtsuk umirniuka nujai<sub>n</sub> pé<sub>n</sub>ker pujustatui.” Tu áarmaiti.

<sup>6</sup>Antsu Krístun enentáimtus pé<sub>n</sub>ker pujustinian pachis shuar juna tíminiaiti: “Ti itiurchata áinis “¿Yaki nayaimpiniam waka Krístun itiarat?” tiirap,” tawai.

<sup>7</sup>Tura ¿Yaki jakamunam we Krístun iniantkit?” tiirap” tawai.

<sup>8</sup>Tura junasha tawai: “Yus-Chicham yúpichuch umirkamniaiti. Aya enentáimjai<sub>n</sub> enentáimtakum wenumjai<sub>n</sub> ujaktinaitme.” Nu Chicham “Yus enentáimtusiniaiti” tawai. Nu Chicham tuke étsereaj núiti.

<sup>9</sup>Yus Jesusan jakan iniantkimia nu enentáimtakum tura wenumjai<sub>n</sub> “Jesus winia Úntruiti” takum uwemprattame.

<sup>10</sup>Kame Kristu enentáimtakmin Yus “pé<sub>n</sub>keraitme” turamtatui nuyá wenumjai<sub>n</sub> “Jesukrístun enentáimtajai” takum uwemprattame.

<sup>11</sup>Ataksha Yus-Papinium tawai: “Nin shiir enentáimtuinia nú shuar natsaarchartatui.”

<sup>12</sup>Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí pé<sub>n</sub>keran súawai. Tura ashí métek ni Úntrinti.

<sup>13</sup>Nu arantcha “Ashí shuar Uuntan áujea nu uwemprat-tawai” yáunchu Krístunun tu áatramuiti.

<sup>14</sup>Tura Krístun enentáimtuiniachusha ¿itiurak Nin áujsarat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktinai<sub>n</sub>.

<sup>15</sup>Tura akupkachmasha ¿itiurak Yus-Chichaman ujarakat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shíirchakait.”

<sup>16</sup>Tura ashí shuar uwemprat<sub>n</sub> chichaman ántuiniayatan umirainiatsui. Isayassha yaunchu aak tímiayi:

“Uuntá, ¿yaki ii étserman antukaruit?”

<sup>17</sup>Paantchakáit. Kristu túramu ujakam antuktiniaiti. Tura antukar Krístun shiir enentáimtusiniaiti.

<sup>18</sup>Tura ¿Israer-shuar Yus-Chichaman antukharu ásaran Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

19 Tura “Israer-shuar nu chichaman antukariat ¿paant nekaawarmaashi?” inintrusminiati. Tura nekas nekaawarmai. Tuma asamtai Muisais tawai: “Israer-shuarchan nékachu ainiana nuna shiir awajeakun akajkattajrume.”

20 Nuyá Isayas ashamtsuk áarmiayi:

“Eatkacharua nu waitkiarmiayi. Inintruiniatsajin wantintiukmiajai.”

21 Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

## 11

### *Chíkich Israer-shuarsha uwemprartatui*

1 Tura Israer-shuar Yúsan umiiniachkui ¿Yus nin iniaisaashit? Péñkea. Warí, wi Israer-shuarchakaitiaj. Wi Apraámsha tura Pinjamin weeá akiiniachukaitiaj.

2 Yámankamtaikniumiá Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi:

3 “Uuntrú, naman awasar Yus sútaincha mash saákiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áujsamiaiyi.

4 Tura Yus ayak tímiayi “Siati mir (7000) áishmankan Israer-shuarnumiá apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

5 Núnisan yamaisha Yus ti waitnentainia asa ashí Israer-shuarnumiá ni shuarin achikiuiti.

6 Yus ni enentájjajin waitnentak túraiti. Nú shuar péñker tura asamtai waitnentatsui. Yus aya péñkernak waitnentakka nuikia waitnenkrachtainti.

7 Ayu. Nuikia ashí Israer-shuar péñkeran eakarua ajin aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajasar kuserua núnin awajnasarmiayi.

8 Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jijncha tura ántushtai kuishniasha súsarmiayi. Yamaisha núniskete.”

9 Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

10 Ni enentájin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

### *Israer-shuarcha uwempramin áiniawai*

11 Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarsha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui.

12 Israer-shuar umirkachmajai ashí shuar, Israercha ainia nusha, uwempramnia ajasarmiayi. Nuna nan̄kaamas Israer-shuar atak Yúsan enentáimtuiniak uwemprarmatai nujai ashí shuar ti pen̄ker ajasartatui.

13 Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai.

14 Nuna túrakun átum uwemprarmena núnisan̄ niisha, wíshuar ainia nu, nuna ísar uwemprarat tusan wakerajai.

15 Kame Israer-shuaran iniaisamujai ashí shuar Yusjai shiir nawamnaikiarmatain̄kia nuikia atak nin achikmajai jaka-munmaya nantaktinia áintsan̄ ti shiir átatui.

16 Emka apatuk ana nu Yus súakur yuminsamuitkiun̄ka nuikia ashí apatkunam Yus yuminsamuiti. Núnisan̄ numí kan̄kapé péñkeraitkiun̄ka numi takamtsuk péñkeraiti.

17 Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmaya árumniñ nu numiniam anujtamkamarme. Nujai péñker numijiai tsanínkrum nu kakarmajai iwiaakrume.

18 Tura kanawē tsupikmajai nan̄kaamantu enentáimtumasaip. Warí, ame kakarmarmijiai numi wajatsui antsu ni kakarmarijiai iwiaakme.

19 “Túrasha wi anujnaktinian kanawen tsupikchamka” tíchainmeash.

20 Nekasaiti, túmaitiat niisha Yúsan enentáimtuiniachu ásar tsupinkiararmiayi. Atumsha aya Yus nekas enentáimta asam anujnakuitme. Tuma asamtai nan̄kaamantu enentáimtumatsuk aya anearta.

21 Yus nekas kanawē péñkercha túrawarun tsupikkia páchitsuk amincha tsupirmakchamniakait.

22 Iista, Yus atumjai ti tsánkaiti tura Israer-shuar umichua nuna ti wari asutiaiti. Tura péñker wáinmankata. Yus tuke nekas enentáimtachkurminkia atumniasha páchitsuk tsupirmaktatrome.

23 Núnisan̄ Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai.

24 Túram Israer-shuarsha asam niisháa numinmaya tsupikiar pen̄ké numiniam anujnakuitrome. Nuna tura asa nekas ni kanawē tsupikia ajapamun páchitsuk atak anujkamniaiti.

25 Yatsurú, nan<sup>ka</sup>amantu enentáimtumara<sup>irum</sup> tusan yaunchu nekaachman ujaajrume. Júiti: Israer-shuarnumiana<sup>ka</sup> chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi.

26 Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seú<sup>n</sup>numia<sup>Uwemtikkiartin</sup> tátatui. Israernumia<sup>tunaan</sup> asakátrattawai.

27 Jú Chichamnasha niijia<sup>i</sup> najanattajai: ni tunaar<sup>in</sup> asakturtatjai.”

28 Uwempratin chicham atumsha nekaatarum tusa Israer-shuaran Yus ni nemasr<sup>i</sup> awajsaruiti. Tura yaunchu ni weatr<sup>in</sup> achikiu asa nincha tuke anenawai.

29 Kame Yus amáa nuna ataksha ata<sup>atsui</sup>. Shuáran achiksha atak iniaiyatsui.

30 Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarme.

31 Núnisa<sup>n</sup> nii yamaikia Yúsan umirainiatsui. Tura atumin waitnentrampamarum núnisa<sup>n</sup> nincha waitnentrattawai.

32 Nujai ashí métek sumamtikiak métek waitnentrar uwemtikrattawai.

33 Maa, Yus imiá shiirchakait. Tí nekachukait. Ni túramu penké nekaachminiaitji.

34 “Uunt Yus enentáimmian ¿yaki neka? Tura ¿ya Nin unuinia<sup>ruit</sup>.

35 Yaki Nin penkeran susa shiira nujai yapajniuit?” Tu áarmaiti.

36 Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisa<sup>n</sup> atí.

## 12

### *Yusaj surumaktarum*

1 Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakar<sup>in</sup> maa Yúsan suu árimiayi. Atumsha núnisrumek iwiaaku árumna nu<sup>n</sup> Nii túrutataj taku túrutati tusarum tuke enentáijjai Yusaj tsankamaktarum. Yusaj íisam ti shiir atí tusarum túratarum. Nu túrakrumka pátatkechu antsu ti nekas enentáimjai Yus shiir awajin áatrume.

2 Chíkich shuar aya jú nun<sup>kan</sup>mayá ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsankatkatkarum. Nu túrakrumka Yus wakera nu nekaattarme. Ni wakeramusha yajauchihuiti antsu imiá nekas penkeraiti.

<sup>3</sup> Yus winia waitnentrak akatar akuptuku asamtai juna tájarme. Atumek wíkitajtai tu enentáimtumatsuk jeamna nujai métek enentáimtumasta. Yus enentáimta asakmin takastinian suramsana nujai apatkam nekaamata.

<sup>4</sup> Ii ayashí chikichkiitiat ii muchitmarí untsuríinti. Tura métekrak muchitiáiniatsui.

<sup>5</sup> Núnisrik iisha, Yus-shuarti, ayashí muchitmaríya áintsarik untsuríitiatar chikichik ayashtinia áintsar takaaji. Nusha Krístujai tsanínkiu asar áitkiamuitji. Túramu asar nuamtak atsumnaiyaji.

<sup>6</sup> Ii túratniun Yus nusháa nusháa súrámji Nii wakera nujai métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuinikia Yus enentáimtakum unuimiarmam nujai métek etserkata.

<sup>7</sup> Chíkich shuar yáinťinian Yus suramsaitkiuinikia nekas enentáimjai yáinťá. Unuiniartiniaitkiumka yawetsuk unuiniarta.

<sup>8</sup> Chíkich shuar ikiakártiniaitkiumka nekas péñker ikiakárta. Súsatniuitkiumka shiir enentáijjai ementutsuk súsarta. Shuaran wáinin atí tusa Yus apujtamsaitkiuinikia ti enentáimsam túratá. Tura shuar iturchat pujuinia nu yáinťinian Yus suramsaitkiuinikia shiir enentáimsam túratá.

*Yus-shuar túratniua nu*

<sup>9</sup> Nekas enentáijjai mai anenai ajatarum. Yajauch naki-trarum péñkera nu túratarum.

<sup>10</sup> Nuamtak yachi asarum núnisrum mai anenai ajatarum. Chíkich wijjai nankaamas úntaiti tu enentáimtunaistarum.

<sup>11</sup> Nakittsuk kakaram ajasrum ashí enentáimjai ii Uuntri wakera nu túratarum.

<sup>12</sup> Ukunam Yus tsankatramkattajnia nu enentáimtusrum warastarum. Wáitiakrumsha katsuntratarum. Tuke iniaitsuk ashí túrunamujai Yus áujsatarum.

<sup>13</sup> Yus-shuar atsumainia nujai yáinťarum. Írarsha péñker itiaatarum.

<sup>14</sup> Yajauch awajtamainia nu shiir awajsatarum. Yus yajauch yumíntsuk nu shuaran péñker túrawarat tusarum seat-tiarum.

<sup>15</sup> Warainia nujai warastarum. Kúntuts pujuinia nujai sha úuttiarum.

<sup>16</sup> Chikichik enentáijjai métekrak shiir enentáimtunaitiarum. Nankaamantu enentáimtumasairap. Antsu péejchach ajas-tarum. “Ti nekajai” tu enentáimtumasairap.

<sup>17</sup> Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá.

<sup>18</sup> Ame jeamna nujai ashí shuarjai nawamnaikiam wekasata.

19 Yuska ni Papiriin juna áamtikramiayi: “Wíitjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus íistí. Yus asutiáti.

20 Tura nu arantcha tawai: “Ame nemasrum tsukamakuisha ayurata. Kitiamakuiasha umartin susata. Nu túrakum péñker ajachua nu iniatsaartatme.”

21 Yajauch nupettamkain. Antsu péñker túrakum yajauchia nu nupetkata.

## 13

1 Akupniunka ashí shuar umirkatniuiti. Akupniuka Yus apujsamuiti. Yus apujdachma akupin atsawai.

2 Tuma asamtai shuar akupniun umirtsuna nu, Yus apujsamun umireachu asa nekas asutniátniuiti.

3 Kame akupniuka péñker shuar sapijmiakarat tusar apujdachma áiniawai. Antsu yajauch shuar ashamkarat tusar apujsamu áiniawai. Nii ashamtsuk pujustin wakerakmekaka péñker túratá. Túrakminkia akupin shiir enentáimturmartatui.

4 Yainmakat tusa Yus apujsamuiti. Antsu yajauch túrakmekaka akupin nekas ashamkatniuitme. Warí, Yus ántar apujdachmaiti. Tunáa shuaran asutiátniun Yus apujsaiti.

5 Nu asamtai akupin tuke umirkatniuiti. Aya asutiuáwain tusar umirkashtiniaitji. Antsu shiir enentáijijai wekasatin umirkatniuiti.

6 Tuma asamtai núnisañ akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

7 Ashí túratniua nu túratarum. Akiktiniaitkiunka páchitsuk akikta. Akupniusha uuntcha ashí núnisañ írunka nusha shiir enentáimtikratarum.

8 Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame.

9 Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichík chichamjain tíminiaiti: “Ame ayashim aneam núnismek ashí shuar aneata.”

10 Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

11 Ii yámankamtaik Yus nekas enentáimtusmiaj nuí “Ii ti shiir ajaras tuke uwempratín ukunam átatui” tu enentáimprachmashiaj. Antsu yamaikia nu tsawant yuntumsamtaí ashí túrajnia nujai shintiarar enentáimpratniuitji.

<sup>12</sup> Tuke káshiitiat tsawaatemprai. Ii Uuntrī Kristu jú tunáa nuñkanam tátin ishichik ajasai. Tuma asamtai ii túrutairī kiritniua núnisan̄ yajauch túrutai ana nuka túrutsuk tsáapninium péñker wekasatin kakaram ajastai.

<sup>13</sup> Túratniua nujaī métek wekasatai. Tsawaī wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratai.

<sup>14</sup> Ii Uuntrī Jesukrístu túramia núnisrik túratai. Tura ii ayashí wakeramu umikiat tusar tsañkatkashtiniaitji.

## 14

### *Ame yatsum kakantraip*

<sup>1</sup> Shuar Yúsan ishichik enentáimtana nu itiaatarum tura kakantrairap.

<sup>2</sup> Iis, chíkichka ashí yuamniaiti tuiniawai. Tura chikichcha, Yúsnan awajirar, naman̄ yúashtiniaiti tuiniawai.

<sup>3</sup> Tura ashí yúa nuka namañken yúatsna nuna wishikrash-tiniaiti. Núnisan̄ ashí yucha nu ashí yuun kakantrashtiniaiti. Warí, núnaka Yus ni shuarin̄ awajsachukait.

<sup>4</sup> ¿Ámeke timiataash péñkeraitiam chíkich shuar kakan-tinia? Antsu ni úuntriñ̄ ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

<sup>5</sup> Chikichcha enentáimpratai. Chíkich shuar tsawantan achikiar “Jú tsawantaī Yus nan̄kaamas shiir awajsat-niuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti.

<sup>6</sup> Chikichik tsawantan enentáimtakka Yusan shiir awajsat-niun túrawai. Tura ashí métekrak enentáimtakka Yúsan shiir awajsataj tusa túrawai. Yurumkajaisha ashí yúana nu Yúsan yumiñkias shiir awajsataj tusa túrawai. Núnisan̄ ashí yúatsna nusha Yúsan yumiñkias shiir awajsataj tusa túrawai.

<sup>7</sup> Iikkia ii enentáijjain̄ iwiaaktsuji. Tura jáakrishia ii enentáijjain̄ jaatsji.

<sup>8</sup> Kame iwiaaku pujakrishia ii Uuntrī Kristu shiir awajsa-tai tusar pujurji. Tura jáakrishia tuke Níniuitji. Nu asamtai iwiaaku pujakrishia tura jakarsha tuke Krístunuitji.

<sup>9</sup> Kame jakancha iwiaakuncha ashí ni Uuntrī ajastaj tusa Kristu jaka nantakmiayi.

<sup>10</sup> Tura ¿urukamtai ame yatsum “yajauchiiti” tame. Urukam-tai nakitiam? Warí, ashí iikkia ii túramu paant awajnasat tusar Kristuī naka wajastatji.

<sup>11</sup> Nu asamtai Yus-Papinium tawai:



“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutiatatui” tawai.” Tu áarmaiti.

12 Tuma asamtai iisha chikichik chikichik ashí ii túramu Yus paant ujakartatji.

*Ame yatsum tunaanum ajuaraip*

13 Nu asamtai “yajauch túriniaiti” tu áujmatnaisashtiniaitji. Antsu ii yachi tunaanum ajuarchatin ti enentáimturtiniaitji.

14 Jesukrístu jintintiamu asan juna nékajai: Yus najana-muka péñkerchaka atsawai. Ashí túramniaitjai. Túrasa shuar chichaak “Nu túrushtainti” táyat nuna túrakka niijjai tunaiti.

15 Tuma asamtai shuar chichartamuk “Nu yúakminkia Yusjai péñkerchaiti” tai, ame yúakminkia nu shuar itiuarchat enentáimsashtatuak. Tura niisha tunaanum iniaar menkakamniaiti. Nu shuar aneakum túratsme. Enentáimprata. Aya ame yamna nujajin ame yatsum Kristu jarukmia nu emenkákaip.

16 Tura “yuamniaitjai” táyatam wi yúakui yajauch áujmatrusarajin tusam iniaisata.

17 Kame Yus umirkatin yurumátniujaisha umartinjaisha enentáimtuschatniuiti. Antsu Yusa Wakanijjai shiir wekasar Yusjai tura shuarjai nawamnaikiar ti péñker wekasatniuitji.

18 Ashí shuar Krístun núnis umireakui Yussa tura chíkich shuarsha péñker enentáimtuiniawai.

19 Nu asamtai tuke shiir pujusminia nu túrakur Yusjai kakaram ajastin yáiniaiktai.

20 Yus iisam ashí yuamniaitji. Antsu ame yamna nujai chíkich shuar tunaanum ajuartin tunaiti. Tuma asamtai ame yuam nujai Yus nu shuara enentáin takarsamu emesraip.

21 Nu túrashtin nuikia naman yúashtincha karía umarchat-niusha péñkeraiti. Warí, túrushtaijjai ame yátsum itiuarchat enentáimtikram tunaanum ajuarchatapash. Tura nu shuar Yúsan nekas enentáimtuschanmia ajastatui. Nuka atsuti.

22 Ame Yus nekas enentáimtakum ashí túramniaitkiumka Yúsak wararsata. Shuar Yus íimmianum shiir enentáijjai mash túramnia nu nekas shíiraiti.

23 Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

## 15

*Chíkich shuar wakeramu enentáimtustiniaiti*

1 Yusjai katsuaru ájnia nu iik enentáimtumsuk kakarmachu ainia nu yáintiniaitji.

2 Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji.

<sup>3</sup> Krístusha ni wakeramun túrachmiayi. Antsu Yus-Chicham tana núnisan<sub>ñ</sub> chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiayi.”

<sup>4</sup> Núnisan<sub>ñ</sub> ashí yaunchu Yus-Papinium aarma in jintintra-matniun áararmiayi. Nujai<sub>ñ</sub> atsantamkurin shiir wáin<sub>ñ</sub>kiattajnia nuka katsuntrar nákastatji.

<sup>5</sup> Yus atsantamar katsuntratniun jintinramji. Tuma asa Jesukrístu túramia áintsan<sub>ñ</sub> atumniasha chikichik enentáijjai<sub>ñ</sub> enentáimtunaisar pujustinian yáinmakartí.

<sup>6</sup> Nujai<sub>ñ</sub> ashí métekrak Yus shiir awajsattarme. Niisha ii Uuntrí<sub>ñ</sub> Jesukrístuncha Aparínti.

*Israer-shuarchanmasha Uwempratin Chicham etserkamu*

<sup>7</sup> Tuma asamtai chíkich shuarjaisha shiir awajnaisatarum. Kristu núnisan<sub>ñ</sub> Yúsan shiir awajsat tusa incha shiir awajtam-samiaji.

<sup>8</sup> Juna tajai. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai<sub>ñ</sub> Yus timia nuna umikmia nu nekaamniaiti.

<sup>9</sup> Tura nu arantcha Israer-shuarchasha Yus waitnentrartin áarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

<sup>10</sup> Tura nu arantcha tawai: “Ashí nun<sub>ñ</sub>kanmaya<sub>ñ</sub> shuartiram ashí Israer-shuar Yúsna ainia nujai<sub>ñ</sub> warastarum.”

<sup>11</sup> Tura ataksha tawai: “Ashí aents ii Úuntrin<sub>ñ</sub> shiir awajsarti. Tura ashí shuarsha Nin “Ti úuntaiti” tiarti” tawai.

<sup>12</sup> Isayasha áarmiayi: “Tawitia aparí<sub>ñ</sub> Isai weatriya<sub>ñ</sub> akupin akiinkiatawai. Niisha ashí nun<sub>ñ</sub>kan akupeakui ashí shuar niiniak shiir enentáimtusartatui.” Tu áarmaiti.

<sup>13</sup> Yus ashí shíiran suramsattakrin nu shiir nákaji. Tuma asamtai Nii nekas enentáimtakrumin warasa shiir pujustinian yamá<sub>ñ</sub> suramsati. Nuyá Yusa Wakaní<sub>ñ</sub> kakarmarjjai<sub>ñ</sub> ti shiir enentáijjai<sub>ñ</sub> katsuntrarum, nu nákastarum.

<sup>14</sup> Yatsurú, atumsha anenainiaitrume. Tura ashí Yusna nekaarum nuamtak chicharnaikiatin nékarme.

<sup>15</sup> Tuma aín<sub>ñ</sub> kajinmatkijrum tusan ataksha ti paant áakun jú<sub>ñ</sub> enentáimtikeajrume. Yus winia waitnentrak ni Chichamen<sub>ñ</sub> etserkat tusa akuptakui nuna áatjarme.

<sup>16</sup> Kame Jesukrístu Israer-shuarchanum Yusa shiir chichamen<sub>ñ</sub> etserkat tusa akuptukuiti. Nuna túrakun Israer-shuarchan Yusa Wakaníjjai<sub>ñ</sub> shiir awajsamu áarmatai Yusai<sub>ñ</sub> juiniajai. Tura Yussha shiir enentáijjai<sub>ñ</sub> itiainiawai.

<sup>17</sup> Jesukrístu yaintiu asamtai Yusna takarsamaj nuna wararsamniaitjai.

18 Tura chíkich shuarjaj Kristu túramun pachischattajai. Aya wi chichasmajajsha tura wi túramujajsha Israer-shuarchan Kristu umimtikiamia nunak áujmatsattajai.

19 Yusa Shiir Wakanj kakarmarjijaj aents tujintiamun túran ashí shuaran Jerusaréñ péprunam nan̄kaman etserkin Iririkiu nun̄kanam ejekamjai. Kristu-chichaman ashí nu nun̄kanam etserkaitjai.

20 Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujaj chíkich takasmanum takarsachuitjai.

21 Yus-Papisha núnisan̄ tawai:

“Chichaman pen̄ké antukcharuka nekaawartatui. Nin áujmatman anturkacharusha unuimiarartatui.”

### *Papru Rúmanam wétaj tawai*

22 Nuna pujuru asan íitjarum táyatan íichmajrume.

23 Tura yamaikia juyá takatrun umikian tura yáunchusha tuke íitjarum tiniu asan

24 Ispania nukanam wéakun íistatjarne. Tura atumjín shiir irasan Ispanianam wéakui atumsha yaíntkiarum shiir akuptukchattarpash.

25 Tura yamaikia kuitjai Jerusaréñnumiã Yus-shuaran yaíntaj tusan wéajai.

26 Masetúnianmayã shuarsha tura Akayanmayã shuarsha kuítian irurar Jerusaréñnumiã Yus-shuaran atsumainia nuna akuptuktai tuiniawai.

27 Ti wakeruiniak túrawarmiayi. Nu nekas túrashtinkiait. Israer-shuarnumiã Yus-Chichaman antukaru ásar yamaikia ni kuítrijaj páchitsuk yaíñchatniukait.

28 Tuma asantai jú kuitian súsan umiran nuikia Ispanianam wéakun íiktatjarne.

29 Tura nuj winiakun Kristu Shiir Chichamēn nujaj shiir yaíntajrum tusan ejeetittiajrume.

30 Yatsurú, ii Uuntrj Jesukrístunu asarum tura ni Wakanj pujurtamkurmin anenia asarum Yus áujtursatarum. Núnisrum wijaj métek Yusna takastin yaíntkiattarme.

31 Jutia nun̄kanmayã Israer-shuarnumiã uwemtikrat tusarum Yus áujtursatarum. Tura jú kuitian júajna nunasha Jerusaréñnumiã Yus-shuar shiir achikiartí tusarum Yus áujtursatarum.

32 Nujaj, Yus wakerakuñkia, péñker wampú enentáimsan warasan íittiajrume.

33 Yus ti shiir pujustinian súana nu atumjai tsaniñ pujurtamsati. Núnisan̄ atí.

## 16

*Amikmaamun akupramiania nu*

<sup>1</sup> Ii umai Jépeka Senkrea péprunmaya Yus-shuaran yáiniaiti. Ti penker Yus-shuaraiti.

<sup>2</sup> Kristu náarijn shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti penker wáitin asamtai atumsha ni atsumamusha yaintarum.

<sup>3</sup> Pírisirasha Akirasha wijjaj métek Jesukrístunun takasaru ásar amikmaatainijai.

<sup>4</sup> Niisha winia uwentikrurtai tusar jániñkiarmiayi. Tuma asamtai yumñkiniyajai. Tura aya wikichu antsu ashí Israer-shuarchanumiã Yus-shuar áinia nusha yumñkiniawai.

<sup>5</sup> Núnisan ashí Yus-shuar Pírisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi.

<sup>6</sup> Marisha, atumjaj ti takasua nu amikmaatruatarum.

<sup>7</sup> Tura wí shuarsha Antrunikiusha Júniassha amikmaatruatarum. Niisha wijjaj sepunam pujusarmai. Wijjaj emka Krístun shiir enentáimtusar chíkich akatramujaj nankaamas takasaru áiniawai.

<sup>8</sup> Ámpriassha Krístunam winia aneamu amikiur asamtai amikmaatruatarum.

<sup>9</sup> Urpanujajsha Jesukrístu takatrí tsaniñniuitji. Niisha tura aneamu Estakissha amikmaatruatarum.

<sup>10</sup> Apírissha amikmaatruatarum. Niisha Krístun ti shiir enentáimtamú ti páantaiti. Núnisan Aristúpuru shuarsha amikmaatruatarum.

<sup>11</sup> Wiishuar Erutiúnsha tura Narsisu shuarsha Kristu shuari ásarmatai amikmaatruawarta.

<sup>12</sup> Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum.

<sup>13</sup> Rúpusha, nusha ti penker Yus-shuar, tura nukurísha amikmaatruatarum. Niisha wijjaj nekas winia nukurua núnisaiti.

<sup>14</sup> Asiñkritiusha, Pirikiuntisha, Érmassha, Patrupassha, Érmessha, tura ashí niijjaj Yús-shuar ainia nu amikmaatruatarum.

<sup>15</sup> Núnisan Jirurukusha, Júriasha, Néreusha, ni umajjajsha, Urimpiassha, tura ashí Yus-shuar niijjaj pujuinia nu amikmaatruatarum.

<sup>16</sup> Nuámtaksha shiir aujnaisatarum. Ashí juyá Kristu shuari amikmaatmainiawai.

<sup>17</sup> Yatsurú, shuar nusháa enentáimtuiniak Yus-shuaran akanainiak itiurchat awajenawai. Nu shuar wáinkiarum

kanaktiarum. Ni yajauch túramu átum pé<sub>n</sub>ker takastin un-  
uimiarmena nú<sub>n</sub>ischaiti.

<sup>18</sup> Nu shuar ii Uuntri Jesukristunun takainiatsui. Antsu ni wakeramun uminiawai. Tura ti shiir chichasar nékachun anan<sub>n</sub>kenawai.

<sup>19</sup> Átum umirma ashí shuar nékainiakur ti waraaji. Yajauch túrutsuk aya pé<sub>n</sub>ker túratin enentáimsarum pujustarum.

<sup>20</sup> Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntri Jesukristu shiir yainmakarti.

<sup>21</sup> Timiutéusha, wijiai takau, amikmaatmarme. Nú<sub>n</sub>isa<sub>n</sub> Rúsiusha, Jasun<sub>n</sub>sha, Susipatresha, mash wíshuar ainia nu amikmaatmarme.

<sup>22</sup> Wi, Tersiu asan, Papru chichamen ju papinium áateakun Kristu náar<sub>i</sub>n amikmaajrume.

<sup>23</sup> Káyusha amikmaatmarme. Ni jeen pujaji tura ju<sub>i</sub>sha ashí Yus-shuar irunainiawai. Erastusha ju<sub>i</sub> pepru kuítr<sub>i</sub>n wáinniuiti. Niisha ii yachi Kuártujai amikmaatmarme.

<sup>24</sup> Ii Uuntri Jesukristu ti shiir yainmakarti. Nú<sub>n</sub>isa<sub>n</sub> atí.

### *Yus shiir awajsatai*

<sup>25</sup> Watsek, Yus shiir awajsatai. Ni<sub>n</sub>ki nekas kakaram awajtamsamniaiti. Wi Uwempratin Chichamnum Jesukristunun étsereaj nujai ikiantamprattawai. Nu chicham yámankamtaiknumia nekaachmanak Yus yamaikia paant awajsaiti.

<sup>26</sup> Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nu<sub>n</sub>kanmaya shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

<sup>27</sup> Yúsak Ni<sub>n</sub>ki ti neka asa tura Jesukristu ti pé<sub>n</sub>ker tura asamtai Ni<sub>n</sub>ki tuke shiir awájnástí. Nuke atí.

## Papru KURINTIUNMAYA SHUARAN Emka papin aar akuptukma

*Kurintiunmaya Yus-shuaran Papru áatramiania nu*

<sup>1</sup> Wi Pápruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachí Sústinisjai, ju papí akupeaji.

<sup>2</sup> Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsaniñkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti.

<sup>3</sup> Yus ii Aparí tura ii Úuntrí Jesukrístusha waitnentramainia ásar yainmakarti imiatkinchanum tuke shiir pujustinian.

*Ii Uuntri Jesukristujai tsaniñkia pujustin*

<sup>4</sup> Yusan áujkun yumınsan atumin shiir enentáimtajrume. Jesukrístujai tsaniñkia pujakrumin Yus shiir enentáimturmawai.

<sup>5</sup> Jesukrístujai tsaniñkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian.

<sup>6</sup> Kristu juna túramniaiti tíchamkají. Ashí yamaikia uminkiyi.

<sup>7</sup> Tuma asamtai ashí Yus súragna nu atsumatsrume. Nu túrakrum ii Uuntri Jesukrístu tatin tuke nákarne.

<sup>8</sup> Tura iniaitsuk tuke emettamattawai ii Uuntri Jesukrístu támatai atumi tunaarın pachischatin.

<sup>9</sup> Jesukrístu ii Uuntrinți. Niijjai tsaniñkia pujusúk tusa Yus achirmakmarne. Tura Nii tana nuna tuke umiktatui.

*Yus-shuar akantramu*

<sup>10</sup> Yatsuru, ii Uuntri Jesukrístu naari pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijjai métek enentáimsa pujustarum.

<sup>11</sup> Átum yajauch chicharnaisarum pujarme. Kruí shuari tu ujatarmatai tájarne.

<sup>12</sup> Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai.

13 ¿Warí, nuñkia, Kristu akantramukait. Páprusha krúsnum jarutramkamaashi. Tura Papru naari pachisa imiaim-iukaitrum?

14 Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai.

15 Nújainkia shuar “Papru náariin imiaimiuitjai” tíchamniaiti.

16 Maa, nekas, Estepanasa shuarincha imiaimjai tura chíkich wi imiaimiun nékatsjai.

17 Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimpraraín tusan. Antsu yúpichuch chichaajai Kristu krúsnum jakamuk paant atí tusan.

*Kristu Yusa kakarmaríncha ni nekatairíncha paant iniak-masmiania nu*

18 Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántraiiti nu chicham” tu enentáimainiawai. Antsu Yus-shuarti, uwempratniunam wéakur, “nu chichamjai Yusa kakarmari takusminiaiti” tu enentáimji.

19 Núnisañ tawai Yus-Chicham yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen.

20 Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujai péñker pujusam uwemprattame” tu enentáimiainiawai. Tura núnaka mash Yus penké ántar najanaiti.

21 Aya ni nékamujai aents Yúsan nekaacharmiayi. Núnisañ atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántraiiti” tuiniana nu chichamjainkí Yus Nin enentáimtuinia núnaka uwemtikratniun wakerak túramiayi.

22 Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash péñker jíkikim turuttia wisha métek enentáimpratj” tuiniawai.

23 Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ánttraiiti” tu enentáimiainiawai.

24 Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum

jarutramak Yusa kakarmarincha ni nekatairincha paant ini-akmasmiayi” tu enentáimji.

<sup>25</sup> “Yusa nekatairi áénkeraiti. “Yusa kakarmarisha jeatsui” tuiniawai aents, túrasha imiá nekas kakarmaiti.

<sup>26</sup> Enentáimtumastarum yatsuru. Yus achirmakmarme Ni-iniu ajastinian, tura ju nunkanam ti neka áinia núnisan atumin ti neka íruntsui. Ti akupniusha ti nankaamakusha atumin íruntsui.

<sup>27</sup> Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian.

<sup>28</sup> Péejchachincha, nakitsamuncha, ákaamantu írunna nuna amuktinian.

<sup>29</sup> Nújainkia chikichkisha Yusjai waantu enentáimprachminiaiti.

<sup>30</sup> Tura Yus atumin Krístujai tsanin apujtamsaiti. Tura Kristu enentáimtusar Yus nekas nekatainkia nekaattaji. Kristu enentáimtakrin Yus shiir enentáimturmaji, pénkerawajtamji, tura uwentikramji.

<sup>31</sup> Yus-Papinium yaunchu aarma núniskete: “Shuar nankaamantu enentáimprataj tákunka ii Uuntri Yus túramun wararsati.”

## 2

### *Kristu krúsnum jakamu etserkamu*

<sup>1</sup> Wisha, yatsuru, atumin jeamaj nui Yus-chichaman ti neka chichainia áintsan tura íwiasanak ujakchamajrume.

<sup>2</sup> Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu.

<sup>3</sup> Nékyatatan kakarmachu sapíjmiashím jearmiajrume.

<sup>4</sup> Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmarincha tura ni Wakanincha paant iniakmasan Yus-Chichaman ujakmajrume.

<sup>5</sup> Aentsu nekatairijjai Yus enentáimtuschatniuiti antsu Yusa kakarmari paant nekaarum Yus enentáimtustiniaitume. Nuní asamtai Yus-Chichaman tu ujakmajrume.

### *Aya Yusa Wakanijjai Yúsnan nekaamniaiti*

<sup>6</sup> Túmaitiat Yusa nekatairi átsuk. Yúsnan unuimiararujai Yusa nekatairin áujmatji. Tura Yusa nekatairinnkia aentsu nekatairi áintsachuiti. Ju nunkanam akupin ainia nuna



nekatairinchuiti Yúsna. Ju nunkanam akupniuka ishichik pujus amuukachartatuak.

<sup>7</sup> Yaunchu ju nunka atsain Yus in uwentikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji.

<sup>8</sup> Ju nunkanam akupniuka nuna penké nekaacharmiayi. Nékainiakka ii Uuntrj timiá shiira nuna, krúsnum máacharu aayi.

<sup>9</sup> Yaunchu Yus-Papinium áarchamukait: “Shuar Yúsna aneana nuna Yus ti shíiran susattawai. Susattana nuka timiá penker asamtai shuar wáinkiachman, antukchamuncha, enentáimtachmancha Yus susattawai” tu áarmaiti.

<sup>10</sup> Tura Yusa Wakanj ii enentáin pujurtamuk Yus suramsat-tajnia nuna yamá paant jintinramji. Nu Wakancha imia Yus enentáimmiancha mash nékawai.

<sup>11</sup> Shuar enentáimna nuna chíkich shuar nekaamniakait. Antsu aya ní enentáijjain nékatsuk. Núnisan aya Yusa Wakanj Yúsna paant nékawai.

<sup>12</sup> Ju nunkanmaya aents enentáimiainia nujai Yusna nekaachminiati. Antsu Yusa Wakanj in súrámaj nujai Yus shiir tsankatramajnia nu nekaamniatji.

<sup>13</sup> Yusa Wakanj jintinramji Yúsna chichastinian Nii wakera áintsan. Ni chichamen súrámaj. Túramtai ii nékamujai Yúsna étsertsuji. Tuma asamtai imia Yusna nuka Yusjai penker wekainia nu jintíajj.

<sup>14</sup> Yus-shuarcha Yusa Wakanjiniun ántatsui ántrai tusa. Aya Yusa Wakanj jintintiamniatkiui Yus-shuarcha nuna penké nekaachmin ániawai.

<sup>15</sup> Antsu Yusa Wakanj takaku ashí mash iis, penkera nuna nekaamniati. Nii túrana nunasha chíkich shuar súmamtikiachminiati.

<sup>16</sup> Yus-Papinium yaunchu áarmaiti: “¿Yusa enentáimmiari ya neka. Tura Yúsna ya jintintiamniat?” tu áarmaiti. Tuma ajn iikia Yus-shuar ájinia nu, Kristu enentáimna núnisrik enentáimji.

### 3

*Páprusha Apurussha Yusa takatrj mai tsaninkiar takaini-awai*

<sup>1</sup> Tura wikia, yatsuru, nuik aj atumjai pujakun Yusa Wakanj umirniun chichastinia áintsanak atumjai chichastinian tujinkiamjai. Antsu ayash wakeramu umirin asakrumin Krístunam katsuarcharujai chichastinia áintsanak atumjai chichasmajai.

<sup>2</sup> Uchi kuírach naman ayurachminiati antsu aya umuntsatniuti. Núnisan aya yúpichuchin ujakmajrume, itiurchat ana

nu tujintiakrumin. Tura yamaisha itiurchat ana nu tuke tujintiarme.

<sup>3</sup> Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantra-nuitrume. Nujaj páantaiti átum ayash wakeramu umirniuitrume. Yúsnan enentáimticharujaj métek wekainiaitrume.

<sup>4</sup> Atumúinkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume.

<sup>5</sup> Wátsek. Wi Papru ti péñkeraashitaj. Apurussha ti péñkeraashit. Antsu iisha aya Yusa takarniurintji. Yus-Chicham étserkurin ii Uuntri enentáimtuschkuram. Ii Uuntri takatan chíkich chíkich suramsamajnia nuke takasmaji.

<sup>6</sup> Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai.

<sup>7</sup> Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait.

<sup>8</sup> Arakan araana nusha, entsan ukatna nusha métek áiniawai. Túmaitkiuiisha takasmajaj métek Yus akiktatui. Péñker takasmatainkia péñker akiktatui.

<sup>9</sup> Wisha Apurussha Yusa takatri mai tsaniñkiar takaaji. Tura Yus atumí enentáin takaakui atumsha Yusa núñkea áintsaitrume.

Jeasha enentáimpramniaiti. Yus atumjaj takaak jeá jeamtinia áintsan takaawai.

<sup>10-11</sup> Jeá jeamainiak, emka uunt kaya nunká init ikiursar kaki awajsatin áiniawai. Tura nuyanka nu kayanam ekeniar júkitniuiti jeá wewe atí tusa. Wikia jeá jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikiusma áinis asa Nínkiti nu jeá ekenkatin. Iis, ashí enentáimtustinia nankaamas Jesukristu enentáimtustiniaiti. Nu asantai Jesukristunun emka ujakmajrume. Yus nuna etserkatniun tsankatrukuiti. Wi emka, uunt kaya ikiursatniua áintsan, Jesukristunun ujakmajrume. Tura nuyanka chíkich shuar ekeniar jeammin áiniawai. Tura anearti péñker jeamtinian.

<sup>12</sup> Tura jeá jeamainiak nii wakerak péñker ana nujaj jeamminiaiti. Nii péñker jeamtinian wakerak kurijajisha, kuítjajisha, shírmach kayajajisha jeamminiaiti. Chíkich jeamkuka numijajisha, kenkujajisha, nukajajisha jeamminiaiti. Núnisanj shuar Yúsnan takaak péñker takasminiaiti túrasha nánkamas takasminiaiti.

<sup>13</sup> Tura amuukatin tsawant jeakui ashí ni takatri paant átatui. Nu tsawantajisha Yúsajya ji átatui tura nu jisha ni takatri

pénkera nunasha tura yajauchia nunasha nekapsattawai.

<sup>14</sup> Tura shiir jeamuka tura nu jeasha esaachmatainkia shiir akinkiattawai.

<sup>15</sup> Antsu nánkamas jeamuka imianinki jiniumia uwemprat-tawai, tura ni jeamma esaa penké atsuttawai.

<sup>16</sup> Enentáimpratarum. Yusa Wakaní atumín pujá asamtai Yusa Jee ajasuram nu nékatsrumek.

<sup>17</sup> Shuar Yusa Jee émesekuinkia Yus nu shuaran emesrat-tawai. Yusa Jee nka timiá shiir asamtai túrattawai. Nu Jea atumketrume.

<sup>18</sup> Ju nunkanmayan unuimiarua núnisrum “ti nekaitjai” tu enentáimtumasrum ananmamawairap. Antsu ju nunkanmayan nékachu áinis ajas Yúsnan ti shiir unuimiártiniaiti.

<sup>19</sup> Ju nunkanmaya aents nékainia nuna Yus “ántraiti” tawai. Yus-Papinium áarmaiti:

“Ju nunkanmayan unuimiarun ni enentáimmiajain Yus sumamtikiattawai.”

<sup>20</sup> Tura nu arantcha áarmaiti:

“Uunt Yuska “unuimiaru enentáimmiancha penké ántraiti” tawai.”

<sup>21</sup> Tuma asamtai “Páprunuitjai tárumna nusha, “Apurusnaitjai”, tura “Pítrunuitjai” tárumna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írunna nu atumin yainmaktiniaiti.

<sup>22</sup> Páprusha, Apurussha, Pítrusha, ju nunkanmayasha, iwiaak-masha, jákatniusha, yamá írunna nusha, ukunam átatna nusha, mash atumniaiti shiir yainmaktin.

<sup>23</sup> Atumsha Krístunuitrume, tura Krístusha Yúsnaiti.

## 4

### *Yus akatramu takatri*

<sup>1</sup> Júnisan ashí shuar enentáimturmastiniaitji. Iikia aya Kristu yáintrintji. Kristu akatramurintji Yusna yaunchu nekaachma ana nu yamá etserkatin.

<sup>2</sup> Wátsek, akatramuka tána nujai métek umiktiniaiti.

<sup>3-4</sup> Wi umikmancha umikchamuncha ii Uuntrj Kristu nékawai. Átum enentáimturarmena nusha tura chíkich aents enentáimturainia nusha wíjjainkia ántraiti. Imia wíkisha neka-matsjai. Kame winia tunaarun penké wáintsujai tura aya nujai “pénkeraitjai” tíchanniaitjai. Niñki Yus iirui.

<sup>5</sup> Tsawant jeamtai ii Uuntrj Kristu atak tátatui. Tura ashí yamá kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsain shuar umikiuashit tusarum enentáimtusairap. Tura nu tsawantaj Yus ashí pénker umikiarun shiir awajsattawai.

Pénker umikiuncha ishichik umikiuncha takasmajaj métek Yus shiir awajsattawai.

<sup>6</sup> Átum “Ju shuar péñkeraiti tura chíkich péñkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajaj métek enentáimsatarum.

<sup>7</sup> Ámeke chíkich shuarjaj méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujaj nankaamantu ajai tu enentáimtumam?

<sup>8</sup> ÇTi kuítrinnia áintsan tura ashí takakua áintsan enentáimtsurmek. In nankaakarum uunt kapitián ajasua áintsan enentáimtsurmek? Nekas uunt kapitián ajasrumka maak. Nuñkia iisha atumjaj akupkaintji.

<sup>9</sup> Chíkich shuar mash nankaamantu áinis áiniakuisha Yus in ni akatramurjñ ashí amúamunam apujtamsaitji. Tu enentáimpramniati. “Yajauch ániawai, máatái” tu pujurtamji shuar. Tura Yusa suntarisha ashí juyá shuarsha in ístai tusar káutrakaitji.

<sup>10</sup> Iikia atumjaj jeatsji. Kristu shuarjñ asakrin nékachua áinis enentáimturmajai shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia mujtiaintji.

<sup>11</sup> Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji.

<sup>12</sup> Ii ewejéjaj takaakur ti pimpíajai. Shuar katsekramainiaji túrasha iikia shiir chichamjaj aiyajai. Itiurchat awajtamainiakuisha katsunteaji.

<sup>13</sup> Tsanumprutmakrincha tuke shiir chichajai. Tsuata áintsarik tuke yamaisha ashí yajauchia núnisanj ajapramatniun enentáimturmainiaji.

<sup>14</sup> Atumin aya iniatsaartajtsan juní áattsujrume. Antsu winia aneamu uchirua áintsan jintintjarme.

<sup>15</sup> Atumin Yus-Chichaman ujaakun Yus-shuar ajastinian unuiniamjarme. Nujaj Jesukrístu enentáimtakrumin atumí aparía áintsan ajasmajaj. Chíkich shuar Krístunun jintin-trámatin timiá untsurjñ ákuisha aya wiki atumí aparíntjai.

<sup>16</sup> Tuma asamtai wi wekaajna áintsanj wekasatarum atumsha.

<sup>17</sup> Nu túratarum tusan winia aneamu uchirun Timiutéun akuptukmajrume. Niisha ii Uuntrjñ Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujaj wekaamun ataksha

enentáimtikramprattawai. Núiti ashí Yus-shuarnum wena jintíajna nuka.

<sup>18</sup> Papru yamaikia iraishtatui enentáimturainiak chíkich chíkich nan̄kaamantuitjai tu enentáimtumainiawai.

<sup>19</sup> Antsu Yus wakerakuin̄kia wárik íitjam tusan wakera-jai. Nuin̄kia nan̄kaamantu chichameñ antukchattajai antsu wátskea, ni túramurisha íistái.

<sup>20</sup> Yus akupeana nú shuar aya chíchainiatsui antsu Yusa kakarmar̄in iniaktuiniawai.

<sup>21</sup> Wátsek, ¿warí enentáimprum? Átum tuke núnisan enentáimkiurminkia wi winin asutiátnuijtarme. Tura péñker enentáimkiurminkia, aneakun shiir chichasminiaitjarme. ¿Atumsha túa wakerarum?

## 5

### *Tsanirmamu ti tunaiti*

<sup>1</sup> Atum̄in shuar ti tunáa tura awai. Ju yamá ashí nekanaiti. Nu shuar ni apar̄i nuwé achikiuiti. Timia tunaaka nu tsanirmamu Yus-shuarchanumsha atsawai.

<sup>2</sup> ¿Nu tunaajaj̄isha tuke nan̄kaamantu enentáimprumek? Antsu úuttiniaitrum̄e. Nu shuar tunáa túraka atum̄in̄ia akankatniuiti.

<sup>3</sup> Ayashur pujachkuisha wi nūi pujáa áintsan nuna tunaar̄in paant nekaamjai, tura asutiátnuiiti tajai.

<sup>4</sup> Tuma asamtai átum káunkakrumin ii Uuntr̄i Jesukrístu kakarmar̄ij̄ij̄ai tura wi nūi pujáa áintsanak, ii Uuntr̄i Jesukrístu kakarmar̄ij̄ij̄ai

<sup>5</sup> nu shuar uunt iwianchnum surunkatniuiti ni ayashi wak-eramur̄i amukati tusa. Nuj̄ai ni wakan̄i uwemprattawai ii Uuntr̄i Jesukrístu támat̄ai.

<sup>6</sup> “Íikia péñkeraitji” tárumna nu ántr̄aiti, tunáa atum̄in̄ tuke akui. Iis, “Karía ishichik yuminnium en̄ketam mash karimtik-suk” tiniu áiniawai. Núnis átatui jū tunaaj̄aj̄i.

<sup>7</sup> Tuma asamtai nu karía ukartarum yajauch awajtur-mas̄aj̄i tusarum. Núnisrum jū tunaanumiã kanakrum péñker átatrum̄e. Yaunchu enentái karía núnis amuukatniuiti. Ashí yamarmak yuminia áintsan̄ ajasuitrum̄e. Tanta wakapru-achusha enentáimpratai. Israer-shuar paskua nampernum aya wakapruachu tantan yuu áiniawai. Atumí tunaar̄i atsakui atumsha nu námper-tantaa áintsar péñker ajasuitrum̄e. Paskua nampertincha Israer-shuar murikiun main áiniawai. Núnisan̄ Kristu jaka ii murikr̄ia áinis ajasuiti.

<sup>8</sup> Tuma asamtai iisha paskua námper nájanku pujakur tuke núnisan̄ shiir wekasatniuitji. Tuma asamtai ashí yajauch tunaasha írúnna nuka karía yaunchu nawamua áintsan̄kete.

Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsankete.

<sup>9</sup> Nuik papin áatramajrumna nuí “Tsanirma shuarjainkia íschatniuitrume” tímiajrume.

<sup>10</sup> Ju nunkanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjainkia penké íschatniuitkiurmeka ju nunkanmaya jíinkintrume. Núnaka tátsujai.

<sup>11</sup> Antsu wí tájana nu júiti, Shuar “Yus-shuaraitjai” tákunka tura tunáa túriniaitkuinkia níijiai íschatniuitrume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuinkia íschatniuitrume. Penké níijiai yurumáshtiniaitrume.

<sup>12-13</sup> Yus-shuarcha tunaari pachíschatniuitjai. Yus núnaka íistatui. Átumka antsu atumín Yus-shuar ainia nuna tunaari íistiniaitrume. Tuma asamtai nu shuar tunaarintin atumíya akankatarum.

## 6

*Yus-shuar nuámtak itiurchat awajnalisarka Yus-shuarchajai nuna iwiarashtin áiniawai*

<sup>1</sup> Yus-shuarka chíkich Yus-shuarjai itiurchat pujakka kapi-tíanjai chichas iwiarashtiniaiti Yus-shuarcha asamtai. Antsu Yus-shuar írunna nujai iwiarati.

<sup>2</sup> Enentáimpratarum. Amuukatin tsawantai Yus-shuarka ashí ju nunkanmaya shuara tunaari mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum.

<sup>3</sup> Nu arantcha Yusa suntari túramurisha nekaattaji péñkerashit tusar<sup>1</sup>. Nayaimpiniam túrawarma nekaatniuitkiurkia itiura ju nunkanmaya nu tujinkiattaji<sup>1</sup>.

<sup>4</sup> Pai, itiurchat ákuinkia Yus-shuar penké tujintiainiana nujai iwiaratarum antsu.

<sup>5</sup> Natsaruk tusan nuna tájarme. Warí, ¿atumíini chikichkisha atsawak ni yachi itiurchatri péñker iwiamnia?

<sup>6</sup> ¿Urukantai Yus-shuar ni yachijiai itiurchat pujakka Yus-shuarchanum wea iwiaratniun?

<sup>7</sup> Atumí itiurchatri kapitianium jukirmeka nujainkia átum tujinkiamu páantaiti. Natsantchakait. Itiurchat ana nusha ¿urukantai antsu katsuntram asakáatsum? Kasamkamusha ¿urukantai katsuntram asakáatsum?

<sup>8</sup> Antsu átumka nuámtak yachijiai itiurchat awajnáiyarme tura kasárnáiyarme.

<sup>9</sup> Tunáa túrinkia Yus akupeamunam pachiinkiachmin ainia nu nékatsrumek. Anañnawairap. Ashí tsanirma nusha, ántar-yusan tikishmatniusha, nuamtak áishmanjai tsanirmasha,

10 kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anan̄kawar atantin ainia nusha Yus akupeamunma nuí penké wayashtin ániawai.

11 Atum̄iyyasha chíkich chíkich nuna túrin armai. Tura yamaikia ii Uuntri Jesusa kakarmarijjaisha tura ii Yusri Wakaní kakarmarijjaí atumi enentái shiir ajasuiti, atumsha Yusna ajasurme, tura tuke péñker ajasurme.

*Ii ayashí yajauch áchatniuiti*

12 “Ashí túramniaitjai” tiniu ániawai tura nekasaiti. Tuma aín̄ mash yáin̄kiashtatui péñker wekasatniun. Nekas ashí túramniaitjai tura nán̄kamas túratniujai nupetnakchattajai.

13 Júnasha tiniu ániawai: “Apatuk wakejainchu tura wake apatkujainchu mai án̄trai.” Apatkujai wakesha nekas mai metek enentáimpratin ániawai tura Yus mai metek amuktatui. Núnisan̄ ii ayashí ii Uuntri Krístunuiti tura Kristu ii ayashí nérenniuiti. Tuma asamtai ii ayashíjjaí tsanirmashtiniaiti.

14 Tura Yus ii Uuntri Jesusan iniantkimia núnisan̄ ii ayashín̄cha nu kakarmarijjaí iniantkittiwai.

15 Ashí ii ayashíin̄ Kristu ayashím̄kiaiiti. ¿Nu átumka nékatsrumek? Winia ayashrusha Kristu ayashíiyya asamtai ¿itiurak nuna tsanirí ayashín̄ najanattaj? Penké túrachminiaitjai.

16 Kame ¿jusha nékatsrumek? Áishman̄ tsanirijjaí tsanin̄kiar chikichik ayashtinia áinis ajainiawai. Núnisan̄ Yus-Papinium áarmaiti: Mai chikichik ayashtinia áinis ajasartatui.

17 Tura shuar ii Uuntri Krístujai tsanin̄kia mai chikichik wakantin ajainiawai.

18 Tuma asamtai tsanirmatniunmaya yajáyañ wainkiarum tséquentiarum. Chíkich tunáa írunna nu ii ayashín̄kia ti yajauch awajeatsui. Túrasha shuar tsanirmakka ní ayashiniak yajauch awajeawai.

19 Yusa Wakaní ame enentáimin̄ pujurtamu asamtai, ame ayashim̄ ni jeente. Nu Wakanín̄kia Yus amasuiti. ¿Nuka nékatsrumek? Tuma asamtai ame ayashmi nérenchaitme.

20 Kristu numpejai sumakma asamtai, ayashmisha wakanmisha Yusna ániawai. Yusna asamtai ayashmijjaí péñker túratniuitme, Yus shiir awájnástí tusam.

## 7

*Nuatkatniusha péñkeraiti, nuatkashtincha péñkeraiti*

1 Ayu. Átum áaturmarmena nuna yamaikia ujaktajrume. Shuar nuattechkusha péñkeraiti.

<sup>2</sup> Tura ti tsanirmatniun enentáimtuinia ásar ashí áishmaṅ ní nuwenak nuatkati tura ashí nuwá ní áishriṅiṅ iniumkati.

<sup>3</sup> Áishmaṅsha ni áishri asa nuwen túratniua nuna umiktini-aiti. Núnisaṅ nuwasha ni nuwe asa ni áishriṅ túratniua nuna umiktiniaiti.

<sup>4</sup> Núwaka niṅki ni ayashí nérenniuchuiti, antsu ni áishriṅiuiti. Núnisaṅ áishmaṅsha niṅki ni ayashí nérenniuchuiti, antsu ni nuwénuiti.

<sup>5</sup> Ni ayashí suritnaikiashtin áiniawai. Tura mai itit awajnaitsuk Yus áujsatin wakeruiniak ishichik tsawant kanakmin áiniawai. Tura nuṅkia atak tsaniṅ pujustin áiniawai. Túracharmataṅkia uunt iwianch, Satanás, tunaanum iniantinian útsutkattawai katsuntratniun tujintiakuí.

<sup>6</sup> Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiumka péṅkeraiti.

<sup>7</sup> Túramtai “ashí wijjai métek nuatkachuitkiuṅkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

<sup>8</sup> Natsancha wajencha juna tájai, “Wijjai métek nuattsuk pujusrumka péṅkeraiti.”

<sup>9</sup> Tura katsuntratniun tujinkiarka nuatkarti. Ti katsuntra-  
chmin nekapeakum nuatkatniun péṅkeraiti.

<sup>10</sup> Nuatnaikiarun antsu tájai, “Nuwá nuatkamuka ni áishriṅ ikiukchatniuiti” tajai. Núnaka ii Uuntri Kristu akupkaiti aya winia chichampruchuiti.

<sup>11</sup> Túramtai ni áishriṅ ikiukkia niṅki atak nuatnatsuk pu-  
justí tura tsaniṅ pujustinian wakerakka ataksha ni áishriṅ wakеткиti. Núnisaṅ áishmaṅsha ni nuwen ajapashtiniaiti.

<sup>12</sup> Chikich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiuṅka tura ni áishrijjai pujustinian wakerakka péṅkeraiti; ajapash-  
tiniaiti, tájai.

<sup>13</sup> Núnisaṅ Yus-shuara aishri Yus-shuarchaitkiuṅka tura ni nuwejai pujustinian wakerakka péṅkeraiti; ikiukchatniuiti.

<sup>14</sup> Nu nuwaka “Yus-shuarchajai tsaniṅ pujakun Yusjai yajauch ajastatjai” tu enentáimprashtiniaiti. Antsu nii Yus-shuar asamtai ni aishri niijjai pujá asa péṅker ajasminiaiti Yusjai. Núnisaṅ núwaka Yus-shuarchaitiat ni aishri Yus-shuarchaitkiuṅkia niijjai tsaniṅ pujá asa péṅker ajasminiaiti Yusjai. Núnisaṅ ni uchirísha péṅker ajasmin áiniawai Yusjai. Núnischaitkiuṅkia ni uchirí Yus-shuarcha uchiría áintsar ainti.

<sup>15</sup> Tura áishmaṅsha nuwasha Yus-shuarcha ana nu kanak-  
tinian wakerakka túratí. Yus-shuar nujai ankantaiti. Núnisaṅ asati. Tuke máaniaktinian Yus nakitramaji.



16 ¿Núwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka wetí.

17 Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai.

18 Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashtiniaiti.

19 Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin nekas enentáimtustiniaiti.

20 Yus-shuar ajasuka nuik pujumia áintsan pujusminiaiti.

21 Chíkich shuara takarniuri asam ti itiurchat pujakmasha itiurchat enentáimpráip. Tura ankant jínkimniaitkiumka jínkitiá.

22 Ankantchaitkiumka ankantaitkiumsha ju enentáimpratá. Takarniuka Yus-shuar ajas tuke chíkich shuara takarniurínkiusha shiir enentáimpratniuiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarin ajasuiti.

23 Ti wáitsamiayi Kristu in ankant awajtamsatniun. Ni numpejai sumakma asarum shuar emetamu áirap.

24 Tuma asamtai shuar Yus-shuar ajas nuik pujumia áintsan yamaisha pujústi tura Yusan enentáimtus wekasati.

25 Nuwa natsa túratniua nuna yamaikia áujmatjai. Kristu juna akupkachmai tura Kristu anenkratmarí ti nekapsa asamtai wi tájana nu antukminiaiti.

26 Tuma asamtai juna tájai. Ti iturchatnum pujá asakrin shuar aya júnisan nuattsuk pujustin péñkeraiti.

27 Nuatkaitkiumka núwem ikiukip. Nátsaitkiumka nuwa eakaip.

28 Tura nuatkumka tunáa túratsme. Nuwasha iniur-tukka niisha tunáa túrachuiti. Túrasha nuatnaikiaru itiurchatan ti wáinkiertatui ju nunkanam. Nú itiurchatnumiá wi uwentikraintjai.

29 Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashtiniaiti antsu Yúsna enentáimtustiniaiti.

30 Núnisan tuke Yúsna enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Ju nunkanmayajainkia itit awajmamsashtinaitji.

31 Núnisan aya ju nunkanam péñker pujustin ti takaschatniuiti. Ashí ju nunkanmayanka amuukatniuiti.

<sup>32</sup> Jú nuṅkanmayajain itit ajaschak tusan wakerajrume. Nátsaka Yúsnan enentáimtaiwai ni wakera nuna umiktinian.

<sup>33</sup> Túrasha nuatkaka ju nuṅkanman enentáimtaiwai ni nuarin shiir enentáimtiksatts.

<sup>34</sup> Núnisan nuwa nátsasha nuatkamusha niisháa enentáimiainiawai. Nuwa natsa Yúsnan enentáimtaiwai ni ayashísha ni wakanísha tuke Yúsjai shiir atí tusa. Tura nuátkamuka ju nuṅkanmayan enentáimtaiwai ni áishrin shiir enentáimtiksatts.

<sup>35</sup> Atumin yáintajtsan juna tájarme. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

<sup>36</sup> Tura shuar ni nawantri natsan nuatnaikiati tákuṅka péṅkeraiti. Nawantrin natsa tuke apujsatniun nakitiakka surukminiaiti. Nusha tunaachuiti.

<sup>37</sup> Tura chíkichka tuke natsan apujsatatj tákuṅka nekas péṅkeraiti. Apujsatin itiurchatchaitkiuṅkia tura ni nawantri nuatnakchatniuitkiuṅkia apujsatniuiti. Apujsaṅka nekas péṅker túrait.

<sup>38</sup> Tuma asamtai nuatmamtikianka péṅker túrayi tura apusaṅka nu naṅkaamas péṅker túrayi.

<sup>39</sup> Nuwa aishri iwiaaku pujakuṅkia tuke niijjai tsanin pujustiniaiti. Tura ni aishri jakamtai ankant ajas ni wakera nujai Yus-shuaran iis nuatnaikiamniaiti,

<sup>40</sup> tura tuke nuatnatskesha nu naṅkaamas nekas shiir pujustatui. Tú enentáimjai wikia tura Yusa Wakanísha métek tátsuash.

## 8

### *Yurumkasha namaṅsha ántar-yusnum susamu*

<sup>1</sup> Ayu. Yamaikia yurumkasha namaṅsha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiuṅka nujaiṅkia “neka asan naṅkaamantuitjai” tu enentáimiui. Antsu shuar chíkich shuaran aneakka nin péṅker atí tusa yayawai.

<sup>2</sup> Shuar “ti nékaitjai” tákuṅka nekas nekaatniua núnaka un-  
uimiarchaiti.

<sup>3</sup> Tura Yusan aneana núnaka Yus péṅker nékawai.

<sup>4</sup> Wátsek. Ántar-yus susamu yúatin junis enentáimpratniuiti. Yuska aya chikichkiiti. Tura chíkich Yus atsakui,

<sup>5</sup> aentsu yusrí nayaimpinmasha nuṅkasha írunna nuka penké ántar áiniawai. Kame aentsu yúsriṅsha tura úuntriṅsha ti írunui.

<sup>6</sup> Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntriṅsha chikichkiiti, Jesukrístu.

Nijjainkia ashí najanamuiti. Tura iisha ni kakarmarijjai iwiaaku pujaji.

<sup>7</sup> Tuma asantai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiuurchat enentáimprar “enentáirui yajauch ajasjai” tiartatui.

<sup>8</sup> Watsek, yuamujai Yus in shiir enentáimtikrampratniun jeat-sui. Yuarkia nujai péñker áchattaji tura yúachrikia yajauch áchattaji.

<sup>9</sup> Ankantaitme yúatin wakerakmekka. Tura anearta. Ame yúakmin chíkich shuar itiuurchat enentáimna nusha ámin wáitmak yúanka ni enentáin tunáa ajastatui.

<sup>10</sup> Íistá. Ámekka neka asam ántar-yusa jeen wayam tura nuí yúakminkia ame yatsum nuí wáitmakchanpiash. Tura niisha itiuurchat enentáimiat ántar-yus susamun yúashtimpiash.

<sup>11</sup> Nújainkia ame nékamujai ame yatsum Kristu jaka uwentikramia nu yajauch ajastatui.

<sup>12</sup> Túramtai ame yatsum itiuurchat enentáimna nu yajauch awajeakum Krístunmasha tunáa túraitme.

<sup>13</sup> Nu asantai winia yatsurun wi yúajna nujai yajauch awajeaknaka namannaka penké yuashtatjai nii tunáa ajasain tusan.

## 9

### *Kristu akatramu túramnia nu*

<sup>1</sup> Ashí Kristu akatramurí túratniua nuna wisha túramniaitjai ni akatramurí asan. Iis, wisha ii Uuntri Jesusan wáinkiaitjai tura wisha Jesukrístu takatrín takaaajai. Winia takatrujain átumka Yus-shuar ajasuitrume.

<sup>2</sup> Chíkich shuar “Kristu akatramurínchuiti” túrutainiakuiisha átumka winia takatrujai Yus-shuar ajasu asakrumin nujai wi nekas Kristu akatramuríntiaj nu paant nekaamniaiti. Tura tu enentáimtursatniuitrume.

<sup>3</sup> Ashí shuar “Kristu akatramurínchuiti” túrutainia nuna juna tájai.

<sup>4</sup> Wisha Yus-Chichaman etserkataj tusan shuárnum iraakun ashí ajampruinia nuna yuamniaitjai tura umarminiaitjai.

<sup>5</sup> Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai.

<sup>6</sup> Chíkich akatramuka kuit susamujai Yus-Chichaman et-serainiawai. Wisha Pirnapísha núnisrik túramniaitji. Kame ¿aya íchikik takastiniaitjai?

<sup>7</sup> Suntarka ¿ní kuítrijaiimpiash takaa? ¿Tsanimpian aráa nu nuna nerén yúatsuk. Wáakan wainiua nusha muntsurin

úmatsuk? Núnisan Yus-Chichaman étsera nusha nú takasman-  
umiá yurumámniaiti.

<sup>8</sup> Aya aents enentáimmian chichaatsjai. Muisais akupka-  
munmasha métek tawai.

<sup>9</sup> Muisais akupkamunam áarmaiti:

“Turu takaak jin̄kiaia saepen pakartaj tusa nájakui ni nuji  
jin̄kiatáshtiniaiti. Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujai.

<sup>10</sup> Antsu in jujai nekaawarat tusa tímiayi. Jin̄kiain araana  
nusha tura júukmatai saepen pakaana nusha nuna jin̄kiain  
mai yurumátin ániawai. Paant atí tusa Yus nuna áarmiayi.

<sup>11</sup> Tuma asantai Yus-Chicham atum̄ijn etserkakrin nuyá  
átum takakrumna nujai in ajamsatniuitrume. ¿Nusha itiur-  
chatkai?

<sup>12</sup> Chíkich akatramu atum̄ijn irutainiak ajamsamun yuamni-  
aitkuin̄kia iikia nekas túramniaitji ii etserkamujai Yus-shuar  
ajasakrumin.

Tura wikia antsu túrachuitjai. Atsumaknasha ashí itiur-  
chat ana nuna katsuntramjai Kristu shiir chichamen̄ etserkui  
shuar itiurchat enentáimturajin̄ tusan.

<sup>13</sup> Ashí shuar ni yúsr̄iniun tuke pujurin ainia nu, ni yusr̄i  
jeen írunna nuyan yurumáiniawai. Tura yus-sutai namanken  
maawar nuyá yurumáiniawai.

<sup>14</sup> Núnisan Yus-Chichaman etserniua nuka Yúsnan takasu  
asantai péñker ajamsatniuiti. Nuna Kristu akupkamiayi.

<sup>15</sup> Tura wisha ajamsamun yuamniaitiatan tuke winia  
kuítrujai yurumámjai. Tura yamaisha surúsúk tusan  
áattsujrume. Antsu nuna túrutsuk jakañka maak aintjai.

<sup>16</sup> Uwempratin chichaman wi étserkun aya nújain̄ “ti  
pen̄keraitjai” enentáimtumsjai. Kame Yus nuna túratniun  
surusuncha itiurkatjak. Nuna túrachkunka ti itiurchat puju-  
saintjai.

<sup>17</sup> Wakerakun étserkunka, warasminiaitjai. Tura nakitiak-  
nasha tuke Yus surusmanka umiktiniaitjai.

<sup>18</sup> Tura jujai antsu nekas warasminiaitjai: Wi túramnian ini-  
aisan chikichnan takatsuk aya winia kuítrujain̄ uwempratin  
chichaman étserjai. Nujai waraakun akikma áintsan̄kete.

<sup>19</sup> Chíkich shuara takarniuchuitiatan ashí shuara takarni-  
ur̄iya áintsan̄ketjai Kristu shuar̄i untsur̄i ajasarat tusan.

<sup>20</sup> Israer-shuarjai pujakun niisha Yus-shuar ajasarti tu-  
san Israer-shuara áintsan̄ ajai. Kame Muisaisa akupka-  
mur̄i umirkatin áiniakui wisha aun umirkashtiniaitiatnak  
umirniuitjai.

<sup>21</sup> Tura Israer-shuarchasha Yus-shuar ajasarti tusan, nu  
shuar Muisaisa akupkamur̄in umirkashtin̄ áiniakui, wisha

nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai.

<sup>22</sup> Yusjaj katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjaj métek ajajai ishichkisha Yus-shuar ajasarti tusan.

<sup>23</sup> Ashí wí túraj núnaka uwempratin chicham tuke shiir atí tusan túrajai. Tura nu chichamjaj wisha atsumtsuk shiir wekaajai.

<sup>24</sup> Shuar nekapnaisatniusha untsurí tsékentin átsuk tura aya chikichik awakmatsuk. Nínki, awakmakun súsatniua nú shiirmachin achiktatui. Núnisrum kakarum ajasrum awakmak shíirmachin achiktinia áintsarum Yusna takastarum.

<sup>25</sup> Shuar nakurak nekapnaisatin ainia nuka nupetmaktaj tákunka ashí itit awajea nuna ikiuiniawai. Iisha núnisrik nu enentáijjaj Yusna nu takastiniaitji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjinia nú tawasap tuke amuukashtatui.

<sup>26</sup> Wikia aya nánkamsan tsékeatsjai. Nasejaj maania áintsan máaniatsjai.

<sup>27</sup> Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitrurainti.

## 10

### *Ántar-Yus tikishmatrashtiniaiti*

<sup>1</sup> Enentáimpratarum, yatsuru. Yus yaunchu ii úuntrin ashí métek yáinmiayi. Nusháa yuranmijjaj jintian nekapruamiayi. Tura ashí ii uuntrí nu yuranmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi.

<sup>2</sup> Tura Muisaisan umirkar yuranminiam tura nayaantsanam ashí imiainiu áintsan ajasarmiayi.

<sup>3</sup> Núnisan ashí mash Yusnumia yurumkan yuawarmiayi.

<sup>4</sup> Entsancha ashí mash Yus susamunak umararmiayi. Kame Yus kayanmaya entsan akupkamtai ashí umararmiayi. Krístusha, nú kaya áintsan, niijjaj tuke weakui ni wakaní atsumamurin Krístunmayan takusarmiayi.

<sup>5</sup> Tuma an Yus ti yáinmaitiat ni wakeramun umikcharmiai. Tura ásar ni nunkeen jeatsuk atsamu nunkanam ti untsurí jákarmiayi.

<sup>6</sup> Iisha nujaj nuuimiartiniaitji. Iikia ni wakeriarmia áintsar<sup>i</sup> yajauchia nu wakerukchatniuitji.

<sup>7</sup> Nu asamtai ántar-yus ni túrawarmia áintsarum tikishma-trairap. Iis, jiru yusrí shiir awajenakuí Yus-Papinium áarmaiti,

“Nu shuar yurumáwar nampekar námper ti najanawarmiayi.”

Tu áarmaiti.

<sup>8</sup> Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantaj jákarmiayi.

<sup>9</sup> Iisha tunáa túrar “Yus asutiuáshtatui” tu enentáimprashstiniaitji. Niisha nuna túrawar napijjaj esaim untsurí jákarmiayi.

<sup>10</sup> Yussha yajauch áujmatsashtiniaiti. Nuna túrawarmatai Yus ni suntarín akupak untsurín maawarmiayi.

<sup>11</sup> Yaunchu ii úntrijjaj túrunamu in amúamu tsawantnum pujajnia nuna jintintramat tusa áarmaiti.

<sup>12</sup> Tuma asantai shuar “Tunaanum iniaarchattajai” tákunka anearti. Anearchamka iniaarminiaitme.

<sup>13</sup> Tura ame itiurchatrumka aya amek nekapeatsme. Chíkich shuarsha nu itiurchatjaj métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska péñker asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintintramattawai. Nújajnkia katsuntrattame.

<sup>14</sup> Nu asantai aneamu yatsuru penke ishichkisha ántar-yus enentaimtusairap.

<sup>15</sup> Atumsha nékatsrumek. Wi tájana nu nekaschakait.

<sup>16</sup> Kristu jakamu enentáimtustin námper najanar Yus áujeaji Kristu numpen nakumea nu shiir atí tusar. Tura métek umarar nujaj Kristu numpé métek enentáimtaji taji. Tura apatkusha púurar<sup>i</sup> tura métek yuar<sup>i</sup> nujaj Kristu ayashí in jarutramkamu métek enentáimtaji taji.

<sup>17</sup> Apatkusha chikichkiitiat púuram untsurí ajatsuk. Iisha núnisrik untsuríitiatar nu apatuk métek yuar<sup>i</sup> métek enentáimprar chikichik ayashtinia áintsar aji.

<sup>18</sup> Israer-shuartisha enentáimpratai. Yus-sutai namañken yuinia nu, métek yuawar Yusan métek enentáimtuiniatsuk.

<sup>19-20</sup> Núnisan Yus-shuarcha ántar-yus sutai namañken suiniak nekas-Yusan suiniatsui antsu yajauch wakanin suiniawai. Kame ántar-yus áiniak penké ántar áiniawai, iwiaakuchu áiniawai. Nu namañsha sutai namañketiat péñker namañkete, yajauchichuiti. Aya junak tajai. Yus-shuarcha ántar-yus sutai namañken suiniakui amesha niijjaj métek yuamka yajauch wakanniasha niijjaj métek enentáimtajai tame. Nu antsu yajauchiiti.

<sup>21</sup> Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrome.

<sup>22</sup> ¿Warí, Yus akajkatin wakeramek. Iisha nin nupetkamni-ashitiaj?

*Aya aneakur takastiniaitji*

23 “Ashí túramniaitjai” tiniu áiniawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin.

24 Nú arantcha chíkich yáintincha enentáimpratniuitji. Aya íniuk pachischatniuitji.

25 Naman súnakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata.

26 Ashí ju nuñkasha tura ashí írúnna nusha Yúsnachuk ainia. Tuma asamtai péñker áiniawai.

27 Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme.

28 Tura chíkich chichaak “Juka ántar-yus susamu namañkete” túramkuñkia nuikia yuawaip. Yúakminkia nu shuar itiurchat enentáimprattawai.

29 Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitjai.

30 Wi Yúsan yumiñsan yúakuisha urukamtia itiurchat enentáimturainia. Yus yumiñsachmakait?” tíchatameash.

31 Ayu, yúakmesha úmakmesha ashí túramna nusha ashí shuar Yúsan shiir enentáimtuşarti tusam túratá.

32 Tuma asamtai ii túramujaj chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji.

33 Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

**11**

<sup>1</sup> Kristu turamia áintsan takaajai wisha. Atumsha núnisrum wi takaajna áintsarum takastarum.

*Nuwa Yusa jeen túratin*

<sup>2</sup> Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume.

<sup>3</sup> Nu arantcha ujaajrume. Yus Apa Krístun akupea áintsan Kristu ashí áishmañkan akupeawai. Núnisan áishmañsha ni nuwen akupeawai.

<sup>4-5</sup> Íjjañkia shuar Yus áujenak tura núnisan Yus-Chichaman étserainiak áishmañ etsenkrukchatniuiti antsu nuwa múuknum nukumaktiniaiti. Tuma asamtai áishmañ nui etsenkrakka natsantaiti. Tura nuwa múuknum nukumakchañka natsantaiti. Intiashin tsupimiarua áintsañkete.

6 Nuwā múuknum nukumaktinian nakitiakka intiashin tsupír<sup>tí</sup> nuikia. Watsek, nuwā ni intiashin tsupirtinian nakitiakka, tura awampratniun natsamakka múuknum nukumakti nuikia.

7 Áishmaṅkka Yúsan nakumeawai. Yusna shiir ana nuna nakúm<sup>ká</sup>ttsa Yus áishmaṅkan najanamiai. Tuma asamtai áishmaṅkka etsen<sup>k</sup>rukchatniuiti. Antsu nuwānka áishmaṅna shiir ana nuna nakúm<sup>ká</sup>ttsa Yus najanamiai.

8 Iis, Yus áentsun najaneak nuwānmayān áishmaṅkan najanachmiayi antsu áishmaṅka ukunch<sup>í</sup>j<sup>í</sup>ai nuwān najanamiai.

9 Nuwān yáin<sup>k</sup>iát tusa áishmaṅkan najanachmiayi antsu áishmaṅkan yáin<sup>k</sup>iát tusa nuwān najanamiai.

10 Tuma asamtai núwāka múuknum nukumaktiniaiti, nayaimpinmayā aencha ísarti tusa.

11 Ayu, tura áishmaṅ nuwajain<sup>ch</sup>u atsuinti tura nuwasha núnisaṅ áishmaṅjain<sup>ch</sup>u atsuinti. Yus ju<sup>u</sup> nun<sup>k</sup>an núnisaṅ atí tusa najanaiti.

12 Iis, Yus nuwān áishmaṅnumiā najanamiai tura áishmaṅsha nuwānmayā akiiniaiti. Tura Yus mai najanaiti.

13 Enentáimpratarum atumsha. Nuwā múuknum nukumat-suk Yus áujsatin ¿pén<sup>k</sup>kerk<sup>k</sup>ait?

14 Ii shuartinkia áishmaṅ intiash ajakin natsantchakait.

15 Antsu núwāka intiash ajakin pén<sup>k</sup>kerchakait. Múuknum nukumaktinian susamuiti.

16 Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

*Kristu jakamu enentaimtustin nampernum yajauch túramu*

17 Yamái áarattajrumna nujain<sup>ch</sup> shiir enentáimtatsjar<sup>m</sup>e. Atum irunkuram yáiniaiktiniaitrume tuke pén<sup>k</sup>ker wekasatin. Átum antsu iruntrarum yajauch awajnaiyar<sup>m</sup>e.

18 Wats, Yusa Jeen irunkuram atumsháa enentáimprarum kanakurme. Kame tu ujatkar<sup>m</sup>ai. Nekaschashit.

19 Tuke tupartatrumek Yúsnan ti nekana nu shuar paant nekanat tusar<sup>m</sup>ea. Antsu kajernaikiar kanaktin pén<sup>k</sup>kerchaiti.

20 Kanakin asarum Kristu jakamu enentaimtustin nampernum atum iruntrarum yúarmena nu nekas Yúsnachuiti.

21 Iis, ashí ní yurumken itiaawai ai yurumáttsa tura chikichan nákatsuk niá niá wari yuattsa wakerawai. Chíkichkia ishichik itiaana nu tsukamawai tura chikichcha nampekarai.

22 Yurumkan ishichik itiaana nu iniatsáarchamek. Atum áitkiarum núnisaṅ Yusa jeen yurumáshtiniaiti. Natsantaiti. Warí, chíkich jeā átsuk ai yurumátin. ¿Warimpait. Jujai shírash áujsatjarum? Atsá. Jujai shiir áujsachminiaitjar<sup>m</sup>e.



*Kristu jakamu enentaimtustin námper*

<sup>23</sup> Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun júkí

<sup>24</sup> Yusan yuminsamiayi. Nuyá puur tímiayi “Yuatarum. Júsha winia ayashruiiti; atumin jarutramkatta núiti. Ju yúakrum Winia enentáimtursatarum” tímiayi.

<sup>25</sup> Núnisan yurumá umik pininnasha achik tímiayi “Ju pinin Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi.

<sup>26</sup> Tuma asamtai ju apatuk yúakrum tura pininsha úmakrum ii Uuntri Kristu jakamuri enentáimtarme. Kristu táatsain ju tuke túratniuitrume.

*Shiir enentajijiai Kristu jakamu enentaimtustin nampernum yuatniuiti*

<sup>27</sup> Tuma asamtai shuar Yusan enentáimtutsuk ju apatkun yuawar tura ju pininnumiancha umarar Kristu ayashincha ni numpencha yajauch enentáimta asa tunáa túraiti.

<sup>28</sup> Nu asamtai ashí shuar ju apatkun yútsuk tura ju pininnumiancha úmutsuk ni enentáin iwiaratniuiti Yusjai.

<sup>29</sup> Kristu ayashí jakamu enentáimtutsuk yúakka tura úmakka nuna tura asa asutniáttawai.

<sup>30</sup> Atumsha tura asarum jaarme tura pimpiruitrume. Chikichcha jákaru áiniawai.

<sup>31</sup> Ímia-iik íimiakrinkia Yus in asutiámachaintji.

<sup>32</sup> Tura ii enentáin Yus yajauchia nuna wáiniuk asutiámji. Túrachkunka ashí Yus-shuarhajai súmamtikramawaintji.

<sup>33</sup> Tuma asamtai, yatsuru, iruntrar yurumáttsa matsatkurmeke nákastarum métek yurumátin.

<sup>34</sup> Shuar tsukamakka ni jéeniink<sup>i</sup> yurumáti. Nújainkia yajauchijjai irunchakrumin Yus asutiámashatrum. Ayu, chikich áatrururmena núnaka wi ai jean iwiarattajai.

## 12

*Yusa Wakaní ni shuarin susamu*

<sup>1</sup> Yusa Wakaní ashí ni shuarin súana nuna yamáí ujaktatjarume. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

<sup>2</sup> Yaunchu átum Yus-shuar tuke ajatsuk chikich shuarjai métek ántar-yus tikishmatramarme. Niisha ántar-yus ásar áujmattramsachmin ármiai.

<sup>3</sup> Tura jújain shuar Yusa Wakaní kakarmarjijai chichaana nu nekaamniaiti. Yusa Wakaníjainkia shuar “Jesus yajauchiiti” tíchamniaiti. Núnisan aya Yusa Wakaníjain “Jesus winia Úuntur asa akuptuktiniaiti” tíminiaiti.

4<sup>5</sup> Yusa takatrj́ íruntsuk. Tura Yusa Wakanj́nk<sup>i</sup> ashí nuna takastinian súsaiti. Tura shuar Yus-shuara Uuntrj́ chikichik ajn ashí Yusa takatrj́n métek takaatsui. Antsu chikichkin ashí nankaamas pé<sup>n</sup>ker takaawai. Yusa Wakanj́sha nuna shiir takasat tusa súawai. Tura Nii wakera nuna Nj́nki ni shuarj́n chikichik chikichik niisháa niisháa súawai.

6 Yúskete ashí ni shuarj́n niisháa takamtikeana nu. Nj́nki ashí ni shuarj́ enentájn takaak takatnasha shiir takamtikeawai.

7 Yusak túratin súam Yusa Wakanj́ kakarmarj́ paant átatui nu takasmanum. Tura ashí shuar ní takatrj́jjaj yáiniaiktin áiniawai.

8 Júnaka Yus takamtikeawai. Nékana nu shuarnasha, unuimiarua nunasha Yúsnan ujaktinian súawai. Tura mai shuaran Yusa Wakanj́ kakarmarj́jjaj nuna túratniun súsaiti.

9 Chikichnasha Yúsán áujenak Yúsán ti enentáimtusar nekas itiurchat ana nuna iwiaratniun súawai. Nj́ncha Yusa Wakanj́ kakarmarj́jjaj nuna takastinian súsaiti. Chikichnasha jaan tsuártinian súawai.

10 Chikichnasha aents nj́nki túrachminian túratniun súawai. Chikichnasha Yúsnan etserkatniun súawai. Chikichnasha shuar wari yajauch wakannia pé<sup>n</sup>ker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintiátniun súawai.

11 Tura ashí shuara enentájn nu Wakanik takaawai. Tura Nii wakera nuna an<sup>k</sup>ant an<sup>k</sup>ant súawai takastinian.

*Ashí Yus-shuar Kristu ayashía áintsan ajainiawai*

12 Iikia Kristu ayashía áintsar<sup>i</sup> ayashímkiatiji. Kristu ayashí muchitmarj́sha írui. Niisha túmaitiat chikichik ayashiniaiti.

13 Tura imianiakrin Yusa Wakanj́ chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, an<sup>k</sup>ant ainia nusha, ashí yamá chikichik ajasuitji. Tura Yusa Wakanj́ pimiutkamuitji Nijjaj tsaninkia pujakur.

14 Ayashi muchitmarj́ aya chikichkichuiti.

15 Tuma asamtai, winia nawer uwejrchuitiat tuke winia ayashrunuiti.

16 Winia kuíshrusha j́jiruchuitiat tuke winia ayashrunuiti.

17 Wátsek winia ayashur aya j́jikitkiuin<sup>k</sup>ia ¿itiurak antukaintiaj? Winia ayashrusha aya kuíshkitkiuin<sup>k</sup>ia ¿warj́jain<sup>n</sup> nekap-saintiaj?

18 Nu asamtai Yus winia ayashru muchitmarj́ ni wakera-munam ikiusuiti.

19 Chikichik muchitmajain<sup>n</sup> ¿ayash áminkiait?

20 Antsu untsurí muchitma akuisha chikichik ayashkiiti. Iisha núnisrik chíkich chíkich iisháa takayatrik métek takasar Yus wakeramu takamtsuk umáji.

21 Winia jiru péñker aṅ winia uwejrúncha wakerishtatjak. Winia muukarsha péñker aṅ winia nawernasha wakerishtatjak. Núnisan Yus-shuar shiir enentáimtumak ni yachin “atsumatsjame” tíchamniati.

22 Antsu ii muchitmari ishichik enentáimtajnia nu at-sakuṅkia ti atsumawaintji.

23-24 Chíkich muchitmasha, ímiancha nu, shiir iwiarmam-taji. Tura nu muchitmaka shiir ísminia nujai nankaamas péñker wainji. Iis, shiircha nu antsu péñker wainji. Yus ii ayashin núnisan atí tusa najanamiayi.

25 Nujainkia ayashí muchitmari máanaitsuk métek yáiniainiawai.

26 Chikichik muchitmaram najaimiakum ashí ayashnium wáitiatsmek. Núnisan chikichik muchitmaram ayap ajakum ashí ayashnium shiir átsumek.

27 Núniskete Kristu ayashíjiai ayashímkiaji nu. Tura chíkich chíkich ni muchitmari aji.

28 Ayashnium muchitma írunna áintsan Yus ni shuarin untsurí takatan súsaiti. Emka Yus akatramu, nuyá ni chichamen etserin, nuyá jintinkartin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjai chicharin, mash írunui.

29 ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia.

30 Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintinkratniuk ainia? Atsá. Túmachuiti.

31 Túmaitkuṅkia péñkera nu takastin wakeruktarum. Tura imiá péñkera nuna juí jintintiatjar-me.

## 13

### *Aneatin*

1 Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten aja-jai. Peñké ántranak chichajai.

2 Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusan murá umuchiayatnak, anenkratchaknaka peñké ántraitjai.

<sup>3</sup> Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan suru-mayatnak tura anenkratchaknaka ántranak túraitjai.

<sup>4</sup> Anenkartaka wari kajeatsui, tsánkaiti, chíkich shuaran shiir awajniuiti, péjchach asa waantu enentáimtumatsui.

<sup>5</sup> Anenkartaka natsanta nuna túrichuiti, níniunak enentáimchaiti, kajechuiti, páchichuiti.

<sup>6</sup> Chikicha tunaarín wararchaiti antsu péñker shuaran wararniuiti.

<sup>7</sup> Anenkartaka aya katsunteawai. Tsanú chichamnasha nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

<sup>8</sup> Anenkrattainkia tuke amuukashtiniaiti. Antsu ju nunka amuukmataisha Yus-Chicham etserkatin atsuttawai, tura ni-isháa chichamjai unuimiatsuk chichastincha amuukattawai, tura ashí nekanamtai unuimiertincha atsuttawai.

<sup>9</sup> Kame yamaikia aya ishichik nékaji. Yus-Chichamsha amutsuk étsereaji.

<sup>10</sup> Túra ukunam mash nekanamtai yámankamtaik nekaa-muka ántar átatui.

<sup>11</sup> Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai.

<sup>12</sup> Núnisrik yamá ju nunkanam Yus paant wáintsuji. Íspik kusurunam ímsatniua áintsankete. Antsu ukunam mai métek paant wainniaikiattaji. Yamaikia aya ishichik nékajai. Nui antsu Yus winia nékara áintsanak nekaattajai.

<sup>13</sup> Watsek, maintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju maintiunmasha anenkrattainkia ashí nankaamakuiti.

## 14

### *Niisháa chicham unuimiatsuk chichastin*

<sup>1</sup> Nu asantai, anenkratin atarum. Tura núnisrumek Yúsnan péñkera nu takastin wakeruktarum. Imiankaska Yus-Chicham etserkatin péñkeraiti.

<sup>2</sup> Nújainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamni-aiti. Yusa Wakaní nin chichastinian súawai túrasha tana nu nekaachminiaiti.

<sup>3</sup> Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai.

4 Niisháa chichamjaj unuimiatsuk chichaana nuka aya niniki katsuartinian yáinmamui. Antsu Yus-Chichaman étserea nuka ashí Yus-shuaran ikiatsuáwai.

5 Atumsha ashí mash niisháa chichamjaj chichastinian wakerajrume. Túrasha nuna nankaamas Yus-Chicham et-serkatniun wakerajrume. Aya chichastinjainkia ju imiá péñkerchakait. Kame chichasma jintiakmeka maak. Nujaj Yus-shuar tsakarartatui.

6 Enentaimpratarum, yatsuru. Nuj iraakun aya niisháa chichamjaj chichaaknaka çitiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarne. Yus-Chichamnasha tura ashí Yúsnancha jintinkiuncha yáintatjarne.

7 Peemsha tura tumañsha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachkuinkia, nu tuntuíyamu nekaachminiaiti.

8 Suntarsha mesetnum wéenakui ni kapitíantri ni wakeramun ujaktinian kachun umpuawai. Paant umpuakuinkia suntarsha ni wakeramun nekaawartatui. Tura paant umpuachkuinkia suntarsha çitiurak mesetnum wétinian iwiarat?

9 Atumjajisha núniskete. Nekaachmin chichamjaj chichaakminkia çtámena nuna itiur nekaawartata? Nase chichartsumeash.

10 Ju nunkanmaya chichamka ti untsurí írunui. Nu chichaman nékakka ashí antukmin áiniawai.

11 Tura chíkich shuara chichamen ántachkunka níjjajainkia yajaya apachia áintsanak ajajai. Niisha wíjjajainkia yajaya apachia áintsankete.

12 Tuma asamtai, Yusa takatri ti wakera asarum ashí Yus-shuaran iñarartatna nú takat nekas wakeruktarum.

13 Nu asamtai niisháa chichamjaj chichaitkiumka chichasumna nu jintiartin Yus seata.

14 Niisháa chichamjaj Yusan áujeaknaka nekas winia wakantrujaj áujeajai tura áujasajna nuna nékatsjai.

15 Antsu wikia júnisan enentáimjai. Yúsan áujeakun winia wakantrujajisha áujasattajai tura enentáimtsuk áujasattajai. Kantamkuncha kantamaj nuna enentáimkiun winia wakantrujajisha kantamattajai.

16 Amesha shuar iruntramunam aya wakanmijaj niisháa chichamjaj Yus shiir yumiñsakmincha nekaachmin asamtai nékachuka ámijaj métek áujasatniun jeatsui.

17 Ti shiir Yus yumiñsam áujeatsmeash tura chíkichka Yusjaj ikiakáatsme.

18 Ashí átum nusháa chichamjaj chicharmena nuna nankaamas wikia chichaajai. Nuna Yusan yumiñsajai.

19 Túmaitiatnak untsurí chichamjaj chichasan ántumtikiashtinjainkia nankaamas Yus-shuar iruntramunmanka aya senku chichamchijain tiintjai, paant jintintiawartaj tusan.

20 Yatsuru, uchia áintsarum enentáimprairap. Kuirchia áintsarum tunáa túrashtin enentáimpratarum tura chíchich írunna nujaj uunt enentáimpratniua áintsarum enentáimpratarum.

21 Yus-Papinium áarmaiti:

“Yajaya shuaran akupkan niisháa chichamjaj chichastajaj. Tura nújajsha anturtukchartatui” tawai Yus.” Tu áarmaiti.

22 Nújainkia páantaiti, nusháa chichamjaj chichastinkia Yus-shuarchan ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti.

23 Tuma ajn, nékachusha tura Yus-shuarchasha Yus-shuar iruntramunam wayanaka tura ashí niisháa chichamjaj chichainianak wáinkianka “mash waurka ajasari” enentáimturmarshartatuak.

24 Tura Yus-Chicham étserkurminkia nékachusha tura Yus-shuarchasha nuj wayanaka ashí tárumna nujaj ni tunaarin íimias enentáimturtatui.

25 Nújainkia ni enentáin úumak ana nuna paant wáiniak tikishmatar Yusan shiir awajsattawai. Tura “nekas Yus atumjaj pujawai” títiatui.

### *Ashí tuke shiir takastarum*

26 Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjaj chichastinniasha, nusháa chichasman jintíatniuncha, ashí Yus-shuar Yusjaj tsakararti tusar júna mash takasarti.

27 Nusháa chichamjaj chichainiakka chikichik chikichik chichasarti. Tura jímiarchik menaintiuchiksha chichasarti. Tura ni timianka jintiartiniaiti.

28 Jintiartin atsakuinkia nusháa chichamjaj iruntramunam chichaschatniuiti. Antsu níñki Yusjaj chichasti.

29 Núnisan jimiarchiksha menaintiuchiksha Yus-Chichaman etserkarti. Tura chíchich shuar nuj iruntrar ni etserkamun enentáimprarti péñkerashit tusar.

30 Tura chikichik chichaakui Yus chikichan nuj pujana nuna yamaram chichaman súakuinkia emka chichaa nu iníaisatí.

31 Núnisrum Yus-Chicham etserkatin wakerarmena nu chikichik chikichik chichasrum ashí jeattarme. Nújajsha Yus-shuar unuimiarar kakarartatui.

32 Yúsnan étserainia nuka tuke enentáimprar chichastin áiniawai. Enentáimtsuk nánkamsañ chichasmin áiniatsui.

33 Yuska pachintak chichaman nakitiak shiir chichasmanak wakerawai.

Chíkich nunkanmasha ashí Yus-shuar iruntramunam túrainia áintsarum túratniuitrume atumsha.

34 Yus-shuar iruntramunam nuwá chichastin surimkiamuiti. Yus akupea núnisañ núwaka chichatsuk umin átin áiniawai.

35 Inintrustinianian wakerakka ni jeen waketkin ni aishrin nuí aniasti. Ashí iruntramunam nuwá chichastin natsantaiti.

36 Jusha enentáimpratarum. Yus-Chicham atumjai nankamnachmai. Núnisañ aya atumijiniñ Yus-Chicham jeartamchaiti. Chíkich nunkanmasha Yus-shuarti túrutai enentáimpratniuitrume atumsha.

37 Atumjin shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí.

38 Tu táchakuinikia niisha ántar áiniawai.

39 Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiairap.

40 Túmaitiat antukchamin awajtsuk ashí shiir túratarum.

## 15

### *Kristu nantakmia*

1 Ataksha, yatsuru, uwempratin chichaman wi etserkamaj nuna atumin enentáimtikrattsan wakerajrume. Nu chichamsha atumsha enentáimturarum tariarurme.

2 Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

3 Winia ujatkamunak ujakmajrume. Nu chichamsha ashí nankaamas úuntaiti. Júiti nu chicham: Ii tunaarín asakártasa Kristu jarutramkamiayi, Yus-Papinium tana núnisañ.

4 Tura jakamtai iwiarsarmiayi. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisañ.

5 Nantakisha Pítrun wantintiukmiayi, nuyá ni akatramurín wantintiukmiayi.

6 Nuyanka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru áiniawai tura untsurí tuke pujuiniawai.

7 Nuyasha Sántiakun tura nuyá ashí ni akatramurín wantintiukmiayi.

<sup>8</sup> Ashí amúamunmasha winiasha wantinturkamiayi, wi ya-  
jauch wekaa aín.

<sup>9</sup> Wisha Yus-shuaran ti yajauch awajsa asan chíkich Yus-  
akatrámujai ímianchaitjai. Nekas winia péñkerujai ni akatra-  
muríntjai tichamniaitjai.

<sup>10</sup> Antsu Yus ti shiir anentak winia enentáiruı́ pujurtus  
péñker najataiti. Nu asamtai winia kakarmarjai takaschait-  
jai, antsu Yus, anenkartin asa, winia enentáiruı́ takaakui ashí  
ni akatramurín nankaamas takasuitjai.

<sup>11</sup> Tura wi takaakuisha tura ni takainiakuisha mai  
péñkerkete. Nu chichamka mash étsereaji tura nu chichamsha  
átum enentáimtusmarne.

### *Jákaru nantakiartatui*

<sup>12</sup> Iisha “Kristu jakamunmaya nantakniuiti” tu étsereaji.  
¿Itiur nuikia shuar jakamunmaya nantakchatniuiti tuinia?

<sup>13</sup> Jakamunmaya nantakchatniuitkiuinı́kia nuikia Krístusha  
nantakchaiti.

<sup>14</sup> Tura Kristu nantakchaitkiuinı́kia ii ujajnia nu penké  
ántrai, atumsha Kristu enentáimtarmena nusha ántrai.

<sup>15</sup> Núnisaitkiuinı́kia iisha “Yus Krístun iniantkimiayi” tákur  
waitruamji. Iis, nekas jakamunmaya nantakchamniaitk-  
iuinı́kia nuikia nekas Yus Krístun iniantkichuiti.

<sup>16</sup> Jaka nantakchatniuitkiuinı́kia imia Krístusha iniantkich-  
maiti.

<sup>17</sup> Tura Kristu iniantkichmaitkiuinı́kia átum Kristu  
enentáimtamusha penké ántrai. Tunaarmisha asakárchamu  
áiniawai.

<sup>18</sup> Núnisaitkiuinı́kia Yus-shuar jákaru ainia nu tuke  
menkakarú áiniawai.

<sup>19</sup> Iikia Kristu enentáimtusar tuke Niiı́jai shiir pujustin  
nákaji. Tura aya jú nunkanam pujustiniaitkiurkia Kristu ántar  
enentáimtakrin ashí nankaamas waitnentrampnatniuitji.

<sup>20</sup> Antsu imiankas Kristu jakamunmaya nantakniuiti. Ashí  
ukunam jakanmaya tuke jákashtinian nantakiartatna nuna  
Nii émtukuı́ti.

<sup>21-22</sup> Yaunchu Atań tunáa túramtai ashí shuar jákatin  
áiniawai. Núnisań yamaı́kia Krístujaiń tuke atakka jákashtinian  
nantakiartiniaiti. Iis, chikichik áishmanjaiń jákatin  
nankamnamiayi. Nuka Atańkauyayi. Núnisań chikichik  
áishmanjaiń nantaktin nankamnamiayi. Nuka Krístuı́ti.

<sup>23</sup> Yus wakerana nuı́ Yusna nu mash nantakiartatui:  
Kristu emka-juukma áintsan émtukim nantakniuiti tura atak  
jú nunkanam tara ashí ni shuarín júuktinia áintsan iniantkit-  
tiawai.

<sup>24</sup> Nuını́kia mash amuukattawai. Nuı́ Kristu ashí kapi-  
tı́anniasha, ashí akupniuncha, ashí núnisań jú nunkanam



írunna nunasha nupetak emesrattawai. Krístusha ashí mash ni Aparín susattawai. Tura Yus Apa ashí akupin átatui nuikia.

<sup>25</sup> Iis, júnisañ átatui. Emka Yus Apa ashí ni nemasrín nupetak Krístun susattawai akupin atí tusa.

<sup>26</sup> Tura ni nemasrín nupetak ashí amúamunam jákatniuncha nupetkattawai.

<sup>27</sup> Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Nínki súsachmaiti.

<sup>28</sup> Tura Yus Apa ashí mash ni Uchirín Krístun nekas susantai Kristu nuikia ashí akupin ajas atak ni Aparín mash awantuki núnisañ surumaktatui. Nuínkia Yuska tuke ashí nankaamantu átatui.

<sup>29</sup> Ayu. Tura shuar jakan enentáimtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

<sup>30</sup> Iikia ¿urukamtai tuke jánínkiaruitiaji? Nantakchatniuitkiuinikia ánta wáitsaintji.

<sup>31</sup> Atsá, penké áintsachuiti. Nu asantai átum ii Uuntrí Jesukrístu enentáimtakrumin wi shiir enentáimtajrume. Tura wisha tuke tsawantin ti itiurchat pujakun jákatniua áintsan pujajai.

<sup>32</sup> Jakamunmaya nantakchatniuitkiuinikia wi ántranak kaje shuarjai Ipsiunam máaniakuitjai. Maa, uunt yawáa áinis kaje ármái. Wats, núnisaitkiuinikia antsu “yurumár nampektai, kashin jákashtatjik” titiai nuikia.

<sup>33</sup> Ananawairap. “Pénkeraitiatam yajauch shuarjai tsanínkia wekakmeke yajauch máatrattame” tiniu áiniawai.

<sup>34</sup> Tunáa ikiuakrum pénger wekasatin shiir enentáimpratarum. Iis, shuar Yúsan nékainiachu tuke awai. Atumin natsaaruk tusan tájarme.

### *Iniantkimiú ayash átatna nu*

<sup>35</sup> Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat?

<sup>36</sup> Enentáimtsuk inintraawai. Jínkiaí araamsha jaka áintsañ amúatsuk. Túrayat tsapaatsuk.

<sup>37</sup> Tsapaitniurísha araatsme antsu trikiu jínkiaichisha chíkich áraka jínkiaichirísha araame.

<sup>38</sup> Nuyá tsapaakuisha Yus wakerana núnisañ ní tsapaitniuríncha súawai. Tura ankant ankant tsapaitniurínkia súsaiti.

<sup>39</sup> Núnisañ ashí ayash métekcha áiniawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai.

40 Nayaimpiniam yaa írunui tura ju nunkanam írunna nujai nusháa ímtin áiniawai. Nayaimpinmayasha nun kayasha shíirmari nushaiti.

41 Etsá wincharisha nantunusha yáanusha mash nushaaiti. Nuamtak yaaksha chikicha wincharinkia chikichnajainkia nushaaiti.

42 Núniskete jaka nantaktincha. Káurtinnium iwiarsam jákashtinnium nantaawai.

43 Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai.

44 Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

45 Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.”

Tu áarmaiti.

Ukunmanka, yamaram Atanka áintsan, Kristu, wakan asa, ashí áentsun nekas iwiaaku átinian susamniaiti.

46 Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu.

47 Emka áishman nun kajai najanamu asa nun kayaiti. Ukunmaya áishmansha ii Uuntri Kristu asa nayaimpinmayaiti.

48 Atanka áintsan ainia nusha juyá ayashtin áiniawai. Kristu áintsan ainia nusha nayaimpinmaya ayashtin áiniawai.

49 Yamái juyá áiniakur ukunam nayaimpinmaya ayashtin ajastatji.

50 Juna tájarme, yatsuru. Ayash númpentin asa nayaimpiniam, Yus akupeana nu, wayachminiaiti. Iis, káutainkia káurchatniunam wayachminiaiti.

51 Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji.

52 Tura púsar<sup>i</sup> muíttarnin ti wárik yapajniáttaji. Tura ashí amuukai tusa umpuariatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nun yapajniáttaji.

53-54 Ju kautainkia yamá jákatniuiat káurchamnia ajastini-aiti. Túrasha jákachmin átatui. Nu túrunamtaisha Yus-Papinium aarma uminkiatstawai:

“Jákatniun Yus nupetak amukuiti.

55 ¿Itiur jákatjik yamaikia. Jákatniusha itiur nupettamkan mantamataj?” Tu áarmaiti.

56 Yaunchu Yus akupkamu tiniu asamtai shuar tunáa tura jákatniuiti.

57 Yamái antsu ii Uuntri Jesukristu túramujai jákatniunka Yus nupetkaiti. Tura incha nujai uwempratniun amaakui shiir yúminkiaji.

58 Nu asamtai, aneamu yatsuru, kakaram ajasrum yawetsuk nan̄kaamas Yusa takatrī takastarum. Ii Uuntrī Krístujai tsanīnkia takaarum nuka pen̄ké ánrachuiti. Nu paant nékarme.

## 16

### *Yusa kuitrī irurtin*

1 Yusa kuitrī irurtinkia, Yus-shuaran Karasea nun̄kanam tímiaj núnisnak atumniasha tájarme.

2 Ashí tumīntin, Yus súramna áintsam akankam ikiusta. Nujain̄kia wi jeattaj nuj yaunchu akankamu mash irurmin átatui.

3 Nuj jean̄cha átum anaiyarmena nu shuaran papijiai Jerusarēnum akupkattajai. Tura atumí kuítrumin aisha ii yachīn súsartatui.

4 Wisha wéminiaitkiuin̄kia wijiai wéartatui.

### *Papru irastatna nui*

5 Wi Masetúnia nun̄kanam wétiniaitjai tura nuyá Kurintiu-nam jeattajai.

6 Nuisha untsurī tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akuptukchattarpash.

7 Aya wárik nan̄kaamaktinian nakitiajai. Antsu Yus wakerakuin̄kia untsurī tsawant atumjai pujustaj tajai.

8 Tura juin̄ Ipisiunam pintikustis nampernum pujustajai.

9 Juin̄kia Yusa takatrī tí shiir takastin awai. Tura untsurī shuar wi takaamun nakitiainiawai.

10 Timiutéu nuj jeamtain̄kia, shiir awajsatarum; sapijmi-akain̄. Niisha wijiai métek Yusa takatrīn takaawiti.

11 Nu asamtai nakitirairap. Antsu yáinkrum winí shiir akupkatarum. Chíkich yachijiai tatí tusan nákejai.

12 Apurusnasha chíkich yachijiai winí írmasartí tusan ti seamjai tura pen̄kesha nakiarmai. Kame nii an̄kant aku nuj winishtimpiash.

### *Áujmamsamu*

13 Aneara tariarum Yus nekas enentáimtustarum. Áishman̄chakaitrum, kakaram ajastarum.

14 Anen̄kartamujai mash túratarum.

15 Ayu, yatsuru. Estepanasa shuari ashí emka Akaya nun̄kanam Yus-shuar ajasarman nékarme. Niisha Yus-shuaran yáintajtsar tuke takainiawai.

16 Niisha tura ashí niijiai métek yáinkiar takainia nú shuar seatmana nu tuke túratarum.

17 Estepanassha Jurtunátusha Akaikiusha atumíya táarmatai shiir waraajai. Átum yajá pujakrum tujintiarmena nuna túrawarmai.

18 Niisha winia shiir enentáimtikrurarai. Núnisan shiir enentáimtikramprattarme. Nuní aents tuke shiir enentáimtustiniaiti.

19 Asia nunkanmaya Yus-shuar amikmáatmainiawai. Aki-rasha ni nuwe Prisirajaisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai.

20 Ashí ii yachisha amikmáatmainiawai. Nuámtaksha shiir awajnaisrum amikmáaniatarum.

21 Wi Papru asan júchiniak winia uwejrújai áaran amik-maajrume.

22 Ii Uuntri Jesukrístun aneachuka yajauchiniam yuminkramu atí. “Ii Úuntri, wari tatá.”

23 Ii Uuntri Jesukrístu yainmakarti.

24 Jesukrístunu asakrumin atumin ashí ti aneajrume. Nu atí.

## Papru KURINTIUNMAYA SHUARAN Ataksha papin aar akuptukma

*Kurintiunmaya Yus-shuaran Papru áatramiania nu*

<sup>1</sup> Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachí Timiutéujai Yus-shuar Kurintiu péprunam íruntrumna nuna áatjarne. Kame ashí Akaya nunkanam Yusna ajasurmena nunasha áatjarne.

<sup>2</sup> Apa Yussha, ii Uuntrí Jesukrístusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

*Papru wáitsamurí*

<sup>3</sup> Ii Uuntrí Jesukrístu Aparí, ii Yusrí ana nuna naarí uunt awajsatai. Niisha ii Aparínti. In waitnentramaji. Tura Niisha ii Yúsrinti. Tuma asa in tuke atsañtamji.

<sup>4</sup> Ii wáitijnia nuj Yuska in atsañtamji. Tura in atsañtamjnia nútiksarik iisha chíkich shuar wáitainia nuna atsañkrarat tusa túrutmaji.

<sup>5</sup> Warí, Kristu wáitsamurí núkap pachiiinkiaitjnia núnisrik ni atsañkramurín núkap pachiiinkiaitji.

<sup>6</sup> Tuma asamtai, wáitijnia nu, Yusa uwentikrampratniurí tura ni atsañkratniurí atumsha takustarum tusar wáitijai. Tura Yus in atsañtampramjnia nu, Yusa uwentikrampratniurí tura ni atsañkratniurí átum takustarum tusar atsañkramuitji. Wats, átum uwentikramu tura atsañkramu asarum, ii wáitsajnia nútiksarmek wáitiatrum shiir enentáimsarum katsuntramniaitrum.

<sup>7</sup> Tura “túrtawai” tu enentáimtajrume. Warí, átum iijjai métek wáitsaitrum. Núnisan iijjai métek Yus atsañtamtsurmek.

<sup>8</sup> Yatsurtiram, iikia Asia nunkanam ti itiurchat wáinkiamjnia nu nekaatarum tusar wakeraji. Imiá itiurchat wáinkiar iikia katsuntratin jeachmaji.

<sup>9</sup> Nu itiurchatnumiá “iwiaaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannia nú Yúsan enentáimtusarat tusa nu túrunamji.

<sup>10-11</sup> Jakamnia itiurchatnumiá Yuska uwentikrampramji. Tura yamaisha uwentikrampratajtsa pujurtamji. Tura

atumsha in Yus áujtakrumniṅkia “Yuska tuke uwemtikram-prattaji” taji. Tura untsurí shuar Yus aujsa asakrumin, ii uwempura asakrin untsurí shuar Yúsan yumĩnsartatui.

*Kurintiunam wau wéchatniun Papru ujakmiania nu*

12 Yatsurtiram, ju nekaatarum tusar wakeraji. Ju nunṅkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairijia in wekaichamji. Antsu Yus in waitnentra ma asa péṅker wekasatniun yainmakmaji. Nu nekaar shiir enentáimji.

13 Áatjarmena nu páantaiti. Átum áujсарum nekaatin jearmena nunak aarjai. Chikichan nekaachminian aatsjai. Péṅker nekaatarum tusan wakerajrume.

14 Ishichik nékayatrumeḱ nú núkap tuke nekaki wetarum tusan wakerajrume. Nuṅkia Jesukrístu tátinia nú tsawan-tai átum winia shiir enentáimtursattarme. Tura átum péṅker wekasa asakrumin shiir enentáimtustatjarme.

15 Tura ii shiir enentaimtuniaj nuna nékakun ataksha Yusa waitnenkartutairi nekapsak tusan ataksha atumi in irastinian wakerimjai.

16 Masetúnia nunṅkanmaani wéakun írkuta nanḱaikitjjarum tusan enentáimmiyajai. Tura wáketkuncha ataksha ístajrum tusan wakerimjai. Túramtai wi Jutía nunṅkanam weakui átum yáintkiatarum tusan atumin ístinian wakerimjai.

17 Nuṅkia ¿urukamtai túrachmaj? ¿Péṅker enentáimtsukek “wetajai” tímiaj? ¿Wi Yus-shuarcha nunisan, jimiará chicham-tiniaiti, tú enentáimtursarumek?

18 Núchaiti. Yus tana nuna tímiatrusan umiana nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji.

19 Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai.

20 Niijiaisha Yus tana nu tímiatrusan uminiui. Tuma asamtai Jesukrístu enentáimtakur “nii tana nuna nekas túrattawai” tu enentáimji. Tu enentáimsar Yusa naari shiir awajeaji.

21 Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji.

22 Tura ukunam ii achiktatjinia nuna, nekas amastatjai tusa Yus ni Wakan in ii enentáin apujturmaj. Nujai Níiniuitji tusar paant nékaji.

23 Atumi in itiurchatan wáinkiaij tusan nakitiakun atumi péprur in Kurintiunam jeachmajai. Wáitrakuṅkia “Yus iirsati” tajai.

24 “Aya wi tájana nútiksarmek Yus enentáimtustarum” waantu enentáimtumasar nu titin nakitiaji. Yus nekas

enentáimtusmaajai kakaarme. Antsu nekas warastarum tusar wakeraji.

## 2

<sup>1</sup> Tuma asamtai, atak kúntuts awajsajjrum tusan nakitikon, “atumí tunaari íwiartsurminin jeashtatjai” tímiajai.

<sup>2</sup> Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitume.

<sup>3</sup> Wi jeakun atumí tunaari íwiartsurminin kúntuts enentáimsajj tusan nakitiakun, nu papin áarmaj nútiksanak áarmajai. Warí, atumketrume winia waramtikrustin.

<sup>4</sup> Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

### *Yajauchin túrana nu tsankuratin*

<sup>5</sup> Túrasha kúntuts awajtusmia nu, aya wíniak kúntuts awajtuschamai. Antsu atumniasha ishichik kúntuts awajtamsayi. Patasa chichasajj tusan “ishichik” tajai.

<sup>6</sup> Kame nu áishmankan iruntra chicharkarum wáitkiasmarum nuke máaketé.

<sup>7</sup> Antsu yamaikia tsankuratniuitume. Shiir enentáimtikratniuitume. Niisha imiá kúntuts pujus nú arantajasajj tusarum túratniuitume.

<sup>8</sup> Túrakrum nii nekas anearmena nu paant iniaktustarum tusan seajrume.

<sup>9</sup> Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme.

<sup>10</sup> Átum tsankurearmena nú shuaran wisha núnisnak tsankureajai. Tura tsankuratin ákuinikia, wi tsankurajna nu ashí atumnian enentáimtusan, Kristu íimmianum túrajai.

<sup>11</sup> Kame uunt iwianch Satanás in emestampratajtsa wakerana nusha nékaji. Tuma asamtai, túrawajin tusar tsankuratniuitji.

### *Trúas péprunam Papru juákchamiania nu*

<sup>12</sup> Krístunu shiir chichaman Trúas péprunam etserkatajtsan jean, ti péñker takastinian wáinkiamjai.

<sup>13</sup> Túrasha ii yachi Titium wáinkiachu asan, shiir enentáimsatniun tujinkiamjai. Tura asamtai Trúasnumiã aentsun áujsan ikiukiaran Masetúnia nunkanam wémiajai.

### *Krístujai nupetkamniaitji*

<sup>14</sup> Kristu Jesusjai Yuska incha nupetmamtikramak ewekamasuitji. Tuma asamtai Nincha ti shiir yúmiñsa pujajai. Tura

kukuj<sup>i</sup> kun<sup>k</sup>úakui, ashí nékainia núnisan<sup>u</sup> ii etserkamuj<sup>ai</sup> Kristu shiir chicham<sup>e</sup>n Yuska ashí aentsun nekamtikiainiawai.

<sup>15</sup> Kristu in pujurtamu asamtai Yusj<sup>ai</sup> nekapsamka iikia kun<sup>k</sup>úaji. Ii kun<sup>k</sup>úajnia nuna uwentikramu ainia nusha tura uwentikrachma ainia nusha nekapramnia ainiawai.

<sup>16</sup> Men<sup>k</sup>akatniunam weena nuka ii kun<sup>k</sup>úajnia nuna jakamnia mej<sup>e</sup>a nekapramji. Tura iwiaaku átinnium weena nuka iwiaaku átin kun<sup>k</sup>úa nekapramji. Maa, nu túratniuncha ¿yaki jeá?

<sup>17</sup> Kame untsur<sup>i</sup> aents kuítian achiktaj tusar Yusa chicham<sup>e</sup>n yapajinia núniskechuitji. Antsu Krístunu ajasu asar, Yus akupkamu asar, Yus ímmianum anan<sup>t</sup>suk esetsar étser<sup>e</sup>aji.

### 3

#### *Yamaram chícham najanamu*

<sup>1</sup> ¿Nu tákurnin<sup>k</sup>ia, “ataksha nin<sup>k</sup>i waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman<sup>u</sup> nekas Yus-Chichaman etserin áiniawai” tusa papí aarma atumin iniaktustinkiaitaj? ¿Chíkich iniaktustin nú papí atumin seatniukaitaj?

<sup>2</sup> Atsá. Átumka ii papir<sup>ia</sup> núniskechukaitrum. Ii enentáin nu papí áarmaiti. Tura nú papí áujsatniua núnisan<sup>u</sup> ashí aents atumí túramur<sup>i</sup> wáinkiar ii etserkamaj nu, Papru nekas Yusa takatr<sup>i</sup>n takaawai tusa nekaamnia áiniawai.

<sup>3</sup> Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiaj<sup>ai</sup>nchu antsu iwiaaku Yusa Wakan<sup>í</sup>j<sup>ai</sup> áarmaiti. Kayanmasha áarchamuiti; antsu shuara enentáin, auka, áarmaiti.

<sup>4</sup> Kame Krístunu asar, Yus enentáimta asar, nusha tíminiaitji, taji.

<sup>5</sup> Ju nékaji; imia iik pen<sup>k</sup>é tujinkiaitji. Antsu ii túrajnia nu Yus ni kakarmar<sup>i</sup>n súramkurin túraji.

<sup>6</sup> Yamaram chichaman Yus najanamia nuna, incha pé<sup>n</sup>ker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yuska ni Wakan<sup>í</sup>j<sup>ai</sup> yamaram wekasatniun súramji. Yusa kakarmar<sup>í</sup>j<sup>ai</sup> nu chícham étserji.

<sup>7</sup> Yaunchu chichamnaka kayanam aar Yus Muisaisan susamiayi. Susamia nu<sup>i</sup>, Muisaisa yapi ti wincha ajasmiai. Túrunamtai Israer-shuar ni yapin íistinian tujinkiarmai. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakui, nu chichamsha aya tuke jákatniunam shuáran ejemiayi. Túmayatan<sup>u</sup> winchaj<sup>ai</sup> susamuyayi.



<sup>8</sup>Tura yamaram chichaman Yusa Wakaní súramna nu, nujai nan̄kaamas shíiraiti.

<sup>9</sup>Kame mesertinnium ejeana nú chicham winchajai susamuyayi. Tura nujai nan̄kaamas Yúsnum ejeana nú chichamka Yus ímmianum péñkeraiti.

<sup>10</sup>Iista; yamaram ana nu imiá shiir asa, yaunchu wincha amia núnaka mushatmamtikiui.

<sup>11</sup>Núkap arur pujuschamnia nu wincha áchamkia. Kame tuke átinia nuke nujai nan̄kaamas shíiraiti.

<sup>12</sup>Nu nékakur ti paant étserji.

<sup>13</sup>Muisais túramia nútiksarik túratsji. Ii uuntri Israer-shuar ni yapin wincha ajas men̄kaan wáinkiaraiñ tusa tarachjai ni yapin Muisaiska nukumakmiayi.

<sup>14</sup>Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarmiayi. Tura yamaisha núnisan yaunchu aarma chichaman áujSAM antukar nekaatniun tujintiainiawai. Kristu enentáimtuschatin ni enentáin nukukma nu yapajíáchmaiti. Aya Krístujai nuka yapajíámniaiti.

<sup>15</sup>Yamaisha Muisaisa áarmarín áujsar nékainiatsui, ni enentáimmiarij nukurkamu asa.

<sup>16</sup>Tura aencha ni enentái yapajíá Uuntna ajasmataikia ni enentáimmiarijya nukurkamu ana nu jusamuiti.

<sup>17</sup>“Uunt” tájnia nu, Yusa Wakaníiti. Uunt Yusa Wakaní pujana nuj an̄kant ajastiniaiti.

<sup>18</sup>Nuke asantai, iisha ii yapí tarachjai nukukchamu asar ípíikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

## 4

<sup>1</sup>Yus in waitnentrana asa ni chichamen etserkatniun ataktamsaitji. Tuma asantai yawetsuk takaaji.

<sup>2</sup>Uuka túratin ana nuyá tura natsanmaj ana nuyasha kanakmiayi. Anan̄katai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai.

<sup>3</sup>Uwempratin Chicham ii étserjnia nu páantaiti. Áyatik men̄kakatniunam weena nu “páantchaiti” tuíniawai.

<sup>4</sup>Uunt iwianch, ju nun̄ká uuntri ana nu, nu aentsu enentáin ukusturuiti. Uunt Krístunu shiir chichaman ii étsermajai tsáapnin enentáimprarañ tusa ukustawai. Nu Kristu Yúsán ímiatrusañ nakumui.

<sup>5</sup> Iisha étserkur, Jesukristu ii Úuntr̄inti tu étseraji. Iikia atumí úntr̄int̄ji tátsuji. Antsu, Jesus ii uuntr̄i asamtai, atumí yáintr̄int̄ji, taji.

<sup>6</sup> Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijai ni shiirmarin, Jesukristu iniakmia nuna, ashí aents nekaawarat tusar Jesukristunun étseraji.

*Yusak enentáimtusar wekasatin*

<sup>7</sup> Nu tsáapin imiá péñker ana nuna ii ayash̄ijn Yus ikiusuiti. Tura ii ayash̄i kakarmachu, nuwe najanamua áanin asamtai, warí, kakaram ájinia nu Yúsnumiāchukait. Ii ai nuna nekaawarat tusa Yuska ni tsáapnintr̄in ii ayash̄ijn ikiusuiti.

<sup>8</sup> Tuma asamtai ii itiurchatr̄i árentmaku árinin̄ tuke jinkimniait̄ji. “Itiurkat̄jik” taji, túrasha Yus yáinmaji.

<sup>9</sup> Aents pataaturmainiakrincha Yus ikiurmats̄ji. Emesrataj tukamá tujintiainiawai.

<sup>10</sup> Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmarī ii ayash̄ijn iniakmaji.

<sup>11</sup> Iisha Jesusna ajasu asar wekaajnia nūi tuke tsawant tsúumainium jasattuk ajaji. Túrar ii ayash̄i jakamniait̄iat nu ayash̄nium Jesusa iwiaakmar̄i paant iniakmaji.

<sup>12</sup> Iisha Yus-Chicham étserkur ii ayash̄ijn jasattuk ajaji, tuma aijn̄ atumsha umikiu asarum nekas iwiaaku atin wáinkiar̄me.

<sup>13</sup> Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji.

<sup>14</sup> Yus kakarmaiti. Uunt Jesusan jakamunmayan̄ ini-antkimiayi. Incha núnisan̄ Jesusjaī iniantamkittiaji. Tura atumjaī métek ni pujamunam juramkittiaji. Nusha paant nékaji.

<sup>15</sup> Atumsha untsur̄i aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yum̄nsarum pujarme. Nujaī Yusa naarī uunt awajsamuiti. Nu nekaar wáitsatin ashamats̄ji.

<sup>16</sup> Tura yaweats̄ji. Ii ayash̄i amuiki wéakuisha ii enentáin̄kia yamaram ajaki wéawai.

<sup>17</sup> Warí, ukunam tuke shiir pujustat̄jinia nu enentáimtakrikia, ju nun̄kanam wáitiajnia nu, ti itiurchatait̄iat, aya yamaiyā asa tiikia itiurchatchaiti, tura wárik nan̄kaamawai. Túrasha ii itiurchatr̄ijjaī Yuska ti shiir ana nuna amuukachmin ana nuna núkap suramsattaji.

<sup>18</sup> Tuma asamtai wáinjinia nu ti enentáimtats̄ji. Antsu wáintsujnia nu nekas enentáimtaji. Wáinjinia nusha aya yamaiȳaiti. Antsu wáintsujnia nuka tuke amuukachminiaiti.

## 5

1 Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashj emesnakuisha warí itiurtamajia. Nuka aaka núnisan amuukamniaiti.

2 Ju ayashnium pujusar wáitajai, taji. Yamaram ayash nayaimpiniam pujana nu achiktai tusar wakeraji.

3 Ayashtichu ajasajj tusar, yamaram ayashtin ajastaitсар wakeraji. Pushía núnik yamaram ayash in nukurmaktai tusar wakeraji.

4 Tura juj ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustatji.

5 Yamaram ayashintin ajastinian iwiarturmaruitjinia nu Yúsaiti. Tura nekas túrattajai tusa ni Wakanin suramsaitji.

6-7 Ju nékaji. Ju ayashnium pujajnia jujnkia Uunt Jesusjai pujatsji. Tuma asamtai, wáinjinia nu ti enentáimtutsuk Yus enentáimtusar tuke shiir enentáimsar wekaaji.

8 Tura ju ayashniumia jjinkir Uunt Jesusjai tuke pujustaitсар wakeraji. Tura túrattajai tu nékaji.

9 Tuma asamtai ju ayashnium pujakrishia tura ju ayash ikiukrishia Uunt Jesus tuke waramtikсатаi taji.

10 Warí, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatniuitji. Tura ii túramujai métek akirmaktatji.

*Krístun waramtikсатаj taji*

11 Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaji. Tura incha Yus nékarmaji. Tura ii túramurj átumka atumj enentáin paant nékarme, tajai.

12 Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya páatkea nujaj warainia nú shuar tsanumprutmainiakui yaintkiatarum tusar taji.

13 “Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáintai tusar túrajai.

14 Kame ashí ii túrajnia nu Kristu anenkrattairijjai túrajai. Kame ju nékaji: Kristu ashí shuaran jaruku asamtai, Yus íimmianum ashí iisha jaka núnisaitji.

15 Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juj, iik wararmamtsuk, Kristu umirkatniuitji.

<sup>16</sup> Tura yamaisha aya ni ayashj írsar, “nu shuar péñkeraiti” tura “nu shuar yajauchiiti,” titin tujintiaji. Kame yaunchu aya ni ayashj írsar “Kristu yajauchiiti” tu enentáimsamajia. Tura yamaikia yapajjár, esetsar enentáimkiur “Kristu Yusa Uchirínti” taji.

### *Krístujaj yamarmaitji*

<sup>17</sup> Tuma asantai, Krístunu ajasúka yamaram najanamuiti. Yaunchu enentáimtaij menkakai. Antsu núnaka íikias ni enentáimtaij nekas yamarmaiti yamaikia.

<sup>18</sup> Nunasha Yus túrait. In nawampramkattsa Krístun akup-turmakuitji. Tura nu etserkatniun incha ataktamsaitji.

<sup>19</sup> Yuska in tunaarinniutin asutiámatniun nakitiak Krístujaj nawampramkamajia. Tura incha Yus-shuartin nu ujaktinian ataktamsaitji.

<sup>20</sup> Krístunu ataksamu asar, Yuska “winia Uchirjaj nawamnaikiatarum” tusa ii wenejaj atumin seatmarme. Tuma asakrin, Kristu náarijn “túratarum” tájarme.

<sup>21</sup> Krístuka tunaan penké túrachmiayi. Túmanak ii tunaarijn Yus Krístun makuumiayi. Nuna tura Krístunam makuuchmin awajtamsamajia.

## 6

1-2 Ni Papirijn Yus yaunchu Isayasan júna tímiayi:

Tsawant jeamtai, ame seatmena nuna anturkamjame.

Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asantai, iikia Yusa takatrjn pachitkiajnua nu, Yusa anenkrattairj péñker achiktarum tusar seajrume.

<sup>3</sup> Tura “Papru etserkamurj ántraij” tíarajjn tusar chíkich ya-jauch enentáimtiktsuk péñker wekaaji.

<sup>4</sup> Nekas Yusa takarniurintji nuna paant nekaawarat tusar wáitiatatrik, atsumayatrick, itiurchatnum pujayatrick shiir kat-sunteaji.

<sup>5</sup> Ju itiurchat wáinkiamji: katsumpramkarmaji; sepunam enketmáwarmajia; charáa-charáa awajtamiarmajia; takatcha ti itiurchat takasmajia; kanutsuk pujumajia; tura tsukasha ti tsukammajia.

<sup>6</sup> Tunáa nakittrar wekaaji; Yus-Chicham unuimiátraitji; shiir enentáijjaj katsuntrar wekaaji. Chíkich shuar péñker awa-jeaji; Yusa Wakaní pujurtamkurin shuar nekas aneaji;

<sup>7</sup> nekas chicham ana nu étsereaji; tura Yusa kakarmarisha nú paant iniakmaji. Tura ni nemasrjn nupettukajjn tusa suntar ni tantarjn júana núnisrik iisha ii nemasrj íwianch nupettamkajjn tusar ii Yusrj tuke umirkar wekaaji.

8 Shuar shiir enentáimturmainiakrincha, yajauch enentáimturmainiakrincha, pé<sub>n</sub>ker chichartamainiakrincha, yajauch chichartamainiakrincha tuke Yus<sub>j</sub>ai shiir wekaaji. “Wáitruiniawai” turamainiakrincha tuke nekas chichaaji.

9 “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitriatrik mantamnatsji. Yusa takarniurintiaj nu ashí nujai paant nekaamniaiti.

10 Kúntuts pujayatrik ii enentáinkia waraaji; kuítrinchaitriatrik chíkich shuar kuítrintin awajeaji; penké takakchiatrik ashí wáinji.

11 Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme.

12 Wikia atumin paant chichastajtsan wakerajrume; antsu átumka anenttsuk paant chichastin nakitrarme.

13 Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujatkatatum tusan seajrume.

### *Yusa jeentji*

14 Yus-shuar Yus-shuarchajai tsaniñktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjai métek enentáimiainiawak? ¿Tsáapnisha kiritjai máimtek áminkiait?

15 ¿Kóstuka uunt iwianchjai nawamnaikiamniakait? ¿Yus-shuar Yus-shuarchajai tsaniñ shiir pujusminkiait?

16 ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jéentrum. Yus Niñki ni Papi<sub>r</sub>in juna tíchamka:

Niijjai tsaniñkia pujusan, niijjai wekasartatai tura ni Yusri átatjai; tura niisha Wi aents ajasartatui.

17 Tuma asamtai junasha tímiayi:

Nii matsatainia nuyá jíinkitiarum, tura niija kanaktiarum, tawai Uunt Yus; tura yajauch ana nu antin<sub>k</sub>iairap. Túrakrumninkia awayattajrume.

18 Tura atumí Apari átatjai; átumka winia uchir átrume. Nuna Wi imiá kakaram uunt Yus asan tajai. Tu áarmaiti.

## 7

1 Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasain tusan; ashí tunáa ana nuyá kanaktiniaitji. Túrar “Yusak nekas ii úntrinti” takur, ii ayashísha, ii enentáisha takamtsuk tuke tsawant Yus íktustiniaitji.

*Kurintiunmaja shuar enentáimprarmatai Papru warasmiaiyi*

<sup>2</sup> Ataksha nawamnaikiatai. Iikia shuar yajauch awajsachmaji; yajauch jintintrachmaji; anan\_kachmaji.

<sup>3</sup> Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme.

<sup>4</sup> Araantutsuk áatjarme; shiir enentáimjai. Itiurchatnum pujayatnak, atumin enentáimtusan enentairuĵ kakaram enentáimsan waraajai.

<sup>5</sup> Jui Masetúnianum pen\_ké ayamprachmaji. Antsu ti wáitsamji. Áentsnumiā itiurchat wáinkiamji, tura ii enentáijjain\_kia ashamkamji.

<sup>6</sup> Tura kúntuts pujakrincha Yus ikiakátmartinian nékawai. Tuma asantai Titiún akupturkamai. Nujai winia enentáirun ikiakármai.

<sup>7</sup> Tura átum nii ikiakármarumna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nan\_kaamas warasmajai.

<sup>8</sup> Papí nuik akupkamaj nu áujсарum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujсарum ishichik kúntuts enentáimprarumna nuna nekaan waraajai.

<sup>9</sup> Kame kúntuts enentáimprakrumin waraatsjai. Antsu atumí tunaariĵ nekaarum kúntuts enentáimprarum atumí enentáij Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asantai iikia nu papijjaj yajauch awajsachji.

<sup>10</sup> Nekaatarum. Yus wakerana nútiksar kúntuts kat-sunteakka ni enentái Yúsnum yapajjáwai. Nuin\_kia ni tunaariĵya uwempraiti. Nuka “túruminchu túraitjai” tíchamniaiti. Antsu Yusan enentáimtutsuk kúntuts pujakka ni enentái yapajjáshatui; yapajjitsuk ni tunaariĵya uwemtsuk jakattawai.

<sup>11</sup> Tura iistarum; Yus wakerana nútiksarmek atumí kúntutsrĵ katsuntearme. Tuma asarum wi áatjarmena nu esettsarum enentáimtusurme. Atumí túramurĵ ujatkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin pen\_ker túrarmena nu, paant iniakmarme.

<sup>12</sup> Kame yajauchin túramia nuna ni tunaarin iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nan\_kaamas átum Yúsnum in anearmena nu nekamatarum tusan áatramjarme.

13 Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujakamtai nú nan̄kaamas shiir waraaji.

14 Atumin shiir enentáimtajrumna nuna Titium ujakmajai. Tura nuna nekas aan Titiu nekaamai. Tuma asantai atumin natsantrachmajrume. Kame atumin tuke nekas ana nuna tímiajrume. Núnisan atumnian Titium tímiaj nusha nekasauyi.

15 Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarme. Tura nii taa seatmarma nu umikiurme. Títiuka nuna enentáimias waraawai.

16 Tura wikia, átum péñker túramurmin nekaan tura péñker túrawartatui tu enentáimsan waraajai.

## 8

### *Yus-shuarti ii kuitri súsatin*

1 Yatsurtiram, Masetúnia núñkanmaya Yus-shuaran Yus waitnentainia nuna yamáí ujaktatjarme.

2 Ti itiurchatnum nekapsamu ainiawai. Túmayatan warainiawai. Tura ti kuítrincha ániayatan emeentutsuk kuítrinnia núnisan suiniawai.

3 Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nan̄kaamassha súiniawai.

4 Yus-shuaran kuítrinchan súsartaitsa ti wakeruiniak, nu túratniun ti seatmarmaji.

5 Tura ii enentáimmiyaj nú nan̄kaamas túrawarmiayi. Emka Yúsnum niñki sumamawarmiayi. Tura Yusa wakeramuri túrattaji tusar incha “yáintajrume” turammiaji.

6 Tuma asantai, “Masetúnia nun̄kanam kuit júuktin nan̄kamamamna nu, Kurintiu peprunmasha amukta” tusar Titium seamiaji.

7 Atumsha ashí péñker túratin ti nékarme. Yus enentáimtustincha, unuiniartincha, ju nun̄kanmaya nekaatniusha, in aneatniusha nuka ashí nékarme. Wats, júsha túratarum. Yus-shuar kuítrincha ainia nu achikiarat tusarum Titium támatai núkap susatarum.

8 Kame atumí úuntriá núnisnak akupeatsjarme, túratniuitrume tusan. Antsu chíkich shuar ni kuítrin susartasa ti wakeruinia nuna atumin ujakan, atumí anenkrattairi nekaspashi tusan nekapsatajtsa pujajai.

9 Ii uuntri Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisan ajasmiaji. Ju nun̄kanam kuítrincha núnis ajasmatai átum nayaimpiniam kuítriniak tusa túramiayi.

<sup>10</sup> *Juna* enentáimjai. Nuik uwitin, “yáin̄tatji” tíchamkarum. Tura nu túratin ti wakerimiarme.

<sup>11</sup> Nañkamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum.

<sup>12</sup> Iistarum. Ni kuítr̄in Yúsan nekas susatajtsa wakerakuíñkia, nii jeana nuna susat tusa Yus wakerawai. “Jena nú nañkaamas susati” tátsui Yus.

<sup>13</sup> Chíkich ti núkap susarum atumnia táasat tusan tátsujai.

<sup>14</sup> Antsu ashí métek takusarat tusan tajai. Iis atumsha yamaikia ti nukap takakrume; nujaj̄ atsuma nu súsatniuitrume. Ukunam chíkich tsawantaj̄ átum atsumashtarmeash. Nuñkia niisha atumin suramsarti. Nu túratin ákuíñkia ashí métek takustin átatui.

<sup>15</sup> Yusa Papir̄in yaunchu áarman núnis tátsuk:

Núkap takusmia nu ampirchamiayi; tura ishichik takusmia nu atsumachmiayi.

*Titiu chíkich Yus-shuarjaj̄ Kurintiunam wetin áarmiayi*

<sup>16</sup> Tura wi aneajrumna núnisan̄ atumin aneatniun Yus Titiun susamiayi. Tuma asamtai Yúsan yuminsan̄ pujajai.

<sup>17</sup> Iis, wi takui wétinian wakerimiayi. Tura nú nañkaamas, atumin anenma asa, ni enentáij̄iain̄ wéawai.

<sup>18</sup> Tura chíkich Yus-shuar Titiujaj̄ akupkatajtsa pujaji. Nu shuar Yusa Chichamen̄ ti pen̄ker etserainakui, ashí Yus-shuar iruntramunam nin péñker áujmatainiawai.

<sup>19</sup> Tura nú shuarnaka ii tsaniakmar̄i atí tusar ashí Yus-shuar iruntramunam nuna anaikiarmiayi. Iij̄aj̄ kuítian jukiarti tusar anaikiarmiayi. Iis Yusa náar̄in ashí aents uunt najanawarat tusar tura ashí shuar atumí tsañkar̄in nekaawarat tusar nu takat túratsjik.

<sup>20</sup> Iis, j̄u kuit ii jukittiajnia nu, núkap asamtai, aents tsanumprutmawar̄aj̄ tusar, Titiujaj̄ tura j̄u shuarj̄aisha wéaji.

<sup>21</sup> Yus ímmianumsha, aents ímmianumsha ii naka wekaajnia nuna nekaawarat tusar túraji.

<sup>22</sup> Nu jimiará shuarjaj̄ chíkich Yus-shuar akupeaji. Yusa takatr̄in takastasa ti wakerana nu nekas nékaji. Tura átum yáin̄tin ti wakerarmena nuna nekáa niisha atumiin̄ jeataj tusa ti wakerawai. Nuna túmak Yusa takatr̄in takastinian wakerana nuna paant iniakmawai.

<sup>23</sup> Tura aisha chíkich shuar Titiun nekaataitsar anintruiniakuisha, “Titiu Papru tsaniakmar̄inti. Incha yáin̄maktajtsa Páprujaj̄ takaawai” titiarum. Chíkich Yus-shuaran nekaataitsar anintruiniakuisha, “Yus-shuar akupkamu áiniawai, tura Kristu náar̄in shiir awajin̄ áiniawai” titiarum.



24 Tura atumí anenkrattairi ashí Yus-shuar nekaawarat tusarum, nu shuar péñker itiaatarum. Nu túrakrum, atumnia ii shiir tímiaj nu nekasaiti tu iniaktustatrome.

## 9

### *Yus-shuaran kuítrinchan súsarmia nu*

1-2 Kame átum Yus-shuar kuítrincha súsatin wakerarme; nuna nékajai. Tuma asan núnaka áatrachminiaitjarme. Atumsha súsatin wakera asakrumin wi nunasha shiir enentáimsan, “Akaya nunñkanmaya shuar nuik uwitinia wakerusmatak yáinñtinian wakeruiniawai” tusan Masetúnianmaya shuáran ujaajai.

3 Tura “kuítniasha súsatniun ti wakeruiniawai” tímiaj nuna, “wáitaiiti” tíarain tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai.

4 Wi ukunam Masetúnianmaya shuarjai atumiin jean, kuit súsatin tímiarmena nuna iwiarachman wáinkian natsaraj tusan, tura atumsha natsarajrum tusan túrajai. Warí, “súsatniun ti wakeruiniawai” tuke tu wéatsjak.

5 Nu tuma asamtai, au takui súarme tu enentáimsarain tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuiñkia wisha Masetúnianmaya shuarjai ukunam jeawakrin, nu kuit atumsha nekas atumí enentáijjaink<sup>i</sup> súsatin wakerarmena nu nekaamnia átatui.

6 Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete.

7 Tura ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai.

8 Ashí péñker ana nuna suramsatniun Yus tujintiatsui. Nujai átum atsumashtatrome. Tura chikichan yáinñtin núkap takustatrome.

9 Yus-Papinium ju aarma awai:

Kuítrinchan núkap susayi;

nuna tura, tuke túratin átatui.

10 Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujai péñker túratarum tusa araakrumin ipiampartatui.

11 Tuma asamtai núkap juukma takaku asarum, núkap súsatin jeattarme. Nuiñkia súarmena nuna ii uwejeyan chikich Yus-shuar achikiar Yúsan yumiñsartatui.

12 Warí, ju kuit Yus-shuar kuítríncha súakrin ni atsumamuríncha atsumachartatui. Tura nú nan̄kaamas Yúsan ti yumín̄sartatui.

13 Nu shuar yáin̄tai tusarum tura ashí Yus-shuar yain̄tai tusarum súatsrumek. Nujai Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarin uunt awajsartatui.

14 Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsan áujturmasartatui.

15 ¡Tura ashí iisha ii Yusri ti yumín̄satniuitji! ¿In súramjinia nuna yaki jintíartinian jeá?

## 10

### *Papru nekas jintintiamniaiti*

1 Wats, “Papru iijiai pujak péejchach ajawai, tura yaja pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijiai juna seatjarum tusan pujajai.

2 Atumí weatkamuriya shuar chichainiak “Papru ni tsaniakmarijiai ju nun̄kanam akupin ajastai tusar wakeruniak jintintiainiawai” turutainia nuna kíishtumaktajtsan enentáimjai. Wisha atumijn̄n jean kakaram chichaschataj tusan, nu antukairap tu seajrume.

3 Áentstan̄ka nun̄kanmaya áentsuitji, túrasha jú áents maania aintsar máaniatsji.

4 Ju nun̄kanmaya nan̄kijiai máaniatsji antsu ii nan̄kiri Yusa kakarmarinti. Nujai iwianchi kakarmari núpeteaji.

5 Ju nun̄kanmaya aentsu jintiamuriñkia tura waantu enentáimtumamuriñkia, Yus nekaatniun itit awajea nuka, nu nan̄kijiai núpeteaji. Tura ashí ju nun̄kanmaya enentáimsatin yapajniak, emetamu áintsan̄, Kristun umirkarat tusar nu nan̄kijiai núpeteaji.

6 Nekas umirkatin átum jeawakrumniñkia nuiñkia umirkatniun tuke nakitiainia nu, Yusa kakarmarijiai asutiáttaji, tajai.

7 Atumsha aya pátatek ana nu iiyarme. Wats, shuar nekas Krístunu ajasman nekamaka, núnisan winiasha Krístunuiti tu enentáimtursatniuiti.

8 Yusa kakarmarijiai akupeaji tuke tákuncha natsaamatsjai. Nu kakarman atumin péñker jintintiatarum tusa Kristu suramsaitji. Kame atumin emesratniun suramsachuitji.

9 “Ni áarmarijiai awaktamkatajtsa wakerutmaji” tátsurpash. Núchaiti.

10 “Papru áarmari ti kakaram áiniawai, tura juí pujak kakarmachuiti; tura etserkatniuncha nékatsui” turutainiawai.

11 Wats, tuinia nuka jnasha nekaawarti. Yajá pu-  
jakur kakaram ájainia núnisrik atumjai pujakrishá kakaram  
túrattaji.

12 “Wiki imiá pénkeraitjai” tuinia nujai méteketji tátsuji.  
Ní shuaraitji tátsuji. Warí, niisha imia ninki nekapma-  
mainiawai. Tura ni ai íisar “nu nankaamas pénkeraitjai” tu  
wéenawai. Nuna túruiniak netse túruiniawai.

13 Antsu iikia, ii nekamatin jeajnia nú nankaamas  
waantu ajaschattaji. Ii takastatjainia nuji Yus Ninki  
jintinramji. Nu arant wéatsji. Kame atumiin takastinian  
Yus tsankatramkaitji.

14 Tuma asamtai, tájainia nu Yus tsankatramka nú iniankas  
túratsji. Warí, iisha emka Kristu chichamejai atumiin jeach-  
makaj<sup>i</sup>. “Emka jeamji” tájainia nu ánrar tátsuji. Kame Yus  
tsankatramakrin jeamji.

15 Chíkich takasmanum iikia waantu enentáimtumasar,  
“ii takatrinti” tátsuji. Antsu yamá*i* enentáimtarmenta nú  
nankaamas Yus enentáimtustarum tusar wakeraji. Nu  
túrakrumninkia atumiin tuke takasminiaitji.

16 Nuyasha chíkich takaana nuji takatsuk átum pujarmena  
nú arant pujuinia nusha Yus-Chicham ujaktaj tusar wakeraji.  
Nu túrar chíkich shuar takasma “íiniuiti” tíchattaji.

17 Tura pénker enentáimtumastaj tusa wakerakka, Yúsnaítjai  
tusa pénker enentáimtumasti.

18 Warí, ninki “pénkeraitjai” tumamna nuka anturkach-  
miniaiti. Antsu Uunt “pénkeraiti” tana nú shuar nekas  
pénkeraiti.

## 11

### *Ántar etserniun Papru áujmateawai*

1 Waurua núnisnak chichastatjana nu anturtukain-  
trumeash. Ee, anturtuktarum tusan seajrume.

2 Atumniasha Krístunak anajmamtikrajrume. Tura  
nuwá chíkich áishmankan nékatsuk ni áishrjaink<sup>i</sup> nuatnaiya  
núnisrumek átum chikicha chichame umirtsuk aya ni  
chichamenk<sup>i</sup> umiakrumin Krístui ejetaj tusan wakerajrume.  
Nuna túrataj tusan atumin akasmatajrume. Nu  
akasmaktinian Yus surusuiti.

3 Túrasha íwianch ni nekatairjiai emka nuwá Epan  
anankamia nútiksan atumniasha Yusa jintiya awajimtikra-  
mar Kristu aneashtinian enentáimtikramprarmatai anankamu  
ajrum tusan tsuutajrume.

4 Warí, chíkich shuar Jesusnan nusháa étserkamujai  
táiniakuisha pénker ántarme. Tura nusháa wakan achikiam,

nusháa chichamjaj uwempramniaiti tu etserainiakuissha, nekasapitia tárume.

<sup>5</sup> Kame “Yúsnumiã akatramu asar etserkatin imiá nékaitji” tuinia nujaj nankaamas nékaitjai, tu enentáimjai.

<sup>6</sup> Ti péñker chichastinian nékachiatnak winia nekaatairsha taamtsui. Núnaka ii túramurijjaj tuke paant iniakmajai.

<sup>7</sup> “Akirkata” tútsuk Yus-Chichaman atumin ujakmajrumna nuj ¿tunáa túrajak? Átum ankant ajastarum tusan wikia péejchach ajasu asan, “etserkamunam akirkata” tíchamjarme.

<sup>8</sup> Antsu atumin yáintaj tusan pujakun chíkich Yus-shuarnumiã kuítian suruiniakui achikmiajai. Nuna túran ni kuítrin emeentukmiajai.

<sup>9</sup> Tura atumjaj pujusan atsumaknasha atumniaka seachjarme. Masetúnianmayã Yus-shuar taar, wi atsummiajna nuna surusarmiyai. Nu tuma asamtai tájarme, seachjarme tura seashtatjarme.

<sup>10</sup> Ashí Akaya nunkanam nuna ujaktinian suritrukcharta-tui. Nuna tákun Kristu nekasrijjaj tajai.

<sup>11</sup> ¿Urukamtai nuna taja? ¿Atumin aneachu asanak taja? Atsá. Anejrumna nuna Yus nékawai.

<sup>12</sup> Túrasha wi túrajna nuna tuke turu wétatjai. “Papru túrana núnisrik túrají” tuinia nuna tírajín tusan túrattajai.

<sup>13</sup> Warí, niisha Yúsnumiã akatrachma áiniawai. Anankartin áiniawai. “Kristu akatramurintji” tumá átaj tusar wekainiawai.

<sup>14</sup> Nusha urukaku túmait tíchamniaiti. Warí, imia Satanáskesha “nayaimpinmayã akatramuitjai” tumá átaj tusa wekaatsuk.

<sup>15</sup> Nuñkia imia ni suntarisha péñkeran túrawai tumá atai tusar wekasachartinkiait; túrasha ni amuamurinkia tunáa túriarma nujaj métek nekapmá asutiátin átatui.

### *Papru wáitsamia nu*

<sup>16</sup> Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsankatruktrarum. Ishichik waantu enentáimtumastaj tusan wakerajai.

<sup>17</sup> Tura waantu enentáimtumastaj tájana nu, Uunta tsankatramurijjaj tátsujai. Antsu waurka núnisnak chichaajai.

<sup>18</sup> Untsurí ju nunkanam uunt ajasar ti waantu enentáimtumainiakui wisha ishichik waantu enentáimtumastajai.

<sup>19</sup> Imiá nékatyatrurum waurka ainia nu shiir enentáimtusurum ánturearme.

20 Niisha atumin takamtikramainiakuisha, kasartamainiakuisha, atumí nérenniurí ajainiakuisha, yajauch chichartamainiakuisha, yapimin awattamainiakuisha ashí nu katsuntearme.

21 Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaajai.)

22 Niisha Ipríu-shuar ániakuisha wisha núnisnak Ipríu-shuaraitjai. Israer-shuar ániakuisha wisha núnisnak Israer-shuaraitjai. Apraáma weeatrí ániakuisha pai, wisha núnisnak.

23 Kristu takarniurintji, tuiniawai. Wikia aujai nankaamasaitjai. Kame nuna tákun waurka núnisnak chichaajai. Kame niijjai nankaamas takasuitjai; niijjai nankaamas asutiámuitjai; niijjai nankaamas sepunam enkeamuitjai; ti núkap jániñkiamjai.

24 Israer-shuar chikichkí achirkacharmai. Antsu tímiajni senku jea achirkarmai. Tura emka achirkarmia nuí awawatatqua trainta nuiwi ejeyarmiayi. Tura nu tímiajni senku jea achirkarmia nuísha nútiksang nujai métek awatturarmiayi.

25 Numijjai menaintiú awatturarmai. Kayajaisha mantuatai tusar chikichkí tukurarmai, kanusha menaintiú wayamai wi enkempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai.

26 Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaisha, wí shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai.

27 Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekrú wáitsaitjai.

28 Tura nuna nankaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai.

29 Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanumajuawarmatainkia wisha natsamakun kajekan wáitiajai.

30 Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai.

31 Yus, ii Uuntri Jesukristu Aparí ana nu (ni naari tuke shiir awajsamu atí) wí wáitratsjana nuna nékawai.

32 Tamasku péprunam pujai nu nunkanmaya akupin winia jinkia juruktiaj tusa wakerak pepru tanish téntakma wáitirijn

suntaran apuj samiayi. Aretas uunt kapitián pujai túramiayi.

<sup>33</sup> Túrasha uunt chankinnium enketawar pepru aa tanishri áan kamunam jiki itiararmiayi. Tu uwempramijai.

## 12

### *Papru wáinkiamia nu*

<sup>1</sup> Kame wiki shiir chicharmamsatniun nakitiajai. Túmayatnak ímiarjana nuna tura uunt Yus iniaktursamia nuna ujaktiniaitjarne.

<sup>2</sup> Krístun umirin ana nú áishman kan nékajai. Nu áishman jimiará nayaimpin nan kaikin menaintiú nayaimpiniam junakniuti. Nusha katurse uwí nan kaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai.

<sup>3</sup> Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai.

<sup>4</sup> Yus-shuara wakaní shiir pujutainium junakmiayi. Nuisha paant awajsachmin ana nuna antukmiayi. Nii antukmia nú chicham paant awajsatniun suritkiamuiti.

<sup>5</sup> Nu áishman ka túrunamuri nan kaamakuiti tajai. Tura wikia nan kaamakuitjai túmamtsuk, kakarmachuitjiana nuna paant ujaajai.

<sup>6</sup> Nan kaamakuitjai túmamtiaj tusan wakeraknaka nekas tímianiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

<sup>7</sup> Wi nayaimpiniam wáinkiamajna nu timiá pé nker asamtai ántar waantu enentáimtumaschatniun, jan ki mesertinia núnisan winia ayashruj najaimiatniun sunasmijai. Nuka wi wáitsatin Satanásnumia akupkamuiti.

<sup>8</sup> Nuka jurutkitia tusan Úuntan menaintiú seamjai.

<sup>9</sup> Tuma ain Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashin winia kakarmarun wáiniainiawai.” Tuma asamtai, Krístu kakarmari winia ayashruj paant ati tusan kakarmachuitiatnak araantatsjai.

<sup>10</sup> Tuma asamtai, wi Krístun aneakui shuar katsekruiakuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nu kakarmachuitiatnak kakaram nekapeajai.

<sup>11</sup> Wi “pénkeraitjai” túmamkun waurua núnisnak chichaa-jai. Tura atumsha winia pé nker chichartusminiaiatrumek,

túrachu asakrumin tu chichasjai. Warí, wi penké ántraiatnak, “ti péñker akatramuitji” tumamainia nú nunkaachichuitjai.

<sup>12</sup> Atumjai pujumiaj nuí, itiurchat ámanman katsuntran takasmiajai. Yuska ni kakarmarín iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi.

<sup>13</sup> Warí, chíkich Yus-shuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarme. ¡Nu yajauchiitkiuin\_kia tsankurturtarum!

### *Papru atak tátinrin ujakmiania nu*

<sup>14</sup> Jújain\_kia menaintiú iwiarnarjai atumin ístaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchat-niuti. Antsu aparí ni uchirín kuítian ikiauntuktiniaiti.

<sup>15</sup> Atumniasha yáintaj tusan ashí takakjana juna ajapawaintjai, tura winia kakarmarnasha ashí emen\_kákaintjai. Wi ti wakeramaitiatrum átumka ishichik wakerutarminiñ túrawaintjai.

<sup>16</sup> Túrasha chíkich shuar chichainiak “Nekasaiti; Papru nin\_ki ii kuítrin jurutramkichmaji. Túrasha anan\_kartuatniun neka asa in anan\_kramachmiashia” turutainiatsuk.

<sup>17</sup> ¿Nusha itiura? ¿Shuáran wi akupkamaj nujai kuítrumin achikjak?

<sup>18</sup> Atumin írmasat tusan Titiun “wetá” tímiajai. Tura nin atamprit tusan chíkich Yus-shuaran akupkamjai. ¿Titiusha kuítrumin juruttramkimkiarum? ¿Wisha niisha mai metek enentáimsar métek takaschamkaj'?

<sup>19</sup> ¿Warí enentáimsarum? ¿Átum péñker ániawai turutik tusar nu tájik? Antsu, aneamu yatsurtiram, ii tájnia nu atumin Yúsnum ikiakártajrum tusar taji.

<sup>20</sup> Wi atumíin jeaknasha, wi wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrume, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, nin\_ki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai.

<sup>21</sup> Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuartiram iniaisachurmena nuna nekashtajash. Tura enentáim yapajítsuk tuke tura asakrumin

úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

## 13

<sup>1</sup> Jujai menaintiú ístajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnar-tatui.

<sup>2</sup> Wi atumjai pujachiatnak, atumjai pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaiasastjarme.

<sup>3</sup> Nuin̄kia wi Kristu kakarmarijjai chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takawai.

<sup>4</sup> Kristu nekas kakarmachua nútiksan krúsnum máamuiat, Yusa kakarmarijjai iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmarijjai ni takat̄ri takaaji. Nu atumin iniakmastatji.

<sup>5</sup> “Nekas Yúsan umirniuashitiaj” tusarum nekamatarum. Ímiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme.

<sup>6</sup> Tura iikia ántar Yus-shuarchaitji nu nekaatarum tusan wakerajai.

<sup>7</sup> Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar ániawai” túrampriniñ, átum péñker wekasatarum tusar wakeraji.

<sup>8</sup> Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túrajni.

<sup>9</sup> Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji.

<sup>10</sup> Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atum̄in jeaknaka kakaram chicharkajirum tusan winitsuk ju papin áatjarme.

### *Amikmaawai*

<sup>11</sup> Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichik enentáik enentáimsatarum. Shiir awajnisarum pujustarum. Tura Yus anenmarmena nu, shiir enentáimtikramna nu atumjai pujurtamsattarme.

<sup>12</sup> Yúsn̄um shiir enentáimtunaisrum amikmaanaisatarum.

<sup>13</sup> Ashí Yus-shuar ainia nu amikmaatmarme.



<sup>14</sup> Uunt Jesukrístu waitnenkartutairi, Yusa anenkrat-tairisha atumín pujurtamsati. Tura Yusa Wakanísha tuke nemartamsarti. Nu atí.

## **Papru KARASEANMAYA SHUARAN Papí aar akuptukma**

*Karaseamaya Yus-shuaran Papru áatramiania nu*

<sup>1</sup> Wi Pápruitjai, Yus akatramu. Yúsak winia akatturuiti. Shuarka akatturchamai. Yussha chíkich shuáran akupturak akatturchamai, antsu Nun̄ki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun.

<sup>2</sup> Wisha, ashí Yus-shuar wijjai pujuinia nusha, ju papí akupeaji. Ashí Yus-shuar Karasea nun̄kanam pujarmena nu áujsatarum tusan ju papin akuptajrume.

<sup>3</sup> Yus Apa tura ii Uuntri Jesukrístusha waitnentramainia ásar yainmakarti imiatkinchanum tuke shiir pujustinian.

<sup>4</sup> Yus ii Aparí nuna wakera asamtai, Jesus ni ayashin surum wáitsamiayi ii tunaari asakartinian. Nuna tura ashí tunáa ju nun̄kanam ana nuyá an̄kant awajtamsatai tusa in yáinmaji.

<sup>5</sup> Tuma asamtai tuke Yus shiir atí. Ayu.

*Chíkich uwempratin chichamka atsawai*

<sup>6</sup> Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum.

<sup>7</sup> Wátsek, nekas chíkich chicham pen̄ké atsawai shuar umikiar uwempratin. Antsu yajaya shuar atum̄in taar pen̄kercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai.

<sup>8</sup> Tuma asamtai Yus nin yajauchiniam yum̄inkrattawai. Wisha Yus-Chicham yapajiamun etserkamtain̄kia Yus winia yum̄inkrurtatui. Nayaimpinmaya suntarsha nusháa chichaman wi etserkachmaj nuna étserkuin̄kia nunsha yum̄inkrattawai.

<sup>9</sup> Paant ujakjarme túmaitiatnak ataksha ujaajrume: Nán̄kamas shuar niisháa uwempratin chichaman, wi etserkachmaj nuna étserkuin̄kia Yus yum̄inkrattawai.

<sup>10</sup> Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

*Papru júnis Yus akatramu ajasmiayi*

11 Antsu nekaatarum, yatsuru. Uwempratin chichaman wi étserjana nuka áentsnumiānchuiti.

12 Aentska ujatkachmai. Unuitiutnasha unuitiurchamai. Antsu Jesukristuk winia paant jintintruamai.

13 Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme.

14 Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijiai métek uunt armia nuna nankaamas Yúsnan takasmajai. Túmaitiatan aya winia únuntrun chichamen ti umirniuyajai.

15 Túrasha wikia akiintsain Yus winia achirkamiayi, tura ti anenkratmarijjai winia anaitiukmiayi.

16 Nuikia shiir enentáimiuk ni Uchirin paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asantai chíkich shuaran anischamjai.

17 Uunt péprunmasha, Jerusarénumka, wéchamjai wini emkaru Yus akatramujai chichastinian. Antsu wárik Arapia nunkanam wémajai. Tura nui Yúsán enentáimtasuan atak Tamasku péprunam waketkimjai.

18 Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai.

19 Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkiachmajai.

20 Yus iirui. Wi tájana nu nekasaiti, wáitchaiti.

21 Nú ukunmasha Siria nunkanmasha, Sirisia nunkanmasha wémajai.

22 Tuma asantai ashí Yus-shuar Jutía nunkanam pujuarmia nu winia nekaracharmai.

23 Aya antukarmai. “Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniaiatiat yamaikia iniaisaiti” tiarmai.

24 Túrawar winia enentáimtursar Yúsán shiir yumiñsarmai.

## 2

*Chíkich Yus akatramu Paprun shiir enentáimtuiniawai*

1 Tura katurse uwí nankaasmatai wisha Pírnapíjjai Jerusarénum wémajai. Titiuncha jukimjai wijiai.

2 Yus akupta asantai Jerusarénum wémajai. Tura nui jean aya Yus-shuara úntrijjain áujmattsamjai. “Júnisnak ashí

Israer-shuarchan Yus-Chichaman ujainiajai” tímiajai. Takas-majna nusha tura tuke takastin enentáimjiana nusha ántar aïn tusan tu áujmattsamjai.

<sup>3</sup> Niisha Yus-shuara úuntriñtiat itiurchat enentáimpracharmai. Antsu chíkich shuarka Titiu Israer-shuarchaitiat wijiajaj pujaku niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai.

<sup>4</sup> Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujaj uwentikrampratniun wakerutmakarmaji.

<sup>5</sup> Túrasha penké ishichkisha umikchamji. Antsu atumíin Yus-Chicham yapajniátsuk métek jeartamat tusar ni chichame penké anturkachmaji.

<sup>6</sup> Nu arantcha Yus akatramu uuntriñkia yamaram túratniunka suruscharmaj. Nincha ashí aents ti neka ainiawai tu enentáimtuiniawai. Kame nu shuar ti nékainiakuiasha ti enentáimtsajai. Yus ashí shuaran mash métek iyatsuk.

<sup>7</sup> Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmaj. Tura Pítruncha akupkamaj Israer-shuaran Yus-Chicham ujaktinian.

<sup>8</sup> Pítrun Israer-shuarnum akupkama nú Yusak winiasha akuptukmaj Israer-shuarchanum.

<sup>9</sup> Tuma asamtai Jakupusha, Pítrusha, Juañsha, Yus akatramu uuntriñ ásar, Yus winia ti paant akuptan nekaawar, winiasha Pírnapiñsha, “Ayu, átum, Israer-shuarchanum Yus-Chicham etserkatarum, tiarmaj. Iisha Israer-shuarnum Yus-Chicham etserkattajaj” tiarmaj. Túrawarmatai shiir áujnaisar ii uwejejaj achirnaikiamji métek enentáimjaj tusar<sup>i</sup>.

<sup>10</sup> Áyatik “Kuítrincha enentáimtusrum tuke yáinjarum” tiarmaj. Wisha núnaka ti wakerakun tuke túriniaitajaj.

### *Papru Pítrun chicharkamaj*

<sup>11</sup> Tura nú ukunam wi Antiukía péprunam pujajaj Pítiur tamaj. Tura nuñ yajauch túramtai, Yus-shuara úuntriñiak chicharkamajaj.

<sup>12</sup> Iis, Israer-shuar tuiniawai, “Israer-shuarcha Muisais timia núnisan tsupirnakcha asamtai, nu shuarjaj yurumáshtiniaiti” tuiniawai. Túmaitiat Pítiur yurumámñian nékak<sup>u</sup>, emka Sántiak shuar táatsajaj Israer-shuarchajaj yurumámaj. Tura nuyá Sántiak shuar Jerusaréñnumia Antiukíanam jeawarmatai Pítiur ashamak tsupirnakcha

shuarnumiā kanakin yurumáchmai. “Tsupirnaktiniaitme” tiniu ainia nuna ashamak túramai.

13 Tuma asamtai chíkich Yus-shuar, Israer-shuar armia nu, Pítrujai métek emka yurumáwaru ániayat jimiará enentai takusar ukunam iniaisarmai. Pirnapísha neka áyat nútiksan nupetnakmai.

14 Tura nuna íisan ashí íimiainiajn Pítrun chicharkamjai. Yus Shiir Chicham tana nujai métek wekasachu ásarmatai tímiajai “Ame Israer-shuaraitiam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijjai métek wekasatin ániawai” tiip” tímiajai.

*Israer-shuarsha Israer-shuarchasha mai métek Yúsan enentámtusar uwemprartatui*

15 Iikia nekas Israer-shuaraitji. Israer-shuarcha, tunáa ainia áaniuchuitji.

16 Túmaitiatar ju nékaji. Akupkamu umíamujai uwemprach-miniaitji antsu Jesukrístu nekas enentámtakum uwemprat-tame. Nu nekaar iisha Jesukrístu nekas enentámtusmaji tunaajainchu atai tusar. Aya Kristu nekas enentámtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chíkichkí shuarkesha nujai péñker ajaschamniaiti. Nu nekaar antsu Jesukrístu nekas enentámtusmaji péñker ajastai tusar.

17 Tura Israer-shuar enentáimprashtimpiash, “Wátsek, núnisaitkiuinǵkia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashtiniaiti.

18 Antsu yaunchu, wi túrashtiniaitjai tímiaj nuna awaiñkin túratniuitjai tákunka nuikia nekas tunaitjai.

19 Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjai iwiaaku pujajai ni wakera nuna umiktinian.

20 Wisha Krístujai krúsnum jákaitjai. Tuma asamtai yamaikia wikia iwiaaktsujai wi wakeraj nuna túratniun antsu Kristu winí iwiaakui ni wakera nuna túratniun. Tura ju ayashnium pujayatan aya Kristu enentámtakun iwiaakjai. Krístusha Yusa Uchiríntiat winia ti anentuk jarutkamiayi.

21 Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuinǵkia, nuikia Kristu ántar jákaayi.

## 3

*Yus akupkamu tura Yus enentáimtustin*

<sup>1</sup> ¿Wariñ aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsum máamun ti paant étserkun atumin iniaktuschkamkajrum?

<sup>2</sup> Wátsek, aniatatjarme, enentáimpratarum. ¿Warijñain Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram?

<sup>3</sup> ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarññai umiktin enentáimprarmek.

<sup>4</sup> Penké ánrarmek wáitsamarum tura antsu ishichkisha un- uimiarchamkarum?

<sup>5</sup> Naka enentáimpratarum. Yus ni Wakaní súrantsuk tura aents túrachminian atumíin ti takaatsuk. Átum aya akupka- mun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túrait.

<sup>6</sup> Yaunchu ii uuntri Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, péñkeraitme” tímiayi” tawai.

<sup>7</sup> Iis, nujai páantchakait. Ashí shuar Yúsan enentáimtuinia nuka Apraámññai métek enentáimpraru ásar, ni uchiría áintsañ ajasaru áiniawai.

<sup>8</sup> Yamái páantaiti. Yus ashí Israer-shuarchancha tawai “Aya winia enentáimtursarum péñker átatrume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi,

“Ámijñai ashí aents ti shiir ajasartatui.”

Tu ujakmiayi.

<sup>9</sup> Tuma asamtai ashí shuar Yúsan enentáimtuinia nuke Apraámññai métek péñker ajasar shiir warasartatui.

<sup>10</sup> Antsu ashí shuar “akupkamun umirkan uwemprattajai” tuinia nuka yajauchiniam yumñkramu áiniawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yumñkramu áiniawai.” Tu áarmaiti.

<sup>11</sup> Núññaiñkia páantaiti. Akupkamu umirkatniujai péñker ajaschamniaiti Yusññai, antsu aya Yus enentáimtusam péñker ajasam uwemprattame.

<sup>12</sup> Shuar akupkamu umirkatniun enentáimna nuka aya nujai péñker ajastinian enentáimiui; Yúsan enentáimtak péñker ajastinian enentáimtsui.

13 Tura Kristu yamaikia uwemtikrampramji. Akupkamun umirkachu yuminkramuiti tana nuka in túramtsuji. Antsu Kristu in yainmaktin krúsnum jaka yuminkramu ajasmiayi. Kame áarmaiti:

Shuar jakati tusa numiniam nenasma yuminkramuiti.

14 Tuma asantai Jesukristu jakamujai ashí Israer-shuarchasha Apraámjai métek péñker shiir warasartatui. Iisha núnisrik nú shuarjai Yusa Wakaní, Yus akupkataj timia nusha, achiktatji Yus enentáimtusar.

*Yus akupkamu tura Yus túrattana nu anajmarma*

15-16 Iis, yatsuru, Yus Apraáman Chichaman najana anajmatuk,

“Ámijjai tura amée weeá akiinkiattana nujajisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk ini-aisachminiaiti. Patattasha patattsachminiaiti.

17 Wátsek, Yus núnisan Chichaman Apraámjai najana, ukunam umitsuk iniaisachminiaiti. Tura Chichaman najanania nú ukunam, kuaru sianu nuyá trainta (430) uwi nankaamasmatai, Yus ni akupkamurin Muisaisan susamiayi. Túramaitiat nujai Yusa yaunchu Chichamen yapajíáchmiayi iniaisatniun.

18 Tuma asantai Yus timia nuka tuke uminkiattawai, Yus yaunchu Apraámjai Chichaman najana asantai. Nújaiñkia páantaiti, péñker ajastajtsar akupkamu umikrikia shiir pujuschartatji antsu Yus timia nujai iikia takatsuk shiir pujustatji. Nuna tsan̄katkamiayi Yus Apraámjai Chichaman najaneak.

19 “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsaiñ Yus tímía nu uminkiachminiuyayi. Tuma asantai nii táatsaiñ ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari ju akupkamun ashí iwiarar Muisaisan susar akatrarmiyai Israer-shuaran susárti tusar.

20 Antsu chikichik shuar niñki takastinian enentáimkiun̄ka chikichan atsumatsui. Tura Yus aya chikichkiiti. Niñki chikichan akattsuk ashí aentsun Apraámjai péñker awajsatniun Apraáma anajmatar niijjai Chichaman najanamiayi.

*Yus akupkamu itiúrkátin*

21 “¿Tura Yus jimiará chichamjaj chichaawak, tíchaintmeash. Emka Apraáman “Jujaj uwemprattame” tíchamkia, nuyá Mui-saisan ni akupkamurjín súdachmakia?” tíchaintmeash. Tura áintsachuiti. Nekaata, akupkamu umirkatniujaj Yusjaj tuke péñker pujusminiaitkiunka nuyá aya akupkamujaj uwempram tunaajajinchu ajasaintme.

22 Tura Yus-Chicham paant “Ashí tunáa áiniawai” tawai. Nu asantai yamaikia ashí Jesukrístu enentáimtuinia nú shuar, aya Yus timiá asantai, uwemprartatui.

23 Tura Kristu táatsainj Nin enentáimtushamniauyayi. Tuma asantai Nii táatsainj akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji.

24 Akupkamu, nuika, in waitmakmaji uchin kuírchin wainnia áintsanj. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsaj péñker áiniawai.

25 Yamái Kristu nekas enentáimtusiniaiti tuma asantai yamaikia akupkamu kuirchia áintsanj wáitmatsji.

26 Antsu Jesukrístu enentáimtusar, nujaj Yusa uchirí úuntmaru ajasuitji.

27 Ashí Kristu náarijn imiaimiutirmeka Kristu áintsanj ajasuitrume.

28 Jesukrístujaj tsaniñkiu asarí imiá métek aji. Israer-shuar, Israer-shuarcha, ankant ainia nu, ankantcha ainia nu, áishmanj, nuwaj, ashí mash Jesukrístunuitkiunkia yamaikia “niishaaiti” tu enentáimprashtiniaiti. Ni shuarj mash chikichik áiniaji.

29 Tura Krístunuitkiurmeka Apraám weeá áintsanj ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

## 4

1 Kuítrinniu uchirí ashí ni aparí takakna nuna niiniu áchattawak ukunam. Tura uchichitkiunka ni aparí takarniurija núkete.

2 Tuke uunt ajatsuk ni wáinnia nuna umirkatniuiti. Tura uunt ajasmatai tura ni aparí “Ayu” takui nuyá nii antsu ni aparíniu ashí wáinkiatniuiti.

3 Núnisrik iisha úchichik asarkia ashí aentsu akupkamurj umirkatniuji.

4 Tura tsawant jeantai, Yus ni Uchirj akupkamiayi ju nunkanam. Niisha Yúsaitiat nuwanam akiiniamiayi. Tura aents ajasmiai. Tura aents ajas yaunchu akupkamuncha umirkatniuyayi.



<sup>5</sup> Nujai ashí aents akupkamun umirkatin armia nuna uwentikrataj tusa támiayi. Tura iisha yamaikia nujai ni uchirí uunt ajasminiaitji.

<sup>6</sup> Atumsha nekas ní uchirí ajasakrumin Yus ni Uchirí Wakanin atumi enentáin akupturmakuiti. Tura nu Wakan atumí enentáiyá Yúsan “Aparú” tawai.

<sup>7</sup> Tuma asamtai yamaikia aya takarniuchuitme antsu Yus ni uchirin najatmaiti ámin. Tura ni uchirí asakmin ashí Yus takakna nuna amastatui Krístuiyan.

*Papru nu Yus-shuaran yáintinian wakerawai*

<sup>8</sup> Yaunchu átum nekas Yus nékachkuram, ántar-yus írunna nu umirkamarme nekascha yúsak.

<sup>9</sup> Tura yamaikia nekas Yus nékarme, kame Yus atumin nekarmarme. Núnis asamtai itiuirtsuk atak aentsu akupkamurí umirkatin enentáimprum. Nujai kakaram ajaschamni-aitme tura umikmesha yainmakchattawai uwempratin.

<sup>10</sup> Átumka jísat ti najanearme. Yaunchu jisat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum.

<sup>11</sup> Ashamajai, atumíin ántankeash takasmaj tusan.

<sup>12</sup> Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuí pujakui ishichkisha yajauch awajtuscharmarme.

<sup>13</sup> Antsu nekamarme ayashruí itiuirchat pujayatan Yusa shiir chichamen emka ujakmajrume.

<sup>14</sup> Tura winia sunkur ti yajauch awajtain atum winia nakitrurum muíjrukchamarme, antsu Yusa suntaríá áintsarmek itiamarmarme. Jesukrístu anturkatniua áintsarum anturtukmarme.

<sup>15</sup> Maa, wi nékajai, nuik atumí jijiimi ukuinkiarum surusaarme, túramniaitkiurmeka. Tura shiir enentáimpramarmena nusha itiuirtsukait yamaisha.

<sup>16</sup> Yamaikia nekas chichaman étserkun ¿atumí nemasri ajajak?

<sup>17</sup> Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar.

<sup>18</sup> Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujainsha tura pujatsainsha.

<sup>19</sup> Uchirú, nuwá jurertaj tana núnisnak ataksha wáitiajai Kristu atumíin paant atí tusan.

<sup>20</sup> Atumjai pujaknaka maak aintjai. Yamái pujaknaka nekas nusháa chichasaintjarme. Itiuirkatjarmetsuk nékatsjai.

*Akarsha, Sarasha jimiará Chichaman nakumainiawai*

<sup>21</sup> Ayu, “akupkamu umirkatniuiti” támena nu nekaata; akupkamuka júnisaiti.

<sup>22-23</sup> Aarma awai: Apraám jimiará uchirtiniuyayi. Emka ni takarniur<sub>i</sub> jurermiayi Ismaeran. Nuyá Apraáma nuwé jurermiayi Isakan. Ismaera nukur<sub>i</sub> Apraáma takarniur<sub>i</sub>yayi. Tura Apraám Yusan enentáimtusuk niij<sub>i</sub>ai kanarmatai, ni takarniur<sub>i</sub> jurermiayi. Tura antsu Isaka nukur<sub>i</sub>nkia takarniur<sub>i</sub>nchuyayi, antsu nekas ni nuwé áuyayi. Niisha ti úuntchiniak, Yus “jurertatme’ tímiayi. Tuma asamtai Yus timiaj<sub>i</sub>ai Isakan jurermiayi.

<sup>24</sup> Ayu. Yamái tájana nuka Yusa Chichamen jímiaran naku-mui. Ismaera nukur<sub>i</sub> Akar chikichik Chichaman naku-mui. Yaunchu Senái muranam Yus ni akupkamur<sub>i</sub>n áarmiayi Israer-shuar, takarniua áintsan, umirkarti tusa.

<sup>25</sup> Senái murasha Akara nunke Arapienam wajaawai. Akarsha Senái muran nakumak, ashí Israer-shuaran “Akupkamuj<sub>i</sub>ai uwempramniaiti” tuinia nuna nakumui. Yamaisha Israer-shuara uuntri Jerusaré<sub>n</sub>num pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai.

<sup>26</sup> Antsu ashí Yus-shuarti uwempra asar imiankas ankant pujaji. Nayaimpinmaya Jerusaré<sub>n</sub>numiá áentsuitji. Nuyá áentsti tuke ankant pujuinijai. Nuyá aents asakrin, nu yakiya Jerusaré<sub>n</sub>ka ii nukur<sub>i</sub>á áintsan enentáimpramniaiti.

<sup>27</sup> Júnis áarmaiti:

Warasta, misurma, uchi takakchiatmek;  
Ti shiir warasta, uchi najawé nékachiatmek.

Nuwá ajapamu uchin jurertatui;

Nuwá áishrinnia núnaka nankaamas uchirtin átatui.

<sup>28</sup> Iisha, yatsuru, Isaka áintsar<sup>i</sup>, Yus timiaj<sub>i</sub>ai akiinaitji.

<sup>29</sup> Yaunchu Ismaer Isakan kajerak itiurchat awajsamiayi. Núnisan yamaisha Ismaera áintsan aya ayashnumiá ainia nú aents Yusa Wakan<sub>i</sub>ya akiinia nuna yajauch awajenawai.

<sup>30</sup> Tura Yus-Papinium áarmaiti:

“Takarniusha, ni uchir<sub>i</sub>j<sub>i</sub>ai, ajapam awemata. Nekas pé<sub>n</sub>ker nuwá uchir<sub>i</sub>j<sub>i</sub>ai tsanin pujuschamniaiti. Apari ku<sub>i</sub>tr<sub>i</sub>ncha achikchamniaiti,” tawai Yus-Papí.

<sup>31</sup> Ayu, yatsuru, nekaatarum. Takarniu uchir<sub>i</sub>nchuitji antsu ankant pujaji nekas pé<sub>n</sub>ker nuwá uchir<sub>i</sub> asar<sup>i</sup>.

## 5

*Yusj<sub>i</sub>ai tuke ankant atarum*

<sup>1</sup> Kristu uwentikrampramijai tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketkip.

<sup>2</sup> Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itiurtamkamniait?

<sup>3</sup> Ataksha tájarme, ashí tsupirnakua nu shuar ashí Muisais timia nuna takamtsuk umirkatniuiti.

<sup>4</sup> Atum “Akupkamu umiakmin Yus shiir enentáimturmastatui” tárumna nu, nu shuartiram Krístuiya tupanniuitrume. Yusa anenkrattairiya kanakniurme.

<sup>5</sup> Iikia, antsu, Yusa Wakaníjiaj tura Yus enentáimtakrin Yus shiir enentáimturmastatji, tu enentáimji.

<sup>6</sup> Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

<sup>7</sup> Atumsha Krístujaj péñker wekaimiarme. ¿Urukamtai nekas Yus timia nu iniaisatin enentáimprum ataksha akupkamu nam waketkitin?

<sup>8</sup> Nú enentai Yúsaiyanchuiti. Niijjaj wekasatniunka Yus achirmakuitrume.

<sup>9</sup> Ju enentáimpratarum: Karía ishichik yuminnium enketam mashí karimtiktsuk. Aneartarum atumsha.

<sup>10</sup> Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

<sup>11</sup> Wíkiá, yatsuru, yamaisha “tsupirnaktiniaiti” tuke tákuñkia Israer-shuar yajauch awajtuscharainti. Antsu Kristu jakamun étsereatnak “tsupirnaktiniaiti” tákuñkia kajertukcharainti.

<sup>12</sup> Atumin yajauch awajtamsatin wakeruiniana nú shuar antsu niñki tsupimiakar yajauch awajmamsarti.

<sup>13</sup> Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum.

<sup>14</sup> Ju chichamjaj ashí akupkamu mash uminkiattawai: Ame ayashim aneamna áintsamek chíkich shuarsha aneata.

<sup>15</sup> Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

*Ayash wakeramu tura Yusa Wakaní wakeramu*

<sup>16</sup> Juna tájarme: Atumí ayashj wakerana nu umikijaj tusarum Yusa Wakaní kakarmaríjjaj wekasatarum.

<sup>17</sup> Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait.

<sup>18</sup> Tura Yusa Wakaní jintinramkuin<sub>kia</sub>, aentsu akupka-murijj<sub>ai</sub> itit áchattame.

<sup>19</sup> Wats, ayash túramu ti paant ániawai. Ju ániawai: tsanir-matin, wapik túratin, yajauch túratin,

<sup>20</sup> ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nan<sub>ka</sub>amantu enentáimtumastin, aya niisháa niisháa enentáimsartin, níniunak ístin,

<sup>21</sup> yajauch enentáimtunaistin, ma<sub>ñ</sub>kartuatin, nampektin, nampernum aya ti yurumin, tura ti nampen átin. Chíkich nuj<sub>ai</sub> métek ániawai. Nuik ujakmajrumna núnisnak ataksha tájarme: Shuar nuna túrakka Yus<sub>ai</sub> pujustinian pen<sub>ké</sub> tujinki-attawai.

<sup>22</sup> Ayu, yamaikia Yusa Wakaní kakarmarijj<sub>ai</sub> túratin enentáimsatai. Yusa Wakaní ii enentáin pujak, pé<sub>ñ</sub>ker túratniun nerektinia áintsan<sub>ñ</sub> neremtikramji. Ju ániawai: aneatin, shiir enentáimsatin, Yus<sub>ai</sub> tura shuarj<sub>ai</sub> nawamnaikiar wekasatin, shiir enentáijj<sub>ai</sub> katsuntratin, chíkich shuar shiir awajsatin, tsan<sub>ka</sub> átin, tana nuna tímiatrusan<sub>ñ</sub> umiktin,

<sup>23</sup> pé<sub>ñ</sub>ejchach ajastin, iik ímiasar tunáa túrashtin. ¿Ju túratniuncha yaki surimia?

<sup>24</sup> Shuar Jesukrístunu ainia nu, ni ayashí wakeramur<sub>in</sub>cha tura nunisan<sub>ñ</sub> ni túramur<sub>in</sub>cha surimiak wekaawai. Ni ayashí krúsnum maatniua áintsan<sub>ñ</sub> túraiti.

<sup>25</sup> Yusa Wakaní kakarmarijj<sub>ai</sub> Yus-shuar ajasu asar, núnisrik Yusa Wakaní kakarmarijj<sub>ai</sub>in<sub>ñ</sub> wekasatai.

<sup>26</sup> “Wats, nekapnaisatai. Wi imiá pé<sub>ñ</sub>keraitj<sub>ai</sub>” nuámtak túnaitasuk, yajauch enentáimtunáischatniuiti.

## 6

### *Yáinniaiktarum*

<sup>1</sup> Túras<sub>ha</sub>, yatsuru, Yus-shuar tunáa túrashtimpiash. Atumsha nekas Yus<sub>ai</sub> wekaarumna nu, nu wáinkiumeka, yátsum Yus<sub>ai</sub> iwiarat tusarum yáintárum. Tura nan<sub>ka</sub>amantu enentáimtumatsuk túratarum. Tura amesha nekamata. Tunaanum iniar<sub>ai</sub>j tusam anearam wekasata.

<sup>2</sup> Káarak kijin akui nuámtak yáiniaiktin átsuk. Núnisrumek atumsha, itiurchat<sub>ri</sub> akui nuámtak yáiniáiktarum. Túrakrumka Kristu akupeamur<sub>i</sub> umíarme.

<sup>3</sup> Shuar tujintiayat “nan<sub>ka</sub>amantuitj<sub>ai</sub>” táku<sub>ñ</sub>ka ananmamui.

<sup>4</sup> Shuar ní túramur<sub>in</sub>iak enentáimtumastiniaiti. Níniunak enentáimtumakuin<sub>ka</sub> tura pé<sub>ñ</sub>keraitkiuin<sub>ka</sub> chikicha túramur<sub>i</sub> iirtsuk, antsu níniun pé<sub>ñ</sub>ker iis wararsattawai.

<sup>5</sup> Iis, ashí ní káarkariniak júkishtinkiait.

6 Shuar Yus-Chichaman unuimiatna nu, nu shuar nin jintiána nuna ashí takakna nujaj yáinti.

7 Ananmamawairap. Shuar Yúsan anan<sub>kat</sub>niun tujintiawai. Ame araamna nuna neren<sub>en</sub> júuktatme. Chíkich nere<sub>achattawai</sub>. Atumi enentáincha núniskete.

8 Iista. Shuar ni ayash<sub>i</sub> wakeramunak tuke enentáimtakka, jata<sub>i</sub> nere<sub>a</sub> áintsan<sub>en</sub> araaiti. Nerekmata<sub>i</sub> jákatniun júuktatui. Tura Yusa Wakan<sub>i</sub> wakera nuna tuke enentáimtakka Yus<sub>jai</sub> tuke shiir pujustinian júuktatui.

9 Nu asamtai pen<sub>ker</sub> túratin yawetkishtiniaiti. Tura pimpit-suk takasar júuktin tsawant jeamtai, páchitsuk júuktatji.

10 Tuma asamtai yáin<sub>min</sub> ákuin<sub>kia</sub> ii jeajnia nu túratniuitji nekaska ii yach<sub>i</sub> yáin<sub>kiartin</sub>, Yus-shuar ainia nu. Tura ashí shuarsha yáintinaiti.

*Jesukristunu ajasar yamaram akiiniatin nekas pen<sub>ker</sub>erai*

11 Íimsakua, winia uwe<sub>jrujai</sub> urutá uuntna áatjarum.

12 “Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuin<sub>kia</sub> itiurchat awajtusarain<sub>en</sub> tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan<sub>en</sub> tsupirnaktiniaiti.

13 Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnakuk tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai.

14 Wikia, antsu, aya ii uuntri<sub>i</sub> Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nu<sub>nkanmaya</sub> ana nuna jaka áintsan páchiatsjai; tunaanum winia útsutkatin atsawai.

15 Krístunu ajasrikia tsupirnaktincha tsupirnakhaitkiursha mai ántrai<sub>i</sub> antsu yamaram akiiniatin nekas pen<sub>ker</sub>erai<sub>i</sub>.

16 Ashí nekas Yus-shuaran, wi tájana nujaj métek wekainia nuna, Yus shiir enentáimias yáinti tuke shiir pujustinian.

17 Yamaikia itiurchat najatawarain<sub>en</sub>. Jesusa takatri<sub>i</sub> takaakui asutiuawarma paant ayashru<sub>i</sub> chimikma írunui.

18 Yatsuru, ii uuntri<sub>i</sub> Jesukristu atumin shiir yainmakarti. Nuke atí.

## Papru IPISIUNMAYĀ SHUARAN papí akuptukma

*Ipisiunmaya Yus-shuaran Papru áatramiania nu*

<sup>1</sup> Yus nuna wakerakui Jesukrístu akatramuitjai. Jesukrístu nekas enentáimtusurum Yus-shuar ajasurum Ipisiunam pujar-mena nuna ju papin áatjar-me.

<sup>2</sup> Yus ii Aparísha tura ii Uuntri Jesukrístusha waitnentra-mainia ásar imiatkinchanum shiir pujustinian yainmakarti.

*Krístujai tsaninkiu asakrin Yus ti shiira nuna tsankatramji*

<sup>3</sup> Ii Uuntri Jesukrístu Apari Yus nekas shiir awajtustiniaiti. Iisha Krístujai tsaninkiu asar ii enentáin ashí nayaimpinmaya ana nujai warasminiaitji. Túmaitkiui Yus nu waratain ashí suramsaitji.

<sup>4</sup> Krístujai uwemprar ti shiir tunaajainchu Niijjai pujusarat tusa Yus, ju nunka atsaisha, anaitiamkamiaji.

<sup>5</sup> Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmiaji.

<sup>6</sup> Ni aneamu Uchirijjai tsaninkiu asakrin nekas ti anenmaji. Nu enentáimsar ti shiir awajsatniuitji.

<sup>7</sup> Yus ti anenmakrin ni aneamu Uchiri numpé puarmatai, nu jakamujai ii tunaarín akikmatramak uwentikrampraitji.

<sup>8</sup> Tura ti anenmak ni enentáimtairín tura nekatairíncha suramsamiaji.

<sup>9</sup> Nujai shiir enentáimturmak in uwentikrampratniun wakerutmakmij nuna, yaunchu nekaachman, yamá paant awajturmajai.

<sup>10</sup> Ashí jú nunkanam írunna nunasha tura nayaimpiniam írunna nunasha Kristu ashí akupin ati tusa Yus tsankatkattawai. Nunasha Yus yaunchu enentáimturum asamtai tsawant jeamtai ashí uminkíáttawai.

<sup>11</sup> Iisha Krístujai tsaninkiu asakrin Yus yaunchu achirmak-miaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

<sup>12</sup> Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awaj-samin ániawai.

<sup>13</sup> Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanín akuptuktaj timia nuna

akupturmakmai. Nuna tura “nekas Wíi shuaraitrume” tawai.

<sup>14</sup> Yamái Yusa Wakanj̄ ii enentáin pujuruk tuke uwemtikramji. Tura takas umik nu tsawantaj̄ ashí tsan̄katramkattaj̄i. Tura ii enentáin pujá asamtai Yus ukunam Niiijaisha ashí tsan̄katramkattaj̄ nu paant nékaji. Maa, Yus ti pen̄ker asamtai Nin ashí ti shiir awajsarti.

*Papru Yus-shuaran áujtusmiania nu*

<sup>15</sup> Átum ii Uuntr̄i Jesukrístu nekas enentáimtamuncha tura ashí Yus-shuarjaj̄ shiir awajnaiyamuncha antukjai.

<sup>16</sup> Túran shiir enentáimkiun Yúsan áujkun tuke yúm̄nkiajai.

<sup>17</sup> Ii Uuntr̄i Jesukrístu Apar̄i Yus ti shiir asamtai Nin áujeakun ni Wakanj̄ ni nekatair̄in suramas ashí jintinramawarti tusan seajai. Nujaj̄ nuna nan̄kaamas Yus nekaattarme.

<sup>18</sup> Tura enentáimincha paant enentáimtikramprarti tusan sea-  
jai. Nujaj̄ shiir túrutmataj̄ tusa achirmakuitrum nu nekaat-  
tarme. Nu arantcha imiá shíira nu, Yus ni shuar̄in ashí tsan̄katkattana nusha nekaattarme.

<sup>19</sup> Nu arantcha Yus umirkurin ti kakaram tujincha asa in yáinmaj nu nekaattarme. Tura nu kakaram ti kakaram asamtai

<sup>20</sup> nujaj̄ Krístun jakamunmaya iniantkimiayi. Tura nayaimpiniam jukí ni untsuurin̄i akupin pujutainium apujsamiai.

<sup>21</sup> Tura ashí ju nun̄kanam akupin ainia nújaisha tura ukunam nun̄ka átatna nūi akupin áminia nújaisha tura ashí akupin ainia nújaisha tura ashí naari nékamu ainia nujaj̄isha Yus Krístun ashí nan̄kaamas akupin najanamiayi.

<sup>22</sup> Tura ashí írunna nu, Krístun umirkartin̄i áiniawai. Tura Yuska Krístunak ashí Yus-shuara Akupniur̄i awajsamiayi. Túramtai Kristu ni shuar̄i muuké áintsan̄kete.

<sup>23</sup> Tura ashí nun̄kanam Yus-shuar ainia nu Kristu ayashí najanainiawai. Tura Kristu ashí ni ayash̄in pimiutkaiti tura nu arantcha ashí írunna nunasha pimiutkaiti.

## 2

*Yus anenma asa uwemtikramji*

<sup>1</sup> Átum yajauch túrakrum tunaanum tuke wekaakrum Yúsnumiá kanakin asarum jákauyarme.

<sup>2</sup> Nu tunaanum jú nun̄kanam pujuinia nujaj̄ métek tuke wekainiuyarme. Túrarum uunt iwianchi wakeramur̄i umirniuyarme. Uunt iwianch ashí Yúsan umirainiatsna nuna akatenawai.

<sup>3</sup> Ashí iisha núnisrik yaunchu nu shuarjaj̄ métek ii ayashí wakerakmu umirniuyaji. Tura íi enentáin̄i wakeramusha

umirniuyaji. Tuma asar tura tunaajaj akiinia asar chíkich shuarjaj métek ti kajernakmiaji.

<sup>4</sup> Antsu Yus ti waitnenkartin asa in ti anenmamiaji.

<sup>5</sup> Tuma asa ii tunaanum tuke jaka pujarniñ Krístujaj métek iwiaaku awajtamsamiaji. Aya ti anenkartin asa uwentikrampramiaji.

<sup>6</sup> Tura Krístujaj métek iniantamkimiaji. Nuyá Jesukrístujaj métek, akupin pujutainium yamaisha apujtamas tuke nu-petkatniun tsankatramkaitji.

<sup>7</sup> Nujaj ni ti anenkratmarincha tura Kristu túrunamujaj waitnentrampamuncha tuke iniaktusmin átatui.

<sup>8</sup> Jesukrístu nekas enentáimta asakrumin Yus waitnentramar uwentikrampraiti. Juka átumkeka túrunachuitrume. Antsu Yuska Niñki kuítchajaj suramsaitrume.

<sup>9</sup> Shuar ni takatríjjaj uwempratniuitkiunka nankaamantu enentáimsainti winia kakarmarjaj uwemprajaj tusa. Nu enentáimsatniuka atsutí tusa Yuska átumka takaatsrumniñ uwempratniun suramsamiarme.

<sup>10</sup> Yus najanamuitji. Kame Jesukrístujaj tsaniákrin yamaram iwiaakman suramas tuke péñker túratniun najatmamji. Yáunchuk nuna enentáimturmasmiaji.

### *Krístujaj tsaniñkiu asar shiir nawamnaikiar pujaji*

<sup>11</sup> Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha ániakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme.

<sup>12</sup> Nuik Krísturtinchauyarme. Israer-shuarcha asarum ashí ni túrutairísha tura ashí Yus nin tsankatkarmasha nekaachuyarme. Tura jú nunkanmayá asarum nekas Yusa nu enentáimtichuyarme tura shiir pujustin nánkamsarum enentáimpramarume.

<sup>13</sup> Antsu yamaikia Krístujaj tsaniñkiu asarum, yaunchu Yusaíya yajá pjuwitiatrum, yamaikia Kristu numpé puármatai ni jarutramkamujaj tántaitrume.

<sup>14</sup> Israer-shuarjaj Israer-shuarchajaj nemasmanaikiar ajapén péenkramu ámiaji. Tura Kristu nuna sáaki nawamnaintikramkamiaji. Tura chikichik shuar najatmamiaji.

<sup>15</sup> Nuik aya Israer-shuar Muisais akupkamu untsurí armia nuna umirkatin ániak nujaj chíkich shuarjaj nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamiaji.



16 Núnisañ ámiayi. Kristu krúsnum jaka nemasjaj̄ mai apattamak chikichik awajtamas Yusjaj̄isha nawamnaimtikramkamiayi.

17 Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi.

18 Yamaikia Israer-shuartisha tura Israer-shuarchasha mai metek Kristu túrunamujaj̄ tura Yusa Wakanj̄ takaku asar Yusaj̄ jeatniuitji.

19 Tuma asamtai yamaikia chíkich shuarchaitrume, antsu ashí Yus-shuarjaj̄ métek ajasuitrume. Nekas Yusa shuarj̄intrume.

20 Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisañ yaunchu Yúsnan etserniusha tura Kristu akatramurj̄isha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj̄ nankaamas Jesukristu enentáimtustiniaiti.

21 Jea apujtukmari Kristu asamtai Nij̄ ti penker ekeniar jea jeamnaki wéawai. Tura ii Uuntrj̄ Krístujaj̄ Yusa Jee ti shiir átatui.

22 Núnisrumek atumsha Krístujaj̄ tsaniñkiu asarum átum ashí Yus-shuarjaj̄ Yusa Jeeya áintsañ ajasuitrume. Tura Yusa Wakanj̄ ashí Yus-shuara enentáin pujú asamtai nekas Yusa Jeeñte.

### 3

*Papru Israer-shuarchanum Yus-chichaman etserkatniuya nu*

1 Nu asamtai atumin Israer-shuarchatirmin yáintaj tusan Jesukristunu étserkun sepunam pujajai.

2 Yus anentak Yus-Chichaman atumin etserkatniun akatar akuptukuiti. Nu nékatsrumek.

3 Yus nuna túrutak yaunchu nekaachmancha paant awaj-tursamiayi. Núnaka ishichik áatraitjarne.

4 Nu áujсарum Krístunu yaunchu nekaachman yamaikia paant nékajna nu nekaattarme.

5 Nú chichaman yáunchusha chikichkinkesha ujankachmiayi. Túrasha yamaikia Yusa Wakanj̄ Kristu akatramurj̄incha etserniurj̄incha nu chichaman paant awajtusarai.

6 Nu chicham juiti: Uwempratin chichaman umirkar Israer-shuarcha Israer-shuarjaj̄ métek Krístujaj̄ tsaniñkiaru ásar chikichik shuar ajasartatui. Tura nu arantcha Yus ni shuarj̄in ashí shíiran tsan̄katkatniun anajmatrama nuj̄ métek pachiinkiertatui.

<sup>7</sup> Yus ni kakarmarjijai winia yáintiuk tura ti anentu asa nu uwempratin chichaman etserkat tusa akatturmiayi.

<sup>8</sup> Ashí Yus-shuarjai nankaamas wi péndercha ain Israer-shuarchanum shiir chichaman etserkat tusa Yus tsankatrukmiayi. Kristujainkia kuitjai nankaamas pénder, enentáimtustin jeatsjinia nu, takakji. Nusha ti shiir chichamaiti.

<sup>9</sup> Yuska, ashí najana nu, nu enentáimmian yáunchusha et-sertsuk yamaikia ashí shuar nu chichaman nekaawarat tusa winia akatturmiayi.

<sup>10</sup> Yamaikia ashí nayaimpiniam pujuinia nuka Yus ni shuarijn túrunamun íisar Yuska imiá neka asa ashí enentáimniua nuna paant nékainiawai.

<sup>11</sup> Yus júnis túratniun yáunchuk enentáimpramiayi. Tura ii Uuntri Jesukristujai mash uminkiamiayi.

<sup>12</sup> Tura Kristujai Yusaj yúpichuch jeaji. Tura Nin nekas enentáimtusar sapijmiatsuk Nijn tantamniaitji.

<sup>13</sup> Tuma asamtai tájarme, atumin yáintaj tusan sepunam pujakui kúntuts enentáimprairap. Antsu nujai Yus atumin ti shiir awajtamkurmin átum warasuk tusan wakerajrume.

#### *Kristu ti anenkratniuiti*

<sup>14</sup> Nu asamtai ii Uuntri Jesukristu Aparin tikishmatran áujtajrume.

<sup>15</sup> Ashí nayaimpinmasha tura nunkasha Yus-shuar ájinia nu nekas ni shuari áiniaji.

<sup>16</sup> Yus ti kakaram asa ni Wakanijjai atumí enentáin pujureak ashí ni kakarmariyan atumin suramsarat tusan áujtajrume.

<sup>17</sup> Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume.

<sup>18</sup> Túrakrum ashí Yus-shuarjai Kristu anenkrattairi nekaat-tarme. Imiá uunt asa nankantasuk tuke amuukachminiaiti.

<sup>19</sup> Nu anenkrattai ashí takamtsuk nekaachmin ain nekaatarum tusan áujtajrume. Nujai Yus takamtsuk pimiutramkattarme.

<sup>20</sup> Nekas Yus shiir awajnasti. Ni ti kakaram asa ii seajnia nuna nankaamas tura enentáimprachminia nunasha nankaamas iin pujurtamuk ashí túramniaiti.

<sup>21</sup> Ashí Yus-shuarjaisha tura Kristujajisha Yusa pénderi tuke paant wantinin atí. Yus tuke iniaitsuk shiir awajnasti. Núnisan atí.

## 4

*Yusa Wakanijjai tsaninkiar pujakur túratin*

<sup>1</sup> Atumsha ni shuari ajastin Yus achikma asarum pé<sub>n</sub>ker wekasatarum tájarme. Ii Úuntri<sub>n</sub>iun étserkun sepunam pujakun seajrume.

<sup>2</sup> Nekasmiancha ajasrum aneniakrum katsunnairatarum.

<sup>3</sup> Yusa Wakan<sub>i</sub> chikichik shuar awajtamkurmin shiir awaj-naisarum pujustarum.

<sup>4</sup> Yusa Wakan<sub>i</sub>nkia chikichkiiti. Tura ashí métek Yus achikma asar métek Niij<sub>i</sub>ai shiir pujustin enentáimji. Iisha Kristu ayash<sub>i</sub> ayash<sub>i</sub>mkia asar chikichik ayashkiitji.

<sup>5</sup> Ii Uuntri<sub>i</sub> chikichkiiti. Ni<sub>n</sub>ki nekas enentáimtusar métek imiantiniaitji.

<sup>6</sup> Chikichkiiti Yus, ashí Yus-shuarti ii Apar<sub>i</sub>nti. Ashí akup-tamniuitji. Ashí ni shuari<sub>i</sub>n pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

<sup>7</sup> Tura chikichik chikichik niisháa shiir takastinian suram-saitji. Tura Kristu wakerimia núnisan<sub>n</sub> suramsaji.

<sup>8</sup> Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíran susamiayi.”

Tu áarmaiti.

<sup>9</sup> Tura “wakamiayi” tana nu ¿warintiua? Kristu nayaimpiniam pujá asa yakí wákan<sub>k</sub>a emka tárashtinkiait. Nekas nun<sub>k</sub>á taramiayi.

<sup>10</sup> Ni<sub>n</sub>ki ataksha nekas nayaimpiniam wakamiayi. Nuna tura asa ashí ni shuar<sub>i</sub>n pimiutkarmiayi.

<sup>11</sup> Tura nuj<sub>i</sub>ai chikichan akatramun awajsamiayi. Chikich-nasha Yúsnan etserniun awajsamiayi. Chikichnasha uwem-pratin chichaman etserniun awajsamiayi. Chikichnasha Yus-shuara wáinniun awajsamiayi. Tura chikichnasha unuikiar-tinian awajsamiayi.

<sup>12</sup> Túramtai ashí Yus-shuar ni takatrij<sub>i</sub>ai yáiniaikiar ti pen<sub>n</sub>ker shuar ajainiakui Kristu ayash<sub>i</sub> takamtsuk katsuarartatui.

<sup>13</sup> Nuj<sub>i</sub>ai Yus nekas enentáimtamunam Yusa Uchir<sub>i</sub> ashí métekrak pé<sub>n</sub>ker nekaattaji. Nu túrakur katsukir Krístuj<sub>i</sub>ai métek pé<sub>n</sub>ker ajastatji.

<sup>14</sup> Tura uch<sub>i</sub>a áintsar áchattaji. Úchikia ashí yamaram chichaman antukar wari yapaj<sub>i</sub>niawai. Tura anan<sub>k</sub>artinia chichamen antukar waaku ániawai. Kame nu anan<sub>k</sub>artin shuar ti paant chichayan<sub>n</sub> ni shiir chichamej<sub>i</sub>ai anan<sub>k</sub>atniun pujurenawai.

<sup>15</sup> Antsu nekas aneniakur nekas chicham ujanaiktini-aitji. Túrar Krístuj<sub>i</sub>ai tsani<sub>n</sub>kiar tuke tsakakir ashí pé<sub>n</sub>ker túratniuj<sub>i</sub>ai Niij<sub>i</sub>ai métek ajastatji. Krístuka ashí ni shuari muuké áintsan<sub>k</sub>ete.

16 Tuma asa ni ayashin wáinkui ashí nuna muchitmarí pénker yáiniaikar ashí ni túratniurín shiir takasartatui. Nujai nu ayashniun muchitmarí chíkich chíkich pénker takainiak métekrak shiir tsakartatui. Tura anenainiakui nu ayashsha pénker úntmartatui.

*Kristujai tsanin'kiu asar yamaram iwiaakmanum wekaaji*

17 Ii Uuntrí Kristu ímmianum juna akatjarne: Chíkich aents Yúsán nékachu ásar ántar ni enentáimmiajain wekainia núnisrum wekasairap.

18 Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui.

19 Nu arantcha, ni túramurijjai natsamtichu ásar ti yajau-chiniam surumakar ashí tunaan wararainiak túrin ániawai.

20 Antsu átumka núnisrum enentáimtustin unuimiar-chamarme.

21 Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiar-marme.

22 Yaunchu enentáimtairmeka ayash wakeramu anankramin ainia nujai piaku asa imiá yajauchiiti. Nu enentáimtairmesha yaunchu túrutairmesha ajapa iniaisatarum.

23 Túrarum pénker enentáimsarum wakannium yapajjatarum.

24 Tura yamaram enentáimtairam emetatarum. Nuka Yusjai métek najanamu asa nekas pénker tura shiira nuna tuke túriniaiti.

25 Nu asantai chikichik ayashi muchitmarí asarum wáitrutsuk nekas chicham chicharnaisatarum.

26 Kajeakrum tunáa túrawairap. Tura nu kajekmasha tsawant takamtsuk áchatniuiti.

27 Uunt iwianch yajauch awajtamsatin tsankatkaip.

28 Kasasha kasamtsuk kakaram takakmasti. Tura ni uwejéjai pénker takaak atsumainia nú shuarnasha susati.

29 Muijmiai chicham chichasairap. Antsu chichastin akui pénker chicham, chíkich shuar pénker awajsamnia nu chichastarum. Anturtuinia nuna yáintaj tusarum nu chicham ujaktarum.

30 Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwentikramprat-taji.

31 Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí.

32 Antsu shiir awajkartin ajasrum waitnennairarum, Kristu jakamujai Yus atumí tunaarín tsankurtampra nútiksarmek tsankurnairatarum.

## 5

*Yus-shuar túratin*

1 Nekas Yusa Uchirí aneamu asarum Nii tura núnis túratin wakeruktarum.

2 Kristu in anenmaj núnisrum anenaitiarum. Kame ii tu-naarín akikmaktaj tusa jákatniunam surumakmiayi. Túramtai Yus shiir enentáimtusmiayi.

3 Yusna asarum tsanirmatniusha yajauch túratniusha tura jú nuñkanmayaan ikiaun̄katniusha ishichkisha enentáimtuschatniuitrume.

4 Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yumínsatniuíti.

5 Shuar chíkich nuwajaj tsanirmakka tura ashí yajauchin wakerakka tura jú nuñkanmayaan ikiaun̄katniun wakerakka Yusaj Kristu akupea nuí pen̄ké pachiinkiachminiati. Kame ju nuñkanmayaan ikiaun̄katin ántar-yus tikishmatratniua nujaj méteketete.

6 Nu túramniati tusar ántar chichamjaj anañkramacharti. Warí, nuna túruiniakui Yúsan umirainiachun Yus ti asutiáwartatui.

7 Tuma asamtai nu shuar pen̄ké pachischatniuitrume.

8 Yáunchuka atumsha kiritniunam wekainiuyarme. Tura yamaikia Krístujaj tsanin̄kiu asarum pen̄ker tsáapninium wekaarme. Shuar tsáapninium wekainia nujaj métek wekasatarum.

9 Tsáapninium wekainiaka shiir awajkartincha tura nekas chichamtincha tura pen̄ker túrin áiniawai.

10 Ii Uuntrí Kristu wakeramu nekaatin wakeruktarum.

11 Kiritniunam wekainia nu túramu pachisairap. Antsu nu shuar tsáapninium en̄keatarum.

12 Ni uuk túruinia nu áujmatsatin natsanmajniati.

13 Tura ashí tsáapninium itiamu ashí paant ajawai. Tsáapnikia ashí paant awajeatsuk.

14 Nu asamtai Yus-Papinium tawai:

“Kanáruitme nu shintiártá. Jakamunmaya nantáktiá. Tura Kristu tsáapin awajturmastatui.”

Tu áarmaiti.

15 Nu asamtai átum túramu ímiastarum. Nékachu áintsarum pujusairap. Antsu pen̄ker enentáimprarum wekasatarum.

16 Pen̄ker túratin tsawant wasúrkáip. Tunáa ti pampaatsuk.

17 Enentáincha áirap. Ii Uuntrí Kristu warinia wakera nu enentáimtustarum.

18 Nampekairap. Nampeakmeká aya yajauch ajame. Antsu Yusa Wakanj winia enentáiruñ takamtsuk pujurtusti, tu enentáimsatarum.

19 Túrarum Yus shiir enentáimtakrum Yus-kanta kantamkirum shiir áujnaisatarum.

20 Ii Uuntri Jesukrístu náarijjai ashí irunna nu Yus Apa tuke yuminsatarum.

### *Yus-shuar túratin*

21 Yus-shuar asarum nuámtak umirnaikiatarum. Túrakrum Kristu shiir awajsattarme.

22 Núwaka Krístun umirna núnisan ni áishrincha umirkatniuiti.

23 Kristu ni shuarin akupeana núnisan áishmansha ni nuwen akupkatniuiti. Kristu ni shuarin ayashimiak ni muuké áintsankete. Tura nin uwentikiartiniaiti.

24 Nu asamtai Yus-shuar Krístun umirin áiniawai. Núnisan ashí ana nujai nuwa ni áishrin umirkatniuiti.

25 Kristu ni shuarin ti aneak nin yáintaj tusa jákatniun surumakmiayi. Núnisrumek áishmantirmesha atumi nuwé aneatniuitrume.

26 Kristu ashí ni shuarin ni Chichamejai tura entsajai nijjar níshuar péñker árat tusa jakamiayi.

27 Nujai ashí ni shuarin tunaarinniuchu tura yajauch máatrachu antsu ti penker shiir awajas Niini ejetaj tusa túramiayi.

28 Núnisan áishman ni ayashín anea núnisan ni nuwen aneatniuiti. Shuar ni nuwen aneak nujai ni ayashíncha aneawai.

29 ¿Yaki ni ayashín nakitniuit? Antsu péñker wáiniuk áyureatsuk. Kristu núnisan ni shuarin wainiui

30 ni ayashí asamtai. Kame ni ayashí muchitmarintji.

31 “Tuma asamtai áishman ni aparíncha nukuríncha ikiukin ni nuwejai tsaninkiar chikichik ayashtin ajainiawai.” Tu áarmaiti.

32 Nusha Kristu ni shuarijjai tsaninmán tawai. Nuka yaunchu nekaachma yamaikia nekanaiti, tura ti enentáimturiniaiti.

33 Tura núnisan ashí áishmantiram atumí nuwé atumí ayashía nútiksarmek aneatniuitrume. Nuwasha ni áishrin umirkatniuiti.

## 6

1 Uchitirmesha, Yus-shuar asarum apasha nukusha umirkatarum. Nuka ti péñkeraiti.

2 Emka akupkamu “umirkam nekas shiir átatme” tana nu júiti:

“Apasha nukusha umirkata.

3 Túrakmeke shiir átatme tura jú nunkanam untsurí tsawant pujustatme” tawai.

<sup>4</sup> Atumsha, uchirtintirmesha, atumí uchirí ánrarum aka-jkairap. Antsu Yúsan shiir enentáimtusarat tusarum ti péñker jintinkirum tsakatmartarum.

<sup>5</sup> Takakmautirmesha, atumí uuntri ju nuñkanam pujuinia nu ti péñker umirkatarum. Kristu umirkatniua áintsarum wishiktsuk ashamakrum tuke enentáijiai takarsatarum.

<sup>6</sup> Aya wáitmakui shiir enentáimtursat tusarum péñker takarsairap. Antsu Kristu takarniurja núnisrum ashí ame enentáimjai Yus wakera nu túratarum.

<sup>7</sup> Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijiai takasatarum.

<sup>8</sup> Kame chíkich chíkich ni takasmajai métek akinkiaratui. Ii Uuntri Kristu nu shuar péñker túramujai métek akiktatui.

<sup>9</sup> Tura atumsha, iniamniutirmesha, atumí takartamu wakaní mántutsuk shiir enentáijiai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

*Yusa kakarmarijiai íwianch taritratarum*

<sup>10</sup> Wátsek, yatsuru, ii Uuntri Yusjai tsaninkiu asarum ni ti kakarmarijiai iwianchjai máanaiktin kakaram ajastarum.

<sup>11</sup> Apach máanainiak jiru entsarua núnisrum Yus susamujai entsartarum. Nujai íwianch nupettamkui tariartatme.

<sup>12</sup> Kame Yusna takáa asar penké áentsjai máaniatsji antsu yajauch wakan kakaram írunna nujai máaniaji. Niisha ju nuñkanam, kiritniunma áintsan, tunaanum wekainia nuna akupin áiniawai.

<sup>13</sup> Jiru entsartinia áintsarum Yus súramna nu entsartarum. Nu entsarmajai itiurchat tsawant taritra nupetkarum tuke tariarum wajastatrum.

<sup>14</sup> Wats, nekas tariartin nekas chicham emenmamatarum. Tura péñker túratniujai jatairum ajaktarum.

<sup>15</sup> Suntar iwiarnak sapatan aweá áintsarum Yusa shiir chichame etserkatin iwiarnartarum.

<sup>16</sup> Nuyasha ashí nankaamas, tantar takustinia áintsan, Yus tuke nekas enentáimtustarum. Nujai íwianch ekeétrámkamusha uwemturtatme.

<sup>17</sup> Múukem ajaktincha Kristu uwemtikrampramu múukmjín etsenkructarum. Tura Yus-Chicham puniáa áintsan achiktarum. Nuka nekas Yusa Wakaní puniarinti.

<sup>18</sup> Yusa Wakaníjiai Yus áujeakrum tuke seatniuitrum. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum.

<sup>19</sup> Núnisan winiasha áujtustarum. Wi sepunam pujayatan Yus winia chichastinian surusat tusarum seatritiarum.

Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum.

<sup>20</sup> Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

*Amikmaamu*

<sup>21</sup> Ii aneamu yachi, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti.

<sup>22</sup> Tuma asamtai ii jui pujamun ujatmak ikiantamprarat tusan akuptajrume.

<sup>23</sup> Yus Apasha tura ii Uuntri Jesukrístusha ashí Yus-shuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

<sup>24</sup> Ashí ii Uuntri Jesukrístun tuke enentáijjai aneana nuna Yus shiir yáinti.

Nuke atí.



## Papru JIRIPIUSNUMIA SHUARAN papí akuptukma

*Papru sepunam pujus Jiripiusnumia Yus-shuaran áatramiania nu*

<sup>1</sup> Wi Papru Timiutéujai Jesuskristu takarín asar ashí Yus-shuar Jiripius péprunam pujarmena nu ju papí akuptaji. Yus-shuaran wainín árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesuskristujai tsanínkiu asakrumin ju papí áateajrume.

<sup>2</sup> Yus ii Aparísha Jesuskristu ii Úuntrísha atumin waitnen-tramainia ásar imiatkinchanum tuke shiir pujustinian yain-makarti.

*Papru Yus-shuaran Yúsan áujtawai*

<sup>3</sup> Ashí tsawant atumin enentáimtakun Yúsan tuke shiir yúminíajai.

<sup>4</sup> Yúsan áujeaknasha ti warasan seatjarme.

<sup>5</sup> Kame iikia yámankamtaiknumia Yus-Chicham métek yáiniáikiar iniaitsuk takasuitji.

<sup>6</sup> Yus atumín ti péñker awajsatniun naníkaasa núnisan Jesuskristu táatsain tuke shiir awájtámki nekas péñker najat-mattarme. Nuka ti nekasaiti.

<sup>7</sup> Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakuí átum yáintiarme. Yus ti aneñkartin asa nu túratniun mai metek tsañkatrámkaitji. Tuma asamtai atumin júnisan enentáimtustin ti peñkeraiti.

<sup>8</sup> Jesuskristu aneñkrattairíjjai wi atumin aneamun Yussha paant nékarui.

<sup>9</sup> Yúsan áujeakun anearmena nú naníkaamas aneak tusan seatjarme. Tura nújajisha ti neka ajasrum

<sup>10</sup> ashí péñkera nu achikiuk tusan Yúsan áujtajrume. Atumin nu túrunamtaíñkia yamaisha tunáajainchu pujustatrume tura Kristu támatai sumamashtatrume.

<sup>11</sup> Núnisan Jesuskristu kakarmaríjjai ashí péñker túrin áatrume. Tura nújai ashí shuar Yúsan ti shiir enentáimturartatui.

*Wi ju nuníkanam aya Krístunak enentáimtakun pujajai*

<sup>12</sup> Winin túrunamu itiurchat aín nujai uwempratin chicham nekas pampaawai. Nu nekaatarum tusan wakerajrume, yatsurú.

13 Iis, uunt akupniu suntarisha tura ashí shuarsha wi Krístunun etseru asan sepunam pujamun paant nékainiawai.

14 Ti untsurí Yus-shuar wi sepunam enketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

15 Kame shuar awai winia kajertuiniak tura nankaamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai.

16 Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai.

17 Antsu péñker shuar Krístun nekas aneenak etserainiawai. Nu uwempratin chicham imiá penkeraiti wi titin asamtai winiasha anentainiak shiir etserainiawai.

18 Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nankaamas shiir enentáimprattajai.

19 Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittijai.

20 Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujai winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarin winí nankaamas nekaawarat tusan wakerajai.

21 Wíjiainkia ju nunkanam iwiaaku pujakun aya Krístunak enentáimtakun pujajai. Tura jákatniusha jui pujajnia nuna nankaamas péñkeraiti.

22 Ju nunkanam pujakun Uunt Jesusan takasminiaitjai. Nu asamtai tunatsuk achiktaj nékatsjai.

23 Wíjiainkia itieurhataiti mai achiktin. Jákatniuncha wakerajai Krístujai tsaninkian pujustaj tusan. Wíjiainkia nu imiá péñkeraiti.

24 Túrasha atumin yáintaj tusan tuke ju nunkanam iwiaaku pujusminiaitjai.

25 Kame tuke pujustajai nékajai. Núnisnak atumjai pujakun Yus nekas enentáimtakrum nankaamas waraakrum tuke kat-suaruk tusan yáintatjarme.

26 Nu asamtai wi atumjai pujakui Jesukrístu yuminsarum shiir warastatrum.

27 Kristu chichame ti penker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum.

<sup>28</sup> Atumí nemasrjsha ishichkisha sapijmiamtikramkaraj̄n. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan̄ atí tusa Yus túrait̄i.

<sup>29</sup> Krístunu asarum Nii nekas enentáimtustinniasha tura Niiniu asarum wáitsatniusha Yus anenma asa tsankatramkaitrume.

<sup>30</sup> Yus-Chicham pamparat tusar maimetek ti takáa asar wáitiaji. Wi nuik ti takasmaj nu nekarmarme. Tura yamáí tuke takaaj nusha ántarme.

## 2

*Kristu péejchach ajasmatai Yus ti uunt awajsamiayi*

<sup>1</sup> Kristu ikiantamkuisha, ni anenkrattair̄i atsantamkuisha, ni Wakan̄i atumjaī pujakuisha, anenkratniuitkiurmesha, waitnenkratniuitkiurmesha

<sup>2</sup> waramtikrustarum. Métekrak takastarum. Mai metek anenaitiarum. Yusa Wakan̄i atumí enentáin̄ pujá asantai chikichik enentáik enentáimsatarum.

<sup>3</sup> Átum wakeramuk túrawairap. Nan̄kaamantu ajastaj t́irap. Antsu péejchach ajasrum chíkich shuar atumjaī nan̄kaamas péñker enentáimtusta.

<sup>4</sup> Aya níniak péñker átatna nunak shuar túrashti. Antsu chíkich shuar yáin̄minia nuna túrati.

<sup>5</sup> Kristu Jesus enentáimpramia núnisrum enentáimpratarum.

<sup>6</sup> Niisha Yúsaitiat̄ jū nun̄kanam winiak tuke Yusjaī métek átinian emettsuk

<sup>7-8</sup> antsu nuna ikiuak aents ajas péejchach asa ashí aentsu takar̄in̄ ajasmiayi. Tura aentsu ayash̄in̄ ayashimiak tura Yúsán umireak jákatniuncha surimiakchamiayi. Maa, imiá tunaarinnia áintsan̄ krúsnum natsanmainium jakamiayi.

<sup>9</sup> Túramtai Yus nekas nan̄kaamantu awajsamiayi. Ni náar̄in̄cha ashí paant awajsamiayi.

<sup>10</sup> Tuma asantai ashí nayaimpiniam írunna nusha, nun̄ká írunna nusha, tura iwiarsamusha Jesusa náar̄in̄ antukar tik-ishmatrartatui.

<sup>11</sup> Tura ashí shuar Jesukrístu ashí akupin̄ ajasman paant nekaawartatui. Nújain̄kia Yus Apá kakarmarjsha paant nekanattawai.

*Yus-shuar kiritniunam keeák tsáapin̄ awajeana áintsan̄ áiniawai*

<sup>12-13</sup> Nu asantai, aneamu yatsuru, wi atumjaī pujaku umirtukmarmena nuna nan̄kaamas yamaikia arant pujakuisha umirtuktarum. Iis, Yus atumí enentáin̄ takaak ni shiir wakeramu wakeruktinniasha tura umiktinniasha pujurtamprume. Nu asantai atumsha kakaram ajastarum Yus ti péñker awajtsatniun wakera nu túrunati tusarum. Tura

péejchach enentáimprarum awajirminiaitjai tusarum aneara wekasatarum.

<sup>14</sup> Ashí yajauch tunaitsuk tura jianaitsuk wekasatarum.

<sup>15</sup> Túrakrum makuumatsuk tunaajainchu átatrume. Antsu Yusa uchirí átatrume. Ju nunkanmasha shuar imiá tunaan túrinjaisha máatrachu asarum kiritniunam ji keeá áintsan ketrume

<sup>16</sup> iwiaaku pujustin chicham paant awajeakrum. Nújai Kristu támatái atumín ántran takascha asan ti shiir wararsat-jarume.

<sup>17</sup> Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna jui núnisrumek warastarum tusan wakerajrume.

<sup>18</sup> Atumsha waraakrumin métek wararnaisatai.

*Timiutéuncha Epaprutítiuncha Papru ujatkamiania nu*

<sup>19</sup> Ii Uuntri Jesus wakerakuinkia Timiutéun írmainiarat tusan ti warik akuptuktatjarume. Tura átum shiir pujamu ujateakui warastatjai.

<sup>20</sup> Kame Timiutéu wijiai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarume.

<sup>21</sup> Chíkichka Kristu wakeramun iniaisar ní wakeramunak páchiniawai.

<sup>22</sup> Túrasha átumka Timiutéu tuke péñker túramu nékarme. Uchi ní aparíjiai takaana áinis Yusa shiir chichame etserkatniun yáintkiaiti.

<sup>23</sup> Winia itiurtukartiñ nuna nekaan Timiutéu írmainiarat tusan akuptuktatjarume.

<sup>24</sup> Kame Kristu yáintkiui wíkisha wárik ímniaitjarume.

<sup>25</sup> Wi atumaj nuna írsati tusarum Epaprutítiu akupturkarmume. Wijiai métek tsaniñ takasuíti. Tura métek wáitsaitji. Áunkesha akupkamnia enentáimjai.

<sup>26</sup> Nii jaawai taman átum antukman nekáa, írmaitniun ti wakerutmarme.

<sup>27</sup> Maa, nekas ti janiñkiamai. Túrasha Yus nin waitnentra-mai. Kame winiasha wi jui wáitiakun nii jakamtai nu arant ti kuntuts pujuschatniun waitnentrurmai.

<sup>28</sup> Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarume.

<sup>29</sup> Kristu yuminsarum ti shiir warasrum wáinkiatarum. Chíkich shuar niijiai métek péñker Yus-shuar ainia nusha shiir enentáimtustarum.

<sup>30</sup> Kristu takatrñ takaak ti janiñkiamai. Átum yáintkiachminia nuna winia yáintkiataj tusa pujus jániñkiamai.

## 3

*Kristu nekaatin ashí nan̄kaamas péñkeraiti*

<sup>1</sup> Ayu. Warastarum, yatsurtiram, ii Uuntrī Kristu ti pen̄ker asamtai nuik áatramajrum nuna ataksha títiatjarme. Ataksha ujam yainmakminiaitkiuin̄kia wíj̄j̄ain̄kia itiurchatchaiti atak enentáimtikratin.

<sup>2</sup> Yajauch shuarj̄ai aneartarum. Nu shuar Muisais timia núnis tuke yamaisha tsupirnaktiniaitrum tuiniawai.

<sup>3</sup> Antsu iikia ayash tsupirnakmaj̄ai péñker átiniat̄ji tu enentáimtats̄ji. Iikia antsu ii wakan̄j̄j̄ai Yus shiir awajeaji tura Jesukrístunu asar Niñki shiir warar̄ji. Nu túrakur Muisais timia nu umintikia iit̄ji.

<sup>4</sup> Ju nun̄kanam írunna nuj̄ai waantu enentáimpramniaitkiuin̄kia ashí shuarj̄ai nan̄kaamas wikia waantu enentáimtumaraint̄jai.

<sup>5-6</sup> Israer-shuar asan Muisais timia núnisan̄ wi akiiniamtai uchu (8) tsawant nan̄kaamasmatai tsupirtukarmiayi. Israer-shuarnum Pin̄jamín̄ weeit̄jai. Winia aparsha nukursha mai Israer-shuar áiniakui wi imiá Israer-shuarait̄jai. Wisha Pariséu tuinia núnisan Muisais akupkamun ti umirin asamtai chíkichka winia sumamtikiatniun tuj̄in̄trin ármiayi. Tura Pariséu asan Kristu-shuarin ti kajerkan áin̄tram̄jai.

<sup>7</sup> Ashí nuj̄ain̄kia waantu enentáimtumauyaj̄ai. Antsu yamaikia Krístuj̄ain̄kia pen̄ké ántar áiniawai taj̄ai.

<sup>8</sup> Ashí enentáimpramnia ákuisha winia Úuntur Jesukrístu shiir enentáimtustin nekas péñkeraiti. Nu asamtai Krístunu ajakun wi takusmaj nu muijm̄iai ajasmatai núnaka iniaisam̄jai.

<sup>9</sup> Nuna túran Niij̄ai tsan̄in̄kian puj̄aj̄ai. Tura akupkamu umirkatniuj̄ai péñker ajaschait̄jai antsu Krístun enentáimtakui Yus “péñkerait̄me” túrutui.

<sup>10</sup> Tuma asamtai ashí nan̄kaamas wakeraj nu júiti: Krístun péñker nekaan nekas enentáimtustinnia sha tura ni iniantkimi kakarman takustinnia sha wakeraj̄ai. Tura Niij̄ai métek ajastinian wakerakun ni wáitkiamunam tsan̄in̄tinnia sha tura Nii jakamia núnisan j̄akatniuncha wakeraj̄ai.

<sup>11</sup> Túraknaka Krístuj̄ai métek jakamunmaȳa nantaktiaj tusan wakeraj̄ai.

*Papru kakaram ajasm̄iayi Kristu wakeramun umiktinian*

<sup>12</sup> Kame wakerakuit̄jia nuna mash umirkachuit̄jai. Krístuj̄ai métek nekas péñker shuar ajaschait̄jai. Túrasha Kristu Jesus “nuj̄ ejetajam” emka túrutkui, wisha nuj̄ jeataj tusan kakaram ajasan pimpitsuk takaaj̄ai.

13 Yatsuru, wisha nu*j* jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai.

14 Tura nuna umikmatai nayaimpiniam Jesukrístujai tsaniñkian shiir pujustinian Yus surustatui.

15 Ashí shuar Yusj*ai* katsuaru ájnia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme.

16 Tura aneartarum. Naki pujutsuk jeajnia nuj*ai* métek umirkatin pimpitsuk takastiniaitji.

17 Yatsuru, wisha tura chikichcha wijj*ai* métek péñker túrajnia nu wáinkieuram atumsha núnisrumek túratarum.

18 Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun mu*j*jiainiawai.

19 Tuma ásar emesratniunam akupnakartatui. Ni ayashí wakeramun, ni yusria áintsan, tuke umirainiawai. Natsanmainian túruiniayat wararainiawai. Tura ju nunñkanmayanak enentáimtuiniawai.

20 Antsu iikia nayaimpinmaya shuar asar ii Uuntri Jesukrístu in uwentikrampra asamtai nayaimpinmaya tatí tusar nákaji.

21 Nii taa, ii yajauch ayashin yapaj*ia* ni ayashíjj*ai* métek ti shiir awajsattawai. Ashí uunt akupin ajas nu kakarmaj*ai* túrutmattaji.

## 4

### *Krístujai tsaniñkia wekáa asarum warastarum*

1 Nu asamtai, aneamu yatsuru, ii Uuntri Krístuj*ai* tsaniñkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentaímsatniua núnisnak shiir enentáimtajrume.

2 Ewautiancha tura Séntikincha, ii Uuntri Kristu shuar*i* ásar, mai metek enentáímsarat tusan seajai.

3 Amincha, winia airú, nu nuw*a* yáinñkta tusan seajme. Niisha wi iwiaaku chichaman étsereakui wijj*ai* métek takasarm*ai*. Tura Krimintisha tura chikichcha wijj*ai* métek takasarm*ai*. Nuna náar*in* iwaaku átinnium Yus áatrait*i*.

4 Nu asamtai Uunt Jesusj*ai* tsaniñkia pujá asarum warastarum. Ataksha “warastarum” tájarme.

5 Uunt Jesus tátin ishichik ajas*ai*. Tuma asamtai tsanñka enentá*i* takakrum nu paant nekanati.

<sup>6</sup> Itiurchat enentáimsatin atumjaj penké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yuminsata.

<sup>7</sup> Nuñkia atumí enentáj ankant átinian, áentstikia penké nekaachminia nuna, Yus amastatui. Yus atumin ankant awajtamsa asa atumí enentáin tura atumí enentáimsamuríncha yajauch wayawajin tusa shiir waitmaktatrumé Jesukrístujaj tsaniñkiu asakrumin.

*Ashí péñker ana nu enentáimsatarum*

<sup>8</sup> Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péñker enentáimtusminia nusha, kame ashí péñker ana nu enentáimsatarum. Nuyásha chíkich shiir anturkamnia ana nusha enentáimsatarum.

<sup>9</sup> Wi unuiniarmajrumna nu umiktarum. Tura wi túramur ísurmena nu tura antukurmena nusha umiktarum. Túrakrumniñkia Yuska ankant átinian amastaj tusa pujurtamsattarme.

*Jiripiusnumia Yus-shuar Páprun kuítian akuptukarmiania nu*

<sup>10</sup> Ii Uuntri Kristu anea asarum winiasha ataksha enentáimturu asakrumin ti waraajai. Kame kajinmatrukmiarme tátsujaj antsu kuítrum atsakui yáintkiatin tujinkiamarme.

<sup>11</sup> Tura kuítian atsumakun tátsujaj. Antsu wi takakjana nujajin warastinian unuimiáruitjai.

<sup>12</sup> Kuítrinchatu pujustinia nuna nékajai tura ti nukap takustinia nunasha nékajai. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai.

<sup>13</sup> Kristu ni kakarmarın surakui ashí túramniaitjai.

<sup>14</sup> Tuma ajin atumsha wi atsumamu akupturkarum ti péñker túramarme.

<sup>15</sup> Jiripiusnumia shuartiram, ju ti penker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujaj atumí wakanin yainma asamtai yuminsarum akupturkamiarme.

<sup>16</sup> Atumek wi Tisarúnikia nunkanam atsumakun pujaisha kuit akupturkamiarme.

<sup>17</sup> Aya kuit akupturkakrumin tu enentáimtsujaj. Antsu nu kuit Yusaj kawentramkaku tusan wakerajrumé.

<sup>18</sup> Epaprutítijaj akupturkamarum nujajsha atsumamaj nuna nankaamas tiaruncha wáinkiajai. Akupturkamarum nusha ti kunkuin Yus susamua áinis ti shiir auyi.

<sup>19</sup> Winia Yúsrusha ti péñkeran núkap takakui. Atumsha Jesukrístunu ajasu asarum Yus seamniaitrome. Tura Yuska ti takakna nujaj ashí atsumarmena nuna suramsattarme.

<sup>20</sup> Ii Aparí Yus tuke shiir atí. Nuke atí.

### *Amikmaamu*

<sup>21</sup> Winia náaruisha tura Jesukrístu náarincha ashí Yus-shuar ainia nu chícham ujatruktarum. Niisha shiir pujusarti. Wi írutramusha núnisañ shiir pujusarti tusa akupturmainiawai.

<sup>22</sup> Tura ashí akupin Sésaraj pujuinia nuyá Yusna ajaruka tura chíchich Yus-shuarsha shiir pujusarti tusa chichaman akupturmainiawai.

<sup>23</sup> Ii Uuntri Jesukrístu atumniasha ti shiir yainmakarti. Nuke atí.



## Papru KURUSENMAYA SHUARAN papí akuptukma

*Kurusenmaya Yus-shuaran Papru áatramiania nu*

<sup>1</sup> Wi Pápruitjai. Yus wakerutak Jesukrístunun etserkat tusa akatra akupkamuitjai. Wis̄ha ii yach̄i Timiutéujai

<sup>2</sup> ju papí áarar nūi Kuruse péprunam Krístu péñker umirkarum Yusna ajasuitrumna nu akuptaji. Yus ii Apari atumin wáitnentaĩturma asa yainmakarti imiatkinchanum tuke shiir pujustinian.

*Papru Yus-shuaran Yúsan áujtushmanis nu*

<sup>3</sup> Iisha atumin Yus áujtakur ii Uuntri Jesukrístu Apari Yus ashí tsawant yúmiñkijai.

<sup>4</sup> Atumsha Jesukrístu ti shiir enentáĩmtamusha tura ashí Yus-shuar aneamusha antukji.

<sup>5</sup> Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatia tusarum nákarne.

<sup>6</sup> Nu chicham ashí nunkanam pampaakui shuara enentáĩn nereá áinis nusháa ajasar yamaikia péñker túrin áiniawai. Núnisan̄ atum̄incha túrunaiti. Yus ti nekas anenkartiniaiti tu etserkamu ántakrumin nu chicham atumí enentáĩncha nerekmiai.

<sup>7</sup> Nu chichaman Épapas ujatmakmarme. Niisha iijjai métek takasu asamtai ti aneamuiti. Atumniasha Krístu takatrin̄ ti shiir takartamsaiti.

<sup>8</sup> Niisha átum Yus-shuar asarum mai anenai ajamun ujatmakmaji.

<sup>9</sup> Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáĩmtairijjai ashí Níiniun paant nekaatniun Yus jintintramat tusar seaji.

<sup>10</sup> Atumsha Krístunu ainia núnisrum péñker túrutak tusar seaji. Tura ashí ni wakerana nu umiákrum ashí péñker ana nu, nerektinia áintsarmek, túrattarme. Núnis túrarum Yus unimiatki wéakrum Nin ti peñker nekaak tusar seaji.

<sup>11</sup> Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsuntrattarme.

<sup>12</sup> Yus ni shuarin̄ tsáapninia nūi ashí péñkeran susattawai. Tura incha nūi pachiinkiatniun tsan̄katramka asakrin Yus Apa yumiñsanniaitrum.

13 Yus iwianchin nupetak íwianch akupeana nú kiritniun-maya uwentikramar ni aneamu Uchirí akupeana nuĵ wear-makmiaji.

14 Ni Uchirí krúsnum jaka ii tunaarĵn nijiar tsanĵkurtamar uwentikrampramiai.

*Kristu jakamujai Yusjai nawamnaikiar shiir pujustin*

15 Yus wáinkiachminiaitiat ni Uchirí akiiniamai tura ayashimkiamiayi. Túmaitiat ashí najanamua nuna yaunchu pujú asa ashí akupniuiti.

16 Niiĵiai Yus ashí nayaimpiniam írunna nunasha nunĵá írunna nunasha, ashí wáiniaĵ nunasha núnisaĵ wáintsuj nunasha mashi najanamiayi. Nu arantcha ashí akupin ĵu nunĵanam írunna nusha, nayaimpiniam írunna nusha, iwianchnium írunna nusha, ashí Niiĵiai najanamu áiniak Nin umirkarti tusa najanamu áiniawai.

17 Ashí najanamua nuna yaunchu, Krístuka tuke pjuwiti. Ashí najanamu írunna nuna emestsuk wáinniuiti.

18 Ashí Yus-shuar métekrak chikichik ayashtinia áinis enentáimkiumka nuna muuke Krístuiti. Tura nu ayashĵn ni iwiaakmarĵiai iwiaaku átinian súsaiti. Niisha ashí jakamunmaya nantakniujai imiá nanĵkaamantuuti. Núĵainĵia ashí enentáimpramnia írunna nunasha akupniuiti.

19 Yus ashí takamtsuk Kristui shiir pujumiayi.

20 Núnisaĵ Yus Kristu krúsnum jakamujai ashí nayaimpinmasha tura ĵu nunĵanmasha írunna nuna Niiĵiai nawamnaikiar shiir pujusarat tusa wakerukmiayi.

21-22 Atumsha nuik tunáa túrin asarum atumí enentáĵn Yusa nemasrĵ ámarme. Tuma asarum yajá wekaimiarme. Antsu Kristu, aentsu ayashĵn ayashimiak, krúsnum wáitias jakamujai ii tunaarĵ asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamtatji.

23 Tuma asantai Jesukrístu shiir enentáimtusrum kakaram ajasrum katsuartiniaitrome. Tura uwempratin chicham antukuitrum nuyá kanakchatniuitrome. Ĵu uwempratin chichaman ashí nunĵanam etsernakuiti. Wisha, Papru asan, etserkatniun yaimjai.

*Papru ashí Yus-shuaran yáinĵkratniuiti*

24 Atumin wáitiaknasha ti shiir waraajai. Kristu ni shuarĵn nekas péñker awajsat tusa wáitiana nuĵ pachiiñkia asan waraajai. Ashí Yus-shuar Kristu ayashĵ áintsanĵ áiniakui Yus-shuaran yáinĵajtsan ayashrujai wáitiakun shiir enentáimjai.

25 Atumin yáin<sub>nk</sub>iai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáin<sub>nk</sub>trintjai.

26 Yámankamtaiknumiá nekaachman Yus yamaikia ni shuar<sub>nk</sub>in paant awajsaiti. Nu chichamnasha ujakarai tusa winia akatar akuptuku<sub>nk</sub>uiti.

27 Nu chichamsha júiti: Kristu atumí enentáin pujak Nii<sub>nk</sub>jai métek ti shíiram awaj<sub>nk</sub>tamsattawai. Nu imiá shiir chichamnum Israer-shuarchasha pachiiniainian Yus ashí ni shuar<sub>nk</sub>i nekawaarat tusa wakerimiayi.

28 Iisha Kristu étserea<sub>nk</sub>iji. Túrar ashí enentáimtikrar pé<sub>nk</sub>ker nekaawarat tusar jintintiainia<sub>nk</sub>iji. Nujai Krístujai tsani<sub>nk</sub>kiar ashí pé<sub>nk</sub>ker tsakarartatui.

29 Tuma asamtai Kristu ni kakarmar<sub>nk</sub>in tí surakui nekas kakaram takaajai.

## 2

1 Nekaatarum, yatsuru. Yus-shuaran yáin<sub>nk</sub>taj tusan ti takaa<sub>nk</sub>jai. Tura atumín<sub>nk</sub>cha, Rautiséanmayá shuarnasha, tura ashí winia waitcha ainia nunasha yáin<sub>nk</sub>taj tusan ti takaitjai.

2 Ashí shiir enentáimtikratniun ti takaa<sub>nk</sub>jai. Núnisan aneniarum chikichik enentáij<sub>nk</sub>jai métekrak wekasatarum tusan wakerajrume. Nu arantcha, ashí Yusna ti pé<sub>nk</sub>ker nekaarum tuke katsu<sub>nk</sub>aruk tusan takaa<sub>nk</sub>jai. Nujai Kristu ti pé<sub>nk</sub>ker nekaatarme. Tura yaunchu nekaachman Yus yamá<sub>nk</sub>i paant awajsaiti. Nuka Krístu<sub>nk</sub>itui. Tura Nii nekaatin nekas shíiraiti.

3 Tura kakaram ajasam Kristu pé<sub>nk</sub>ker nekaam ashí shiir enentáimpramnia nusha tura ashí Yusna nekaamnia nusha nekaatarme.

4 Atumin chí<sub>nk</sub>kich shuar niisháa chicham<sub>nk</sub>jai shiir chichartamas ana<sub>nk</sub>kramawar<sub>nk</sub>in tusan nuna tájarme.

5 Wi nu<sub>nk</sub>i atum<sub>nk</sub>jai pujachkuncha nu<sub>nk</sub>i pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjai.

6-7 Nu asamtai átum ii Uuntr<sub>nk</sub>i Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Nii<sub>nk</sub>jai tsani<sub>nk</sub>krum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yus<sub>nk</sub>jai kanakchattarme. Yus-Chicham núnisan<sub>nk</sub> etsernakmatai nekamarme. Tuma asarum Yus tuke yum<sub>nk</sub>nsarum, núnisan<sub>nk</sub> pé<sub>nk</sub>ker wekasatarum.

*Krístujai yamaram iwiaakma takakji*

8 Aneartarum atumsha. Shuar aentsti enentáimmi<sub>nk</sub>aj<sub>nk</sub>in ashí ju<sub>nk</sub> nun<sub>nk</sub>kanmay<sub>nk</sub>an enentáimprar tura Krístun enentáimtutsuk

niisháa chichaman áujtamainiak nekaschajai anan̄kramataj tusa wakerutmainiawai.

<sup>9</sup> Krístunam Yus ashí takamtsuk pujuwiti.

<sup>10</sup> Túmakui atumsha Krístujai tsan̄n̄kiu asarum ni iwiaakmar̄i takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti.

<sup>11</sup> Nu arant átum ayashnium tsupirnatskesha Kristu shuarī ajasakrumin ashí ayash wakeramun, tsupirkatniua áintsan̄, Kristu ajapamiayi.

<sup>12</sup> Tura atumsha Yus ni kakarmarijiaj̄i Kristu jakan iniantkimia nu enentáimtusrum imianmiarme. Túrarum Krístujai métek iwianasmarme. Tura núnisrumek Krístujai métek nantakmiarme.

<sup>13</sup> Nuikkia átumsha tsupirnatsuk atumí tunaarī tuke akui atumí wakan̄in̄ jákauyarme. Tura yamaikia Jesukrístujai tsan̄n̄kiu asakrumin Yuska atumí tunaarī tsan̄kur yamaram iwiaakman suramsaitrume.

<sup>14</sup> Tura ashí ii tumashr̄in̄ sumamtikramatin amia nuna japiruiti. Kristu krúsnum jakamtai ashí akupkamujai sumamtikramamun tsan̄kurtampramiai.

<sup>15</sup> Núnisan̄ Kristu krúsnum jaka, iwianchnium ashí akupin ainia nuna nupetak ashí íimiain̄in̄ iniatsararmiayi.

*Nayaimpiniam írunna nu enentáimtustarum*

<sup>16</sup> Akupkamunmaja Yus an̄kant awajtamsamtai chíkich shuar ame túramujaī yajauch enentáimturmar̄in̄. Yúamna nujaī, úmamna nujaī, uwitinha, nantutinha, tura tsawantinha nampermam nujaī chíkich shuar yajauch áujmatramkuisha ¿warí urukatin̄?

<sup>17</sup> Nu nampernum Israer-shuar Kristu túrattana nuna nakumainiak túrin ármiayi. Tura Kristu taa imia Nin̄ki pujá asamtai nakumkamuka ántrai.

<sup>18</sup> Tura shuar “Péejchach ajasam Yus áujtsuk aya Yusa suntarī shiir awajsatniuiti” túramkuñkia anturkairap. Nu shuar mesekranam wáinkiamun áujmatenak ántar nan̄kaamantu enentáimtumainiawai. Aya aentsti enentáimian chichainiawai.

<sup>19</sup> Tuma ásar Krístujaī tsan̄n̄kiar wekainiatsui. Kristu ashí akupin asa ni shuar̄in̄ Yúsnan̄ jintintiá shiir tsakarat tusa péñker wáiniui. Nu arantcha ashí ápateak Yus wakerana áintsan̄ chikichik awajeawai.

<sup>20</sup> Atumsha Krístujaī jaka asarum aya aentsti enentáimtai ikiukniuitrume. Nuikia ¿urukamtai jū nun̄kanmaja ana nu tuke páchiarum? Nii tuinia nu umirkashtiniaiti.

<sup>21</sup> “Jū antiñchatniuiti, tuiniawai. Jū yúashtiniaiti. Tura jū achikchatniuiti” tuiniawai.

<sup>22</sup> Nusha çwarí, takasam amuukashtatuak? Kame áyatik aents akupkamu áiniawai.

<sup>23</sup> Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeatsui.

### 3

<sup>1</sup> Nuikia Krístujai nantakin asarum nayaimpinmaya írunna nu wakeruktarum. Nui Kristu pujawai Yusa untsuuríni.

<sup>2</sup> Ju nuñkanam ana nu enentáimtsuk aya nayaimpinmaya ana nu enentáimtustarum.

<sup>3</sup> Atumsha Krístujai tsaninkrum jakarmame. Tuma asarum Krístujai tsaninkrum Yusjai iwiaaku pujarme.

<sup>4</sup> Krístukete ii iwiaakmari. Nii nayaimpinmaya wantinkuisha atumsha Niijjai métek wantinkiattarme. Tura Niijjai métek ti penker átatrume.

#### *Yaunchu iwiaakmasha tura yamaram iwiaakmasha*

<sup>5</sup> Tuma asamtai ju nuñkanmaya ana nu ajakratniua áintsarum iniaisatarum. Tsanirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsan asamtai iniaisatarum.

<sup>6</sup> Shuar Yúsan umirtsuk aya nuna túrin ásarmatai Yus nin kajerak ti asutiáttawai.

<sup>7</sup> Atumsha núnisrumek túriniuyarme.

<sup>8</sup> Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum.

<sup>9</sup> Yus-shuar ajasrum yaunchu enentáimtairam iniaisarmame. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap.

<sup>10</sup> Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Niijjai métek shiir atí tusa. Túramtai Yus ti penker nekaki wéaji.

<sup>11</sup> Krístuka ashí írunna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

12 Yus atumin anenmak Niiniu arti tusa achirmakmarme. Túrutma asamtai jujai shiir iwiarmampratniua áintsarum tuke túrin atarum: waitnenkartin, shiir awajkartin, péjchach átin, émtin áchatin, tura katsuntin átin.

13 Kristu atumí tunaarin tsankuramia núnisrumek nuamtak tsankúrnáiratarum. Chíkich yajauch awajtamkuisha shiir kat-suntram yapajniaitsuk tsankúrnáiratarum.

14 Tura ashí nankaamas anenaitiarum. Túrakrumka chikichik ajasrum mash pé<sub>n</sub>ker túrattarme.

15 Kame chikichik ayashtinia áintsarum ajastarum tusa Yus ni shuarij ajasat tusa achirmakmarme. Tuma asamtai Yusa shiiri atumí enentáin pujurtamsati. Nujai Yus yu-miñsatarum.

16 Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijjai Yus yumiñsarum shiir awajsatarum.

17 Tura takaakmesha, chichaakmesha, kame ashí túramna nuka Jesukristu shiir awajsataj tusam ni kakarmarijjaiin túrata. Túrakum Krístujai Yus Apa yumiñsata.

### *Yus-shuar túratniua nu*

18 Nuwatiram, atumí aishri umirkatarum Uunt Yus nuna wakerakui.

19 Áishmantiram, atumí nuwé aneatarum. Atumí nuwejai kajernaikiairap.

20 Uchitiram, ame apa nukusha tuke umirkatarum. Nu túrakrum Yus shiir enentáimtiksattarme.

21 Uchirtintiram, atumí uchiri ti kakantrairap. Ti kakanteamka uchisha ti kuntuts pujus pé<sub>n</sub>ker wekasatniun nakitchanpiash. Nu túrunawain tusarum ántrarum atumí uchiri kakantrairap.

22 Takarniutiram, atumí uuntri shiir umirkatarum. Ju nunkanmaya uuntri ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke pé<sub>n</sub>ker takastiniaitrum.

23 Ashí túramna nu asump enentáijjai takakmasta. Aya aentsuk yáintinia áintsachu antsu nayaimpinmaya Úuntrum yayá áitkiasrum takastarum.

24 Ame Úuntrum Kristu asa nayaimpiniam ashí shiir takustinian tsankatramkattawai.

25 Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

## 4

1 Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk péñker iniar-tiniaitrume.

2 Yus áujkuram Nii yumĩsarum asummiarum iniaitsuk áujsatarum.

3 Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir ankant etserkat tusarum áujtursatarum.

4 Tura wi paant etserkatniuitiaj núnisan etserkat tusarum áujtursatarum.

5 Yus-shuarhajai shiir túratarum Yus-Chichaman yajauch enentáimturain. Kakaram ajasrum tsawant ántrarum iniankasairap.

6 Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

*Amikmaamu*

7 Ii aneamu yachj Tíkikiu ashí wínian ujatmaktatrume. Niisha wijjai métek Yúsnan pimpitsuk ti peñker takasuiti.

8 Nu asamtai ii jui pujajnia nuna ujatmak ikiantamprarat tusan akuptajrume.

9 Núnisan ii aneamu yachi Unisemu niijjai winiawai. Niisha atum wéeaiti, tura Yusjai shiir wekaawai. Nu shuar ashí jui túrunamun ujatmaktatrume.

10 Aristarku wi sepunam tsaniñkia pujamur amikmaatmarme. Núnisan Markus, Pirnapí kaná yachja nu, amikmaatmawai. Niisha nu jeamtai antukmarum núnisrum péñker wáinkiatarum.

11 Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai.

12 Épaprassa, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjai kakaarum tuke shiir Yus wakera nu túrak tusa seatramprume.

13 Wisha Épapas atumin ti enentáimturman nékajai. Núnisan Rautiséanamaya shuarnasha tura Iarapurisnumia shuarnasha ti páchiniawai.

14 Rukas, aneamu tsuákratin, núnisan Témassha amikmaatmarme.

15 Tura Rautiséanam pujuinia nú Yus-shuarsha amikmaatruatarum. Núnisan Nímpiassa tura ni jeen irunainia nú Yus-shuarsha amikmaatruatarum.

16 Átum ju papí áujсарum umikrum Rautiséanmasha nuyá Yus-shuar áujсarti tusarum akupkatarum. Tura atumsha núnisan Rautiséanmaya papí támatai atumsha áujсatarum.

17 Tura ju Arkipiu titiarum: “Ii Uuntri Jesus ni takatrin suramsa nu péñker umikta” tawai, titiarum.

18 Wi, Papru, winia uwejruijaj júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.



## Papru

# TISARÚNIKIANMAYA SHUARAN

## Emka papín aar akuptukma

*Papru ni tsaniakmarijjai Yus-shuaran áatramiania nu*

<sup>1</sup> Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarne. Atumsha Yus-shuar asarum Apa Yúsnaitrume, tura Uunt Jesukrístunuitrume. Ii Apari Yus, tura ii Uuntri Jesukrístu waitnentrama ásarmatai, ti shiir imiatkinchanum pujustarum, tu wakerajrume.

*Tisarúnikianmaya shuar Yus nekas enentáimtusar umirkatniun jintintiarmania nu*

<sup>2</sup> Iisha Yus áujkurkia atumniasha tuke enentáimtusar Yus shiir yuminsaji.

<sup>3</sup> Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukrístu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume.

<sup>4</sup> Yatsurú, Yus anenmarme. Anenma asa Winia arti tusa achirmakurmena nusha nékaji.

<sup>5</sup> Enentáimpratarum. Iisha Yúsai Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakaní kakarmarijjai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

<sup>6</sup> Atumsha yamaikia íksarmek ii túramiaj nu, tura ii Uuntri Jesukrístu túramia nu túrarme. Itiurchat aijn Yus-Chicham umikiurme. Tura wáitiatrumek Yusa Wakaní shiir enentáimtikramkui warasrum pujarme.

<sup>7</sup> Nu túrakrum ashí Masetúnia tura Akaya nunñanmaya Yus-shuarsha shiir wekasatin jintintiarne.

<sup>8</sup> Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunñanmaya shuar nuna nékainiawai. Tura nú nanñaamas Yus nekas umirkarumna nuna ashí aents nékainiawai. Nuna nékainia ásar ii étserman atsumainiatsui.

<sup>9</sup> Antsu átum in péñker itiaamun nii íksañ ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji.

<sup>10</sup> Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha

ujatmainiaji. Iis, Jesus Nínkiti Yusa kajetáiri tsawantri jeat-tana nuyá uwemtikrampratin.

## 2

### *Yus-chichaman paant ujakarmiania nu*

<sup>1</sup> Atumsha nékarme, yatsurú, iisha ánrar atumín jeachmaji.

<sup>2</sup> Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitiatan Yus yáintkiui Yusa chichamen ujakmajrume. Nuka atumsha ti penker nékarme.

<sup>3</sup> Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarne.

<sup>4</sup> Antsu Yus in penker enentaimturmas Uwempratin Chicham etserkatarum tusa akatrampramiaji. Tuma asamtai núnisrik étsereaji. Túrasha aya aents waramtikсатаi tusar étsertsuji. Antsu Niñki Yúsak ii enentáin nekartamin asamtai, shiir enentáimtikсатаitsar túraji.

<sup>5</sup> Átumka nékarme, penkesha shíirmach chichasan anañkachjarne. Nuyasha, kuit achiktai tusar ánrar chichaschamji. Núnaka Yus nékawai.

<sup>6</sup> Iisha Kristu akatramuríntji. Tuma asar ni kakarmarijjai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji.

<sup>7</sup> Antsu uchi kuírchin ni nukurí penker iis tsakatmana áintsarik iikia atumniaka shiir íismajrume.

<sup>8</sup> Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachaaji, atumín ti anea asari.

<sup>9</sup> Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarme. Iis, Yus-Chicham étserkur, tsawajisha káshisha takasmiaji. Nusha, akirkata, tjjj tusar takakmasmiaji.

<sup>10</sup> Yatsurú, atumjai pujumiaj nu iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichartamkatniusha atsumiaji. Nuka atumsha nékarme tura nú arant Yus nékawai.

<sup>11</sup> Tura atumniasha añkant añkant Yúsnum ikiakármajrumna nu nékarme. Tura uchin ni aparí átsañkeana nútiksarik shiir enentáimtikramajrumna nusha nékarme.

<sup>12</sup> Tura Yúsjai shiir wekasatarum tímiajrume. Yus nañkaamas uunt asa ashí akupeawai. Tura Yus-shuaraitrumna nuna, Winin pachiinkiarat tusa, Yus

untsurmarme. Yus untsurma asamtai Níiniuitrume. Niiniu asarum Yusa uchirja núnisrumek wekasatniuitrume.

<sup>13</sup> Yus-Chicham ii étserma antukrum, aya áentsnumiãñchaiti tímiarme. Yúsnumiãiti tímiarme. Nu tiniu asarum umirkarmarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmiñkijaji.

<sup>14</sup> Yatsurú, ju nekaatarum. Aya atumek wáitiatsrume. Ashí Jutía nuñkanam Israer-shuar, ni shuarin ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuarin wáitkiarmainiawai. Nujai Jutía nuñkanmaja Yus-shuarjai métekrak ajasurme.

<sup>15</sup> Niisha Israer-shuaraitatan Yus-Chichaman etserin armia nuna nuamtaketiat máawarmiayi. Tura nú weeák Uunt Jesunasha máawarmiayi. Tura incha aa jiki akuptamkarmijaji. Maaj, niisha Yúsan shiir enentáimtikianiatsui. Tura núnisan ashí áentsun kajerainiawai.

<sup>16</sup> Warí, Israer-shuarcha Uwempratin Chicham ujaktaj tákurnisha niisha suritramainijaji. Nuna túruiniak yaunchu tunaan túriarmia nújainkia nan kaamas yamaikia túrawarai. Pai, túrasha yamaikia Yusa kajetairi imiá tsumai ana nui pujusarai.

### *Papru ataksha Tisarúnikianam irautajtsa wakerimiania nu*

<sup>17</sup> Iisha, yatsuru, ishichik tsawant atumijya kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji.

<sup>18</sup> Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntrí Satanás tuke nuna suritrammijaji.

<sup>19-20</sup> Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukrístu tátintri shiir enentáimsar nákaji. Nii támatai imiá warastatji. Atumin Yus-shuar awajsa asar, Nii támatai atumsha iijjai Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

## 3

<sup>1-2</sup> Iisha ataksha atumin iistaitsar ti wakerimji. Tura tujinti-akur iikia Atenas péprunam juákur ii yachi Timiutéu atumin

írmainerat tusar akupkatai, timiaji. Iisha Kristuj Uwempratin Chicham etsermiaj nuĭ, Timiutéuka iijjai métek takasuiti. Tuma asa niisha Yusa takatrĭn takáa asa atumniasha Yusaj kakartarum turamarti tusar akupkamji.

<sup>3</sup> Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinea nuka páchitsuk wáitsatniuitji. Iis, tuma asantai atumsha ti nekas itiurchatnum pujarme, Yus-Chicham umirka asarum.

<sup>4</sup> Iimiatarum, atumjai nuik tuke pujumjinea nuĭ “iisha wáitsartaji” tíchamkajrum. Iis, túrunachaik. Nuka nékarme.

<sup>5</sup> Tura atumin íwianch tunaanum ajunmarchariash tusan, wisha kúntuts enentáimsamijai. Tura ánrar takaschajash tu enentáimsamijai. Tuma asantai nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yúsjai péñkerash wekainia tusan, “nu inintrusam ikiuuta” timiajai.

<sup>6</sup> Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji.

<sup>7</sup> Tuma asantai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji.

<sup>8</sup> Atumsha Yúsjai tariara weká asakrumin, shuar jaa péñker ajas enentái chinkiana áintsarik enentáimji.

<sup>9</sup> Yus péñker umirka asakrumin, iisha shiir waraaji. Warasu asar ii Yusrĭ ti yúmiñkiaji.

<sup>10</sup> Incha Yus akuptamkurniñkia atumiĭn tímiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

<sup>11</sup> Atumiĭn weri ístinian ii Aparĭ Yussha tura ii Uuntri Jesukrístusha in yáinmaktai tusar wakeraji.

<sup>12</sup> Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikrampartí. Tura nú nukap anenkrattain Yus amasartí tusar wakeraji.

<sup>13</sup> Yus ikiakátmakui átum tunáa túrutsuk Yus umirkarum wekasatarum tusar ii Aparĭ Yus seaji. Ii Uuntri Jesus Níniurijjai winiak péñker wekaarmin tati tusar taji.

## 4

### *Péñker túratniun Yus wakerana nu*

<sup>1</sup> Iikia Uunt Jesus akupkamuitji. Tuma asar nu kakarmajai atumniasha ju túratarum tusan akupeajrume. Atumsha

iwiaaku pujarmena nuĭ Yus shiir waramtikstarum tura tuke pēnker túrukum wetarum tusar seajrume. Iisha nuik atumin unuiniarmajrumna nútiksarmek túratarum.

<sup>2</sup> Uunt Jesusa akupeamurijjai tura nu kakarmajai atumni-asha nuik unuiniarmajrumna nu átumka nékarme.

<sup>3</sup> Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanir-maashti”.

<sup>4-5</sup> Yus-shuarcha ainia nu, Yúsan nékainiachu ásar, aya ninĭki enentáimtumasar aya ni ayashĭ wakeramunak umiktinĭan wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuarĭ pēnker enentáimtusrum shiir aneasrum ayastarum.

<sup>6</sup> Nú arant, amesha ame yatsum anankam ni nuarĭ yajauch awajtusaip. Nu túrakrumninĭkia ii tímiajrumna nútiksān Uunt Yus ti kakaram asutiámawartatui.

<sup>7</sup> Warĭ, Yus incha pēnkercha yajauch túratarum turamchaitji. Antsu aya pēnkerak túratarum turamji.

<sup>8</sup> Tuma asamtai shuar ju chichaman nakitiakka áentsun nakitiatsui, antsu Yúsan nakitraitĭ. Tura nu Yussha ni Wakanin amaawiti tunaan túrashtinian.

<sup>9</sup> Tura yamaikia nuamtak Yus-shuar aneniastin ana nuna ti neka asakrumin áatrashtatjarme. Warĭ, imia Ninĭki Yus atumin mai anenai ajatniun jintinramawarmatai nékarme.

<sup>10</sup> Iis nútiksarmek aneniatsrumek ashĭ Masetúnianam matsatania nujai. Túrashta, yatsuru, atumí anenkrattairĭ nú nukap ajasti tusan, seajrume.

<sup>11</sup> Yamaikia tímiaj nútiksarmek, yayauchin túruinia nuĭ wekatsuk, chĭkich shuarna pachittsuk, atumí takatriin shiir anĭkant pujusrum atumí uwejejin takakmá pujutarum.

<sup>12</sup> Átum táasaĭrum tusan tájarme. Túrakrumninĭkia atumni-asha chĭkich shuar pēnker enentáimturmasartatui.

### *Kristu tátintri*

<sup>13</sup> Yatsuru, Yus-shuarcha ni shuarĭ jakamtai “atakká wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsaĭrum tusan juna tájarme. Jákaru ainia nu urukawartinkit paant nekaatarum.

<sup>14</sup> Jesus jákayat nantakchamkia. Núnisan Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha.

<sup>15</sup> Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikuakur émkishtatji.

<sup>16</sup> Antsu Yus akupeakui, Yusa suntarĭ uuntrĭ unsumkui tura Yusa kachurin umpuarmatai Uunt Jesukristu unsumuk

Yus pujamunmaya tarattawai. Nuinkia Krístunu ajarar jákaru áiniana nu iwiarsumunmaya nantakiartatui emka.

<sup>17</sup> Tura nuyá iisha Yus-shuar tuke iwiaaku pujajnia nu Krístujai yuranminiam ajapén inkiunaikiartatji. Nuní ashí nayaimpiniam ii Uuntri Jesukrístujai tuke iwiaaku pujusartatji.

<sup>18</sup> Tuma asamtai ju shiir chicham atumin ujakjana jujai mai ikiakánai ajatarum.

## 5

<sup>1</sup> Túrasha, yatsuru, ni tátintri waritin tura warí tsawantaj, nuka áatratin atsumatsrume.

<sup>2</sup> Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiiti. Núnisañ nákatasuk pujuiniaj Uunt Krístu tsawantri jeattawai.

<sup>3</sup> Ashí shuar “Pai, yamaikia ti nekas shiir péñker pujuinij” tu matsatainij, aya aneachma nunka mesertin tsawant jeattawai. Nuwá ajamtin aya aneachma jatema áintsañ, nékachmanum átatui. Túmakui pisartin penké atsuttawai.

<sup>4</sup> Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsañ tarutrámashatui.

<sup>5</sup> Enta, átumka tsáapninium wekáa asarum Yus-shuartirmeka nékaitrume. Iikia kiritniumianchuitji.

<sup>6</sup> Nu tuma asar, chíkich uruka núnisrik, ii enentájn kanar-tinia núnisrik “Warí, winia itiurtawa” tíchami. Antsu naka enentáimsar anearmi.

<sup>7</sup> Iis, kashi kanarchatniukait. Tura nampeena nu kashi nampeenawai.

<sup>8</sup> Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anankruawain tusa anear wekasatniuiti. Tura iisha núnisrik íwianch yajauch awajtamsaj tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsaj tuke pujustatji, tu enentáimprar wetái.

<sup>9</sup> Páantchakait. “Jinium wéchatniuitrume” Yus incha túramji. Antsu ii Uuntri Jesukrístujai uwempratniun tsankatramkaitji.

<sup>10</sup> Niijjai métekrak iwiaaku ami tusa Jesukrístu in jaru-tramkamiaji. Nu tuma asamtai iisha ii ayashijjai iwiaaku pujakrishia Niijjai iwiaakji, tura ii ayashijjai jáakrishia Niijjai tuke iwiaakji.

<sup>11</sup> Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

*Papru Yus-shuaran jintintiamiania nu*

12 Yatsurú, juna seajrume. Atumjai pujuinia nú shuar Yúsnan takakmainiakui shiir enentáimtustarum. Jintintramuk chichartamainiakui umirkatarum.

13 Yúsnan takainia ásarmatai ti péñker enentáimtusrum aneestarum. Tura yajauch awajnaitsuk ti shiir nawamnaikiarum matsamsatarum.

14 Tura junasha seajrume, yatsuru. Takastinian naki-tiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáinrarum. Tura ashí shuarjai kajetsuk katsuntrarum wekasatarum.

15 Aneartarum, yatsuru. Chíkich yajauch túrutmamtai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túratarum.

16 Tuke shiir warasrum pujustarum.

17 Tuke tsawant iniaitsuk Yus áujsatarum.

18 Péñker pujakmesha, itiurchat pujakmesha ashí warí wáiniam nujsa Yus shiir yuminsatarum. Kristu Jesusai Yusshuar ajasutiram nu túratniun Yus wakerawai.

19 Ji ikiajniaktinia núnisan Yusa Wakaní enentáimin keana nuka tunaajai téenmantikiarum ikiajniakairap.

20 Yus jintintrar akupkamu asa péñker chichaman etserainia nu nakitairap.

21 Ashí etserkamu ana nu nekasashit tusarum nekaatarum. Túrarum aya péñker ana nuke achiktarum.

22 Ashí yajauch ana nuyanka kanaktiarum.

23 Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri Jesukrístu táatsain, atumí wakaní atumí enentaj tura atumí ayashisha mash métek tunaajainchu awajtamsati.

24 Yus atumin untsurmakmarumna nu tímianak uminiaiti. Nii tana nuna yawetsuk túrattawai.

### *Amuamunam amikmaatin*

25 Ashí yatsurtiram winiasha Yus áujtursatarum.

26 Ashí Yus-shuar árum nu, amikmaaniatarum.

27 Winia Uuntru Jesukrístu chichamejai juna tájarme. Ju papí ashí Yus-shuar antukarti tusarum ashí iruntramunam áujsatarum.

28 Ii Uuntri Jesukrístu atumin yáinmákartí. Nu atí.

## Papru

# TISARÚNIKIANMAYA SHUARAN

## Ataksha papin aar akuptukma

*Papru ni tsaniakmarijjai Yus-shuaran áatramiania nu*

<sup>1</sup> Wikia Pápruitjai. Wissha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarne. Atumsha ii Apari Yusna tura Uunt Jesukrístunu ajasuitrume.

<sup>2</sup> Tuma asakrumin ii Apari Yus tura ii Uuntri Jesukrístusha waitnentrama áarmatai yáinmakar péñker awajtamsarat tusan wakerajrume.

*Kristu támatai tunáa shuaran Yus asutiáttawai*

<sup>3</sup> Yatsurú, átum péñker matsatu asakrumin iisha Yus tuke yúmiñkijai. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asantai Yus yumĩnsatniuitji.

<sup>4</sup> Átum Yus-shuar asakrumin chíkich shuar atumin yajauch awajtamainiawai. Tura itiurchat wainiu asarum ti wáitjarne. Nu tuma aju átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainijai.

<sup>5</sup> “Yusa akupeamurĩn pachiinkiamniaitrume” Yus túramprume. Nu pachiinkiatat tau asarum ju nunkanam wáitjarne. Tura wáitiakrumsha nuna nankaamas iwiarnaruitrume nu pachiinkiatin. Kame nújainkia Yus atumin achirmak péñker túrait, nuka páantaiti.

<sup>6</sup> Núnisan atumin wáitkiarmainia nunasha Yus tímiatrusan wáitkiasartincha nekas péñkeraiti.

<sup>7</sup> Tura wáitjarmena nusha Yus íjijajisha ayamtikramprartin péñkeraiti. Ii Uuntri Jesukrístu ji keana ímianisan kakaram suntarijjai nayaimpinmaya tara wantinkiamtai, nu tsawantat Yus ayampratniun suramsartatji.

<sup>8</sup> Tura nú tsawantajsha Yúsan nékainiatsna núnaka ii Uuntri Jesukrístu ti asutiátajsa tátatui.

<sup>9</sup> Taa, nincha meñkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nu akupeajrume, átum winia umirtukcha asakrumin” nin tiartatui.



<sup>10</sup> Kame Uunt Jesukrístu tátin tsawantri jeamtai, ni shuari, ni enentái pé<sub>n</sub>ker awajсарu áinia nu, ni náarín shiir pachis-artatui. Tura Yúsan umikiaru áсар, ti shiir enentáimsar Jesukrístun íisartatui. Ii ujakmajrumna nu antukrum umirka asarum atumsha nu<sub>j</sub> pachiínkiattarme.

<sup>11</sup> Nu tuma asamtai ii Yusrín atumin tuke áujtajrume. Yus atumin achirmakuitrume. Nu<sub>n</sub>kia Yuska atumí enentáin takas Nii wakera nu<sub>j</sub>ai métek awajtamsati, taji. Yus umirka asarum pé<sub>n</sub>ker wekasataj tusarum wakerarme. Túrarum Yus enentáimtusrum pé<sub>n</sub>ker túratin wakerarme. Tura wakerarmena nu umiktin Yuska ni kakarmar<sub>j</sub>ijai yáin<sub>t</sub>í, tu áujtaji.

<sup>12</sup> Átum pé<sub>n</sub>ker wekasa asakrumin chíkich shuarsha ii Uuntri Jesukrístu náarín nan<sub>k</sub>aamantu enentáimtusartatui. Nusha auka ii Yusr<sub>i</sub> tura ii Uuntri Jesukrístu waitnentáimturmasar pé<sub>n</sub>ker wekasatniun yáinmakui túrarme. Túramtai chíkich shuar shiir enentáimturmasartatui.

## 2

### *Tuke Tunaarintin wantinkiattana nu*

<sup>1</sup> Tura, yatsuru, ii Uuntri Jesukrístu tátatna nuna tura Nii<sub>j</sub>ai ínkiunaiktatjina nunasha ujaktinian wakerajrume.

<sup>2</sup> Chíkich shuar anan<sub>k</sub>ramawar “Uunt Jesukrístu tsawantri jeayi” tu ujatmaktaj tusar wakeruiniawai. “Íimiarmaj nu<sub>j</sub>ai nékajai” turamainiakuisha, “chícham étserman antukmaj nu<sub>j</sub>ai nékajai” turamainiakuisha, tura “Papru papí áarmar<sub>i</sub> nuna takui nékajai” turamainiakuisha, páchim enentáimprairap. Tura sapijmiakairap tusan seajrume.

<sup>3</sup> Pen<sub>ké</sub> anan<sub>n</sub>wairap. Nekaatarum. Nu tsawant jeats<sub>ai</sub>n Yúsnumiá kanaktin átatui. Tura nú arant, Tuke Tunaarintin, emesnartatna nu wantinkiattawai.

<sup>4</sup> Niisha aya wíniak enentáimtursarat tusa wakerak, ántar-yusnasha tura nekas Yús<sub>n</sub>asha shuar tikishmatrar<sub>ai</sub>n tusa ti nakitrattawai. Ni<sub>n</sub>ki ti nan<sub>k</sub>aamantu enentáimtumas, Yusa nuke ajas, Uunt Yusa Jeen wayá<sub>a</sub> pujustatui. “Júiti Yus” shuar turutiarat tusa mash túrittiawai.

<sup>5</sup> Yatsurtiram, wi atum<sub>j</sub>ai pujakun nuna ashí ujakmajrume. ¿Nuka kajinmakniurmek?

<sup>6</sup> Yámaikikia, ni tsawantri jeats<sub>ai</sub>n, Tuke Tunaarintin wantinkia<sub>in</sub> tusa surimia nu nékarme.

<sup>7</sup> Tunaasha yamaisha awai, tura paantcha. Túrasha tunaan surimia nu juramkitniuk taasai nu tunaaka paant átin.

<sup>8</sup> Nu<sub>n</sub>kia nu Tuke Tunaarintin wantinkiattawai. Tura Uunt Jesus ni wene<sub>j</sub>ai umpuí aun máattawai. Tara ni win-char<sub>j</sub>ijai nuna amuktatui.

9 Nu Tuke Tunaarintin, iwianchi uuntri Satanás akupkam tátatui. Ni kakarmari iniakmastaj tusa, aentsti túrachminian túrak anaṅkawartatui.

10 Jinium wémin ainia nú shuaran ashí tunáa ana nujai anaṅkawartatui. Nu shuar Yus-Chichaman nekas ana núnaka nakitraru ásar uwemprachmin áiniawai.

11 Iis, nekas ana nuna nakitia ásarmatai, ti anaṅmamawar wait-chichaman umirkarat tusa Yuska tsanṅkatkattawai.

12 Warí, niisha ni tunaarín wararainiak, nekas ana nuna nakitraru ásarmatai, Yuska “jinium wétatrume” tiartatui nuna.

### *Uwempramin ainia nu*

13 Tura, yatsuru, Uunt Jesus aneamu árumna nu, iisha atumin enentáimtusar ii Yusri yuminsaji. Átum nekas ana nuka umikiurme. Tuma asakrumin Yusa Wakaní atumí enentáin péṅker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume.

14 Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukrístu ti péṅker pujana nuṅ pachiinkiamniuram tusan ujakmajrume, nú chichaman.

15 Wátsek, yatsuru, Yusjai katsuartarum. Yus-Chicham et-serkamu antukurmena nu, tura wisha áaran akuptukjarmena nusha kajinmatkiirap.

16 Ii Uuntri Jesukrístusha tura ii Apari Yusha ti péṅker ásar incha anenmatsjik. Tura waitnentrama ásar incha shiir enentáimtikramji. Tura nú naṅkaamas ii tuke péṅker pujustinian ikiurtamsaitji.

17 Nu tuma asamtai, péṅker chichastarum tusa, tura péṅker takastarum tusa Jesukrístuka shiir enentáimtikramar ikiakátmarartí.

## 3

### *Papru “áujtursatarum” tímiania nu*

1 Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nuṅkanam wakerukartí tusarum Yus seatarum.

2 Tura yajauch shuar, péṅker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu áiniawai.

3 Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anaṅkramataj takui kíishturmaktatrume.

<sup>4</sup> Kame Yus atumin yainmaktatrumé, taji. Ii tájinia nu yamáí umíarme. Tura tuke umirkattarme. Nusha nekaar shiir enentáimji.

<sup>5</sup> Uunt Yus yainmakartí ni anenkrattairin nekaatniun. Kristu itiurchatan katsuntrama núnisaj atumniasha katsuntratniun Yus yainmaktí.

### *Takastiniaitji*

<sup>6</sup> Yatsurtiram, antuktaram. Ii Uuntri Jesukrístu chichamejai ju taji: “Nuyá Yus-shuar wi jintintramun nakitiak aya wékana nu ikiuktiarum.”

<sup>7-8</sup> Ii túrajnia núnisrumek túratin nékarme. Júiti: atumjai pujumaj nu tuke takakmasmiaji. Atumí yurumkarí iisha akikmakar yurummiaji. Atumjai itiurchat áchatí tusar tsawajsha káshisha tuke takakmasmiaji.

<sup>9</sup> Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji.

<sup>10</sup> Warí, atumjai pujumiaj nu “Takastinian nakitiana nuka yurumáshti” tíchamkají.

<sup>11</sup> Iis, atumjiniá weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji.

<sup>12</sup> Nú shuáran ii Uuntri Jesukrístu chichamejai “Tákamtak shiir takakmasartí” tajai.

<sup>13</sup> Yatsurtiram, yawetsuk shiir túratarum.

<sup>14</sup> Ju papinium ii tájinia nuna, shuar umiktinian nakitakuinkia “umichuiti” tákuram, ni natsarat tusarum ikiuktiarum.

<sup>15</sup> Túrasha “Yus-shuara nemasrinti” tiip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

### *Papru aajsua ikiuamu*

<sup>16</sup> Uunt Yuska, imiatkichu enentái susamniaiti. Jú Yus, itiurchatnum pujarminin atumin tuke imiatkichu enentáimtikramsarti. Uunt Yuska atumin pujurtamsarti, tajai.

<sup>17</sup> Ju wi Papru juna aajai. Wi papin akupeaj nu júnisnak winia náarun áaran apujeajai, wíniaiti tusan.

<sup>18</sup> Ii Uuntri Jesukrístu atumin ashí yainmakarat tusan wakerajrume. Nu atí.

## Papru TIMIUTÉUN Emka papin aar akuptukma

<sup>1</sup> Wi Papru Jesukrístu akatramurintjai. In uwentikkiartin Yussha tura ii Uuntri Jesukristusha winia akuptuku áiniawai. Jesukristujai métek ti shiir ajastai tusar nákaji.

<sup>2</sup> Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar wait-nentramainiak imiatkinchanum ti shiir pujustinian yainmakarti.

### *Wait chichamjai anearta*

<sup>3</sup> Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuji wait-chichaman jintin ainia nu suritkiarta.

<sup>4</sup> Niisha Israer-shuara weatrin áujmatsamunak tura ni weatri naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

<sup>5</sup> Yus-shuar tuke enentáijjai Yúsan shiir enentáimtusar tura tunáa túrutsuk aya péñkera nuna wakerukar anenkartin ajastin áiniawai. Núnisan péñker ajasat tusar Yus-Chicham étsereaji.

<sup>6</sup> Chíkich shuar juna iniaisar ántar chichaman áujmatainiawai.

<sup>7</sup> Yúsnan nékachiat “jintinniuitjai” tuiniawai. Tura unuiniainia nuna nékainiatsui.

<sup>8</sup> Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji.

<sup>9</sup> Kame akupniuka péñker shuaran itit awajsatniun akupenatsui. Antsu yajauch shuar juna túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashí Yúsnancha nakitiainia nunasha, aparín máinniasha, nukurín máinniasha, kame mankartinniasha,

<sup>10</sup> nuwancha tura áishmanasha tsanirma áinia nunasha, shuaran kasamak juu ainia nunasha, wáitrinniasha, tsanunniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai.

<sup>11</sup> Núnisan tawai ti shiir uwempratin chicham Yus suramajnia nu. Nu chichamnaka etserkatniun Yus péñker asa tsankatrukuiti.

*Yus waitnenkartin asamtai Papru yuminsamiayi*

12 Ii Uuntri Jesukristu shiir enentáimtururu asa Níiniun etser-turkat tusa kakarman surusuiti. Túruta asamtai yúmin̄kijajai.

13 Wi Yúsan imiá yajauch chicharniuyajai. Yus-shuarnasha áinrarmiajai. Yusnasha katsekniuyajai. Túrin aṅṅ Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchayujajai.

14 Tura ii Uuntri Jesukristu ti nekas waitnentrurmiayi. Tura Jesukristujai tsaniṅkia pujakuí Yus nekas enentáimtustinniasha tura anenkartin ajastinniasha surusuiti.

15 Ju chicham ti nekasaiti. Tunáa shuáran uwemtikrataj tusa Jesukristu ju nunkanam taramiayi. Nunasha ashí shuar nekaatin áiniawai. Tura wikia ashí shuarjai nankaamas tunáan túriniaitjai.

16 Ti tunáa aṅṅ Jesukristu ti anenkartin ana nu paant neka-nati tusa Yus winia waitnentrurmiayi Tuma asamtai chíkich shuar, wijjai métek, Yúsan nekas enentáimtusar Nijjai tuke iwiaaku pujusartatui.

17 Yus tuke jacha asa tuke iniaitsuk akupniuiti. Wáinchataitiat imiá nankaamas nékaiti. imia Niṅki Yúsaiti. Tuma asamtai imia Niṅki tuke iniaitsuk ti shiir awajsatniuiti. Núnisan̄ tuke atí.

18 Uchiru, Timiutéu, yáunchuyá Yus-shuar ámin “Ju shuar péṅkeran túrattawai” túramarmia nútiksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata.

19 Chíkich shuar tunaajai anearcharu ásar Yúsan ikiukiarmai.

20 Iminíusha tura Arejántrusha núnisan̄ Yúsan ikiukiarmatai uunt iwianchnium surukarmajai. Nujjai Yúsan ti yajauch chicharsacharat tusan túraitjai.

## 2

*Yus áuj satin*

1 Wátsek, emka seajrume Yus áujeakum Yus yuminsam ashí shuar yaiṅkiat tusam áujtusarta.

2 Imiatkinchanum pujusar Yusjajisha tura áentsjajisha shiir túratai tusar tura ashí akupin ainia nusha péṅker akupkarat tusar Yus áujtustiniaitji.

3 Áitkiasar seatin péṅker asamtai, uwemtikramajnia nú Yus wakerawai.

4 Ashí shuar nekas chichaman nekaawar uwemprarat tusar wakerawai Yus.

<sup>5</sup> Aya chikichik Yus awai. Tura Jesukrístu aents ajas Yusjái áentsun nawamnaimtikiartiniaiti.

<sup>6</sup> Ashí shuara tunaarín akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi.

<sup>7</sup> Nuna túratniun Yus winia akatar akuptukuíti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrutsuk nekas tajai.

<sup>8</sup> Nu asantai áishmanḡka kajetsuk yajauch tunaitsuk antsu péṅker enentáijjái uweje takuiniar Yúsán áujarti.

<sup>9-10</sup> Núnisaṅ núwaka iwiarmamuk nekasmiancha péṅker enentáijjái entsararti. Chíkich shuar nu nuwan iis temashmarmaríncha, sháukríncha, kurimkiamuncha, iwiarmampramuríncha núnaka enentáimtutsuk antsu ni péṅker túrunamun enentáimtusarti. Núnisaṅ áchatniukait nuwá Yús-shuar ainia nujái. Ni péṅker túramujái nekas shiir awajmamsashtinkiait.

<sup>11</sup> Núwaka takamtak pujusar umiiniak unuimiararti.

<sup>12</sup> Nuwanka ashí iruntramunam unuiniartinniasha tura ni áishrín akupkatniuncha suritiajai. Antsu takamtak pujustini-aiti.

<sup>13</sup> Yus emka áishmanḡkan Ataṅkan najanamiayi. Nuyá nuwan Épan najanamiayi.

<sup>14</sup> Tura Yus timian umirkach Ataṅka anannachmiayi. Antsu Épa ananna asa tunaan túramiayi.

<sup>15</sup> Túmaitiat jurertin asa, emesnartinniumiá uwempraiti. Tura Yúsán nekas enentáimtak anenḡkartiniaitiuk tura esetar enentáimiuk péṅker wekasatniuiti.

### 3

#### *Yus-shuaran wáinin*

<sup>1</sup> Shuar Yus-shuaran wáinkiatniun wakerakka péṅker takatan achikiuiti. Nuka nekasaiti.

<sup>2</sup> Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha péṅker esetar enentáimin naka wekasatniuiti. Íraran ni jeḡen ti shiir itiaatniuiti. Péṅker jintinkratin átiniaiti.

<sup>3</sup> Nampechusha tura suir enentáimtichusha átiniaiti. Aya kuítian íkiaunḡkatniun enentáimtuschatniuiti. Antsu tsanḡka átiniaiti. Kajechusha átiniaiti. Chikichnancha wakerutkash-tiniaiti.

<sup>4</sup> Ni shuarín shiir akupeakui ni uchirísha umin tura shiir awajkartin ártiniaiti.

<sup>5</sup> Kame ni shuarín akupkachminiaitkiunḡka ḡitiurak Yus-shuaran wáinkiat?

<sup>6</sup> Yus-shuaran wáinniuka yama Yus-shuar ajasu áchatniuiti. Túmaitkiun̄ka ti nan̄kaamantu enentáimtumak iwianchjaj̄i métek tunaan túrak sumamattawai.

<sup>7</sup> Yus-shuarchasha nin shiir enentáimtustin ániawai. Núnischaitkiuñkia nin yajauch chicharainiakui íwianch wárik tunaanum ajuartatui.

### *Yus-shuaran yain*

<sup>8</sup> Núnisan̄ Yus-shuaran yaincha péñker asamtai ashí shuar nin shiir enentáimtustin ániawai. Nii tana nuna tímatrusan̄ umin átiniaiti. Nampechu átiniaiti. Aya kuítian ikiaun̄katniun enentáimtuschatniuiti.

<sup>9</sup> Yúsnañ ti péñker nekaatniuiti. Tura esetar enentáimsatniuiti.

<sup>10</sup> Emka péñker ístiniaiti nuyá péñker wekaakka Yus-shuaran yain átiniaiti.

<sup>11</sup> Nuwasha péñker asamtai ashí shuarsha nin shiir enentáimtustin ániawai. Tsanumniuchu antsu esetar enentáimiar nii chichaa ímiatrusan̄ umin átiniaiti.

<sup>12</sup> Yus-shuaran yainkia nuwan̄ apatkachu átiniaiti. Tura ni uchiríncha ni shuaríncha ashí shiir akupin átiniaiti.

<sup>13</sup> Yus-shuaran yayak̄ nekas péñker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

### *Yusna ana nu imiá nan̄kaamas péñkeraiti*

<sup>14-15</sup> Wárik íitniun wakerajme. Túmaitiatnak sétaknasha Yus-shuarjaj̄i takastin nekaak tusan̄ juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai.

<sup>16</sup> Maa, imiá nekasaiti, Yus iwiainturmakma ashí nan̄kaamas ti pen̄keraiti. Tura júiti:

Yuska aents ajas jú nuñkanam paant wantinkiamiyai.

Yus Wakancha “ti shiiraiti” Nin tímiyai.

Yusa suntarisha Nin wáinkiarimiayi.

Ashí nuñkanam nu etsernakmiayi.

Túramtai ashí nuñkanmayá shuar umirkarmiayi.

Tura nayaimpiniam waketkimiayi.

## 4

### *Amuukatin tsawantin*

<sup>1</sup> Yusa Wakan̄i ti paant tawai, amuukatin tsawant jeaakui untsurí aents Yus enentáimtustinian iniaisar antsu yajauch wakanin nemarsar íwianch jintíamun anturkartatui.

<sup>2</sup> Yajauch shuaran anturkartatui. Nu shuar ni enentáin̄ narúa áinin ásar ni tunáa túramun pen̄ké enentáimtichu ániawai. Tuma asa shiir chichainiayatan̄ wáitrin ániawai.

<sup>3</sup> Nu shuar nuatnaikiatniun suritiainiawai. Núnisañ chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsán yumiñsar páchitsuk yuámin áiniawai.

<sup>4</sup> Ashí Yus najanamu péñker asamtai nakittsuk antsu Yusan yumiñsar yúatniuiti.

<sup>5</sup> Yus-Chicham tana nújajisha tura yuiniak Yúsán yumiñkias áujsamujai ashí péñker ajasuiti.

### *Jesukrístu péñker takarín*

<sup>6</sup> Wi tájamna nu chíkich Yus-shuar jintintiakmeka Jesukrístu péñker takarín átatme. Tura ashí Yus-Chicham péñker jintíamu unuiniaru asam nujai kakaram ajastatme.

<sup>7</sup> Ántar chichamsha tura netse chichamsha enentáimtutsuk nekas Yusna ana nu túratin kakaram ajasta.

<sup>8</sup> Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nuñkanmasha yáinmaji tura ukunmasha Yusjai pujustin asakrin nankaamas péñkeraiti.

<sup>9</sup> Nu imiá nekas asamtai ashí shuar nuna enentáimtustiniaiti.

<sup>10</sup> Nekas iwiaaku Yus ashí shuaran uwentikramniaiti, tura ashí Nin enentáimtuinia nú shuaran nekas uwentikratniuiti. Nu chicham imiá nekasaiti tu enentáimtakur katsekramaini-akrincha kakaram takaaji.

<sup>11</sup> Nuka ashí ame jintiakum akupkatniuitme.

<sup>12</sup> Ti úuntchaitkiumnisha nakitramprarañ. Antsu péñker túrakum Yus-shuar unuiniarta. Chichammijjajisha, túramurmijjajisha, anenkratmarmijjajisha, nekas Yus enentáimtamujajisha, tura esetra enentáimsam Yusna péñker túramujajisha niisha túrawarat tusam iniaktusarta.

<sup>13</sup> Wi jeatsañ Yus-Chicham áujeakum shuar jintintiata. Túram Yus-shuar ikiakárarta.

<sup>14</sup> Yus-shuara uuntri Yúsnan takastin anaitiamak uwejen awantramsarmái. Nuna túramainiak “Ju shuar kakarman Yúsnumiñ takustatui” túramarmia nu, kakaram ajasam tímiatrusam túratá.

<sup>15</sup> Tuke enentáimjai wi tájamna nu enentáimtakmin ame péñker túruki wéamun nekaawartatui.

<sup>16</sup> Túramna nusha tura unuiniamna nusha péñker wáinmankata. Nu túratin pimpikiip. Nu túrakmeka uwemprattame amesha tura ujainiam nusha uwentikrattame.

## 5



1 Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajsarta.

2 Nuwá úuntchisha nekas ame núkua nútiksamek shiir awajsarta. Nuwá nátsasha nekas ame umaimia nútiksam shiir enentáimjai péñker awajsarta.

3 Waje nekas atsumin ainia nusha yáin<sub>ki</sub>arta.

4 Tura waje uchirtiniaitkiuñkia tura tiran<sub>kr</sub>inniu<sub>it</sub>kiuñkia, nu shuar wajen wáink<sub>ki</sub>arti. Emka ni shuar<sub>in</sub> péñker wáink<sub>ki</sub>atniun unuimiararti. Ni aparí anemia núnis awantu<sub>ni</sub>ak shiir wáink<sub>ki</sub>arti. Núnaka Yus ti shiir enentáimtawai.

5 Nekas waje nin<sub>ki</sub> pujana nu Yúsan enentáimtak tsawa<sub>is</sub>ha káshisha iniaitsuk Yúsan áujeawai.

6 Antsu aya wárastiniak wakera nuka iwiaakiat jaka áintsan<sub>ke</sub>te.

7 Tura wajenka ni shuar<sub>in</sub> wáink<sub>ki</sub>artí. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta.

8 Shuar ni jeen pujuinia nuna nekaska wáink<sub>ki</sub>atniuiti. Tura nuyá chíkich shuár<sub>n</sub>asha yáin<sub>ti</sub>niaiiti. Túrachkun<sub>ka</sub> Yus tana nuna umíatsui, tura Yus-shuarcha nuj<sub>ai</sub> nan<sub>ka</sub>amas yajauchiiti.

9 Yusa kuítrij<sub>ai</sub> yáinniaiktiniaitkiun<sub>ka</sub> waje sesenta (60) uwí nan<sub>ka</sub>amas takustiniaiiti. Tura chikichik aíshriniak takusu átiniaiiti.

10 Ti paant péñker túrin átiniaiiti. Ni uchir<sub>in</sub> péñker tsakatmaashit, íraran péñker táata tíniuashit, nekasmiancha enentáimtumar Yus-shuaran yáiniaashit, wáitainia nuna waitnenniuashit, tura chikichnasha péñker túriniaitkiun<sub>ka</sub> maak.

11 Tura sesenta (60) uwí takakchaka chíkich wajej<sub>ai</sub> iru-raip. Ni ayash<sub>i</sub> wakeramur<sub>i</sub> Krístuiy<sub>a</sub> kanamtikiainiawai tura ataksha nuatnaik<sub>ki</sub>atniun wakeruiniawai.

12 Tura emka enentáimtiarmia nuna iniaisar sumamainiawai.

13 Nu arantcha nakimiainiak ántar irauwear chikicha itiurchatr<sub>in</sub> áujmatsachminia nunasha áujmatin áiniawai.

14 Nu asamtai waje úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurij<sub>ai</sub> in kajertamainiaj nú shuar yajauch enentáimtur<sub>m</sub>archarti.

15 Kame nuik chíkich chíkich waje Krístuiy<sub>a</sub> kanakiar iwianchin nemarsaru ásarmatai nuna tájai.

16 Áishman<sub>sha</sub> nuw<sub>asha</sub> Yus-shuar ainia nu ni shuar<sub>in</sub> waje áku<sub>in</sub>kia Yusa kuítr<sub>in</sub> seatsuk nii yain<sub>ti</sub>. Nuj<sub>ai</sub> chíkich wajen nekas atsumainia nuna Yusa kuitr<sub>i</sub> yáin<sub>ti</sub>tatui.

17 Yus-shuara uuntri Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustinaiti.

18 Yus-Papiniumsha núnisañ áarmaiti:

Jiñkiaia saepen pakartaj tusa turu takaak nájakui ni nuji jñkiatáshtiniaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

19 Chikichik shuarak Yus-shuara uuntri tunaarjñ etsertuk-matañkia anturkaip. Antsu jímiarsha menaintiusha tsanumtsuk métek tuiniakui anturkata.

20 Chíkich shuarsha ni tunaarjñ ikiuktinian nakitiainia nu, ashí iruntramunam chicharkarta. Chikichcha, nuna íisar, ashankarti.

21 Yussha ii Uuntri Jesukrístusha tura nayaimpinmaya suntarsha íimiainiamunam “túrata” tájame. Ashí shuarjajñ niisháa enentáimtutsuk métekrak túrata.

22 Yus-shuara uuntri atí tusam wárik anaikiaip. Wárik túramka chikicha tunaarjñ sumamattame. Ashí tunaanum penké pachinkiaip.

23 Wakemjajñ jau asam aya éntsak úmutsuk karía ishichik pachimpram umarta.

24 Chíkich shuara tunaarjñ wáitsatin imiá paant áiniawai wáitsatin tsawant jeatsajñ. Tura chíkich shuara tunaarjñkia paantcha áiniawai antsu ukunam paant nekanawartatui.

25 Núnisañ péñker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanatawai.

## 6

1 Takarniutirmesha, atumí uuntri ti shiir umirkatarum. Túrachkumñkia chíkich shuar Yusha ii unuiniamuncha yajauch áujmattsartatui.

2 Atumí uuntri Yus-shuar áiniakka aya Yusjajñ yatsum asamtai nakiarchatniuitrume. Antsu nuna nankaamas péñker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

*Yusna wakeruktincha tura kuit wakeruktincha*

3 Shuar ti shiir naka chichaman ii Uuntri Jesukrístunu ana nuna nakitiak antsu niisháa chichaman étserkunka

4 nu shuar nankaamantu enentáimtumayat ántrai. Ni enentáimmianak chichaak aya ántar chichaman antumtik-naikiatniun chichaawai. Tura nu chichamjajñ nupetmaktaj tusar nankaamas áujmataniak kajernaikiar tura katsekaikiar péñker enentáimtunaitsuk

<sup>5</sup> tuke kakannainiawai. Tura tu aujmatnaisatniun wakeru-  
iniana nú shuar nekas-chichaman nékachu ásar aya tunaan  
enentáimtin ániawai. “Yusna ana nujaj kuítrintin ajasminiaiti”  
tuiniawai. Nu shuar pachisaip.

<sup>6</sup> Shuar takakna nujajin waraakka Yusna ana nujajisha  
waraak ju nunkanmasha tura nayaimpinmasha nekas  
kuítrinniuiti.

<sup>7</sup> Iis, ju nunkanam misuk támaji; núnisar misuk jiinkittiaji.

<sup>8</sup> Tuma asamtai yurumkasha tura entsataisha takakkurkia  
nujajin warasa pujustiniaitji.

<sup>9</sup> Antsu kuítrintin ajastaj tuinia nu, tunaanum awankekemkar  
iniainiawai. Tura antra nuna wakerukar itiurchatan  
wáiniainiawai. Nujaj emesratniunmasha jeainiawai.

<sup>10</sup> Kame kuit aneatniuka ashí tunáanum útsutmakminiaitji.  
Chíkich shuar nuna wakerukar Yus enentáimtustinian iniaisar  
ti itiurchatjaj yajauch awajmamsarai.

*Yusna nu túrunat tusam kakaram ajástá*

<sup>11</sup> Antsu ame Yus-shuar asam nuyá pisarta. Yus nekas  
enentáimtakum péñker túrata. Waantu enentáimtsuk Yus  
péñker umirkata. Aneakum katsuntrata.

<sup>12</sup> Yusna nu túrunat tusam kakaram ajástá. Tuke amuicha  
iwiaakma emetata. Nu túratniun Yus anaitiamkaiti, tura  
ame Yus nekas enentáimtamu untsurí shuar iruntramunam  
etserkaitme.

<sup>13</sup> Yuska ashí iwiaaku átinian súwiti. Jesukrístusha Punsiu Pi-  
ratuj nekasa nuna ti paant ujakmiayi. Tuma asamtai Yussha  
Jesukrístusha írainiamunam nuna tájame.

<sup>14</sup> Ii Uuntrí Jesukrístu táatsain wi tájamna nu yapajítsuk tura  
yajauch chicharnakchamnia péñker umiktá, tájame.

<sup>15</sup> Tsawant jeamtai Jesukrístu tatí tusa Uunt Yus, imiá  
penker asa, akupkattawai. Nínkiti Yus. Akupniuncha Akup-  
niuiti. Uuntjaj nankaamas Úuntaiti.

<sup>16</sup> Iwiaaku átinia nérenniurí Nínkiti. Ti tsáapninnium pu-  
jakui nuntumtuachminiaiti. Wáinchatai asamtai shuar penké  
wáinkicharu ániawai. Nínki ashí shiir awajsatniuiti tura Nínki  
tuke ashí akupin atí. Núnisan atí.

<sup>17</sup> Jú nunkanam kuítrintin ainia nusha nankaamantu  
enentáimtumascharti. Kuitcha yúpichuch menkakamnia  
asamtai kuítniak enentáimtusar pujuscharti. Antsu iwiaaku  
Yus ashí in ti penkeran núkap súramaj nuna nekas  
enentáimtusarti.

<sup>18</sup> “Péñker túratarum” tiarta. Tákumin niisha shiir enentáijjaj  
ni takakman ajamsarti. Nuyá nú péñker túramujaj Yusaj  
ikiáunkartí.

<sup>19</sup> Nuna túruiniak kuítriniawartatui. Núnisan tuke iwiaaku  
átinian wáinkiertatui.

*Amuak Timiutéun akatramu*

<sup>20</sup> Timiutéu, ashí ame túratniua nu tuke enentáimturta. Jú nun<sup>u</sup>kanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip.

<sup>21</sup> Chíkich shuar nuna umirkar Yusajya kanakiarai.

Wátsek, Timiutéu, Yus shiir yainmakti.

Nuke atí.

## Papru TIMIUTÉUN Ataksha papin aar akuptukma

*Papru Timiutéun áatramiania nu*

<sup>1</sup> Wí Pápruitjai. Yus wakerakui Jesukrístu akatramurí aja-suitjai. Ashí Jesukrístujají tsanínkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akup-tukuiti.

<sup>2</sup> Aneamu uchiru, Timiutéu, jü papín áateajme. Yus Apasha tura ii Uuntri Jesukrístusha ti anenma ásar waitnentrainiak imiatkinchanum shiir pujustinian yainmakarti.

*Krístunu takastiniaitjinia nu*

<sup>3</sup> Tsawajsha káshisha Yúsan áujeakun ámin tuke enentáimtusan ti shiir Yúsan yúminíajajai. Winia weatur túrawarmia nútiksanak Yúsan enentáimtakun ti shiir awajeajai.

<sup>4</sup> Kanakmíaj nuí eantramiam nuna tuke enentáimtajme. Ataksha wararnaisatai tusan íitniun wakerajme.

<sup>5</sup> Yus nekas shiir enentáimtiniaitmena nuna nékajai. Nukuchrum Rútiasha tura ame nuku Eunisiasha emka Yúsan nekas enentáimtin árimiayi. Amesha núnisketme.

<sup>6</sup> Tuma asakmin tájame: Yusna takasái tusan winia uwe-jrun ámin awanteakui Yus kakarman suramsamia nujají atak kakaram takasta.

<sup>7</sup> Yus sápij enentáin suramsachuitji. Antsu kakaram ajastiniasha anenainiuncha péñker wekasatniuncha suramsaitji.

<sup>8</sup> Ii Uuntri Jesukrístunu etserkatin natsantraip. Níiniun étserkun sepunam pujamusha étserkum natsantruraip. Antsu Yus kakaram awajtamkui ame étseam nujají shuar yajauch túramainiakui surimiamtsuk wáitsatin enentáimtumarta.

<sup>9</sup> Ii péñker túrichu áriníñ Yus in anenma asa uwentikramar péñker túratniunam apujtamsaitji. Iisha Jesukrístujají tsanínkiaru asakrin tura Yus nuna túratniun wakerak túramiayi. Yaunchu jü nuñka atsaísha in tuke waitnentrampamiaji.

<sup>10</sup> Turá yamáí in Uwemtikkiartin Jesukrístu támatai nu anenmamu paant ajasuiti. Niisha jákatniun nupetak emes-ramiayi. Tura uwempratín chichamjají jáchatai iwiaakman paant awajturmají.

<sup>11</sup> Nuna etserkat tusa Yus anaitiukmiayi. Tura akattur Israer-shuarchanum akuptukmiayi.

<sup>12</sup> Túruta asamtai ti wáitíajai. Túrasha Yúsan nekas enentáimta asan natsamatsjai. Imiá kakaram asa amuukatin

tsawant jeatsain ashí wínian susamaj nuna ti penker waitruktatui.

<sup>13</sup> Shiir chichaman jintintiamajmena nuke emetata. Jesukrístujai tsanin̄kiu asar Yus nekas enentáimtaji tura nujai anenkratniuitji. Tuke núnismek túrata.

<sup>14</sup> Yus ámin takasat tusa suramsamu shiir takasta. Tura Yusa Wakani in pujurtamaj nuna kakarmarjijai túrata.

<sup>15</sup> Asia nunkanmayá shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armai.

<sup>16</sup> Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantrurchamai. Ii Uuntri Kristu ni shuarincha waitnentrarti.

<sup>17</sup> Rúmanam taashá natsantrutsuk eatak wáittsuk iniaitiúschamiayi.

<sup>18</sup> Ipiisu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

## 2

### *Kakaram ajasta*

<sup>1</sup> Amesha, uchirú, Jesukrístujai tsanin̄kiu asam nu kakarmajai kakaram ajasta.

<sup>2</sup> Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwawat tusam akupkarta.

<sup>3</sup> Ame ti penker Jesukrístu suntari asam wáitsatin katsuntrata.

<sup>4</sup> Suntarka ni uuntri tana nunak umiktin asa chíkich takatan pachintiuikchatniuiti.

<sup>5</sup> Núnisan nakurincha nakurustinia nujai métek nakurachkuŋka nekas péŋkeran awakmakun súsatniua nuna achikchamniaiti.

<sup>6</sup> Ataksha núnisan shuar ajan takaana nu, ashí shuara nankaamas nuyan yúashtinkiait.

<sup>7</sup> Wats, ju menaintiu métek-taku chicham ániawai. Péŋker enentáimtakmin ii Uuntri Kristu paant awajturmastatui.

<sup>8</sup> Jesukrístu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étsereaj nu.

<sup>9</sup> Nuna étsereakun sepunam jirujai jin̄kiamu pujakun wáitiajai. Túrasha Yus-Chicham jin̄kiachminiaiti.

<sup>10</sup> Ashí shuar ni shuari arti tusa Yus achikiarua nuna yáintajtsan ashí itiurchatan katsunteajai. Nujai Jesukrístujai tsanin̄kiaru ásar uwemprar tuke shiir pujusartatui Yusjai.

<sup>11</sup> Ju imiá nekasaiti:  
Jesukrístujai jákaitkiurkia Níjjaisha tuke iwiaaku pujustatji.

12 Wáitiakrishá Niijjaj akupkattaji.

Natsantakrinkia Niisha natsantramprattaji.

13 Umichuitkiurniisha Niñkia tuke uminiaiti. Warí, Yuska ni enentáimmiajjaj yapajniátsuk tuke umiktiniaiti.

*Yusaj natsaarráj tusam ashi túrata*

14 Shuar jintintiakum ju enentáimtikrata. Ii Uuntri Yus íimmianum chichamjaj yajauch tunaiyarajin tusam chicharkarta. Nu tunaitin penké áantrai antsu ántuiniana nuna yajauch awajenawai.

15 Yus-Chicham tuke enentáimjaj péñker unuimiátram shiir jintintiwarta. Túrakum Yus péñker íirsat tusam péñker takarin atá. Túramka Yusaj natsaarchattame.

16 Jú nunkanmayanak ántar áujmatin ainia nujaj kanaktia. Shuar nuna áujmatiniak tunaanum nuna nankaamas wáiniawai.

17 Ni jintiniamusha sunkurjaj métek pampaawai. Iminíusha tura Piritiusha nu shuar áiniawai.

18 Niisha nekas chichaman iniaisar tura ashí Yus-shuar nantaktincha nankaamasai tuñiakui chíkich chíkich shuar Yúsan naka enentáimtuiniatsui yamaikia.

19 Túrasha Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuarj ainia nu tunaanumiá kanakiarti.”

20 Kuítrinniu jeen kurijjaj najanamusha kuitjaj najanamusha írunui. Nújjajñkia ti shiira nu takastin áiniawai. Tura numijjaj najanamusha nuwejaj najanamusha írunui. Antsu nújjajñkia nekasmiancha ainia nu takastin áiniawai.

21 Núniskete Yusa takatríjjaj. Ashí tunaanumiá kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntri Jesukrístu wakerak péñker takata nuj apujtamsamniatji.

22 Natsá wakerutai iniaisam esetram péñker wekasata. Amesha ashí shuar shiir enentáijjaj Yúsan áujena nujaj Yus nekas enentáimtakum aneniakum ti shiir pujustá.

23 Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai.

24 Ii uuntri Jesukrístu takarniuka chíkich shuarjaj nemasmanaikiashtiniaiti, antsu ashí shuarjaj péñker nawamnaikiatniuiti. Tura waitnentáimturar péñker jintintiatniuiti.

25 Tura umircha shuarnasha Yus ni enentáin yapajtiakui nekas chichaman shiir enentáimturarat tusa péñker enentáijjaj jintintiatniuiti.

26 Nujaj íwianch ni wakeramu túrawarat tusa achikmaitiatan uwemprartatui.

## 3

*Amuukatin tsawant jeatemamtai aents ti tunaan túrawartatui*

<sup>1</sup> Amuukatin tsawant jeakui ti itiurchat átatui.

<sup>2</sup> Shuar aya niñki enentáimtumasartatui. Kuítian ti wakeriartatui. Nankaamantu enentáimtumartatui. Yúsnasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsnancha enentáimtuschartatui.

<sup>3</sup> Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasrj ártatui.

<sup>4</sup> Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui.

<sup>5</sup> Yusa kakarmari “ántrai” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip.

<sup>6</sup> Nu shuarsha shiir chichayatan anankawar jeá wáiniawai. Tura nuwá esetar enentáimchan nekas tunaarinniun anankainiawai. Nu nuwá ashí yajauch wakeramujai anannainiawai.

<sup>7</sup> Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai.

<sup>8</sup> Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámprissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiainiachu ásar Yúsnan naka jintiatniun penké tujintiainiawai.

<sup>9</sup> Túrasha nuna nankaamas kuakchartatui. Shuar ti paant ni netse túruiniamurjñ nekarawartatui. Núnisan nu jimiará iwishniujai túrunamiayi.

*Amúak Papru Timiutéun akatramiania nu*

<sup>10-11</sup> Tura ámeke wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura anenkratkun shiir enentáijjai katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntrj uwemtikrurmiayi.

<sup>12</sup> Nekasaiti, shuar Jesukrístujai shiir túrataj tákuñka ni nemasrj ántiam ti wáitsatniuiti.

<sup>13</sup> Tura ashí anankartin ainia nusha kame ashí yajauch shuarsha nú yajauch túrukiar wétatui. Iwianchjai anankamu ásar chikichnasha anankiar weartatui.



14 Antsu ámeke unuimiam nu imiá nekasaiti tu enentáimtakum tuke emetata. Jintintramawarmia nú shuarsha wáitrichua nu nékame.

15 Úchichinmayañ Yus-Chicham nékame. Yus-Chichamka uwempratniun jintintramamniaiti. Nusha “Jesukrístu nekas enentáimtakum uwemprattame” tawai.

16-17 Ni Papirín áarat tusa Yus ni shuarín áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papíjjai nekamatiuitji. Tura awajiakrincha Yus-Papí núnaka paant jintintramji. Nuyá naka wekasatniun jintintramji.

## 4

1 Ii Uuntri Jesukrístu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha ímiainiamunam juna akateajme.

2 Uwempratin chicham etserkata. Yúpichuchia nuísha tura itiurchata nuísha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuinararta.

3 Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia neka-pea áintsañ, nankaamas unuimiaru atai tusar, nánkamas unuikiartinian ti untsurí eakartatui.

4 Nekas shiir chichaman iniaisar ikiuiniak ántar áujmatsamun enentáimtusartatui.

5 Antsu ámeke tuke péñker túratin wakerakum ashí itiurchat katsuntrata. Uwempratin chicham étserkum takatrum péñker umikta.

6 Ishichik ajasai winia iwiaakmar Yusaj surumaktin. Mantannan nayimpiniam wétin jeatimiai.

7 Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai.

8 Tuma asamtai tawasap nukajai najanamu tsékena susamua áintsañ wisha péñker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijjai nákania nunasha nekas péñkera nuna akikiartatui.

*Timiutéu túratin akatmamturma*

9 Wárik iiraitin enentáimturata.

10 Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisañ Títiusha Tarmasia nunkanam weyi.

11 Túrawarmatai aya Rúkas wijíaj pujawai. Márkus eaka wáinkiam ame itiaritia. Jui ti penker yainkiamniaiti.

12 Tura Tikikiunka Ipiſiu péprunam akupkamjai.

13 Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisañ nuparam papísha tura nekaska penké papí takurtuktia.

14 Arejántruka jirujaj takawa nu ti yajauch awajtusuiti. Túrutaitkiuisha ni túramujaj métek Yus akiktí.

15 Nu amesha péñker wáinkiatá. Ii étsereamun penké nakitiawai.

16 Emka akupniunam ayamprumaktaj tusan chichaakui chikichkisha yáintkiacharmiyi. Antsu sapijmiainiak ikiurkiarmiyi. Yus nu shuaran yajauch enentáimturcharka maak.

17 Tura ii Uuntri Jesukrístu ni kakarmarín surus yaintkiamiyi. Nujaj uwempratin chichaman ashí nunkanam Israer-shuarcha antukarti tusan etserkamjai. Tura núnisañ akupni-unmayasha ii Uuntri uwemtikrurmiayi.

18 Tura núnisañ ashí yajauchia nuyá uwemtikrurmatai Nii akupeana nuñ nayaimpiniam jeattajai. Niñki tuke shiir awaj-nasti. Núnisañ atí.

### *Amikmaamiania nu*

19 Piriskancha ni áishri Akirancha amikmainiajai. Núnisnak Unisépuru shuaríncha amikmainiajai.

20 Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai.

21 Michá nantu jeatsain iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

22 Ii Uuntri Jesukrístu ámijaj tsañ pujustí. Tura Yus ashí penker waitmakarti.

Nuke atí.

## Papru TITIUN papí áatramu

### *Papru Titiun áatramiania nu*

<sup>1</sup> Wikia Pápruitjai Yusa takarniuri. Tura Jesukrístu akatramurintjai. Yus achikma ainia nú shuar niisha antukar Yúsan umirkarat tusan akatramuitjai. Shuar nuna nekaawar péñker wekasartatui.

<sup>2</sup> Tura nú arant, nú shuarsha tuke iwiaaku pujusarat tusan étseajai. Nú shuarnasha, nunñkan najantsuk, “uwemtikrattajai” Yus tímiayi. Tura Niisha wáitruatniun tujintiawai.

<sup>3</sup> Tura yamaikia, tsawant jeamtai, nuna nekaawarat tusa ii Yusri uwemtikkiartinia nu, winia chichamur ujakarta tusa, winia akatturmiayi.

<sup>4</sup> Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Apari Yussha, ii Uuntri Jesukrístusha, Uwemtikkiartin ana nu, enentáimin imiatkincha awajtamsati, tajai.

<sup>5</sup> Wats, wi iwiarachmajna nu ame iwiarata tusan Kreta nunñkanam ikiukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

### *Yus-shuaran wáinin*

<sup>6</sup> Yus-shuaran wáinin júnis atí. Niisha makuuchmin ti péñker wekasatí. Tura chikichík nuwentin átiniaiti. Tura ni uchirisha Yusna ártiniaiti. Tura shuar yajauch chicharsachmin niisha tutupnisañ wekain ártiniaiti.

<sup>7</sup> Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiau áchatniuiti. Tura anañma kuítrintin ajastaj tusa wakerukchatniuiti.

<sup>8</sup> Antsu shuar ni jeen írar winiana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nunñkanmayá akupeamuncha, núnisañ Yús akupeamuncha umirkatniuiti. Tura niñki ímiastiniaiti.

<sup>9</sup> Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumiá nekas chichaman, nii unuimiátramiania nuyá kanakchatniuiti.

<sup>10</sup> Nekaata. Umichu ti irunui. Niisha ántar chichau ásar ananmau ániawai. Israer-shuar weenam ti irunui nú shuar.

<sup>11</sup> Niisha kuítian achiktaj tusar wakeruiniak, yajauch uniniarchatniua nuna unuiniainiawai. Nuna túruiniak untsurí shuáran, ni írutkamurijjai yajauch enentáimtikiaiawai. Tuma asamtai auka, ni wene epetkatniuiti, ántar chichainiakui.

<sup>12</sup> Warí, imia Krétanmaya chichaman etserin juna tíchamka: “Krétanmaya aentska tuke wáitrin ániawai. Tura nákitiat ti yurumin ániawai. Yajasma núnisan ániawai.” Nuna tíchamka.

<sup>13-14</sup> Maa, niisha nékasan tímiayi. Nu tuma asamtai, Titu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsan nekas umirkarat tusam, umichu shuar kakaram chicharkarta.

<sup>15</sup> Enentáimprata. Yus-shuarka, ni enentái chamir ajasu ana nuka, ashí ni wainnia nuna péñkernak enentáimtai. Tura chíkich shuar, Yúsan umirkachu asa, ni enentái wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai.

<sup>16</sup> Tura niisha “Yus-shuaraitjai” tuíniayatan, Yúsan umirt-suk niisháa túruiniawai. Tuma ásar mujmiai ániawai niisha. Umichu ásar péñkeran túratniun penké tujintiainiawai.

## 2

### *Péñker jintintiatin*

<sup>1</sup> Tura amesha, Titu, péñker chicham etserkata. Yus-Chicham tátsuna nu etserkaip.

<sup>2</sup> Antsu áishman katsunt Yusna ainia nu, ju jintintrata. Nam-pechu, nánkamas enentáimcha, esetas enentáimin arti. Yus tana nuna umirín tura anenain arti. Ni itiurchatrín Yúsan enentáimtusar katsuntin arti.

<sup>3</sup> Tura núnismek nuwá katsunt Yusna ainia nusha ju jintintrata. Niisha núnisaran Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti.

<sup>4</sup> Niisha yama nuatnakua nuna ni áishrín ni uchiríncha nekas aneetniun unuiniarartí.

<sup>5</sup> Junasha jintintrartí. Esetas enentáimin, péñker wekain ártiniaiti. Ni takatrín péñker takastin ániawai. Ni áishrín umirín ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarain tusar túrawartiniaiti. “Tu jintintrarta” titiá.

<sup>6</sup> Nuyá, Titu, natsa ainia nu “nánkamsar enentáimsarum wekasairap” titiá.

<sup>7-8</sup> Tura amesha, Titu, ashí tsawant péñker wekasatá. Nu natsa wi túramun júkiar nunak túrawarmi tusam, nu

túrata. Tura anturtamna nu “nekaschapitia” tijn tusam, esetsam enentáimsam, Yus-Chicham tana nu ímiatrusmek jintintia. Nú túrakmin<sub>h</sub>ka, Yus-Chichaman nakitiana nu shuar “Titu ná<sub>n</sub>kamas chichaawai” títi<sub>j</sub> tukamá, natsa<sub>a</sub>mak tujintramkattawai.

<sup>9</sup> Takarin ainia nu, ni takartair<sub>n</sub> umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá.

<sup>10</sup> “Kasamkairap, tura ana<sub>n</sub>kawairap. Iis, pé<sub>n</sub>ker túrakrumka, takarniuitiatrum, shiir tura asarum ii Uwemtikramin Yus<sub>rj</sub> chichame<sub>n</sub> shíiraiti, tu enentáimtikrattarme” titiá.

<sup>11</sup> Yus in waitnentrama asa ashí áentstin uwemtikramprataj tusa wakerutmaji.

<sup>12</sup> Kame Yus waitnentrama asamtai, tunáa ana nu iniaisatniuitji, nu nékaji. Tura ju nu<sub>n</sub>kanmaya yajauch ana nu wakerukchatniuitji. Tura antsu ju nu<sub>n</sub>kanam pujayatrik esetsar enentáimsar ana<sub>n</sub>ma wekatsuk tuke tsawant Yus anear wekasatniuitji.

<sup>13</sup> Túrar ii Yus<sub>rj</sub> Jesukrístu, uwemtikramajnia nu, imiá shiir iwiarnar tatí tusar nákastiniaitji.

<sup>14</sup> Jesukrístuka in jarutramkamiaji, ii tunaar<sub>n</sub>ia uwemtikrampratajtsa. Tura, Winia ajarar tuke enentáij<sub>j</sub>ai pé<sub>n</sub>ker túrawarat tusa, ii tunaar<sub>n</sub>in japirtampramijai.

<sup>15</sup> Titu, anaikiamu asam arantutsuk nu jintintrata. Yajauch ana nuna túrawar<sub>n</sub>in tusam chicharkarta. Pé<sub>n</sub>keran túruinia nu ikiakárta. Tura yajauch chichartukar<sub>n</sub>in tusam tuke pé<sub>n</sub>ker wekasata.

### 3

#### *Yus-shuarti túratin*

<sup>1</sup> Titu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. ““Pé<sub>n</sub>keran túratin ana nuna páchitsuk túrattajai” títiniaitrome” titiá.

<sup>2</sup> “Tsanumprairap, kajernaikiairap, antsu shiir enentáimtunaistarum” titiá. Na<sub>n</sub>kaamantu enentáimtumsuk ashí shuar pé<sub>n</sub>ker awajsatarum tusam tu jintintrarta.

<sup>3</sup> Warí, iisha núnisrik Yus-shuar ajatsuk ná<sub>n</sub>kamsar wekaimji, Yuska umirtsuk. Tura íwianch emetamu pempée wekaimji. Tura ii ayash<sub>i</sub> wakeramu tuke túriniuyaji. Tunaasha túriniuyaji. Chikich atankittsar wakeriniuyaji. Chíkich shuar kajerkar tura nuamtaksha kajernainiuyaji.

<sup>4</sup> Túrasha Yus in uwemtikkiartin ana nu, ane<sub>n</sub>kratin asa, ni ane<sub>n</sub>krattair<sub>n</sub>in ashí áentsun iniaktus in uwemtikrampramijai.

<sup>5</sup> Yus in waitnentra ma asa, iikia júkeshá pénker túrachma aín uwemtikrampramíaji. ¿Itiurak uwemtikrampramíaji? Ii tunaarín asakátrampramíaji, níjiaktinia áintsan. Tura Yusa Wakani pujurtamkurin, ii iwíiaakmarín yamarman amas-maji.

<sup>6</sup> Jesukrístu jakamujai Yus in emeenturmatsuk ni Wakanín suramsamíaji.

<sup>7</sup> In anenma asa nuna túramíayi. Nuínkia iisha yamaram awajsamu asar tuke iwíiaaku átin, ti wakerimíaj nu íiniuiti.

<sup>8</sup> Nuka ti nekasaiti. Tuma asamtai Yúsan umirkarmia nu, pénker túratniun tuke wakerukarat tusam tuke jintinki wetá. Wí tímiájna nu, pénker asamtai, ashí aents nuna nekaatniun atsumainíawai.

<sup>9</sup> Shuar netse áujmatainiakui ameja pachisaip. Tura “aya winia úntruk pénker áiniawai” tu chichasaip. Tura Israer-shuara akupkamurí ititurkit tusa shuar ti áujmatainiakui nusha pachisaip. Ántrai ti nuka. Pénker wekasatniun yayatsui.

<sup>10</sup> Shuar tsanumprur yajauch enentáimtunaimtikiana nu chicharkata. Ántachkuínkia ataksha chicharkata. Tura penké tujinkiamka jíiki akupkata.

<sup>11</sup> Nujai júna nekaamniaitme: nuna tura asa awajiruiti. Tura ni tunaarínin jakattui.

### *Papru wakerana nu*

<sup>12</sup> Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. Jui Nekapurisnum yumí nantu asamtai seturan pujuttajai.

<sup>13</sup> Senas, chichaman ti unuimiaru pujana nu, amikiur Apurusjai jeamtai, nii atsumtsuk shiir weartí tusam, ame túratin jeamna nu yainá.

<sup>14</sup> Iiní Yus-shuar ainia nusha pénker túratniun tura atsumainia nunasha yáintinian nekaawartí. Ántar pujusarain tusan nuna tajai.

<sup>15</sup> Ashí wíjjai pujuinia nu amikmaatmainíawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

## Papru JIRIMIÚÑKAN papí áatramu

*Papru Jirimiúñkan papin áatramiania nu*

<sup>1</sup> Wi Papru ju papin áaran akuptajme ámin, Jirimiunká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijjai tsaniñkia takáa asakmin ju papin akuptajme.

<sup>2</sup> Núnisan ame jeemiin Yus-shuar irunainia nunasha tura ii umaj Apiancha tura Arkipiuncha iijjai ti kakaram takasu asantai ju papin akuptajrume.

<sup>3</sup> Yus ii Apari tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

*Jirimiúñ pénker Yus-shuar ámiayi*

<sup>4-5</sup> Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmiñkijai.

<sup>6</sup> Áujeakun chíkich shuarsha ámijjai métek Yúsan nekas enentáimtuiniak ashí pénker ana nuna ti paant nekaawarat tusan seajai. Ashí pénker ana nuka Jesukrístu shiir awajsamujai takakji.

<sup>7</sup> Wisha ame anenkratmajai ti shiir enentáimtakun waraa-jai. Yatsurú, ámijjai ashí Yus-shuarsha shiir enentáimiainiawai.

*Papru Unisemun waitnentratniun Jirimiúñkan seamiani nu*

<sup>8</sup> Nu asantai kakaram tátsujme. Kame wakeraknaka Kristu akatramu asan “Ju túrata” tímíniatjijame.

<sup>9</sup> Antsu aneakun aya júnisan tájame. Wi Papru úuntach asan tura Krístun takarkun sepunam pujakun

<sup>10</sup> Unisemu waitnentrái tusan seajme. Niisha wi ujakmajai Yus-shuar ajasu asa winia uchirua áintsankete. Sepunam pujayatan ni aparíya áintsanak ajasjai.

<sup>11</sup> Nuikkia Unisemu ántrauyi antsu yamaikia aminiisha winiisha yáimniuiti.

<sup>12</sup> Ataksha awañtajme. Wi ti penker aneamu asantai pénker itiaata.

<sup>13</sup> Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wijjai pujus yáintkiat tusan wakerimjai.

<sup>14</sup> Túrasha ámin ujatsuk túrachmin enentáimpramjai. Kame ame wakerakum útsukchamujai “pujustí” tákumniñkia maak.

15 Júnissha enentáimpramniaiti. Unisemu ishichik tsawant menkakamai tura yamaikia wakетки ámijjaj tuke pujustatui.

16 Kame yamaikia emetachma antsu ame aneamu yátsumea áinis átatui. Nuka ti penkerchakait. Wissha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

17 Wissha ti penker amikrumchakaitiaj. Tuma asam winia itiaarua nútiksam shiir awayáta.

18 Yajauch awajtamkaitkiuñkia tura ámijjaj tumashitkiuisha wi akiktatjai.

19 Wi Papru nekas winia uwejrujai juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum.

20 Wátsek, yatsurú, amesha Yus-shuar asam wi seajme jú túrutata. Kristu enentáimtakum shiir enentáimtikrurta.

21 Ti penker uminaitme nuna nékakun júnisan áatjame. Tura wi seajmena nuna nankaamas túrattamna nuna nékajai.

22 Ayu. Átum Yus áujturkurmin Yus winia tsankatruktatui atumijn iiraitniun. Tuma asamtai wi nuñ jean pujustin iwiarturata.

### *Amikmaamiania nu*

23 Épaprassha niisha Jesukrístunu étseruk sepunam wijjaj pujus amikmaatmarme.

24 Núnisan Márkussa Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

25 Ii Uuntrj Jesukrístu atumniasha ti shiir yainmakarti.

Nuke atí.



## ISRAER-SHUARAN papí akuptukma

*Yus ni Uchiríjiaí ni chichamen ujatmakji*

<sup>1</sup> Yáunchuka Yúsnan etserniujai chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitincha niisháa niisháa chichas ujakmiayi.

<sup>2</sup> Antsu ju amúamu tsawantaikia ni Uchirí Jesukrístujain ashí Niiniu ana nuna ujatmakji. Yus Niijiaí ashí íranna nuna najana asa mash Nin súsaiti.

<sup>3</sup> Níyaiti Yúsan imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejai kakarma nujai ashí íranna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurini, pujusmiayi.

*Nayaimpinmaya suntarjai Kristu nankaamantuiti*

<sup>4</sup> Yusa Uchirí nayaimpinmaya suntarjai imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai.

<sup>5</sup> Wátsek, nayaimpinmaya suntaran chikichkinkesha juna tútsuk Kristun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

<sup>6</sup> Tura jú nunkanam ni Iwiairin akupeak tímiayi:

“Ashí Yusa suntari tikishmatrarti.”

<sup>7</sup> Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

<sup>8</sup> Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

<sup>9</sup> Péñkera nu anenaitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujai nankaamas uunt awajtamsaiti.”

<sup>10</sup> Nu arantcha tawai:

“Uuntá, yámankamtaik Ame ju nunka najanamiamé. Túram ame uwejmjiaí nayaimpisha najanaitme.

<sup>11</sup> Nusha mai amuukarmataisha Ame tuke pujuttame. Tarachjai métek mamurartatui.

<sup>12</sup> Tura ipijram ikiustatme. Pushiya áintsam yapajiáttame. Túrasha Ámeka núnismek átatme. Játsuk tuke pujuttame.”

<sup>13</sup> Ataksha tímiayi:

“Akupin pujutainium, winia untsuuruini, pujusam nákarsatá.

Ame nemasrumin nupetkan Ámin umirtamkarti tusan amastatjai.”

Núnisan̄ nayaimpinmayā suntaran penké tíchamiayi.

<sup>14</sup> Antsu Yusa suntarí wakan ániak ashí shuar uwempraratna nuna yáin̄kiarat tusar Yus akupkamu ániawai.

## 2

*Anearta. Uwempratin Chicham nakitrashtiniaiti.*

<sup>1</sup> Nuikia Kristu ti uunt asamtai ashí Niiniu antukajnia nujai kanakchatin ti enentáimtustiniaitji.

<sup>2</sup> Yaunchu nayaimpinmayā suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi.

<sup>3</sup> Antsu ii Uuntrī Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nan̄kaamas uwemtsuk asutniáttaji.

<sup>4</sup> Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan̄ ni Shiir Wakan̄i ni wakerana núnisan̄ niisháa niisháa kakermajai takamtikeawai. Nujai Yus-Chichama nu paant nekanamniaiti.

*Jesukrístu aents ajasmiania nu*

<sup>5</sup> Ayu. Nuik áujmatkur “jú nun̄ka amuukattawai” taji. Tura yamaram nun̄kanam nayaimpinmayā suntar akupkachartatui.

<sup>6</sup> Antsu ii akupkattajnia nu, Yus-Papinium áarmaiti: “¿Shuarti warimpiaitiaj ame imiá enentáimtitniusha? Kame, ¿shuar warí asamtai pujursataj tamea?”

<sup>7</sup> Ishichik tsawant nayaimpinmayā suntarjaī péejchach awajsamiame. Túram ti shiir nan̄kaamas uunt awajsattame. Ame najanamun ashí akupkati tusam tsan̄katkattame.

<sup>8</sup> Ashí nin umirkarti tusam susattame.” Tu áarmaiti. Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji.

<sup>9</sup> Tura wáinjinia nu Krístuiti. Niisha aents ajas ishichik tsawant nayaimpinmayā suntarjaī péejchach ajasmiai. Yus ni shuarin̄ ti aneak jarukarti tusa wakerimiayi. Tura ni wáitias jakamujaī yamaikia ti shiir nan̄kaamas Uunt awajsamuiti.

<sup>10</sup> Ashí írunna nu Yus najanamun ásar ni wakeramun umiktin ainiawai. Tura ashí ni uchirisha ni shíirmarin̄ pachiinkiarat tusa wakerawai. Tuma asa Yuska Jesukrístun, nu shuaran

Uwemtiknia nuna, ni waitsmujaj nekas Uwemtikkiartin awajsamiayi.

<sup>11</sup> Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparínti. Nu asamtai Yusa Uchirí nu shuaran “yatsur” títinian natsantatsui.

<sup>12</sup> Yus-Papinium núnisan tawai:

“Ame náarmin winia yatsurun ujakartatjai. Ashí iruntramunam kantampruattajme.”

<sup>13</sup> Ataksha ni shuarijjaj métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjai Yúsan umirkun pujajai” tawai.

<sup>14</sup> Tura nu uchi aents ásarmatai núnisan Jesussha aents ajasmiayi. Tura aents ajas jaka, iwianchin, jatai nérenniurin, ashí emesramiayi.

<sup>15</sup> Tura ti untsurí shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant áiniawai.

<sup>16</sup> Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi.

<sup>17</sup> Túratin asa penké métek ni yachía áinis ajasmiayi. Nujaj in tuke waitnentrampromniaitji. Tuma asa Yúsnan pujurniu uuntrí ajas Yúsan tuke péñker chichartamsamniaitji. Núnisan murikiun maa Yus súsatniua áintsan ni jakamujaj ashí shuara tunaarín tsankurniuiti.

<sup>18</sup> Tura imia niniki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiaitji.

### 3

#### *Jesus Muisaisjajisha nankaamantuiti*

<sup>1</sup> Tuma asamtai, péñker yatsuru, atumniasha Niiniu atí tusa Yus achirmakuitrume. Tuma asarum Kristu Jesus péñker enentáimtustarum. Niisha Yus nekas Akatramuyayi. Tura ashí Yus-shuar ajasarua nujaj Yúsnan pujurniu uuntría núnisaiti.

<sup>2</sup> Nu atí tusa Yus anaikiamiayi. Túramtai Kristu nuna ti penker takasuiti. Núnisan Muisais ashí Yusa aentsrín, Israer-shuar armia nuna ti shiir wainkiamiayi.

<sup>3</sup> Túrasha Muisaisjaj nankaamas Kristu ti shiir awajnasuiti. Jejjaj nankaamas jea jeamniuka nekas péñkerchakait. Núnisan Kristu Muisaisjaj nankaamas péñkeraiti.

<sup>4</sup> Kame ashí jean shuar jeamtsuk. Tura Yus ashí írúnna nuna najanaiti.

<sup>5</sup> Wats. Muisais Israer-shuaran wáiniuk Yusa Jēen takas-tinia áintsan pé<sub>̄</sub>ker takarniuyayi. Tura ni takaak ukunam Yus títiatna nuna etserkatniuyayi.

<sup>6</sup> Túrasha Kristu Yusa Jēen takarniuchu asa antsu Yusa Uchir<sub>̄</sub>i asa nu<sub>̄</sub>i ashí akupeawai. Nu je<sub>̄</sub>asha iitji. Tura tuke iniaitsuk kakaram ajaras Yus suramsattaj nu wararsar nákastiniaitji.

*Yusa shuari shiir pujustin*

<sup>7</sup> Nu asamtai, Yusa Shiir Wakan<sub>̄</sub>i Yus-Papinium tawai:

“Yamaikia, Yus tana nu ántakrumka

<sup>8</sup> nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yús<sub>̄</sub>an nekapsar akajkarmiayi.

<sup>9</sup> Túramtai Yus tímiayi “Nu<sub>̄</sub>i atumí uuntri nekaprusar akajtukarmiayi. Kuarenta (40) uwitin wi kakaram túramun ísarsha nakitrurarmiayi.

<sup>10</sup> Tuma ásarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai.

<sup>11</sup> Tura kajerkan nekas tákun “Wij<sub>̄</sub>ai shiir pujustinian pen<sub>̄</sub>ké tsan<sub>̄</sub>katkachartatjai” tímiajai” tímiayi Yús.”

Tu áarmaiti.

<sup>12</sup> Anearta, yatsuru. Yajauch enentáimsarum tuke iwiaaku Yus enentáimtusuk kanakiirap.

<sup>13</sup> Kame kashinkia tunaaj<sub>̄</sub>i anannam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum.

<sup>14</sup> Yámankamtaik Kristu shiir enentáimtusmaj núnisrik tuke iniaitsuk émetekrikia Krístuj<sub>̄</sub>i shiir tsan<sub>̄</sub>kiar pujustatji.

<sup>15</sup> Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

<sup>16</sup> Muisais Ejiptu nun<sub>̄</sub>kanmaya j<sub>̄</sub>ikmia nú shuar Yusa chichamen anturkariat nakitrarmiayi.

<sup>17</sup> Tura umiiniachkui kuarenta uwí kajerkarmiayi. Tunaan túrawaru ásar untsur<sub>̄</sub>i shuar aents atsamunam kajin<sub>̄</sub>kiarmiayi.

<sup>18</sup> Kame umirkacharunka Yus “Wij<sub>̄</sub>ai shiir pujustinian pen<sub>̄</sub>ké tsan<sub>̄</sub>katkachartatjai” tímiayi.

<sup>19</sup> Iis, Yús<sub>̄</sub>an enentáimtachu ásar Niij<sub>̄</sub>ai shiir pujustinnium wayatniun tujinkarmiayi.

## 4

<sup>1</sup> Nu asamtai, ii wayatin tsan<sub>̄</sub>katkamu áyatar Yusj<sub>̄</sub>i shiir pujustinnium páchitkiachu a<sub>̄</sub>ij tusar aneartiniaitji.

<sup>2</sup> Yaunchu nu shuaran ujakarmia núnisan incha Uwempratin Chichaman ujatmakuitji. Nu shuar Yúsán enentáimtutsuk antukaru ásarmatai nu chicham yáincharmiayi.

<sup>3</sup> Antsu iikia ni chichame enentáimta asar Yusjái shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjái shiir pujustinian penké tsankatkachartatjai” tímiajai” tímiayi. Kame Yus jú nunkan najana umik nuyá shiir pujus ayampramiayi.

<sup>4</sup> Yus-Chichamnum ayampramun júnis tawai.

“Yus sais tsawant takakmas nuyá tsawantái ayampramiayi.”

<sup>5</sup> Tura ataksha tawai:

“Wijjái shiir pujustinnium wayá ayamprashtatui.”

<sup>6</sup> Shuar nuji wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi.

<sup>7</sup> Nu asamtai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Uunt Tawit timiajai Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman naki-trarua núnisrum ajasairap” tímiayi.

<sup>8</sup> Kame ni kapitiantri Jusué Israer-shuaran ni nunkeen awayá ayamtikraitkiuin<sub>u</sub>kia Yus ukunam ataksha tsawantan áanturmachaaji.

<sup>9</sup> Nujai páantaiti, ashí Yus-shuar Yusjái shiir pujusar ayampratin tuke awai.

<sup>10</sup> Yusjái ayampra nu, ni kakarmarjijai takastinian ayampraiti Yus ni takatrijjai ayampramia núnisan.

<sup>11</sup> Nu asamtai iisha Yusjái shiir pujustinnium pachiinkiachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

<sup>12</sup> Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin inít wayá ashí ni enentáimmian tura wakeramurin ti paant awajtawai.

<sup>13</sup> Yus najanamuka penké Nin umprukchamniaiti. Ashí írúnna nu Yus íimmianum misúa áintsan paant áiniawai. Tura ii túramu ashí paant ujakartatji.

*Jesus nekas Yúsnan pujurniu úuntrinti*

<sup>14</sup> Jesus Yusa Uchiri nekas Yúsnan pujurniu uuntri ajas Yusaj wayá iiniun chichartamji. Nu asamtai iniaitsuk tuke nekas enentáimtustiniaitji.

<sup>15</sup> Niisha ijjaj métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrin waitnentramniuitji. Tura Yúsnan pujurniu uuntri asantai

<sup>16</sup> Yús-akuptainium shiir enentájjaj sapijmiatsuk jeamniaitji. Tura Yus in anenma asa waitnentramak itiurchat pujajnia nuĵ yainmaktatji.

## 5

<sup>1</sup> Tura Yúsnan pujurniu úuntriĵia shuar anaikiamuiti tura ni takatři jímiaraiti. Yusaj shuárnan chicharsatniuiti. Nuyasha Yus suńiamun súsatniuiti tura núnisaĵ namaĵken maa Yúsán súsatniuiti shuara tunaarĵin asakátratniun.

<sup>2</sup> Tura Yúsnan pujurniu uuntri niisha shuar asa ni tujinti-  
amun nékak shuar nékachuncha tura waak yujainia nunasha waitnentramniaiti.

<sup>3</sup> Tura niisha tujintia asa ni tunaarĵincha chíkichnajak métek tsanĵkurnarat namaĵken maa Yúsán súsatniuiti.

<sup>4</sup> Shuar ni enentájjajĵinĵia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisaĵ Arunĵkan anaikiamiayi.

<sup>5</sup> Núniskete Krístujaj. Niisha ni enentájjaj Yúsnan pujurniu uuntri ajaschamiayi. Antsu Yus Nin anak nujaj shiir awaj-  
samiayi. Tura tímiayi:

“Ame winia Uchiruitme. Túmaitkui yamaikia winia kakar-  
marun átakeajme.”

<sup>6</sup> Tura ataksha Yus-Papinium júnis tawai:

“Mirkisetékka Yúsnan pujurin amia núnismek Amesha tuke  
Yúsnan pujurin átatme.”

<sup>7</sup> Kristu jú nunĵkanam pujak kakantar úutuk Yúsán ti seamiayi. Nin jákatniunmayá uwemtikramnia asantai seamiayi. Tura Yusa wakeramurĵin tuke enentájjaj enentáimtakui Yus antu-  
rak ti yáinmiayi.

<sup>8</sup> Nujaj Kristu Yusa Uchirĵintiat ni wáitsatniujaj umirkatniun unuimiarmiayi.

<sup>9</sup> Nujaj ti nekas Uwemtikin ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsantikrarminiaiti.

<sup>10</sup> Túramtai Yus Nin Yúsnan pujurniu uuntri Mirkisetékĵaj métek awaj-  
samiayi.

*Anearta. Yusĵaj kanakchatniuiti.*

<sup>11</sup> Ju ti nukap áujmatsatin awai. Túrasha ántichu asakrumin mashi ujakchamniaitjiarme.

<sup>12</sup> Átumka yaunchu mash nekaamaintrume. Túmaitiatrum ataksha yaiťás Yúsnan jintintruat tusarum atsumarme.

Warí, kuirchia núninaitrume. Kátsuram yútsuk muntsu muntsúatniuitrume.

<sup>13</sup> Kuírchikia Uwempratin Chichaman áujenak péñker un-uimiainiatsui. Tin<sup>ti</sup>kiamnumiá ásar tujintiainiawai.

<sup>14</sup> Apatuk kátsurman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

## 6

<sup>1</sup> Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka un-uimiartinia nu ju áiniawai: shuar ni tunaarín jákatniunam júana nuna kúntuts enentáimtur Yúsan shiir enentáimtustincha,

<sup>2</sup> imiantinnium nekaatniuswai:

“Mirkisetékka Yúsnanha, Yus-shuar yain<sup>manum</sup> uweje áwantsatniusha, jakamunmaya nantaktincha, tura sumantikiatin tsawanta nu nekaatniusha.

<sup>3</sup> Tura Yus yáinmakrin nuna nan<sup>kaamas</sup> nekaattaji.

<sup>4</sup> Shuar Yusna nuna nekaa<sup>nka</sup> tura Yus susamun takakkun<sup>ka</sup> tura Yusa Shiir Wakaní kakarmarín nekapsaitkiun<sup>ka</sup>

<sup>5</sup> tura Yusa chichamencha péñkeraiti nekaa<sup>nka</sup> tura Yusa kakarmarí ukunam nun<sup>ka</sup> yamarmanum takastatna nuna yamá nekapeakka,

<sup>6</sup> nu shuar nuna nakitiak kanakniaka atak ni tunaarín enentáimtak ikiuktinian wakerachuk tujinkiattawai. Warí, ní enentáijj<sup>iai</sup> Yusa Uchirín krúsnum máini<sup>aiti</sup> túrak ashí íimiaini<sup>ai</sup> natsanmain awajeawai.

<sup>7</sup> Nu shuar yajauch nun<sup>ka</sup> áintsan<sup>ai</sup> áiniawai. Yumi yútakui péñker nun<sup>ka</sup> arakan péñker tsapatmakka arakmaun yayawai. Túramtai Yus shiir enentáimiui.

<sup>8</sup> Antsu jan<sup>kí</sup> nupan tsapatmakka nu nun<sup>ka</sup> yajauchiiti. Yus áeseak emesrattawai.

*Yus tsankatramkattajnia nu enentáimtakur kakaram ajaji*

<sup>9</sup> Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme.

<sup>10</sup> Yus ti péñker asa átum takasmancha tura ni aneakrum Yus-shuar yain<sup>mancha</sup> kajinmatkishtatui. Tura yamaisha tuke túrarme.

<sup>11</sup> Tura nuik túrarmena núnisrume<sup>k</sup> tuke iniaitsuk kakaram takasrum ashí Yus tsan<sup>katram</sup>katta nu wáinkiattarme. Núnisan<sup>ai</sup> atí tusar wakeraji.

<sup>12</sup> Nakimtsuk kakaram ajastarum. Niiniua nuna Yus ni shuarín susattawai. Tura shuar Yúsan enentáimtak shiir enentáijj<sup>iai</sup> nákkaka nuna wainkiattawai. Tu takastarum tusar wakeraji.

<sup>13-14</sup> Yus yaunchu Apraámj<sup>ai</sup> chichaak “Ti nekas shiir awajsattajme tura ti nukap pampantikrattajme” tímiayi. Nuna

taku imiá nekas tajai tusa tura chíkich Niijjai nañkaamas uunt atsakui imia Niñki pachiimias tumammiayi.

15 Tutai Apraám yáitmataik nákas Yus timia nuna wáinkiamiayi.

16 Shuar “nekas tajai Yus írui” tákunka chíkich niijjai nañkaamas úuntan páchiawai. Tura tu chichasmataiñkia nuyáñka imiá nekas tana nu nekaamniaiti.

17 Tuma asamtai Yuska “ti nekasan yapájítsuk túrattajai” tusa imia Niñki pachiimias tumammiayi. Nujai ni tsañkatkamun júkiartatna nu shuar Yus ti nekas umiktatna nuna nékainiawai.

18 Yus penké wáitruachmin asa áyatik ni tamajai neka-saiti. Nuna arant nuikia imia Niñki pachiimias ti iki-akátmaji in. Nujai iisha uwempratai tusar Niini weamkatikia tsañkatramkattajnia nu ti shiir enentáimsar wáinkiatin nákaji.

19 Nu enentáimsar kakaram ajaji. Yusaiya in umuchti-amkamnia penké atsawai. Yusaj áchitkia asakrin ti kakaram emettamji.

20 Jesussha emka Yusaj wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

## 7

*Mirkiseték amia núnisan Jesussha Yúsnan pujurniu uuntri ajasuiti*

1 Nu Mirkisetéksha Sarem nunkanam akupniuyayi. Tura ashí nañkamas kakaram Yúsnan pujurniuyayi. Apraám chíkich akupniun mesetjai awakak támatai Mirkiseték jiintiuki inkiun ti shiir awájsámiayi.

2 Túramtai Apraám nupetmakar kuit jukimiun tias (10) akantuk susamiayi. Mirkisetéka naari tana júka “ti penker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupin” tawai.

3 Nukurisha aparisha Yus-Chichamnum atsawai. Núnisan ni uuntrisha atsawai. Ni akiiniamurincha ni jakamurincha ujaatsui. Tuma asamtai Yusa Uchiría áintsan tuke iniañnakchatniun Yúsnan pujurniu uuntri ajasuiti.

4 Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi.

5 Tuma asamtai Apraám nañkaamas úuntaiti. Muisais akupkamujai Riwi weeáka Yúsnan pujurin áiniawai. Niisha ashí Israer-shuarjai métek Apraám weeá áiniawai. Túmaitiat



penké Israer-shuar ni warirjn tias akantuk Riwi shuaran suu ármiai. Muisais tu akupkamiayi.

<sup>6</sup> Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan niijjaj̄i uunt asamtai susamiayi. Túram Mirkiseték Apraáman shiir awajsamiayi.

<sup>7</sup> Imiá nekas Mirkiseték Apraáma nan̄kaamas páantin asa Apraáman shiir awajsamiayi.

<sup>8</sup> Israer-shuarti tias akankamun súajnia nú shuar aya aents ásar tuke pujuschamin áiniawai. Antsu Mirkiseték jakamun Yus-Chicham penké ujaatsui.

<sup>9</sup> Yamái Riwi weeá shuar kuit akankamun achiktin áiniawai. Túrasha Apraám Mirkisetékan súakui Riwi weeá nujaj̄i susa áiniawai.

<sup>10</sup> Apraám weeá áiniak ni ayash̄ia áinis enentáimtusmin áiniawai.

<sup>11</sup> Muisais akupkamunam Riwi-shuarnumiá aya Arun̄ weeá shuar Yúsnan pujurin ármiai. Niisha Muisais akupkamu timia nujaj̄i métek penké shuarjaj̄i takasarmiai. Tura Riwi-shuarnumiá Yúsnan pujurniu takatrijjaj̄i tunáa nekas asakárminiatkiuñkia Yúsnan pujurin yamarmak, Arun̄ weeachu, anaikiashtin ainti. Túrasha Yus Jesusan, Mirkiseték amia áinis, Yúsnan pujurniun anaikiaiiti. Nusha Arun̄ weeachuiti.

<sup>12</sup> Tura Yúsnan pujurin yapajniámtai Muisais akupkamusha yapajniátniuiti.

<sup>13-14</sup> Nu arantcha, ii Uuntrj̄ Jesukrístu Riwi-shuarcha antsu Jutá-shuarauyayi. Tura Muisais akupkamujaj̄i Jutá-shuarnumiá Yúsnan pujurin atsutniuiti. Antsu nuna takatrin̄ penké túrashtiniuyi. Tuma asamtai nújaj̄isha Muisais akupkamu yapajniátniuiti.

<sup>15</sup> Nú páantcha awajsamniaiti. Wats, Yúsnan pujurin yarmar nuka Mirkisetékjaj̄i méteketete.

<sup>16</sup> Niñkia Riwi shuar asa Yúsnan pujurin ajaschamiayi, antsu jákashtin asa nu kakarmajaj̄i Yúsnan pujurin ajasmiayi.

<sup>17</sup> Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

<sup>18</sup> Nujaj̄i yaunchu akupkamu pen̄kercha ajasmatai japirmaiti.

<sup>19</sup> Muisais akupkamuka shuáran pen̄ker awajsachminiuyayi. Antsu Yus in ti shiir awajtamsattajnia nu nákaji. Nujaj̄i Yusai ti shiir jeeáitji.

<sup>20</sup> Nunasha Yus “nekas tajai” tusa Niñki pachiiimias tumammiayi.

21 Riwí-shuarnumią Yúsnan pujurin Yusa naari pachitsuk anaikiamu ármiayi. Antsu jú Yúsnan pujurniunka Yus imia Niñki pachiimias anaikiamiyi. Tura Nin júnis tímiayi:

“Uuntka imia Niñki pachiimias tiniu asa penké yapajíashtatui.

Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

22 Tuma asamtai Jesuska nekas uwentikrattajai tusa yaunchu amia nujai nankaamas péñker Chichaman iwiarturuiti.

23 Yaunchu Yúsnan pujurin untsurí ármiayi. Chíkich jakamtai chíkich tuke takaarmiayi.

24 Antsu Jesus tuke jákashtin asa chikichan ikiurkishtatui.

25 Tuma asa tuke iwiaaku pujak ni shuarin tuke Yúsan áujtusminiaiti. Tuma asa shuar Nin enentáimtusar Yusaj weankarun tuke uwentikramniaiti.

26 Tuma asa Jesus Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yusaj métek Uunt aja-suiti.

27 Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsan suu ármiayi. Nujai emka ni tunaarin nuyá ashí shuara tunaarin asakátin ármiayi. Tura Jesuska jákatniunam chikichki surumak ashí shuara tunaarin asakátramiai.

28 Muisais akupkamuka penké shuarnak tuke péñkercha ain Yúsnan pujurniu úuntrin anaikiaiti. Tura nu ukunmanka Yus, nekas niñki pachiimias, ni Uchirin, tuke péñkera nuna, Yúsnan pujurniu úuntrin anaikiaiti.

## 8

### *Nankaamas péñker Chichaman Jesus takartamji*

1 Nekas júna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurini nayaimpiniam pujusuiti.

2 Nekas Yusa Jee nayaimpinma nu aents najanachma antsu Yus najanamuiti. Nuí Jesus Yúsnan pujurui.

3 Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatin áiniawai. Núnisan Jesukrístusha Yúsan súsatniuiti.

4 Juyá Yúsnan pujurin Muisais timia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai.

5 Yus yaunchu Muisaisan nayaimpiniam írunna nuna ini-aktus tímiayi “Ame wáinkiamna nujai métek ashí najanata.”

Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujain takainiawai.

<sup>6</sup> Antsu Jesus ti nekasa nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti péñker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti péñker ániawai. Tuma asamtai nankaamas péñker Chichaman Jesus takartamji.

<sup>7</sup> Kame Emka Chicham, Yus Muisaisjaj yaunchu najanamia nu, nekas péñkeraitkiuin\_kia Yamaram Chichaman najanachaayi.

<sup>8</sup> Antsu péñkercha ániakui Israer-shuaran tímiayi: “Uunt Yus tawai: “Tsawant jeamtai ashí Israer-shuarjaj Yamaram Chichaman najanattajai.

<sup>9</sup> Yaunchu ju shuara uuntrin Ejiptunmaya yaruakmiaj nuj Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus.

<sup>10</sup> Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrartatjai. Nuyá ni Yusrj ártatjai tura niisha Wí shuar ártatui.

<sup>11</sup> Nuisha Yúsán nekaat tusa jintinnaiyachartatui. Kame ni aisha ni yachisha kame ashí shuar, uchisha uuntcha, ashí nekarawartatui.

<sup>12</sup> Tura ashí ni tunaaríncha tsankuraran ni yajauchirín atak péñké enentáimtuschartatjai” tímiayi.” Tu áarmaiti.

<sup>13</sup> Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

## 9

### *Yusa Jee nayaimpinmasha tura ju nunkanmasha*

<sup>1</sup> Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmaya Yusa Jeeen weriar Yús shiir awajsatniuyayi.

<sup>2</sup> Nu Jeeasha júnis tesakmauyayi. Nékatka Shiir Tesaamu tutainti. Nu asutin ekeemakar tsáapin awajtaisha tura misasha Yus iniaktusma tantajaj pujuyayi.

<sup>3</sup> Nuyá-tesaamuka Imiá Shiir Tesaamu tutainti.

<sup>4</sup> Nu kunkuin ekeemataisha kurijaj kuerma tura Chicham Aarma Chumpitiaisha pujuyayi. Nusha ashí kurijaj kuérmauyayi. Tura inít kurijaj najanamu ichin\_kian maná yurumak enkemniuyayi. Nuyá Yúsnan pujurniu uuntri

Arunka ushukrutairi yaunchu tsapaak janukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi.

<sup>5</sup> Nuna úkurin Kirupín, nayaimpinmaya suntara nu, kurijai nakumkamu wajarmiayi. Nusha Yusa shíirmarin nakumkarmiayi. Tura ni nanapéjai shuara tunaarin ayamprutain nukúakuyayi. Nuna arantka yamá etserkatin atsumatsji.

<sup>6</sup> Núnis aa asamtai Shiir Tesaamunam ashí Yúsnan pujurin tuke wáiniak Yúsnan takasarmiayi.

<sup>7</sup> Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namanke numpen juu ámiayi.

<sup>8</sup> Yusa Wakaní núnis atí tusa nuna mash iwiamiamiayi. Tura asa juna paant awajturmají. Jú nunkanmaya Yusa Jee pujakui tura aya nuin Yus shiir awajsamniaitkiuinikia nekas Imiá Shiira nuí Yus pujamunam wayatin tuke itiurchat ainti.

<sup>9</sup> Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaarijiai tuke itit enentáimtumainiawai.

<sup>10</sup> Warí, aya yurumátniusha umartincha nijiantincha tura ashí núnisan túratniujai aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajniátsain túratin áiniawai.

<sup>11</sup> Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmají. Niisha ti shiir Yus Jeá aents najanachmanum takaawai. Nu Jeá ju nunkanmayanchuiti.

<sup>12</sup> Tura Kristu Imiá Shiir Tesaamunam namanke numpéjai wayachuiti antsu ni numpejaink<sup>i</sup> wayaiti. Tura aya chikichki wayá ii tunaarin asakturmar tuke uwemtikrampramiai.

<sup>13</sup> Nekas namanke numpesha tura áisamu yunkunmirisha tunáa shuarnum pátatek ukatkamu aya pátatek shiir awajsamniuyi.

<sup>14</sup> Túrasha Kristu numpé ii tunaarin penké asakáruiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkamniaitji. Kristu penké tunaarincha asa tuke jákashtin Wakaní kakarmarijiai jákatniunam Yusaj surumakmiayi.

<sup>15</sup> Nu asamtai Jesukristu Yamaram Chichaman shiir takarniuiti. Yaunchu Chichamjai tunáa nekas tsankurachma asamtai Kristu jaka nu tunaancha tsankurarmiayi. Nujai ashí Yus-shuarti Yus achikma asar Yus tsankatramajnia nu wáinkiar tuke wararsattaji.

16-17 Shuar ni kuítr̄in akantrattak chichaman najanatniuiti. Tura jáatsain nu kuit akantrashtiniaiti. Aya nii jakamtai nu chicham najanamum uminkiatniuiti.

18 Nu asamtai Emka Chicham Muisaisjai najanamusha maamu numpé ukatramujai akupkamuyayi. Nujaisha naman máatniuyayi.

19 Muisais nu akupkamun ashí shuáran ujakarmiayi. Nuyá ure kapaakujai tura nupajaisha namanké numpé entsajai pachimpramujai ayak akupkamu papincha ashí shuarnasha ukatkarmiayi.

20 Tura tiarmiayi “Ju numpajai “Chícham Yus akupturmar-mena nu nekas umiktiniaiti” tawai.”

21 Nuyá nu numpajai Yusa Jeencha ashí nui takastin irun-mia nunasha ukatkarmiayi.

22 Nu akupkamujai penké ishichik numpajainchu shiir awajsamniaiti. Túrasha numpajainchu tunáa penké asakárchamniaiti.

*Kristu jakamujai tunáa asakárminiaiti*

23 Tuma asamtai Muisais najanamum nayaimpiniam ana nuna aya nakumkamu ásar namanké numpejai shiir awajsamu ármiayi. Antsu nayampiniam nekas írunna nu, nankaamas kakaram numpajai shiir awajsatin ániawai.

24 Krístuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumka-muiti. Antsu nekas nayaimpiniam Yus pujamunam wayá asa in áujturmaji.

25 Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiayi. Tura Krístuka untsuri wayachuiti.

26 Kame untsuri wayatniuitkiuinkia ni numpejainki wayá asa yámankamtaiknumia untsuri jákaayi. Antsu yamaikia ju nunka amúamunam Kristu chikichki jákatniunam surumak tunaan ashí asakáruiti.

27 Ashí shuar chikichki jakar nuyá ni túramun Yusaj neka-matniun nantaktin ániawai.

28 Núnisan Kristu chikichki jákatniunam surumak shuara tunaarin asakáruiti. Tura atakka tunaan asakártinian wantinki-ashtatui. Antsu ni tátintrin nákainia nuna uwentikkratsa wantinkiattawai.

## 10

1 Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútaijjaisha shuara tunaarin asakátrachminiaiti.

2 Kame asakátraka shuar nekas shiir awajsamniaitkiuinkia Yus naman maar súsatniun atsumachuk iniaisaraayi.

Iis, mash tsankuramuitkiunka ni tunaarijjai itit enentáimtuscharainti. Túrawar namanñ maar Yus súsatniun iniaisarainti.

<sup>3</sup> Antsu namanñken maar ashí uwitin tuke suíniak nujai ni tunaarin tuke enentáimtuiniawai.

<sup>4</sup> Warí, namanñké numpejai ii tunaari penké asakárchamniaiti.

<sup>5</sup> Nu asamtai Kristu jú nunkanam taa Yúsan chicharuk tímiayi:

“Namanñ maar sútaisha penké nakitráme. Antsu ayash*ñ* iwiaram surusuitme.

<sup>6</sup> Namanñ áesamusha tura tunaan asakártin namanñ susamusha wakeratsme.

<sup>7</sup> Tuma asamtai “Yusrú, tímiajai. Winia áatrurma núnisnak ame wakeramurmin umiktajtsan táwitjai” tímiajai” tímiayi.

<sup>8</sup> Emka, Muisais akupkamu aññ, namanñ susamuncha, tunaan asakárat tusa namanñ maar susamuncha, namanñ áesamuncha Yus ashí nakitrait*ñ* tawai Kristu.

<sup>9</sup> Nuyá “Yusrú, ame wakeramurmin umiktajtsan táwitjai” tawai. Nuna taku namanñ maar sútain “Asakáiniaiti” tawai. Tura chikichan ikuiawai.

<sup>10</sup> Jesukrístu Yúsan umiruk jákatniun chikichkí surumakmatai Yus in tunaarincha shiir awajtamsaitji.

<sup>11</sup> Tura Israer-shuarnumiá Yúsnan pujurin ashí tsawantaj nú namanñnak máawar tunaan asakáchunak Yúsan ti suu áiniawai.

<sup>12</sup> Antsu Jesukrístuka jákatniunam chikichkí surumak ashí shuara tunaarin asakár atakka penké jákashtiniaiti. Nuna tura Yusa untsuurinñ nekas akupin pujutainium pujusuiti.

<sup>13</sup> Tura Yus ni nemasrin nupetak nin umirkarti tusa sústartatna nuna nákwai.

<sup>14</sup> Chikichkí jakamujai ni shuarin tuke tunaarincha awajsaruiti.

<sup>15</sup> Yusa Wakanisha núnisañ tawai. Emka tímiayi:

<sup>16</sup> “Yamaram Chichaman najanattaj nuka júnisañ átatui: Wi akupeaj nuna ni enentáin paant enentáimtikrattajai.”

<sup>17</sup> Nuyásha tawai: “Ni yajauch tunáa túramurin penké enentáimtuschattajai.”

<sup>18</sup> Tuma asamtai, ii tunaari tsankuramu asamtai atak in jarutramkatin atsumatsji.

### *Yus tuke shiir enentáimtusar Yusai jeartai*

<sup>19</sup> Tuma asamtai, yatsurú, Jesukrístu numpejai penker awajsamu asar sapijmiatsuk shiir enentáijjai Imiá Shiira nuñ, nekas Yus pujamunam wayamniaitji.

<sup>20</sup> Nuñ wayatniuka Kristu jaka Yusa Jeen tesaamun júsatniua áintsañ ánturmamiaji. Yamaisha tura tuke wayamnia átatui.

21 Jesus Yúsnan pujurniu uuntri asa ashí Yus-shuartin wáitmak pujurtamji.

22 Tuma asamtai, tuke enentáijjai Yus imiá nekas enentáimtusar Yusai jeartai. Ii enentái Kristu numpejai nijiarma asamtai nekas enentáimtakur ii tunaarjaj itit enentáimtumaschatnuiitji. Tura ii ayashisha pénger entsajai imianniuitji.

23 Yus tsankatramkattajnia nu shiir enentáimtamú iniaitsuk kakaram ajasar tuke emetatnuiitji. Yus tsankatramkaitji nuna umiktatui.

24 Pénger anenain tura pénger túrin ajasartai tusar mai yainiaikiartiniaitji.

25 Yusa Jeeen Yus-shuarjai tuke iruntratin iniaiashtiniaitji. Chíkich iniainiakusha iikia tuke iruntratnuiitji. Nu irunkurkia ikiakánairtiniaitji. Tura Kristu tátin tsawantri ishichik ajasu asamtai nú nukap túratnuiitji.

*Anearta. Ti tsúumainti iwiaaku Yusa kakarmarijjai asutniátin.*

26 Túrasha shuar nekas chichaman nékayat wakera-murijjain tunaanum wekaakka Kristu jakamun nakitia asamtai chíkich atsawai ni tunaarın asakátratniun.

27 Áyatik ashamak ti tsuumaı sumamatin tsawantan nákasminiaiti. Nu tsawantaj Yus ni nemasrın ti kajerak asutiak mash emesrattawai.

28 Shuar Muisais akupkamun umikchamtaı tura jímiar shuar menaintiusha etserkarmataı waitnentsuk máatniuyayi.

29 Núnisaitkiuınkia shuar Yusa Uchirın wishikiainiakka ni numpencha nakitiainiakka tura Yus nin anea nuna Wakanıncha katsekainiakka nuna nankaamas asutniáchartatuak. Warı, nii nakitiana nu numpajai Yamaram Chicham nekas umirkatin awajsamuyayi. Tura nújaısha nii ti pénger awajnastiniuyayi.

30 Ii Uuntri Yus júnis tímiayi “Wi asutiátnuiitjai. Wi yapa-jkiattajai.” Nuyásha tímiayi “Wı shuara tunaarın ti paant nekarattajai.”

31 Ti tsúumainti iwiaaku Yusa kakarmarijjai asutniátin.

32 Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itıur-chat katsuntramarme.

33 Chíkichtirmeka katseknakmarme tura ashı íimiainiamunam yajauch awajnasmarıme. Chíkichcha nu shuarınum pachıtkia asarum itit awajnasmarıme.

34 Atumsha sepunam pujuinia nusha waitnentramarme. Tura shiir warasrum kuıtrumın atantramainiakusha katsuntramarme. Nayaimpiniam tuke amuukashtin kuit pachıktin asarum túramarme.

35 Tuma asarum yawetsuk Yus tuke enentáimtusrum kakaram ajastarum. Túrakrum nan̄kaamas akinkiattarme.

36 Atumsha esetra enentáimsarum Yus wakera nu túrakrum Yus atumin amastinia nu wainkiattarme.

37 Kame Yus-Chichamnum áarmaiti:  
“Tátinia nu ishichik ajasai. Wárik tátatui.

38 Shuar Yúsan nekas enentáimtak péñker wekaak uwemprat-tawai. Tura iniaiyakuñkia nin wararsashtatjai.”

39 Tura iikia iniaisar mesena nú shuarchaitji. Antsu Yus shiir enentáimtusar uwempraitji.

## 11

### *Yus nekas enentáimtustin*

1 Yus nekas enentáimtakur “nákajnia nuna, Yus nekas suram-sattaji” taji. Tura wáinchaitiatar “nekas wainkiattaji” taji.

2 Yaunchu ii uuntri Yúsan nekas enentáimtuiniakui Yus “péñkeraitme” tiarmiayi.

3 Aya Yus enentáimtakur ju nékaji: Yus aya ni chichamejain ashí nun̄kan najanamiayi. Túramtai ashí wáiniainiaj nu wáinchataijiaj najanamu áiniawai.

4 Apir Yúsan nekas enentáimtak Kaínjai nan̄kaamas péñkera nuna Yúsan susamiayi. Túramtai Yus “péñkeraitme” taku shiir yumiñsamiayi. Tuma asamtai Apir jákaitiat tuke enentáimtikramji.

5 Eruksha Yúsan nekas enentáimtak iwiaakuk nayaimpiniam junakmiayi. Yus jukimiu asamtai wáinkiacharmiayi. Tura Yus-Chichamnum aarma “Eruk júnatsuk Yúsan ti shiir enentáimtikniuyayi” tawai.

6 Tura Yus nekas enentáimtachkumka çitiurak Nii shiir enentáimtiksatom? Nekas enentáimjai Yúsan weantuktaj tusam wakerakmeka, emka, Yus iwiaaku pujawai, tu enentáimpratniuitme. Nuyásha, Wi Yúsan eakuñkia Yuska winia yáintkiattawai, tu enentáimsatniuitme.

7 Yus, ‘amaarkatniun akupkattajai’ tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajai métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “péñkeraitme” tímiayi. Tura ni umirkamujai chíkich shuar Yúsan enentáimtachun súmamtikiawarmiayi.

8 Tura Apraámsha Yúsan nekas enentáimtak Yus “núñkem ikiukim wetá” tutai shiir umikmiayi. Yus tuke nin súsatniua nú nun̄kanam wémiayi. Turasha ni nun̄ken ikiuak ni jeatniun nékatsuk jiinkimiayi.

9 Yúsan shiir enentáimtak nú nun̄kanam Yus nin tsan̄katkamuitiat írara áinis pujusmiayi. Nuap jeanam



pujuyayi. Núnisan ni uchirí Isaksha tura ni tiranķí Jakupsha nuñ tsanķatkamuitatan írara núnisar pujuarmiayi.

<sup>10</sup> Kame Apraámka nayaimpinmaya ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiaiti.

<sup>11</sup> Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi.

<sup>12</sup> Tura nujai Apraám ti úuntchitiat ti pampanmiayi. Nii chikichkitiat ni pampanmarí ti untsurí ajasar yaajai métek tura náikmijiai métek nekapmarchamnia ajasarmiayi.

<sup>13</sup> Ashí nu shuar Yus tsanķatkamun wáintsuk jákarmiayi. Túrasha Yúsan nekas enentáimtuiniak arantiá wáinkiar warasar shiir enentáimtiarmiayi. Túrawar “ju nuñkanam nekas aya íraraitji” tiarmiayi.

<sup>14</sup> “Íraraitji” tu chichainiak chíkich nuñka eamun páant awajainiawai.

<sup>15</sup> Niisha matsatu winíarmia nuí atak waketkitniun wakeruiniakka páchitsuk waketkíaraayi.

<sup>16</sup> Tura antsu niisha nuna nanķaamas péñker nuñkan nayaimpinmaya nuna enentáimtiarmiayi. Túmainiakui Yuska péprun íwiartur susa asa “wi ni Yusríntjai” títinian natsantatsui.

<sup>17</sup> Ataksha Apraám Yúsan nekas enentáimtak “chikichik uchi amasmaj nu, namañkea áitkiasmek maam surusta” takui Apraám Isakan ni uchirín Yus susatniun penķé suritkiachmiayi.

<sup>18</sup> Kame Yus “Isakjai ti pampantatme” tau asamtai

<sup>19</sup> Apraám “máamtaisha Yus iniantkittiawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan wáinkiamiayi.

<sup>20</sup> Isaksha Yúsan nekas enentáimtak ni uchirín Jakupnasha Esauncha ukunam ni túrunattana nuna ujakarmiayi.

<sup>21</sup> Núnisan Jakup Yúsan nekas enentáimtak jatsuk ni tiranķin, Jusé uchirín, shiir túrunattana nuna ujakarmiayi. Tura ti uuntach asa máshtunķrín ushukruma Yúsan shiir awajsamiayi.

<sup>22</sup> Tura Jusesha jákatniurí ishichik ajatesmatai Yúsan nekas enentáimtak Yus ukunam Israer-shuaran Ejiptu nuñkanmaya júkiartatna nuna ujakarmiayi. Tura jíiniainiak ni ukunchin júkiar Yus tsanķatkamu nuñkanam iwiarsarat tusa akupkamiayi.

<sup>23</sup> Muisaisa aparisha nukurisha Yúsan nekas enentáimtuiniak Muisais ti shíirmach asamtai suntar máawarain tusa akiiniamunmaya menaintiu nantu

úukarmiayi. Tura uunt akupin akupkamun ashamkacharmiayi.

<sup>24</sup> Muisaissha Yúsan shiir enentáimtak uunt ajas Ejiptunmaya uunt akupniu nawantrí uchirí ajastinian nakitramiayi.

<sup>25</sup> Antsu Ejiptu nunkanam ishichkisha tunaan warartsuk Yusa shuaríjjají métek wáitsatniun nankaamas wakerukmiayi.

<sup>26</sup> Nujají Krístun yajauch awajsarmia núnisaní niisha wáitsatniuuuyi. Túrasha ashí Ejiptu nunkanam péñker irunmia nuna nankaamas Yus nin ukunam tsan\_katkatta nuna shiir enentáimtusmiayi.

<sup>27</sup> Niisha Yúsan shiir enentáimtak uunt akupin kajeramu aín ashamtsuk Ejiptu nunkanmaya jíinki wémiayi. Yúsan wáinchiat shiir enentáimtamujají wainíua áinis kakaram ajas ashí katsuntramiayi.

<sup>28</sup> Muisais Yúsan shiir enentáimtak yámankamtaik paskua namperan najaneak ashí Israer-shuaran numpajají ní wáitirín kuérat tusa akupkarmiayi. Nujají Yus timia núnisaní nayaimpinmaya suntar nuna iis nu jéanam iwiajirín máatsuk nankaikit tusa tímiayi.

<sup>29</sup> Israer-shuarsha Yúsan shiir enentáimtuinia ásar Kapaántin Entsa nakaakamtaí ajapén ti péñker kukarnum katiñkiarmiayi. Ejiptunmaya suntarsha núnisaní katiñtai tukamá jakerarmiayi.

<sup>30</sup> Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmataí aa tanish sánakmiayi. Nujají ti yúpichuch nupetkarmiayi.

<sup>31</sup> Raapsha nu péprunam pujak, Yúsan nekas enentáimtak tsanirmataí áyat Israera suntarín mamikmak wekaan ti péñker itiáa asa chíkich shuar Jerikiúnam matsatua nujají jákachmiayi.

<sup>32</sup> Nu arantcha Yúsan shiir enentáimtin ti írunui. Jeteúnsha, Paraksha, Sañsunsha, Jiptísha, Tawitcha, Samuersha, Yúsnan etserniusha nu shuar ármiai. Mash ujaktinian jeatsjai.

<sup>33</sup> Niisha ashí Yúsan nekas enentáimtuinia ásar Yusa kakarmarín niisháa niisháa iniaktusarmiayi. Nuna túruiniak chíkich chíkich nunkanmaya aentsun nupetkarmiayi, nuísha péñker akupkarmiayi, tura Yussha ní timia núnisaní yainkiarmiayi. Uunt yawancha kajechu awajsarmiayi,

<sup>34</sup> uunt jiniasha ikiajniakarmiayi, puniajají mantamnatniuncha uwemprarmiayi. Kakarmachusha kakaram ajarar mesetnumsha ní nemasríncha nupetkarmiayi.

<sup>35</sup> Nuwasha ní uchirí jakan iniantkimiun wáinkiararmiayi.

Chikichcha wáitias mantamnewarmiayi. Ti shiir pujustinium nantaktiai tusar nú tsawantají uwempratniun naki-trarmiayi.

<sup>36</sup> Chikichcha katseknakarmiayi, asutniáwarmiayi, jirujai jin<sub>ki</sub>awar sepunam en<sub>ken</sub>awarmiayi.

<sup>37</sup> Kayajai tukú mantamnawarmiayi, jímiapetek tsupinkiar<sub>mi</sub>ayi, Yúsan iniaisar<sub>t</sub> tusa nekapnasarmiayi, puniajai mantamnawarmiayi. Aya wékainiar<sub>mi</sub>ayi, kuítrinch<sub>a</sub> ásar nuapen entsararmiayi, shuar nincha áin<sub>tr</sub>ar wáitnenmai awajiar<sub>mi</sub>ayi.

<sup>38</sup> Atsamunmasha, naincha, wa<sub>an</sub>masha, ashí nun<sub>kan</sub>am wekain ár<sub>mi</sub>ayi. Nu shuarjain<sub>ki</sub>a ju<sub>n</sub> nun<sub>kan</sub>maya shuar imiá yajauch ásar niijiai pujumain<sub>ch</sub>u áiniawai.

<sup>39</sup> Nu shuar Yúsan shiir enentáimtuiniakui Yus “pén<sub>ker</sub>aitrume” tiarmiayi. Túmaitiat ni tsan<sub>kat</sub>kamun wáinkiachar<sub>mi</sub>ayi.

<sup>40</sup> Yuska nuna nan<sub>ka</sub>amas pén<sub>ker</sub>an iwiarturaru asa tura in yamá pujajnia ju<sub>n</sub>a enentáimturma asa niisha iisha mai metek tsan<sub>ki</sub>ar ti pen<sub>ker</sub> ajasarti tu enentáimsamiayi.

## 12

### *Jesus tuke enentáimtusar tséken<sub>t</sub>iai*

<sup>1</sup> Ashí ju<sub>n</sub> nun<sub>kan</sub>am túrajnia nuka shuar nakuruiniak tsékena nujai nakumkamni<sub>ai</sub>ti. Ashí shuar yaunchu Yúsan shiir enentáimtusaruka téntakar írmainiaji. Tuma asamtai ashí kijin ana nusha tura ashí tunaaka itit awajtamaj nusha ajapa iniaisar tura katsun<sub>tr</sub>ar tséken<sub>ki</sub>r jeatai.

<sup>2</sup> Túmakur Jesus tuke enentáimtusar tséken<sub>t</sub>iai. Ashí shuarjai nan<sub>ka</sub>amas Jesus Yúsan ti nekas enentáimtak aya pén<sub>ker</sub>nak túramiayi. Tuke nekas awakmakmiayi. Imiá tunáa shuáran krusnum máatin a<sub>in</sub> núnisa<sub>n</sub> natsanmainium jákatniur surim<sub>ia</sub>kchamiayi. Antsu ukunam ti shiir warastin átatna nuna enentáimtak nuna ashí katsun<sub>tr</sub>amiayi tura nuyá Yusa untsu<sub>ur</sub>in<sub>i</sub> akupin pujutainium pujusuiti.

<sup>3</sup> Tunáa shuar Jesusan wáitkiasarmia nu enentáimpratarum. Túrarum pimpitsuk katsun<sub>tr</sub>atarum.

<sup>4</sup> Átum tunaajai máaniakrum Jesus túramia áintsarum numpemsha puárchaitrume tura jákachuitrume. Nuisha katsun<sub>tr</sub>arum jeatniuitrume.

<sup>5-6</sup> Yus nekas ni uchir<sub>in</sub> chicharkatniua áinis túramprum nu kajinmatkichmashuram. Júnis tawai:

“Uchirú, wi jintin<sub>tr</sub>amajmena nu kajinmatkip. Asutiámkuisha kúntuts pujusaip. Kame Uuntka Nii aneana nuna jintintiai. Tura ni uchir<sub>i</sub> ajasat tusa achána nuna asutiawai.”

<sup>7</sup> Tuma asamtai Yus ni uchir<sub>ia</sub> áinis asutiámkuisha katsun<sub>tr</sub>atarum. Warí, ashí apa ni uchir<sub>in</sub> chicharkashtatuak.

<sup>8</sup> Tura ashí uchin chicharkatniua núnis Yus atumin chichartamchakrumniñkia nekas ni uchirinchuitrume. Antsu chichichnaitrume.

<sup>9</sup> Nu arantcha ii aparı uchich árinı chichartamkurin umirniuyaji. Nu arant nuikia nekas ii Aparı nayaimpiniam pujana nu shiir umirkar tuke shiir pujustin wakerishtatjik.

<sup>10</sup> Ii aparı ishichik ni enentáijjı wakeramu chichartamniuyaji. Antsu Yuska ti penker awajtamstataj tusa nekas atsumajnia nujı métek chichartamji.

<sup>11</sup> Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujı unuimij nuka penker túratniun tura shiir pujustinian yáinmaji.

*Anearta. Yus tana nu nekas antuktiniaiti.*

<sup>12</sup> Nujı pimpirarusha tura kakarmachu ainia nusha ikiakártarum.

<sup>13</sup> Túrarum penker esettsa enentáimsarum wekasatarum. Túrarum tujintiainia nusha shiir wekasatin yaintarum.

<sup>14</sup> Ashí penker túrakrum ashí shuarjı nawamnaikiarum penker wekasatarum. Tunaan túrinkia Yusı penke jeashtatui.

<sup>15</sup> Aneartarum. Shuar nakitiakuinka Yus nu shuáran shiir yáintinian tujinkiattawai. Nu shuar yajauch enentáimiuk chíkich shuárnasha itit awajas tunaanum útsukartatui.

<sup>16</sup> Tsanirmawairap.

Yusna nusha nakitraitrap. Isaka uchirı Esau penkera nuna nakitramiayi. Yus “iwiaırin núkap súsatniuiti” tímia nuna enentáimtuschamiayi. Tura asa aya ishichik yurumkajı yapajjámiayi.

<sup>17</sup> Tura nuyá ni aparı ukunam túrunattana nuna takui Esau ti penkeran wakerimiayi. Tura ti útkuisha ni aparı nin nakitramiayi tura ni chichasman yapajjátniun tujinkiamiayi.

<sup>18</sup> Atumjainka Yusna enentáimtusminia nuka yaunchu Israer-shuarjı ashammain amia núnischaiti. Yáunchuka Yus ni akupkamurın Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi.

<sup>19</sup> Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiayi.

<sup>20</sup> Kame Yus chichaak “Shuarsha tañkusha ishichkisha nú muranam najarmatai nuka kayajı tukurar tura nankijaisha máatniuiti” tímiayi. Nu akupkamu ti ashammai asamtai “chichaschati” tiarmiayi.

<sup>21</sup> Wáinkiarimia nu ti tsumai asamtai imia Muisaissha “Ashamakun kurıajai” tímiayi.

22 Antsu atumjainkia Yusna enentáimtustin nujai nankaamas péñkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nu jeeáitrume. Nuisha ti untsurí nayaimpinmaya suntarsha

23 ashí Yus-shuarsha shiir iruntrarú ániawai. Yus-shuarka ashí nayaimpiniam ni naarí anujtukma ásar ni uchirí ániawai. Nuisha Yus, ashí shuaran ti nékana nu, pujawai. Niisha shuáran ti péñker awajsantai nu shuar jákar ni wakaní nu shiir pujuiniawai.

24 Nuisha Yamaram Chichaman in takartamajnia nu, Jesus, pujawai. Nuna numpe ukatramujai ashí shiir awajsaiti. Nu numpasha Apira numpejai nankaamas péñkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran péñker awajsartaj tusa jakamiayi.

25 Nuka ti péñker asamtai Yus chichartamprumna nu nekas anturkatniuitrume. Yaunchu Yus jú nunkanam murá chichaamun anturkachar asutniátniunam uwempracharmiyai. Nuikia Yus nayaimpinmaya chichartamkurin ántachkurkia ishichkisha uwemprashtatji.

26 Yaunchu Yus chichamejai nunkan úrmamtekiarmiayi. Tura yamaisha tawai “Ataksha aya núñkankechu antsu nayaimpinmasha úrmamtekiattajai.”

27 “Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui.

28 Yus in akupkatniun tsanekatramaj nuka umuchnakchat-tawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji.

29 Maa, ii Yúsriñkia kajerkanka uunt jáa nuke áesaa mash emesramniaiti.

## 13

### *Yus shiir enentáimtiksatín*

1 Nuamtak yachia núnisrum tuke mai anenai ajatarum.

2 Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruuti.

3 Sepunam pujuinia nusha atumsha niijiai pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

4 Nuatnaikiatin péñkeraiti. Shuar ni nuwejai tsaniñ pujustin péñkeraiti. Tura nuatkamu ainia nusha chikichan eakchatniuiti. Tsanirmaná núnaka Yus asutiáttawai.

5 Aya kuítiak enentáimtusam pujusaip. Yuska “Kanakchattajai tura péñké ikiukchattajme” túramui. Tuma asamtai ame takakmena nujai shiir enentáimsam “maakete” titiá.

6 Tiniu asamtai arantutsuk ju tíminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtatjai.”

7 Atumin Yus-Chichaman jintintramawarmia nu enentáimtustarum. Yúsan shiir enentáimtuiniak péñker wekasarmia núnisrumek atumsha túratarum.

8 Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui.

9 Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajai enentáiruui kakaram ajastaj táyat penké yáinçhaiti. Yurumeaj nújainchu antsu Yusa anenkrattairijjai ii enentáin kakaram ajasminiaitji.

10 Yáunchu Yúsnan pujurin naman maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nu pachiinkiachmin áiniawai.

11 Israer-shuarnumiá Yúsnan pujurniu uuntri tunaan asakártaj tusa namanké numpen júkiar Imiá Shiir Tesaamunam wain ármiayi. Tura nu naman arant áesatniuyayi.

12 Núnisan Jesussha péprunam arant wáitkianas mantamnamiyai. Nujai ashí shuara tunaarin ni numpejai nijiatkaiti.

13 Núnisrik iisha péprunmaya arant wétinia núnisrik Jesusai weri Niijjai métek wishikmain katsuntutai.

14 Kame ju nunkanam amuukachmin pepru atsawai. Antsu ukunam ti shiir pepru átatna nu nákaji.

15 Tuma asar naman maar Yus sútsuk antsu shiir chicham súakur tuke Yus shiir yúminçkijai. Tuke núnisar túratui.

16 Péñker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

17 Yus-shuaran akupin ainia nu umirkarum shiir enentáimtikratarum. Ni takatrin Yúsan ujaktin ásar atumí wakanin shiir wainiainiawai. Niisha itiurchatcha antsu wakerumainian túrawarat tusarum shiir yáintarum. Nu túrachkumka çitiurak yainmakarat?

18 Incha Yus áujstarum. Iisha ashí péñker túratin wakeraji. Túrajai enentáimji.

19 Tura Yus áujkuram Yus ataksha atumjai wainniaikiatniun wari tsankatrukak tusarum seatritiarum.

### *Amúak shiir chichaawai*

20-21 Imiatkinchanum apujkartinia nú Yus, Jesukrístun jakamunmaya iniantkimia nuka, ni numpé kakarmarijjai ashí péñker ana nuna suramsarti. Nujai ni wakeramu túrattarme. Tura Jesukrístu kakarmarijjai ashí ni wakeramun in pujurtamas takasti. Ii Uuntri Jesukrístu ashí Yus-shuaran ti péñker

Wáinniuiti. Tura ni numpejaj Yamaram Chichaman kakaram awajsamiayi. Nu Chichamsha tuke menkakashtatui. Aya Kristu tuke shiir awajnasti. Núnisan atí.

<sup>22</sup> Yatsurú, kakaram chicharkajrumna ju shiir enentáimjai anturkatarum. Kame ti wárik áatrajrume.

<sup>23</sup> Yamaikia ii yachi Timiutéu sepunmaya jiinki ankant ajasai. Nuna ujaajrume. Wárik támatainkia atumin íitij tusan winiakun niijjai winittijai.

<sup>24</sup> Atumí úntrisha tura ashí Yus-shuarsha amikmaatarum. Itiaria nunkanmaya shuarsha amikmatmainiawai.

<sup>25</sup> Ashí Yus ti shiir yainmakarti. Nuke atí.

## SÁNTIAK papin árar akuptukma

### *Sántiak aarmiania nu*

<sup>1</sup> Wi Sántiak Uunt Yúsan tura núnisan̄ ii Uuntrī Jesukrístun umirin asan̄ jū papin aajai. Ashí Yus-shuarterimin ashí nun̄kanam tsakiñmakarum matsatrumna nuna amikmaajrume.

### *Nekatainkia Yúsnumiaiti*

<sup>2</sup> Yatsuru, ashí itiurchat wáinkiumesha tuke warastarum.

<sup>3</sup> Iis, itiurchatnum pujakrum nekas Yus enentáimtaikurmeka katsuntratin unuimiartatrum.

<sup>4</sup> Tura tuke páchiachkuram, tuke katsunteakrum, nuikia Yúsjaí ti pen̄ker katsuartatrum. Pen̄ké atsumashtatrum.

<sup>5</sup> Átum nánkamsarmek nekaatin tujintiakrumka Yusa nekatairī seata. Shuar seakūj Yuska kajetsuk tura ementutsuk antsu patatas súawai. Tuma asamtai seakminkia suramsattawai.

<sup>6</sup> Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturī juní taa, atúu waketki ajatsuk. Amesha áintsamek túmame.

<sup>7</sup> Enentáimjin̄ núnisketkuin̄kia, seamna nuna Yus pen̄ké suramsashtatui.

<sup>8</sup> Shuar jimiará enentáimna nuka shiir wekasatniun tujintiawai.

<sup>9</sup> Yus-shuar, jū nun̄kanam kuítrinha ainia nu, Yus shiir awajsamu nujaī warasti.

<sup>10-11</sup> Tura Yus-shuar kuítrinniuitkuisha péejchach enentáimtikramsha warasti. Iis, nupā kuán̄kam tura nantu ti sukuam kaar miniatsuk. Kuítrinniuka ántska ántram seame. Nayaantsa tsukaturī juní taa, atúu waketki ajatsuk. Amesha áintsamek tán̄kete. Tuke súrutnak pujurkusha itiurchat wáiniuk wárik amuukattawai.

### *Ii itiurchatrj ana nu*

<sup>12</sup> Shíiraiti shuar ni itiurchatrjin̄ nekas katsunteana nuka. Nekapsam jíinkiuñka akinkiatniun wáinkiatstawai. Iwiaaku átinian, tawasap achiktinia núnisan, wáinkiatstawai Yus ni aneam tsan̄katka nuna.

<sup>13</sup> Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha pen̄ké chikichkinkesha tunaanum útsuchuiti.

<sup>14</sup> Antsu ni wakeramurijiain̄ aents tunaan nin̄ki ikiatmamkaiti yajauch túratniun. Nújain̄kia tunaanum útsukmaiti.



15 Nu yajauch wakeramunmaya tunáa akiiniui. Tura nu tunáa mash amuukamtai jákatin akiiniui.

16 Yatsuru, aneakun tájarne, anaṅmamawairap.

17 Ashí péṅker ana nu, ashí shiir ana nusha nayaimpinmaya Yusak amasuiti. Yus ashí tsáapnina nuna najanaiti. Tura Niin kiritin atsaiṅ yapajítsuk tuke tsáapniiti.

18 Nii wakera asa ni nekas chichamea nujai ni uchiri najatmamji. Tura ashí ukunam átatna nujai ii émkaitji.

*Yus nekas shiir awajsatin*

19 Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip.

20 Kajena nuka Yus péṅker wakeramun túratsui.

21 Nu asamtai, ashí péṅkercha nu tura ashí yajauch írunna nusha iniaisata. Tura tuke enentáijjai Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

22 Yus-Chicham umikta. Aya ántukaip. Aya ántakmeka amek anaṅmamattame.

23-24 Shuar íspikia ímiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujai méteketete.

25 Yus tana nujai ankant ajasminiaiti. Shuar íspikia iimia áintsan nekas Yus péṅker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

26 “Nekas Yúsan shiir umirjai” tana nu tura eseer chichaachkuṅka imia niṅki anaṅmamui tura “Yúsan shiir umirjai” tana nuna ántar tawai.

27 Nekas Yus Apa awajítsuk shiir umirkatin júiti: mitiaiki-asha wajasha itiurchatnum pujuiniakuisha yáintiniaiti tura ju nuṅkanam ashí tunáa ana nujajisha máatrashtiniaiti.

## 2

*Shuar antra akantrashtin*

1 Yatsuru, ii Uuntri Jesukrístu ti shiir naṅkaamantua nu enentaimtatirmeka shuar akantratin enentáimsairap. Shuara enentái enentáimtsuk antsu aya pátatke wáinmena nujai aents akantram niisháa enentáimturairap.

2 Iis, iruntrumna nu shuar kuítrintin kurí aniyu aweera tura péṅker iwiarmampra wayashtimpiash. Tura núnisan chíkich kuítrincha aruta entsaru wayashtimpiash.

3 Tura kuítrinnia nu “Péṅkera juí pujusta” tíchatameash. Tura kuítrinchaka “Atu wajauta, túrachkumsha juí nuṅkansha pujusta” tíchatameash.

4 Nu tákumka yajauch enentáimpram jimiará enentáijjaj aents enentáimtame.

5 Aneamu yatsuru, antuktarum. Ju nuṅkanam kuítrincha ainia nuna Yus achikiuiti Ní shuar ajasar Nin nekas enentaimtin ajasartinian. Tura ashí nayaimpiniam írúnna nunasha Yus nin tsan̄katkattawai. Ashí shuar Yúsán aneena nuna anajmatra asa nin tsan̄katkattawai.

6 Átum antsu kuítrincha natsant awajearme. Iista, kuítrinnia nuka timiá itiurchat awajtamainiatsuk. ¿Nuikia níchuk ainia achirmak kapitiánnium japiki júramprumna nu?

7 ¿Nín̄kichuk ainia Kristu naar̄i shiira nuna ántar pachikiar pen̄ké yajauch áujmatainia nu? Tura átumka nuna naar̄i tuke shiir awajkurmin, ashí shuar “Kristu shuar̄i” túramainiawai.

8 Yus-Chichamnum ju akupeamu nekas pen̄keraiti: “Ame ayashim aneamna núnismek ame írútramuram aneeta.” Nu nekas umirniuitkiurmeka maak.

9 Nú enentáijjaj kuítrinnijaj chichasminiaiti. Tura nuyá kuítrinčajaj shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjaj amek sumamame.

10 Chíkich akupkamu írúnna nu ashí umikiam tura aya chikichik akupkamu umikchamka nuikia ashí akupkamu umircha ajasume.

11 Iis, Nín̄ki Yúsak chichaak tíchamka “tsanirmawaip.” Tura chikichnasha “maṅkartuawaip” tímiayi. Nu asamtai, shuar tsanirmatsuk túrasha maṅkartakka ni wakeramun umirtsui.

12 Kristu an̄kant awajtamsamtaí ii yamáí ni akupeamur̄i yúpichuch umirkamniaitji. Nu asamtai nu akupkamujaj métek wekakurniṅkia Yus “pen̄ker túraitme” turamtatji. Tura umikchakriṅkia “pen̄ker umikchaitme” turamtatji. Tura nu enentáimsar pen̄ker chichasar takasar wekasatniuitji.

13 Chikichan waitnentachkuṅka waitnennatsuk asutniáttawai. Tura waitnen̄kratniuitkiurniṅkia tsawant jeamtaí Yus in waitnentramp Prattaji.

*Yus enentáimtustin tura umirkatniusha*

14 Yatsuru, shuar “Yusan shiir enentáimtajai” táyat tura pen̄ker túrachkuṅkia pen̄kerashit. Nujaj uwemprattawak.

15 Wátskea, Yus-shuar, áishmaṅsha nuwasha, entsátáir̄in tura yurumken atsumashtimpiash.

16 Tura ame nékayatmek ayash̄i atsumana nu sútsuk tíchatapash “Pén̄ker wetá, entsatai entsaram túram pen̄ker yurumáta.” ¿Nu sútsuk tákum pen̄kerkait?

17 Núnisan̄ takatsuk Yus enentáimtustin ántraiiti.

18 Tura shuar tíchanpiash, “Chíkich takaawai tura chikichcha Yúsán shiir enentáimtai. Mai pen̄kerchakait” tichanpiash.

Wats, ame Yus enentáimtamun takatsuk paant inaktusmini-ashitiam. Tura wi antsu pé<sub>n</sub>ker takatrujaj<sub>i</sub> Yus enentáimtamun paant inaktustatjaj<sub>i</sub>.

<sup>19</sup> Nekas Yus chikichkiiti tu enentáimtame. Nuka pé<sub>n</sub>ker túrame. Túrasha iwianchcha nunasha nékainiawai. Tura umircha ásar ashamainiawai.

<sup>20</sup> Netse enentáimpraip. Ashí Yus wakera nu takaachkumka, Yus enentáimtustin ántraiti. ¿Nu nekaatin wakeramek? Iista.

<sup>21</sup> Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pé<sub>n</sub>keraitme” tímiayi Apraáman.

<sup>22</sup> Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiaay<sub>i</sub>. Tura umirak Yus enentáimtamun umikmiayi.

<sup>23</sup> Nujaj<sub>i</sub> Yus-Chicham aarma nu uminkiamiayi. Juiti: Apraám Yúsan shiir enentáimtusmiayi tura Yus chicharuk tímiayi “Máakete. Nújaj<sub>i</sub>inkia tuke pé<sub>n</sub>ker túraitme Wijjaj<sub>i</sub>” tímiayi. Apraámsha nekas “Yusa Amikr<sub>i</sub>” tu náamkamiayi.

<sup>24</sup> Páantchakait. Shuar aya Yúsan shiir enentáimtamujaj<sub>i</sub>inchuk tura pé<sub>n</sub>ker takasmajaj<sub>i</sub>sha Yus nin shiir enentáimtawai.

<sup>25</sup> Núnisan<sub>i</sub> Raap tsanirmataj<sub>i</sub>yayi. Túmaitiat Israeran suntar<sub>i</sub>n mamikmauta tusar akupkamun ni jeen itiaawar tura úukar chikich jíntianam akupak uwentikrarmiayi. Nuna túramtai Yus “pé<sub>n</sub>keraitme” tímiayi nincha.

<sup>26</sup> Ayash<sub>i</sub> wakantichuka jákachukait. Núnisan<sub>i</sub> Yus enentáimtustin tura ni wakeramu takaachkurkia, jaka áintsan ántraitji.

### 3

#### *Ii inia<sub>i</sub>*

<sup>1</sup> Atum untsur<sub>i</sub> jintin<sub>i</sub>kiartin ajastin wakerukairap. Yus in, jintin<sub>i</sub>kiartin ájinia núnaka, nan<sub>i</sub>kaamas neka asar, awajiakrin nan<sub>i</sub>kaamas Yus asutiámattaji.

<sup>2</sup> Iis, ashí mash ti awajiatsjik. Tura shuar chichaak, aya pé<sub>n</sub>kernak chichaakka, nu shuar tuke eseer enentáimniuiti. Tura ayash<sub>i</sub>ísha tuke pé<sub>n</sub>ker ana nuna túriniaiti.

<sup>3</sup> Kawaisha enentáimpratai. Jiru wenuchiniam ikiursam ni ayash<sub>i</sub> ashí ayantaatsuk.

<sup>4</sup> Kanusha ti úuntaitiat tura kakaram wéayat ishitiapach wiantaj<sub>i</sub>aj<sub>i</sub> shuar wakera nu<sub>i</sub> ayantarminiaiti.

<sup>5</sup> Núniskete ii inia<sub>i</sub>. Timiá ishitiapchitiat awakmaktinia tímianu chichaatsuk. Ji ishichik kapaaj<sub>i</sub>aj<sub>i</sub> ashí numi tsaruaku ekeemakchamniakait.

<sup>6</sup> Ii iniajsha jijjaj méteketete. Ashí tunáa piákuiti. Tura ii ayashúin tunáa túratniun útsutmaji. Túnkuruanmaya jijjaj iki-apármaiti tura ashí ii wekajnia nuí émesewai.

<sup>7</sup> Shuar ashí yajasman nawamkamin áiniawai. Ashí kajen íranna nunasha, nanamtincha, napincha, tura entsayancha ashí nawamkaruiti.

<sup>8</sup> Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaíti.

<sup>9</sup> Nu iniaijjaj Yus Apa shiir awajeaji tura nu iniaijjajin aentsti yajauch chichárnaiyaji. Áentsun Yus Nijjaj métek-taku najanamaitiatar yajauch chicharnaiyaji.

<sup>10</sup> Nu iniaijjajin péñkersha tura yajauchisha chichaaji. Yat-suru, nuka penké atsutniuiti.

<sup>11</sup> ¿Púkuninmaya entsa sáawijjaj kusuku jíinkimniakait?

<sup>12</sup> Yatsuru, ¿Kushin\_kiap shuinian nereawak. Munchisha kushin\_kiapen nerektatuak? Núnisan púkuninmaya entsa sáawijjaj kusuku jíinkichminiaiti. Ii iniaijjaj núnisan aya péñkera nu chichastiniaitji.

### *Yusa nekatairi*

<sup>13</sup> Shuar ti neka enentái takakna nu, péñker túrattawai. Nekas nékaitkiun\_ka pééjchachia núnis tuke péñker ana nuna túrattawai.

<sup>14</sup> Antsu atumí enentáijjaj penké yajauch enentáimtumairum tura atumek péñker pujustin enentáimtumarum, nékaitiatam péñker túrachiatam “péñkeraitjai” tiip. Nuka wáitrame. Nekaska núchaiti.

<sup>15</sup> Nú enentaikia Yúsaiyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia.

<sup>16</sup> Shuarsha yajauch enentáimtumairar tura nin\_ki enentáimtumainiakui, nujaj ashí meseawai tura ashí yajauch ti awai.

<sup>17</sup> Antsu Yusaiya enentái takakua nu júnisaiti: ashí nan\_kaamas emka eseeratin, nuyá nawamkartin, shiir ajá, péñker anturnain, waitnen\_kratin, ashí péñker takáa tura anañtsuk naka chichamtin.

<sup>18</sup> Eseera enentáimsatniusha shiir takawai ashí shuar péñker ana nuna túrawarti tusa.

## 4

### *Ju nunkanam íranna nu aneashtin*

<sup>1</sup> ¿Urukamtaitasuk tuke kajernaikiarum ti máanaisrum pu-jarum. Mesetnumsha urukamtai wéarum? Júnisaiti: Atumin yajauch enentái katsuntrachmin útsutmakrumin tuke máaniarme.

<sup>2</sup> Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam.

Chíkich takakna nujaj itit enentáimtuniarme tura ataitin tujinkiam máanaitrume. Wakerarmena nusha Yus seachu asarum wáintsurme.

<sup>3</sup> Tura seakrumsha yajauch searme. Atumí pénkerijjai warastin enentáimiu asarum searmena nusha wáintsurme.

<sup>4</sup> Jú nunkanmaya wakerakum Yusa nemasrijjai tsanirma áintsanketrume. Nékatsumek atumsha. Ju nunkanmayan wakerakikia Yusa nemasrintji. Shuar ju nunkanmayan wakerakka Yusa nemasri ajawai.

<sup>5</sup> Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántrankeash ta?

<sup>6</sup> Tura anenma asa ti yáinmaji. Tuma asamtai Yus-Chicham tawai:

Kajemtinian Yus íistatui tura péejchachin Yus nin aneak ti shiir yáintatui, tawai.

<sup>7</sup> Yusaj ikiumastarum, tura íwianch taritatarum. Túrakrumin íwianch ikiurmaktiatui.

<sup>8</sup> Yúsainí weamkata tura Nii atumin wearmaktatrume. Tunáa shuartiram Kristu numpejaj nijiamartarum. Tura átum, Yussha tura ju nunkanmayasha mai métek wakerarmena nu, atumí enentái naka eseeratarum.

<sup>9</sup> Atumí tunaari enentáimsarum kúntuts enentáimpratarum. Nu kúntutsjai ti úuttiarum. Nuik shiir enentáimprarum wishikmiarumna nuka iniaisarum kúntuts enentáimprarum úuttiarum.

<sup>10</sup> Yusjaj péejchach ajasta, túrakmin shiir awajtamsattawai.

### *“Yajauchiitme” tunaichatin*

<sup>11</sup> Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántrai, umirkashtiniaiti” tawai nu shuar. Nujaj nu shuar umirtsuk Yus akupkamu nankaamas enentáimtumawai.

<sup>12</sup> Yus Niniki akupkamu najana asa Niniki nu akupkamu umirkamun nekas nekaamniaiti tunaashit tusa. Nínkiti uwentikratniun tura emesratniunam akupkatin jea nu. Amesha yáitiam chikicha tunaari íistincha.

### *Kashin átatna nuna Yusak nékawai*

<sup>13</sup> Watsek, átum áujmateakrum “Arumsha kashincha nu péprunam weri nuí chikichik uwí takasar kuit achiktatji” tíchattarpash.

<sup>14</sup> Ishichikisha penké nékatsumek kashin átatna nu. Ju nunkanam ii iwiaakmarí wárik amúatsuk. Yurañkim utsanar tura nantu sukuam mash wárik menkaatsuk. Núnisketji.

<sup>15</sup> Antsu júnis tíminiaitrume: “Yus wakerakuñkia iwiaaku pujakrikia nusha túrattaji” titiarum.

16 Túrachkurmeka átumka Yusjaj nan̄kaamantu enentáimprume. Tura ashí nu enentáikia yajauchiiti.

17 Shuar péñker túratniun nékayat, túrachkuñkia, nuka tunaiti.

## 5

### *Kuítrintin enentáimpratniua nu*

1 Kuítrinniutiram ju antuktarum. Ti úuttiarum. Ti wáitsatin asarum ti kakantra úuttiarum.

2 Kuítrum mash mamukarai tura iwiarmampramurmesha mash tiñkishap yúkayi.

3 Kurirmesha tura kuítrumsha ashí ijiakmamkarai. Ijiakmampramurisha ame péñkercha túram nuna paant iniakmawai. Tura jinium áesamua áintsan̄ ame kuítrum yajauch awajtamsattawai ayashmiin. Amuukatin tsawant jeamunam anearchamame antsu ame kuítrum ikiaun̄kamame.

4 Ame takat iniararam ementushim akirarmamna nu “akirkati” turamainiawai. Anearta. Yakijá Yus, nayainpinmaya suntara uuntri, nu takartamniu chichamen antukai.

5 Ashí ju nun̄kanam írúnna nu wararsaruitrume. Tuma asarum kapun̄ka nuke machararme tura yamaikia máatin tsawant jeayi.

6 “Nu shuar tunaiti” tírum tunaachu tsanumprurum máamarme, tura niñkia surimiakcharmai.

### *Yawetsuk takastin tura Yus áujساتin*

7 Nu asamtai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentaijjai nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk.

8 Núnisan̄ atumsha katsuntsatarum tura yawekiiirap. Kristu tatin yuntumtemayi.

9 Yatsuru, nuámtak “ju yajauch túrutui” tunainirap. Tákurminkia Yus írmastatrume. Nín̄kichukait nuna íistin tura anearta nu Yúsak tíjiuch wajatramui.

10 Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiayi. Túmaitiat wáitsarmiyai túrasha pachischarmiyai. Núnisrumek enentáimsatarum.

11 Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiayi, ni naarj Jup. Tura ni itiurchatři nan̄kaasmatai Yus ti núkap kuítrin susamiayi. Nu nékatsrumek. Ii Uuntri Yus ti waitnen̄kratchakait.

12 Ju ashí nan̄kaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas

titiá. Nekas chicham chichaachkumniñkia Yus írmastatui. Nu asamtai nayaimsha nun̄kasha ashí írunna nusha páchitsuk, aya támena nu tuke nekas atí.

<sup>13</sup> Wáitakmeká Yus áujsata. Waraakmeká, warasam kantamám Yus shiir awajsata.

<sup>14</sup> Yus-shuartiram, shuar jáakka, Yus-shuara úuntrin untsukti. Tura niisha taarti. Tura Jesusa naari pachikiar asuitijiai jaa shuaran ishichik kuerarti. Túrawar Yúsan áujtusarti nu shuaran.

<sup>15</sup> Tura “Yus nuna nekas anturtamkattaji” tu enentáimsar áujsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuñkia Yus nu tunaan tsan̄kurattawai.

<sup>16</sup> Nu asamtai, atumí tunaari paant etsertunaiktarum. Túrarum Yus áujtunaistarum atumí tunaari tsan̄kurnarat tusarum. Péñker shuar Yúsan tuke enentáijiai áujeamuriñkia ti kakarmaiti.

<sup>17</sup> Yaunchu Yus-Chichaman etserin ámiayi, ni naari Erías. Niisha iijiai méteketiat yumi yutukai tusa Yusa áujsamtaí menaintiu uwí nuyá nan̄kaamas yutukchamiayi.

<sup>18</sup> Ataksha yutukti tu áujsamtaí ataksha yutukmiayi tura araksha ataksha tsapainiarmiayi.

<sup>19</sup> Yatsuru, shuar eseera wekatinmaya kanaakuñkia chíkich nin waketkitniun yañti.

<sup>20</sup> Shuar tunáa shuaran yajauch wekaan awakeakka jákatniunmaya uwemtikrattawai tura ti untsurí tunaari tsan̄kurnartatui.

## PÍTIUR

### Emka papin aar akupkamu

*Pítiur Yus-shuaran áatramiania nu*

1 Wis̄ha ju papin aajna nu Pítruitjai. Wis̄ha Jesukrístu akatramurintjai. Israer-shuar Yus-shuar árum nuna atumin an̄kant an̄kant tsakin̄makarum chíkich chíkich nun̄kanam matsatrumna nuna áatjarne. Puntu nun̄kanmasha, Karasea nun̄kanmasha, Kapatúsea nun̄kanmasha, Asia nun̄kanmasha, Pitinia nun̄kanmasha pujarmena nuna áatjarne.

2 Yaunchu Apa Yus, “uwentikrataj” tímia núnisañ achik-maitrume. Tura, Winia ajasat tusa ni Wakanijjaj akan-tamkamiarme. Umirtukat tusa nuna túramiayi. Tura Jesukrístu numpejajisha atumí enentáin atsajkir chamir awaj-turmasmiarme. Wats, Yus tuke waitnentramar ti shiir awaj-tamsarat tusan wakerajrume.

*Shiir enentáimsar pujustin*

3 Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmaya nantakin asamtai, iikia atak akiiniar tuke iwiaaku pujustiniaitiajnia nu arutramji.

4 Tura nayaimpiniam ikiurtamsamu ana nuna achik-mintrum tusa Yus wakerawai. Nu ikiurtamsamu meser-chamnia amuukachminiaiti. Tura nusha yajauchichuiti.

5 Yus nekas enentáimta asakrumin ni kakarmarijjaj wear-marme. Tura tuke uwentikrampratniun, nun̄ka amuua-munam paant iniakmastatna nu achikmintrum tusa tuke tsawant ni kakarmarijjaj wáitmarme.

6 Nu enentáimsarum wararme. Kame ju nun̄kanam pujakrum itiurchat wáinkiashtarmeash. Tura ju nun̄kanam pujustin ishichkichukait. Ukunam péñker pujustaj tu enentáimsarum wararme.

7 Enentáimsatarum. Shuar kurin wakerana núnisañ atum-niasha umirtukat tusa Yus wakerutmarme. Aents kurin jinium áesaniawai, aya kurik juakat tusa. Kurin ti wakeru-inia ásar, amuukamnia añ túruiniawai. Atumsha, itiurchat wáinkiarmentana nujaj, Yusan nekas enentáimtusartimpiash tusa nekapsamuitrume. Nu enentáimtamur kurijjaj nan̄kaamas péñkeraiti. Ukunam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awaj-sarat” tusa



túrutmattarme. Nu tuma asamtai ju nunkanam nekasamuitrume, itiurchat wáintrumna nujai.

8 Jesukrístu wáinchaiatrum anearme. Tura yamá wáinchiatrumek nekas enentáimtarme. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji.

9 Iimiatarum. Uwentikrurat tusarum Yus umirkachurmek. Nu uwempratín wainiu asarum waraarme.

*Krístujai ii uwempratniun yaunchu etserkarmiayi*

10-11 Yus áentsun waitnenta asa, uwentikrataj tusa tuke wakerimiayi. Núnaka Yúsnan etserin etseriarmiayi. Kristu Wakani ni enentáin pujuriarmia nu, túruntsain Kristu wáitsatniurín jintiarmiayi. Tura ukunam ni ti shiir pujustintríncha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi.

12 Tura nii pujuiniainkia túrunashtinian, antsu ti ukunam, ii pujajnia juí túrunatniun Yus nekaamtikiamiayi. Núnaka Yusa shiir chichamen ujatmakarmia nú shuar nekaprutmarme. Nú shuar Yusa Wakani, nayaimpinmaya akupkamu ana nuna nekatairijiai ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

*Pénker wekasatin*

13 Tuma asamtai, pénger enentáimsarum tura pénger íimiasrum wekasatarum. Tura Jesukrístu ukunam wantiniak waitnentramp Prattana nu yawetsuk nákastarum.

14 Umin uchi áintsarmek yaunchu nékachu asarum wakerimiarmena nu iniaisarum Yus umirin atarum.

15 Ashí túramurmijiai timiá pénger wekasatarum. Yus, untsurmakuana nu, pénger asamtai, átumka ni shuari asarum pénger wekasatarum.

16 “Wi pénger asamtai atumsha pénger wekasatarum” Yus tana nu ni Papirijn áarchamukait.

17 “Yus winia Aparuiti” tárúmna nu aneartarum. Ashí aentsu túrutairín métek Yus nekaattawai. Nu neka asarum, ju nunkanam pujarmena juí Yus ashamkatarum.

18 Warí, ánta wekasatniun atumí uuntri jintintramarmena nuyá Yus uwentikramprarme. Túrasha kurisha kuitcha amuukamnia ainia nujai uwentikrachmaitrume.

19 Antsu Kristu numpé ti shiira nujai uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarín tsankurattajai”

tíniuyayi. Núnisañ Kristu in jarutramka asa ii tunaarínia uwentikrampraitji.

<sup>20</sup> Nunkan nájantsuk áentsun jaruktinian Krístun anaikiami-yi Yus. Tura wárik akupkachmiayi. Antsu yamáí tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi.

<sup>21</sup> Nijjají átumka Yus umiirume. Yuska Krístun jakamun-mayan iniantki nankaamantu awajsamiayi. Yus nekas enentáimtakrum, aya péñkernak túrawai titiarum tusa túraiti.

<sup>22</sup> Yus nekas tana nuna, Yusa Wakaní yainmakui, umirka asarum atumí wakaníin péñker ajasuitrume. Yus-shuarjají yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum.

<sup>23</sup> Nekaatarum. Yusa chichame umirka asarum atak akiini-aitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjají tuke iwiaaku átiniaitrum.

<sup>24</sup> Ju ayash tuke pujuschamniaiti. Yusa Papiriin junis áarmaiti:

Ashí aentsti nupáa áaniuitji. Ii péñkerisha kukujja áaniuiti.

Nupa wárik kaawai. Kukujsha núnisañ wárik iniaawai.

<sup>25</sup> Tura Yusa chichamesha tuke amuukachminiaiti.

Nu Chichamjají uwempramnia asantai atumin etsernakuiti.

## 2

<sup>1</sup> Tuma asantai, ashí yajauch ana nu iniaisatarum. Anañkatin, ántar-chichamtin átin, chikichna wakeruktin, ashí tsanumpratniusha iniaisatarum.

<sup>2-3</sup> Antsu, Uunt Jesukrístu waitnenkartutairí nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejají tuke tsawant tsakakrum tuke uwemprami tusarum túratarum.

### *Iwiaaku kaya*

<sup>4</sup> Ii Uuntri Kristu kayáa áantsañkete. Tura shuar kayan yajauchin nakitiainia núnisañ Jesukrístun nakitrarmiayi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukrístun achikmiayi. Atumsha Jesukrístu weantuktarum. Nii iwiaaku kayaiti.

<sup>5</sup> Atumsha iwiaaku kaya áantsañketrume. Tuma asarum Yus wijjají ni jeen jeamti tusarum tsañkamaktarum. Tura nútiksarmek Jesukrístují atumí iwiaakmarí tsañkamaktarum, Yus wakera nuna túrutati tusarum. Jesukrístujají tura asarum Yus shiir enentáimtikrume.

<sup>6</sup> Jesukrístunun Yusa Papiriin junis áarmaiti:

“Istarum. Kayan ti penkeran achikjai” Yus tímiayi. Jeān emka apujtuamurj atí tusan Seunnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukrístun tawai.

<sup>7</sup>Yus umirkaitrumna nu, “kaya ti penkeraiti” tarume. Tura Yúsān umirainiatsna nuka Yusa Papiriin tana nujai métek áiniawai. Ju áarmaiti:

Jeān jeamin nakitrarmia nú kaya jeān emka apujtuamurj atí tusa apujamuiti.

<sup>8</sup>Tura jusha aarma awai:

Tukumak iniaartin kayaiti.

Kame shuar Jesukrístunun etserkamun nakitiakka, ¿enentáinium itiur penker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

### *Yusna ajasaru ainia nu*

<sup>9</sup>Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkairume. Yusna asarum penker enentáimin ajasurme. Tura Yus sumakmaitrume. Niisha winia penkerun etserturkarat tusa túrait. Kame kiritniunmaya jíinkirum ni tsáapnintrin wekasatniun achirmakurme.

<sup>10</sup>Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumnin, ¿ya waitnentrampria? Antsu yamaikia Yus waitnentrampuitrume.

### *“Yúsnaítjai” tu enentáimsatin*

<sup>11</sup>Yatsurtirmin tájarme, Yusna ajasrum, ju nunkanam írar matsatu asarum, atumí ayashj wakerana nu tsankatkairap. Ayashim wakerana nu túrakminkia ame enentáim nujai yajauch ajastatui.

<sup>12</sup>Yus-shuarchanum penker wekasatarum. Túrakrumninkia niisha yamá “Yus-shuar yajauch túruiniawai” ántar tuíniayatan, ukunmanka, Yusjai inkiunaiktin tsawant jeamtai, penker wekarmena nuna enentáimturmasar, nú shuarsha Yúsān shiir awajsartatui.

<sup>13</sup>Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum.

<sup>14</sup>Tura ni akupeamurj ainia nusha tunaan túruinia núnaka asutiáti tura penkeran túruinia núnaka shiir awajsati tusa uunt akupin akupkamu ásarmatai umirkatarum.

<sup>15</sup>Nekas penker wekaamurmijjai enentáimcha ainia nu netse chichaamurj itiatmamtikiatarum tusa Yus wakerawai.

16 Tunaanumiā ankant ajasu asarum péñker wekasatarum. Túrasha wi ankant ajaschajak tusarum nánkamsarum ya-jauch túrawairap. Antsu Yusna asarum, ni wakera nuna umirkatjai tusarum anearum wekasatarum.

17 Chíkichcha shiir enentáimtustarum. Yus-shuar ainia nusha aneetarum. Yus péñker asamtai ashamkatarum. Uunt akupin shiir awajsatarum.

### *Yus-shuarti katsuntratin*

18 Takarniutirmesha ame úuntrum péñker shiir enentáimturmakeisha tura yajauchiitkuisha umirkatarum.

19 Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti penkeraiti.

20 Yajauch túrawakmin asutiámamtai katsunteakmeka nuísha wariñ ati. Antsu péñker túrawakmin asutiámamtai katsunteakmeka júka ti péñker túrame Yusaj.

21 Núnisañ túrunatin achikmaitrume. Kristu waitrutmasmi-  
arme nuí, Wi túraj núnisañ túrawarmi tusar wáitsamiayi.

22 Krístuka tunaan penké túrachmiayi. Tura chikichkinkesha penké anankachmiayi.

23 Kátsekeamsha Niñkia katsekachmiayi. Wáitkiamsha “yapa-  
jmiaktaj” tíchamiayi. Antsu “winia Apar Yus iistí’ tímiayi, Yus péñker túrin asamtai.

24 Kristu Niñki ni ayashjín ii tunaarjín entsaki krúsnum jarutramkamiayi. Tunáa enentáimtusairum tusa, antsu Yusaj péñker wekasamniuram tusa jarutramkamiayi. Atumí enentájin tsuártaj tusa Kristu asutniámiayi.

25 Murik ni pujutairjín waketkitniun nékatsna ántsarmek atumsha menkaka wekaimiarme. Tura yamaikia atumí wáitmaurjín waketkintrume. Atumí wáitmau Krístuiti, atumí enentájin wáinnia nu.

## 3

### *Nuatnaikiaru itiur túratniuit*

1-2 Tuma asamtai, nuwatiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeká chichaatsminiñ, niisha Yus-shuar ajastinian wakerittiawai.

3 Nu asamtai aya pátatek iwiarmampratniusha ti enentáimtusairap. Intiash ti penker iwiaratniusha, kurijjai iwiarmampratniusha, pushí ti kuitjai entsartincha ti enentáimtusairap.

4 Antsu, “nekas shírmach ajastaj” tákumka, enentáimin “shiir kajeche átajai” tu enentáimsatarum. Nuka sakarchattawai. Tura nuka Yúsnumka ti penkeraiti.

<sup>5</sup> Yaunchu núnisaraṇ nuwā Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrṇ umirkar nujai ni enentáin shíirmach ajasar pujuarmiayi.

<sup>6</sup> Atumí weatrṇ Sara ni áishrṇ Apraáman umirmiayi. Umirin asa, “winia uuntru” tíniuyayi nin. Atumsha péñker túrakrumka tura sapijmiatsuk wekaakrumka, Sarajai métek átatrume.

<sup>7</sup> Tura áishmanṭirmesha Yus wakerana nu nekaarum atumí nuwē shiir enentáimtusrum tsanṇtarum. Nuwēmsha, nuwā asa, áishmanṇjai métek katsuntrachminiaiti. Tura niisha, ámiṇjai métek Yusa waitnenkartutairṇjai tuke iwiaaku átinian takusminiaiti. Tu enentáimta asam ame núwēm shiir enentáimtustá. Yus áujkuram itiurchat atsuti tusarum túratarum.

### *Yúsnun péñker wekasatin*

<sup>8</sup> Nuyasha ashí Yús-shuartistirmin tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáinṭaj tu enentáimsatarum.

<sup>9</sup> Yajauch turamainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu péñker awajsatarum.

<sup>10-12</sup> Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuṇka tura tuke tsawant warastinian wakerana nu, péñker íimiastí, yajauch chichakajj tusa tura wáitruawajj tusa. Tunaanumiá kanaki péñkeran túratí. Tuke enentáijjai shiir átinian eakti.

Tu áarmaiti.

### *Itiurchat aiṇ péñker túratin*

<sup>13</sup> ¿Yaki yajauch túrutmat péñker turamnisha?

<sup>14</sup> Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume.

<sup>15</sup> Tura “Kristu winia Úuntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker ámkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata.

<sup>16</sup> “Yúsjai péñker wekasataj” tu enentáimsarum wekasatarum. Yus-shuar asakrumin chíkich shuar ántrar áujmatramainia nu ni ántar áujmatramsamun nekaawar natsaararat tusarum Yusjai péñker wekasatarum.

<sup>17</sup> Yajauch túrakur wáitsatniujainkia nankaamas, Yus wakerakuinkia penker túrakur wáitsatniuka ti penkeraiti.

<sup>18</sup> Kristu ii tunaarin asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmiaji, Yúsnum ejetamtai tusa. Ayashiinkia jakayat ni wakanijiaj ni ayashi ataksha iwiaaku ajasmiaji.

<sup>19</sup> Ni wakanijiaj jakáa wakanin emetamu armia nuna etserkataj tusa wémiayi.

<sup>20</sup> Nusha yaunchu Nuai uunt kanun nájanuk siantu painti (120) uwi pujurmia nui Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumijiaj uwentikrarmiaji.

<sup>21</sup> Nu yumi Yus-shuarti imiantinian nakumui. Ii ayashi chamir awajsatai tusar imiantsuji. Antsu ii enentái penker atí tusar Yus sear imianji. Nujai iisha uwemji. Jesukristu nantakin asamtai, nujai uwempraitji.

<sup>22</sup> Tura Niisha nayaimpiniam we akupin pujutainium Yusa untsuurini apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukristun umirainiawai.

## 4

### *Ju nunkanam wáitsatin*

<sup>1</sup> Kristu ni ayashiin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashiin wáitiana nú shuar yajauchin páchiatsui.

<sup>2</sup> Antsu “iwiaakjana nuikia Yusa wakeramurin tuke umirkatjai” tu enentáimiui. Ni ayashi wakerana nuna yamaikia páchiatsui.

<sup>3</sup> Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperin yajauch ana nu najanatniusha nusha ashí wakerimiarme.

<sup>4</sup> Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai ini-aisara?” tusar yajauch áujmatramprme.

<sup>5</sup> Túrasha ukunam nu aents ni túramurin etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui.

<sup>6</sup> Túrasha jaka armia nu Yusa shiir chichameu jankarmiaji. Ni ayashiin ashí shuarjai métek jakamniaitiatan Yus iwiaaku pujana núnisan ni wakanij iwiaaku pujusarat tusa ujankarmiaji.

*Shuar yáintiniaitji*

<sup>7</sup> Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujutarum.

<sup>8</sup> Aneniamujaj untsurj tunaasha tsankuratin awai. Tuma asamtai ashí nankaamas nuamtak anenaistarum.

<sup>9</sup> Kajé-kajejainchu atumí jeen itiaaniátarum.

<sup>10</sup> In ankant ankant shiir awajtamsatniun Yus ti núkap takakui. Tura in shiir awajtamsamujaj chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujaj ame írutramuram yaintá.

<sup>11</sup> Etserkatniun Yus amasuitkiuñkia ame tamena nu, Yus tana nujaj métek atí. Chíkich shuar yáintiniaitkiumka Yus amaana nú kakarmajaj túrata. Ashí túramna nu Yusa naari shiir atí tusam Jesukrístu náarjjaj túrata. Jesukrístun ashí aents shiir enentáimtusartí. Tura ashí áentsnum ni kakarmarij tuke atí. Nuna tajai.

*Yus-shuarti wáitsatin*

<sup>12</sup> Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti.

<sup>13</sup> Tuma ajñ shiir enentáimsatarum. “Kristu wáitsamurin métek-taku wáitiakun péñkeraiti” tu enentáimsatarum. Ukunam Kristu wincharj wáinkiarum timiá warasmi tusarum túratarum.

<sup>14</sup> Kristunu asakrumin katsekkramkachartimpiash. Túmaitkiuisha Yusa Wakanj shiir ana nu atumjin pujurtamkui shiir awajsamuitrume. Katsekkramainia nú shuar imia Yusa Wakanj yajauch áujmatainiawai. Tura átumka Yusa Wakanj shiir awajearme.

<sup>15</sup> Túra atumsha yajauch túrawajrum aneartarum. Mankartana nu, kasamkana nu, tunáa túrana nu, tura chikichna páchiana nusha ni wáitsatniurinkete. Atumjainkia nu wáitsatniuka atsutí.

<sup>16</sup> Tura antsu Krístunuiti tusar wishikramuk wáitkiarmainiakui natsaarairap. Krístunu asam wáitiatmek, natsamtsuk Kristu naari shiir awajsata.

<sup>17</sup> Yuska ni shuarin nekapsatajtsa nan̄kamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartñ. Ti asutniáwartatui.

<sup>18</sup> Imia Yus umirjinia nu uwempratniurj itirchataitkiuisha tunaan túruiniana nusha urukawartñ.

<sup>19</sup> Tuma asamtai Yus wakeramujaj wáitainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

## 5

*Yus-shuara uuntri túratin*

1 Yamaikia Yus-shuara úuntri<sub>t</sub>tiram, jintintjiarme. Wisha núnisnak Yus-shuara úuntri<sub>n</sub>tjai. Kristu wáitsamuri<sub>n</sub> wáinkiaitjai wisha. Tura ukunam ti shiir átatna nu<sub>i</sub> chíkich Yus-shuara uuntri<sub>a</sub> núnisnak wisha pachiinkiat<sub>t</sub>ajai.

2 Yus-shuar ame ístiniaitmena nu, pé<sub>n</sub>ker iistá, murikiu wáinin ni murikri<sub>n</sub> wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrat<sub>t</sub>ajai” tútsuk tura nujai<sub>i</sub> kuítrintin ajastin enentáimsuk nekas wakeritia, Yusa takatri<sub>t</sub> asamtai.

3 Turasha, “Yús-shuara uuntri<sub>t</sub> ajasan, Yus-shuaran akuptiaj” tu enentáimsaip. Antsu shiir túramurmijia<sub>i</sub> Yusa murikri<sub>t</sub> jintin-tiata.

4 Nuínkia murikiu wainniu Uuntri<sub>t</sub> taa wantiniak iwiar-mamtaí tawasap ti shíirmachia núninian suramsattawai. Aents súana nú shíirmach wari mamurtini<sub>a</sub>iti. Tura Úuntrum ámin suramsattana nuka pen<sub>ké</sub> mamurchattawai.

*Yus-shuarti umirnaikiatin*

5 Tura natsatirmesha atumí uuntri<sub>t</sub> umirkatarum. Kame yaunchu Yús-Papinium aarma asamtai ashí Yus-shuartiram nan<sub>k</sub>aamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nan<sub>k</sub>aamantuchu enentáimtuma nuna Yus waitnentak yayawai. Tu aarmaiti.

6 Wats, Yus timiá kakaram asamtai, amek nekamam, pé<sub>e</sub>jchach enentáijia<sub>i</sub> enentáimtumasta. Nuínkia tsawant jeamtaí ni wakerak Yus ámin pen<sub>k</sub>er<sub>i</sub> awajtamsattawai.

7 Yus ámin ti enentáimturmakui ame itiurchatrum ainia nu Yus ashí iiktusta.

8 Aneartarum tura ímiastarum. Íwianch atumí nemasri<sub>t</sub> ana nu, uunt yáwáa nuke, yanak emesraintiaj tusa eá<sub>k</sub> tentaa wekaawai.

9 Tura tuke Yus nekas enentáimtusum surimiaktarum. Ashí nun<sub>k</sub>anam Yusnum atumí yachi<sub>t</sub> ainia nu átum wáitiarmena núnisara<sub>n</sub> wáitiainiawai. Nusha kajinmakchatniuitrume.

10 Wats, ishichik tsawant wáitsarmena nu nan<sub>k</sub>aamasmatai Yus ataksha pé<sub>n</sub>ker awajtamsattarme. Tura numi wewe waja núnisa<sub>n</sub> ikiakátmartatrume. Tura Yus ikiakárma asarum ni jinti<sub>n</sub> tuke pé<sub>n</sub>ker wekasattarme. Ju Yus tuke in wait-nentramtsujik. Tura iisha Jesukristunu asakrin Nii<sub>j</sub>ia<sub>i</sub> métek Yus ni shiir pujutainium tuke shiir pujusmintrum tusa achir-makuitji.

11 Nú Yús<sub>n</sub>asha ashí aents shiir enentáimtusartí. Tura ashí áentsnum ni kakarmari<sub>t</sub> tuke atí. Nuke ati.



<sup>12</sup> Serpanujai ju papin ishichik áarmaj nuna akupeajai. Serpanu Yusjai pé<sub>2</sub>ker wekaak Yusnum winia yatsur ajasuiti; núnaka nékajai. Yus waitnentrana asa ti yainmakmania nuna enentáimtikeajrume ju papijiai. Tura tuke ni waitnenkartutairiin wekasatarum tájarne.

<sup>13</sup> Papirúnianmaya atumjai métek Yus achikma áinia nu amikmaatmarme. Winia uchir Markus núnisañ amikmaatmawai.

<sup>14</sup> Yusai yachi ajasu asarum anenaisrum shiir awajnaisatarum. Jesukristunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

## PÍTIUR Ataksha papin áarar akupkamu

*Pitiur Yus-shuaran áatramiania nu*

<sup>1</sup> Wikia ju papin aajna ju Semuñ Pítruitjai. Jesukrístu akatramu asan ni takarniurintjai. Ii Yusri tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijiai métek Niiniu ajasurme. Nuka ti penkeraiti.

<sup>2</sup> Yus, tura ii Uuntri Jesussha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisañ atí tusan wakerajrume.

*Yusaj páchitkia atin*

<sup>3</sup> Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji.

<sup>4</sup> Niisha uunt asa tura tujinkiachu asa ni chichamēn suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashi yajauch wakerana nuyá uwemprarum, Yusaj páchitkia átinian suramsaitrume.

<sup>5</sup> Yus umirkarme. Yamaikia juna túrataj tusarum kakartiniaitrum. Ti penker wekasatniuitrum. Nuyá Yusna nekaatniuitrum.

<sup>6</sup> Nuyá yayauch túrashtin ímiastiniaitrum. Nuyá katsuntratniuitrum. Nuyá Yus shiir enentáimtusum wekasatniuitrum.

<sup>7</sup> Tura nuyá ashí shuar shiir enentáimtustiniaitrum. Tura nu nankaamas ashí shuar aneatniuitrum.

<sup>8</sup> Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme.

<sup>9</sup> Tura nuna túruiniatsna nuka, kusurua áanin áiniawai. Jesukrístu wakeramuriñ enentáimtuiniatsui. Ni tunaariya uwemprarmia nuna kajinmatainiawai.

<sup>10</sup> Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme.

<sup>11</sup> Tura ii Uuntri Jesukrístu uwemtikramprajnia nu, Nii tuke akupeana nui, nakittsuk shiir awaintiamattarme.

<sup>12</sup> Tuma asamtai nékarminiñ tura Yusna nekas ana nuyá kanaatsrumniñ tuke enentáimtikratjarme.

13-14 Nekaatarum. Winia jákatniurun jeatema nuna ii Uuntri Jesukrístu ujakayi. Tuma asamtai iwiaaku pujajna juik atumin tuke enentáimpratarum tusan jintinratniuitjarne, tu enentáimsajai.

15 Tura wi jakamtai, wi aajna juna tuke kajinmatkijirum tusan, wi jeajna nuna túrattajai.

### *Kristu waantu ajasun wáinkiarminu*

16 Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchauyi. Antsu imia ii jijijai Uunt Jesukrístu waantu ajasu wáinkia asar ujakmajrume.

17 Tura Apa Yus Jesukrístun shiir waantu awajsamia nui, ni imia shiir pujutairiya chichaak tímiayi, “Juka winia ti aneamur Uchiruiti. Nin ti wararjai.”

18 Iisha naint “Yusna” tájinia nui Nijijai pujá asar nu nayaimpinmaya chichaamu paant antukmaji.

19 Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, pénker enentáimta asarum pénker túrarme. Tura Kristu taa, yánkuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke pénker enentáimtustarum.

20 Tura ju emka nekaatarum. Shuar aya ni enentáimmiarijijain, Yusa Wakanjijainchu, Yus-Chicham urukamtai tu chicháa nuna nekaatniun jeatsui.

21 Warí, Yúsnan etserin yaunchu etserkarmia nu, aya ni wakeramurijijain tícharmiayi. Nu áishmankan enentáin Yus pujursarmiayi. Tuma asa ni tiarmia nuna Yusa Wakaní jintintiam tiarmiayi.

## 2

### *Wait chichaman unuiniainia nu (Jútas 4-13)*

1 Tura Israer-shuarnum wait chichaman etserniusha páchitkiarmiayi. Atumijncha wait chichaman unuinau páchitkia ártatui. Niisha awajimtikrampratniun wakeruiniak wáitian ti yajauchin uukar unuiniarartatui. Tura “Uunt Jesus uwemtikrurmia nusha ántaraiti” tiartatui. Nuna takui ni amuukatniurisha wárik jeartiatui.

2 Tura untsurí shuar ni yajauch túruiniamurin úrsar métek túrawartatui. Iis, “Yus-Chichaman unuinaitjai” tuíniayatan imia yajauch túruiniakui untsurí aents “Yus-Chicham ántaraiti” tiartatui.

3 Kuítian ti wakeruinia ásar, wait chichaman unuítiamprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemayi.

4 ¿Warí? Yuska ni suntarij nayaimpiniam pujuarmia nunasha penké tsankurachmiayi. Antsu nayaimpinmaya jinium akupkarmiayi. Tura nekapsatin tsawant jeatsajin kiritniunam jinkiamu emetamu pujuiniawai.

5 Yáunchuyá shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asamtai ni shuari siati armia nujai uwentikramiayi.

6 Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúumainian nekaawarat tusa túramiayi.

7 Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi.

8 Péñker áishman asa, nuyá shuara yajauchirin wáitiainiak, ni enentái péñker asamtai tuke tsawant kúntuts enentáimiuk wáitmiayi.

9 Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

10 Tura Yus akupeana nuna umirkatniun nakitrar ni yajauch wakeramurin túruinia nunasha Yuska nekas asutiáttawai. Enentáimcha ániawai. Tura ni wakeramuriniak wakeruiniawai. Niijjai nankaamas akupin ainia nuna yajauch áujmataniawai.

11 Warí, imia Yusa suntarij Yusaj matsatainia nu, nuna túratniun tsúumainiawai. Nankaamas kakaram tura nankaamas uunt ániayat nu akupniun katsekainiatsui.

12 Nu áishmansha enentáincha yajasma núnin ániawai. Achikiar mantamnatniuk akiinia ániawai. Enentáimtsuk nankamsar yajauchin chichainiawai. Tuma ásar yajasma núnisan jákartatui.

13 Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

14 Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiaini-

awai. Kuítian wakeruktinniasha ti nékainiawai. Jákatniunam sumamawaru áiniawai.

<sup>15</sup> Yúsnumaani naka wétsuk awajirarai. Peura uchiri Paraam Yúsnan etserniuiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi.

<sup>16</sup> Tura niisha tunáa túratajtsa weai Yuska umpuurun chichachun aents chichaana nujai métek chichamtikiamiayi. Nuinkia umpuuru timia nujai Yúsnan etserin ni netse túratniurin enentáimiar iniaisamiayi.

<sup>17</sup> Nu áishmaṣsha yumirmat kuyua núnis áiniawai. Tura núnisan yuranmisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin áiniawai.

<sup>18</sup> Niisha ti chichainiyat ántar chichainiawai. Yajauch túratniujai tura ayash wakera nújajsha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai.

<sup>19</sup> “Iiya núnis túrakrumka ankant átratume” tu wénawai. Túrasha imia niniki ni tunaariin emetamu áiniawai. Páantchakait. Shuar warí tunaajaim nupetnaka, nuna emetamurinti.

<sup>20</sup> Kame shuar, uunt Jesukrístu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújainkia nankaamas yamá imiá yajauch pujuiniawai.

<sup>21</sup> Yusa akupkamurin imiá pénkera nuna Yus nú shuarnasha súarmiayi. Túrasha nékainiyat tunaanum waketkiaru ásar ti asutniáwartatui. Tuma asamtai, nekas jintia nekaachuitkiunka maak árainti.

<sup>22</sup> Tíchamukait, “yawá iyak ataksha yúawai,” tura, “kuchisha imiainiuiat ataksha tsakusnum maajkimiuui.” Nu áishmaṣsha núnisan yajauchiniam ataksha wáketainiawai.

### 3

#### *Uunta tátintri*

<sup>1</sup> Aneamu yatsurtiram ju papin jimiará áatjarme. Mai papinium winia jintintiamurjai atumí chamir enentáin enentáimtikratjarum tusan wakerajrume.

<sup>2</sup> Yúsnan etserin, pénker wekain armia nuna etserkamurj enentáimturarum. Tura ii Uuntri akupkamurin ni akatramurijjai ujatmakarmia nusha enentáimpratarum. Jesukrístu uwemtikrampramaj nuna chichamen tajai.

<sup>3</sup> Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakera-murj̄n túrusar wekasartatui.

<sup>4</sup> Tura juna tiartatui. “¿Křístuka “wi atak tátatjai” timia nusha urukuit? Warí, ii uuntri yaunchu kajin̄kiarmia nuyá yapajjáchmaiti. Yus yaunchu ju nun̄kan najanamia nuyá yamaisha tuke núniskete” tiartatui.

<sup>5</sup> Túrasha nun̄kancha nayaimpincha Yus yaunchu najanamia nuna nekaatniun nakitiainiawai. Yusa chichamejai nun̄ka entsaya jiinkimiayi tura nun̄kasha entsá nanatrawai, Yus timia nujai métek.

<sup>6</sup> Tura ukunam nu nun̄kan amaarkamujai Yus emesrami-ayi. Ashí nuna nekaatniun nakitiainiawai.

<sup>7</sup> Tura Yus tiniu asamtai nayaimpisha nun̄kasha yamáiya nuka jijjai emesnarat tusa ikiusma áiniawai. Yus áentsun nekapsattana nu tsawantai yajauch aents emesnartatui; tura jisha nu tsawantai nun̄kancha nayaimpincha áesattawai.

<sup>8</sup> Tura jusha, aneamu yatsurtiram, enentáimsatarum. Uunt Křístujain̄kia chikichík tsawant mir uwiya núniskete; mir uwisha chikichík tsawanta núniskete.

<sup>9</sup> Uunt Kristu, “atak tátatjai” tana nuna umitsuk men̄kakashtatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichíkísha men̄kakaiñ tusa nakitiawai. Antsu ashí shuar enentáin̄ yapajjáwarat tusa wakerawai.

<sup>10</sup> Túrasha Uunta tsawantri aya aneachma jeattawai. Kasa aya aneachma kiritniunam taana núnisan̄ tátatui. Nu tsawantin nayaimpisha ipiamta núnis charáa timiatai men̄kakattawai. Tura nuj ashí írúnna núurtiuk esaawartatui. Tura nun̄kasha tura ashí írúnna nusha esaawartatui.

<sup>11</sup> Ashí nu emesnartin neka asarum atumsha imiá nekas Yus tuke enentáimtusrum, takamtsuk umirkarum wekasat-niuitrume.

<sup>12</sup> Yusa tsawantri wárik tati tusar, jintiá íimprusar nákastiniaitji. Nu tsawantai nayaimpisha esáa emesnartatui, tura ashí írúnna núurtiuk ti tsuer ajas entsamnattawai.

<sup>13</sup> Tura iikia yamaram nayaimpisha, yamaram nun̄kasha ati tusar nákaji. Nu átatui, tímiayi Yus. Tura nuisha aya péñkerak átatui.

<sup>14</sup> Nu tuma asamtai, aneamu yatsurtiram, ju túrunati tusarum nákarmena nuj, imiatkinchanum wekasam chamir enentáimjai makuuchmin Yus wáitkiati tusarum wekasatarum.

<sup>15</sup> Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan̄ Yus ni nekatairin̄ susamia tímiatrusan̄ áatramprarmeme.

<sup>16</sup> Ashí papí aarmia nuí Pápruka wi tajana nuna chichaawai. Kame ni áarmari chíkicha ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajíáwar nusháa jintintiainiawai. Tura chíkich chichamsha Yus-Chichamnumiá ana nuna núnisan túruiniawai. Túmainiakka nínki emesmamainiawai.

<sup>17</sup> Wátsek, aneamu yatsurtiram, túruntsain̄ ujakjarmena nu neka asarum, yajauch shuar anan̄kramattsa wakerut-mainiak awajimtikrurain̄ tusarum, tura Yusaj̄ tariarurmena nuyá iniaraj̄j̄ tusarum anearum wekasatarum.

<sup>18</sup> Tura ii Uuntrī Jesukrístu in Uwemtikkiartin ana nu, yamáí nékarmena nú nan̄kaamas nekaatarum. Tura enentáimin nú nan̄kaamas tariarum wetarum. Yamaisha tura tuke, ii Uuntrī Jesukristu náarin̄ uunt awájsartí. Nu atí.

## JUAN

### Emka papin áarar akupkamu

*Tuke iwaaaku átinia nérentin Chicham ana nu*

<sup>1</sup> Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkaitji. Nekas ii j̄ij̄ij̄iāi wáinkiaitji. Wáinkiarsha ii uwejējaisha ant̄inkuitji. Niisha Yúsan ti paant awajeak<sub>w</sub>, Chícham tíminiaiti. Tura tuke iwiaaku átinia nérennuiti. Nuna áateajrume.

<sup>2</sup> Iwiaaku átinia nérenniusha paant nekanamiayi, nusha Jesukristuiti. Iisha Nii wáinkia asar nu étsereaji. Tura tuke iwiaaku átinia nérenniur̄i asa tuke Yus Apajāi pujuyayi. Tura yamaikia īini paant ajatramsakrin atumniasha ujaajrume.

<sup>3</sup> Ii Yus Apajāisha ni Uchir̄i Jesukristuj̄aisha tsan̄inkiar nekas chikichík ajaji. Tura atumsha núnisrumek īij̄iāi chikichík ajasuk túsar wáinkiamajnia nuna anturkamajnia nunasha ujaajrume.

<sup>4</sup> Ti shiir warastarum tusan j̄una áatjar<sub>m</sub>e.

*Yus tsáapniniaiti*

<sup>5</sup> Yus imiá tsáapnin asamtai kiritin N̄j̄inkia pen̄ké atsawai. Nu chichaman Jesukristu in unuitiamprakrin nuna atumniasha ujaajrume.

<sup>6</sup> “Niij̄iāi tsan̄inkia pujaji” táyatar kiritniunam pujustinia áintsar tunaanum pujakri<sub>k</sub>ia wáit<sub>r</sub>aji tura nekas pen̄ker ana nu túratsji.

<sup>7</sup> Yuska tuke tsáapninium pujuwiti. Iisha núnisrik tuke tsáapninium pujakri<sub>k</sub>ia nuám<sub>t</sub>ak nawamnaikiar pujuiniaji. Túrakrin Yus ni Uchir̄i Jesukristu numpéj̄āi ashí ii tunaari japirtamji.

<sup>8</sup> “Wi tunaan túrichuitjai” tákurkia ímia iik anan̄mamaji. Nekas ana nu nékatsji.

<sup>9</sup> Antsu ii tunáari Yus paant ujakrinkia Yuska tsan̄kur<sub>t</sub>amprattaji. Tura ii tunaarin asakátramprattaji. Yuska ti pen̄ker asa Nii tana nuna tímiatrusan̄ umikmin asa túrattawai.

<sup>10</sup> Kame “Tunaan túrichuitjai” tákurkia nuj̄āi “Yus wáit<sub>r</sub>iniaiti” taji. Ni chichamesha ii enent̄ain pujurtamtsuji.

## 2

*Jesukristu in Yúsan áujtur<sub>m</sub>aitji*

<sup>1</sup> Yus-shuartiram, tunaanum iniaar̄airum tusan j̄u papí áateajrume. Túrasha Yus-shuar tunáa túramt̄ain̄kia Apa Yusan



ii áujturmau awai. Nuka Jesukrístuiti. Niisha ti penkeraiti. Niisha Yúsan áujturmakui Yusjaj ataksha iwiaarar pujustatji.

<sup>2</sup> Jesukrístu ii tunaarín asakártaj tusa jarutramkamiaji. Túrasha aya íniunkechu antsu ashí shuara tunaarín asakártaj tusa jarukmiayi.

<sup>3</sup> Yus tana nu umirkurkia nuikia Yus nekas nékaitji.

<sup>4</sup> Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin atsawai.

<sup>5</sup> Antsu shuar Yus tana nuna umireakka Yúsan ti shiir aneawai. Túrakur Niijjaj tsaniñkiar pujamu nékaji.

<sup>6</sup> “Yusjaj tsaniñkia wekaajai” tana nú shuar Jesukrístu wekasamia núnisaj wekasatniuiti.

### *Yamaram akupkamu*

<sup>7</sup> Yatsuru, yamaram akupkamun áattsujrume. Áyatik yámankamtaiknumia antukmiarum nunak tájarme. Ashí atumin jintintiamu yaunchu akupkamuiti.

<sup>8</sup> Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumjíncha nu akupkamu nekas paant awajsamuiti. Nujaj kiritin menkaatemka asamtai tura nekas tsaapniñkia paant tsaapnirtasa pujakui nu akupkamun ataksháa aateajrume.

<sup>9</sup> Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai.

<sup>10</sup> Yus-shuaran aneana nu nekas tsáapninium pujawai. Niisha iniaatsuk chíkichnasha tunaanum ajuarchamniaiti.

<sup>11</sup> Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

<sup>12</sup> Uchitirmincha, Jesukrístu jakamujaj atumí tunaari tsanjurnaru asakrumin juna áateajrume.

<sup>13</sup> Úntirmincha yámankamtaiknumia tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume.

<sup>14</sup> Úntirmincha yámankamtaiknumia tuke pujuuya nu nekáa asakrumin juna áatjarme. Únmarutirmincha atumí enentájjaj Yus-Chicham umirkarum kakaram asarum íwianch nupetka asakrumin juna áatjarme.

<sup>15-17</sup> Aya áentsnumia ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nankaamantu ajastin. Nuka ju nunkanmaya ániawai. Shuar aya nunak wakerak Yúsnaka aneatsui. Kame ju nunkasha amuukattawai. Ashí nu wakeruktincha ti nekas amuukattawai. Túrasha shuar Yusa wakeramurín umiana nu tuke iwiaaku pujustatui

Yusjai. Nu asamtai atumsha ju nunkanam ana nu pachiki-airap. Tura aya juyá ana nu aya tákustin enentáimsáip.

*Nekas chicham tura wait chicham*

<sup>18</sup> Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsuri Kristu nemasri wantinkiamatai amuukatin tsawant jeatemayi.

<sup>19</sup> Nusha ii weeak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijiai irunar pujuarayi. Tura jíinkiamatai nekas Yus-shuarcha ainia nu paant nekanamniaiti.

<sup>20</sup> Antsu atumniaka Yusa Shiir Wakanin Kristu suramsamtai ashí paant nékarme.

<sup>21</sup> Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáitchichamsha nekas-chichamsha penké nushaachuk ainia.

<sup>22</sup> Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchirincha nakitia asa Kristu nemasrinti.

<sup>23</sup> Yusa Uchirin nakitiaiania nu Yus Apajaisha tsanin pujatsui. Tura Yusa Uchirin shiir awajea nu, Yus Apajaisha tsanin pujawai.

<sup>24</sup> Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchirijiaisha Yus Apajaisha tuke tsaninkrum pujustatrume.

<sup>25</sup> Jesukrístusha Niijiai tuke iwiaaku pujustinian tsankatramkaitji.

<sup>26</sup> Anankartin írunkui juna áatjarme.

<sup>27</sup> Atumniasha Jesukrístu Yusa Shiir Wakanin suramsakrumin, nu Wakan tuke pujurtamkurmin shuar jintinramatin atsumatsrume. Antsu Yusa Wakani ashí jintinramprume. Ni jintinrammasha imiá nekas asa wáitchaiti. Tuma asamtai Nii jintinramna áintsarum Krístujai tuke tsaninkrum pujustarum.

<sup>28</sup> Yamaikia, uchiru, Krístujai tuke tsaninkrum wekasatarum. Nu túrakrikia Nii támatai natsamtsuk ti shiir inkiunaiktatji.

<sup>29</sup> Atumsha Jesukrístu ti penkera nu nékarme. Núnisan ashí shuar penkeran túruinia nuka Yusa uchiri ániawai. Nusha nekaatarum.

### 3

*Yusa uchiri ániiana nu*

<sup>1</sup> Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirintji. Tuma asakrin junkanmayau Yús-shuarcha nekarmainiatsji. Kame Yusnasha nékainiatsui.

<sup>2</sup> Aneamu yatsurtirmea, ju na tájarme: nekas Yusa uchirí ajasuitji. Kame ukunam urukuk átaj<sup>i</sup> nusha nékatsji. Túrasha ju paant nékaji: Jesukrístu támatai imia Nii paant wáinkiar Níjjai métek ajastatji.

<sup>3</sup> Tura shuar shiir enentájjai nuna nákkaka imia niñki shiir awajmamui Jesukrístujai métek shiir atajai tusa.

<sup>4</sup> Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin.

<sup>5</sup> Jesukrístu ii tunaarí asakártaj tusa ju nuñkanam támia nu nékarme. Tura Niñkia tunaan túrichuyayi.

<sup>6</sup> Tuma asamtai shuar Níjjai tsaniñ wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisañ nékachuiti.

<sup>7</sup> Uchiru, shuar anañkramawairap. Péñker túrinkia Kristu ti peñker asamtai niisha péñkeraiti.

<sup>8</sup> Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirí ju nuñkanam táwiti ashí íwianch túramun emesrataj tusa.

<sup>9</sup> Shuar nekas Yusjai akiinia nu tunaanum wekaatsui. Yusa uchirí asa Yusa iwiaakmaríjjai wekaawai. Tuma asa tunaanum tuke wekaatsui.

<sup>10</sup> Shuar péñker túratsna nuka tura Yus-shuaran kajera nuka Yus-shuarchaiti. Nujai Yusa uchirí ainia nusha tura iwianchi uchirí ainia nusha paant nekaamniaiti.

### *Mai anenai ajatin*

<sup>11</sup> Atumsha yámankamtaikniumiá chicham antukmiarum nu júiti: mai anenai ajartin.

<sup>12</sup> Iisha Kaíñkia áanin áchatniuitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi péñker asamtai máamiayi.

<sup>13</sup> Yatsurtiram, ju nuñkanmaya shuar nakitramainiakui ti enentáimsairap.

<sup>14</sup> Iikia jákatniunmaya uwempra asar<sup>i</sup> nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkuñka tuke jákatniunam wekaawai.

<sup>15</sup> Shuar Yus-shuaran nakitiakka mañkartinia núnisaiti. Tura mañkartinkia tuke amuicha iwiaakmanum pujuiniat-sui. Nuka nékaji.

<sup>16</sup> Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakur ni yaiñtai tusar jarukmin átiniaitji.

<sup>17</sup> Túrasha shuar chíkich Yus-shuar atsumana nuna takakiat waitnentachkuñka nekas ni enentájjai Yúsan aneawash.

18 Uchiru, aya chíchamjain anenain áchatnuiitji antsu nekas aneniakur péñker túrar yáiniaiktiniatji.

*Yusaj natsamtsuk jeamniaitji*

19 Jujai ii Yúsai sapijmiatsuk jeatniusha tura nekas Yusshuaraitji nu nekaatniusha nekapmampramniaitji.

20 Ii enentái yajauch túramun enentáimtikramkurnisha Yus iijjai nankaamas ashí mash nékatsuk.

21 Tura, aneamu yatsurtiram, ii enentái yajauch túramun enentáimtikramchakrinkia Yúsai sapijmiatsuk jeamniaitji.

22 Tura ni wakeramu túrakrikia tura ni chichamesha umiru asakrin ashí ii seaj nuna suramsattaji.

23 Júiti Yus akupkamu: ni Uchirí Jesukrístu nekas enentáimtustin tura Kristu timia áintsarik shuartisha mai anenai ajartin.

24 Shuar ni chichamen umía nuka Yusjai tsaniñ wekaawai tura Yus niijjai tsaniñ wekaawai. Mai chikichik ajasu áiniawai. Tura Yusa Wakaní ii enentáin pujá asantai nujai Yus iijjai tsaniñ wekaana nu nékaji.

## 4

*Yusa Wakanisha tura Kristu nemasri wakancha*

1 Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asantai ashí shuar “wi Yusa Wakanin takakkun chichaajai” tuinia nu péñker nekapsuk enentáimtusairap. Antsu íisrum nekas Yusa Wakanímpiashit tura chíkich wakaniashit nu nekaatarum.

2 Jujai nekapsarum ya nekas Yusa Wakanin takaka nu nekaattarme: Shuar “Jesus Yusa Uchirí Krístuitiat nekas aents ajas ayashimkiamiayi” tana nu Yusa Wakanin nekas takakui.

3 Tura Jesusan tu enentáimtatsna nuka Yusa Wakanin takaktsui antsu Kristu nemasrí wakanin takakui. Kame Kristu nemasrí wakan tátin tama ántichukaitrum. Nu wakan yamaikia ju nunkanam táwiti.

4 Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumiin pujana nuka niijjai nankaamas kakaram asantai wáittrin ainia nu nupetkaitrume.

5 Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai.

6 Antsu iikia Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiat-sji. Nujai nekas Wakanin takakusha tura wáittrin wakanin takakusha nekaamniaiti.

*Yus tuke anenkratniuiti*

<sup>7</sup> Aneamu yatsuru, anenaitin Yúsnumiá asamtai mai anenai ajartai. Shuar anenkratniua nuka Yusa uchirí asa Yúsnancha nékawai.

<sup>8</sup> Shuar anenkratcha nuka Yúsnanka nékatsui. Kame Yuska tuke anenkratniuiti.

<sup>9</sup> Tuma asa ni Uchirí chikichkiniak ju nunkanam akupturmakmijai. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniakturmasmijai.

<sup>10</sup> Jujai nekas anenkrattainkia paant nekanamnaiiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirín ii tunaarin asakárat tusa akupturmakmijai nujai nekas nekanamnaiti.

<sup>11</sup> Aneamu yatsuru, Yus núnis anenma asakrin iisha núnisrik mai anenai ajartai.

<sup>12</sup> Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niijiai métek anenkratin ajaji.

<sup>13</sup> Yus ni Wakanin suramsa asakrin Yus iijjai tsanin wekaana nusha tura ii Niijiai tsaninkia wekaajnia nusha, nujai nékaji.

<sup>14</sup> Yus Apa ni Uchirín ashí shuaran uwemtikrarat tusa ju nunkanam akupkamia nu wáinkia asar<sup>i</sup> étsereaji.

<sup>15</sup> “Jesus Yusa Uchirinti” tana nu shuarjai Yus tsanin wekaawai tura niisha Yusjai tsanin wekaawai. Mai chikichik ajasu áiniawai.

<sup>16</sup> Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjai tsanin wekaawai tura Yussha niijjai tsanin wekaawai. Mai chikichik ajasu áiniawai.

<sup>17</sup> Núnisar ti penker anenkartin ajaji. Túrar<sup>i</sup> súmamtikiatin tsawantai natsamtsuk wajastatji. Kame ju nunkanam pujayatrik Jesukristujai méteketji.

<sup>18</sup> Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátin akui sapijmiaaktinaiti. Tuma asamtai ántar sapijmiana nu nekas anenkratchaiti.

<sup>19</sup> Yus emka in anenma asakrin iisha Nii aneaji.

<sup>20</sup> Tura shuar “wi Yúsan aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka çitiurak Yusan wáinchasha aneat?

<sup>21</sup> Yus incha juna turammijai: Yúsan anea nu shuar chíkich Yus-shuarnasha aneatniuiti.

## 5

*Ju nunkanmaya írunna nu núpeteaji*

<sup>1</sup> Ashí “Jesus Yusa Uchirí Krístuítu” tu enentáimtana nú shuar Yusa uchirínti. Tura aparí aneakrikia ni uchirísha aneattaji.

<sup>2</sup> Yus Apa aneakur tura Nii wakera nu umirkur Yusa uchirísha ashí aneattaji.

<sup>3-4</sup> Yus aneakur Nii tana nu umiktatji. Ashí Yusa uchiríya nu Yúsan nekas enentáimta asa, ashí ju nuñkanmaya írúnna nuna núpeteawai. Nu asamtai Yus tana nu umirkatin itiurchatchaiti.

<sup>5</sup> Aya “Jesus Yusa Uchirínti” tu enentáimtana nú shuar ju nuñkanmaya ana nuna awakkamniaiti.

*Jesukrístu “Yusa Uchirínti” tu etserainia nu*

<sup>6</sup> Jesukristu jú nuñkanam taa entsajai imiankui Yus nayaimpinmaya chichaak “Juka winia aneamu Uchirúiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrín nankamamiayi túrasha in jarutramak ni takatrín amukmiayi ju nuñkanam. Chikichinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai.

<sup>7-8</sup> Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nuñkanmasha Yus Wakancha, entsasha tura numpasha. Mash métekrak tuiniawai.

<sup>9</sup> Aents étserainiakui ántureaji. Nuna nankaamas Yus ni Uchirín tana nu nekas anturkatniuitji.

<sup>10</sup> Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsan enentáimtachu asa Yúsan “wáitriniaiti” tawai.

<sup>11</sup> Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji.

<sup>12</sup> Yusa Uchiríjjai tsanin wekaana nú shuar, nu iwiaakmajai iwiaaku pujuiniawai. Tura Yusa Uchiríjjai tsanin wekaatsna nú shuar, nu iwiaaku átinnium pujatsui.

*Amuak Yus nekas enentáimtustinian áarmiania nu*

<sup>13</sup> Yusa Uchirí nekas enentáimtakrum tuke amuicha iwiaakmajai iwiaaku pujarme. Nu nekaatarum tusan juna áatjarme.

<sup>14-15</sup> Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtaji.

<sup>16</sup> Tunáa awai jákatniunam júana nu. Shuar nu tunaan túramtaínkia Yus áujtustin ántraiti. Tura shuar chíkich tunaan túrakuínkia nuka nekas Yus áujtustiniaiti. Nekas jákatniunam júatsna nú tunaan túraitkiuínkia iwiaaku átinian Yus susatawai.

<sup>17</sup> Ashí yajauch<sup>i</sup> ana nuka tunaiti. Tura jákatniunam júatsna nú tunaasha awai.

<sup>18</sup> Nekas Yusjai akiinia nú shuar tunaanum tuke wekaat-sui. Antsu Yusa Uchiri nin ti penker wainkiui íwianch antinkiachminiaiiti.

<sup>19</sup> Iikia nekas Yúsnatji tura ashí ju nunkanmaya shuar iwianchnia áiniawai.

<sup>20</sup> Yusa Uchiri ju nunkannam taa nekas-Yus aa nuna paant jintintramji. Yusa Uchiri Jesukrístujai tsaninkia wekaakur nekas-Yusa nujaisha tsaninkiar wekaaji. Nekas-Yus asa tuke iwiaaku átinia nuna nérenniuiti.

<sup>21</sup> Uchirú, ántar-yus írunna nui pachiinkiairap. Antsu nujai aneartarum.

Nuke atí.

## JUAN

### Ataksha papin aar akupkamu

#### *Nekasa nunasha tura anenaitniuncha ujaawai*

<sup>1</sup> Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekasan atumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme.

<sup>2</sup> Nekas-chicham tuke amuutsuk ii enentáin pujá asamtai aneajrume.

<sup>3</sup> Yus ii Aparisha tura ii Uuntri Jesukrístusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaittiarme.

<sup>4</sup> Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai.

<sup>5</sup> Yamaikia, umaru, tájame: mai anenai ajartai. Yamaram akupkamun áattsujme antsu yámankamtaik antukmiaj nunak tájame.

<sup>6</sup> Nekas anenkartinia nú shuar Yus akupkamun umini-aiti. Tura Yus akupkamuka “anenkartin tuke atarum” tawai. Nusha yámankamtaiknumiá antukuitrume.

#### *Anankartincha írunui*

<sup>7</sup> Ju nunkanam anankartincha ti írunui. Jesukrístu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai.

<sup>8</sup> Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

<sup>9</sup> Ashí shuar Kristu jintíamun iniais “nankaamas nékajai” tana nu, Yúsnachuiti. Antsu Kristu jintíamun umíana nu shuar Yus Apajaisha tura ni Uchirijjaisha mai tsanin pujawai.

<sup>10</sup> Shuar Kristu chichamen jintíachu atumí jeen írmástaj tusa jeakui awáyáwairap tura “shiir taume” tiirap.

<sup>11</sup> Kame nu shuar “shiir taume” tákumka nu shuar yajauch jintíamu jímiareame.

#### *Umíamu chicham*

<sup>12</sup> Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjai. Nuyá naka chichasar ti shiir warastatji.



<sup>13</sup> Ame kaim Yus achikma nuna uchiri amikmaatmaini-  
awai.  
Nuke atí.

## JUAN

### Nuyá Ukunam papin aar akupkamu

#### *Kayu ti penker shuaraiti*

<sup>1</sup> Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme.

<sup>2</sup> Aneamu yatsurú, Yusjai penker wekaakum ame wakanim penker pujana núnisan ame ayashmisha penker atí tusan Yúsan áujtajme.

<sup>3</sup> Ame nekas chicham umirman shuar ju taar ujatkarmai. Tura nuna antukan ti warasmajai.

<sup>4</sup> Yus-shuar nekas chichaman umiiniakui imiá shiir enentáimtuinijai.

<sup>5</sup> Aneamu yatsurú, chíchich Yus-shuar ti penker yayame. Kame yajaya yujainia nusha nekas yayame. Nu penkeraiti.

<sup>6</sup> Nu shuar ame nekas anenamun ju taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame.

<sup>7</sup> Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijjai yurumátniun nakitrarmatai

<sup>8</sup> ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

#### *Tiútrepes yajauch túriniaiti*

<sup>9</sup> Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai.

<sup>10</sup> Nu asantai nu jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíchich awayátaj tákuisha suritiawai. Tura nuyá Yus-shuarjai iruntratniun surimiawai.

<sup>11</sup> Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

#### *Timitriu penker túriniaiti*

<sup>12</sup> Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuaraiti tákurin nekas tájinia nusha nékarme.

#### *Umíamu chicham*

<sup>13</sup> Wi ti nukap titinian wakerajme. Túrasha ju papinium mashi áatrashtajme

<sup>14</sup> wárik íitin asan. Nuj jean chichasmi.

<sup>15</sup> Shiir pujustá. Juyá amikrum amikmaatmainiawai. Ii amikrjsha chikichik chikichik amikmaatruata.

## JÚTAS papin áarar akuptukma

*Jútas Yus-shuaran papin áateawai*

<sup>1</sup> Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru ásarmatai Yus nin wainiainiawai ni-ijjai kanakchatniun.

<sup>2</sup> Yus ti waitnentramak imiatkinchanum tuke shiir pujus-tinian yainmakarti. Ti anenma asa túrati.

*Ti tunáa shuar írunui  
(2 Pítiur 2.1-17)*

<sup>3-4</sup> Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachinkiarmai. Niisha “Yus ti anenkartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asam-tai tájarme “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

<sup>5</sup> Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejiptu nunkanmaya júkiar Nin umirkacharua nuna máawarmiayi.

<sup>6</sup> Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kir-itniunam jirujai tuke jinikiá sepunam apujas pujurainiawai. Tura Uunt Tsawant jeamtai súmamtikiawartatui.

<sup>7</sup> Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin ármiai. Túmainiakui ashí shuar ashamkarat tusa Yus amuicha jinium asutiáwarmiai.

<sup>8</sup> Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin ya-jauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai.

<sup>9</sup> Antsu Mikiar, nayaimpinmaya suntara kapitántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi.

10 Túrasha ju shuarka nékainiatsna nuna nánkamsar ya-  
jauch chicharainiawai. Tura nékainiana nuka yawá áinis  
enentáimtsuk áyatik nékainiawai. Tura nújajsha imia nin̄ki  
yajauch emesmainiawai.

11 Maa, aneartí. Kaiñ yajauchin túramia núnis tura ásar  
jákartatui. Tura Parama áinis kuítian ti wakeruiniak imia  
nin̄ki tunaanum tsan̄kamakaru áiniawai. Tura Kurea áinis  
ashí akupniun nakitin áiniak kajin̄kiartatui.

12 Átum nuamtak anenaitiai-jisat nájankurmin nu shuar  
chikichan enentáimtutsuk Yushasha ashantsuk imia nin̄ki  
enentáimtumainiawai. Pen̄ké ántar áiniak yumi kiar tee ajasua  
núnin áiniawai. Tura nase umpuim yútutsuk nan̄kamainiawai.  
Árak nerektin nantutin nerechua áanin áiniawai. Tuma ásar  
uwemu pen̄ké jaka áanin áiniawai.

13 Entsa nujan̄krak saurin ajekeawai. Nu shuarsha núnisar  
ni natsantr̄in natsam̄tsuk ajekenawai. Tura yaa waakua  
áanin áiniawai. Tuma ásar nekas kiritniunam tuke men̄kakat̄in  
áiniawai.

14 Atañka tiran̄kiyayi Eruk. Ti pen̄ker Yúsna etserin asa  
juna tímiayi “Uunt Yus ti untsurí ni shuarjijai winittawai.

15 Nuyá ashí shuar túrawarman nekaattawai. Tura ashí ya-  
jauch shuarnasha ti tunáa túrawarua nujai tura Yúsna yajauch  
ájumatsarua nújajsha súmamtikiawartatui” tímiayi Eruk.

16 Nu shuarka pen̄kera nujai waratsuk “yajauchiiti” tu-  
iniawai. Aya ni ayashí wakeramunak wakeruiniawai.  
Nan̄kaamantu enentáimtumainiak chichainiawai. Tura chi-  
kich shuaran shiir chicharainiaksha aya nii wakera nuna  
túrutati tusa pen̄ker chichainiawai.

### *Yus-shuar enentáimtikratin*

17 Tura atumsha, aneamu yatsurú, ii Uuntri Jesukrístu  
akatraturí yáunchu “aneartarum” tiarmiania nusha  
enentáimtustarum.

18 “Amúamu tsawant ishichik ajatesmatai shuar Yúsna  
wishikrar nakitrartatui. Tura ni yajauch wakeramuriniak  
umí pujuartatui” tiarmiayi.

19 Nu yajauch shuar atumín akantamenawai. Ju  
nun̄kanmayanak páchiniak Yusa Wakanin takakainiatsui.

20 Tura átumka, aneamu yatsurú, tuke Yus nekas  
enentáimtusrum kakaram ajastarum. Yusa Wakaní  
kakarmarjijai ashí Yus seatarum.

21 Yus ti anenmakui nii wakera nu wakeruktarum  
atumsha. Túrarum ni anenmamu shiir nekaattarme. Tsawant  
winiawai, ii Uuntri Jesukrístu in waitnentrana asa tuke shiir  
Nijjai pujustinian amastatji. Nu tsawant naká pujutarum.

22 Mai yapaji ajá ainia nu naka enentáimtikratarum.

23 Chíkich shuarsha jiniumiã júsatniua áitkiasrum uwentikratarum. Tura chikichcha ti yajauch ásarmatai anearum waitnentratarum. Tura ni pushirisha ni tunaarijiaj maatra asamtai muíjkiatniuiti.

*Yúsan shiir awajeawai*

24-25 Yus chikichkiiti. Ti nekaiti. In uwentikkiartin asa ni kakarmarijiaj yainmakminiaiti tunaanum iniarchatniun. Tuma asa tunaajaj máatrachu awajtamas ni ti shíirmarín ejetamtatrome. Túrutma ti waramtikramsattarme. Ii Uuntri Jesukrístu túrunamujaj Yuska Niniki shiir awajsatniuiti tura nankaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

## APUKARÍPSIS

### Jesukrístu Juánkan paant iniaktusma

#### *Jesukristu paant awajsamu*

<sup>1</sup> Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asantai Jesukrístu ni suntarin akupak ashí winia paant awajtursamai. Wisha Juánkaitjai.

<sup>2</sup> Yus timia nunasha tura Jesukrístu ujatkamia nunasha tura wi ísmaj nunasha ti paant aya nekasa nuna tájai. Penké wáitratsjai.

<sup>3</sup> Jú papin áujea nu shuarsha tura núnisan̄ juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

#### *Juan̄ siati péprunam Yus-shuar írunun juna áateawai*

<sup>4</sup> Wi, Juan̄, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan̄ yamaisha pujawai. Tura nuke winittiwai. Akupin pujutainium Yusa Wakan̄ siati naka pujurainia nusha shiir yainmakarti.

<sup>5</sup> Núnisan̄ Jesukrístu shiir yainmakarti. Nii tana nu imiá nekasaiti. Niisha emka jakamunmayā yamaram iwiaakmajai nantakniuiti. Tura ju nunkanmayā akupniu Uuntrin̄ti. In anenma asa ni numpejai ii tunaarin̄ nijiatramkaitji.

<sup>6</sup> Túrutma akupin awajtamsaitji. Tura ni Aparī Yúsnan̄ pujursarat tusa anaitiamkaitji. Nii ti kakaram asa tuke shiir awajnasti. Núnisan̄ atí.

<sup>7</sup> Wats, Krístuka yuran̄mijjai winittiwai. Tura íjuarmia nusha tura ashí shuarsha nuna wáinkiaratui. Túrawar ashí sapijmiainiak útiartatui. Maa, nekas nunis átatui.

<sup>8</sup> Krístuka “yámankamtaiknumiā amúamunmasha ashí nérenniuitjai, tawai. Wisha A rétranmayā Y rétranam ashí retra áintsaitjai” tawai ti kakaram Uunt Krístu. Tuke yaunchu pujuyayi. Núnisan̄ yamaisha pujawai. Tura nuke ataksha winittiwai.

#### *Kristu ti shiir wincha ajasun Juan̄ wainkiamiania nu*

<sup>9</sup> Wi Juan̄ atumjai métek waitia asan atumí yachintjai. Núnisan̄ nayaimpiniam, Yus akupeana nū, métek jeattaji. Tura katsuntrar nákastinian Jesukrístu mái métek súramji. Yus-Chichamnasha tura Jesukrístu timiancha étsereakun

nayaantsa ajapén atentramunam Pátmus nunkanam sepunam apujsamua núnisan pujumjai.

<sup>10</sup> Tumai tumiñ tsawantai Yusa Wakani pujurtakui winia úkuruiñ kakantar untsumman antukmajai. Kachu umpúamua núnis ti kakarmauyayi.

<sup>11</sup> Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmaya Y rétranam ashí re-tra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuí akuptukarta. Ju peprunam akupkarta: Ipisiusha, Ismir-nasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

<sup>12</sup> Túrutkui yaki túruta tusan apajasan íikman siati shirikip ikiutain kurijai najanamun wainkiamjai.

<sup>13</sup> Tura nuí ajapén Aents Ajasua núninan wajan wáinkiamjai. Tura pushirísha nawea tímiai nuntuaru entsaruyi. Emenmamkesha kúriniak netsepnum emenmamauyi.

<sup>14</sup> Tura ni muuke intiashísha murikiu uré nijiamua núnisan tura micha núnisan ti puju chíaruyi. Tura ni jiiisha jiya núniskeyi.

<sup>15</sup> Ni nawesha ti wincha asa jiru yanikutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi.

<sup>16</sup> Ni untsuurini siati yaan takakuyi. Tura ni weneniasha puniá áinis tsakatskat mai ere awajsamu jíinmiai. Ni yapisha etsa ti etsantuk íischamnia núnisauyi.

<sup>17</sup> Nuna wáinkian jaka áintsanak naween iniaarmajai. Túrasha ni untsuurí uwejen awaantrus turutmiai, “Ashamkaip. Wiitjai. Yámankamtaiknumiá amúamunmasha tuke pujuwitjai, tímiai.

<sup>18</sup> Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirín takakkun nérenniuitjai, tímiai.

<sup>19</sup> Tuma asamtai wáinkiamna jusha, yamá wáinmena nusha, tura ukunam átatna nusha aartá, tímiai.

<sup>20</sup> Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írurun nakumeawai. Tura winia untsuuruiñ siati yaa wainkiam nu, siati péprunmaya Yus-shuaran wáinniun nakumenawai, turutmiai.

## 2

### *Ipisiunam chícham áatramu*

<sup>1</sup> Nuyá turutmiai ‘Ipisiunmaya Yus-shuaran wáinin ju áatratá: Siati yaan untsuurnum takakna nu tura núnisan siati shirikip-ikiutai kúrinman ajapén atenta wekáa nu, tawai:



2 “Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awe-maitrume. Shuar “Yus akatramuitjai” ántar tuinia nu nekaamarme. Wáitriña nusha nékaitme.

3 Ti wáitiatmek katsuntram yawętsuk Winia ti takar-tusuitme.

4 Túrin áminin̄ juna títiatjame. Yus aneakum yámankamtaik ti penker wekainiuyam núnisam túratsme.

5 Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame.

6 Tura ju penker túriniatme. Nikiurás shuar nakitniuitrume. Nu shuar “ayaşh wakeramu páchitsuk túramniati” tuiniakui Wisha núnisnak nakitiajai.

7 Kuíshtinia nu shuar Yusa Wakani ashí Yus-shuaran timian antukti: Nupetmakunka tuke iwiaaku pujutai numi neręn yúatniun tsan̄katkattajai. Nu numi Yus pujana nūi wajaawai.” Tu áartá’ turutmiai.

*Ismirnanam chícham áatramu*

8 Nuyá turutmiai ‘Ismirnanmayā Yus-shuaran wáinin̄ ju áatratá: Yámankamtaiknumiá amúamunam tuke pujuwa nu tura núnisan̄ jaka nantakmia nu, tawai:

9 “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusaj̄nkia ti kuítrinniuitme. Tura shuar uunt iwianch Satanása shuari áiniyat “Israer-shuaraitjai” tuíniak yajauch áujmatramena nuna nékajai.

10 Ti wáitsattamna nu ashamkaip. Íwianch ashí nekapramsataj tusa atumīiniñ sepunam en̄keattawai. Nūi tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksank nekas iwiaakman tuke shiir pujustinian amastatjai.

11 Kuíshtinia nu shuar Yusa Wakani ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

*Pírkamunam chícham áatramu*

12 Nuyá turutmiai ‘Pírkamunmayā Yus-shuaran wáinin̄ ju áatratá: Puniá áinis tsakatskat mai ere awajsamun takakna nu, tawai:

13 “Ashí ame túram nuna nékajai. Uunt iwianch Satanás akupea nūi pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin̄ ishichkisha iniaitiuschamame. Nusha íwianch pujutainium pujakrumin̄ túrunamai.

14 Túrin áminin̄ juna títiatjame. Atumīiniñ shuar yaunchu Yúsnan etserin Param yajauch jintíamun tuke emetainiawai.

Niisha Israer-shuaran tunáa awajsat tusa kapitián Parakan unuiniarmiayi. Nuyá Parak Yus-sutai namañken maar yúatniun Israer-shuaran jintintiamiayi. Núnisañ ti tsanirmatniun jintintiamiayi.

<sup>15</sup> Atumjiniá shuarsha Nikiurás jintiamuncha, Wi nakitiaj nuna, iniaisatniun nakitiainiawai.

<sup>16</sup> Wats, enentáimpram iniaisata. Túrachakminkia Wi wari winin winia wenuruíya puniá jiinia nujai máaniaktajai.

<sup>17</sup> Kuíshtinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui. Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

*Tiatiranam chícham áatramu*

<sup>18</sup> Nuyá turutmiai “Tiatiranmaya Yus-shuaran wáinin ju áatratá: Yusa Uchirí jii jijjai métek keena nu tura núnisañ nawe jiru yanikutaku jiamua núnis néwar ajawa nu, tawai:

<sup>19</sup> “Ashí ame túram nuna nékajai. Yus shiir enentáimtakum aneam nuna nékajai. Tura katsuntram péñker takaamna nuna nékajai. Yáunchujai nankaamas péñker túrame yamaikia.

<sup>20</sup> Túrin áminin juna títiatjame. Nu nuwá Jesapír awematsme. “Yúsnan unuiniajai” tinia Wíi shuaran ti anañkenawai. Tura ti tsanirmatniuncha tura ántar-yus-sutai namañken maar yúatniun jintintiainiawai.

<sup>21</sup> Niisha ni tunaarín enentáimiar iniaisat tusan nákasuitjai. Tura nakitiawai.

<sup>22</sup> Wátsek, sunkurmatkiakan peaknum áepsattajai. Tura chíkichcha niijjai tsanirma ainia nunasha niijjai métek ti wáitkiastajai. Ni tunaarín enentáimiar iniaisacharmatañkia túratvajai.

<sup>23</sup> Ni uchiríncha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akikattajarme.

<sup>24</sup> Tura chíkich shuar Tiatiranmayatiram, nú chicham enentáimtuscharmena nu, “nekas iwianchnia uukma” tútaiya nu nékachu asakrumin atakka túratniun patatkashtajarme.

<sup>25</sup> Tura Wi jeatsain takakrum nu emetatarum.

<sup>26</sup> Nupetmakunka Wi wakeraj nunak tuke initsuk túrana nuna untsurí nunkanam akupkatniun tsañkattajai.

<sup>27</sup> Winia Apar tsañkatrukmiá núnisnak akupkatniun tsañkattajai. Tura nuwe najanamu jirujai awati ijiakratniua áinis ti kakarmajai akupkattawai.

<sup>28</sup> Yánkuam káshik jiinia nuna susattajai.

<sup>29</sup> Kuíshtinia nu shuar Yusa Wakanj ashí Yus-shuaran timian antukti.” Tu aartá’ turutmiai.

## 3

*Sártisnum chícham áatramu*

<sup>1</sup> Nuyá turutmiai ‘Sártisnumiā Yus-shuaran wáinin ju áatratá: Siati Yusa Wakanin takakna nu tura núnisañ siati yaan takakna nu, tawai: “Ashí ame túram nuna nékajai. Iwiaakua áintsañ wekayatmek Wíjiaĩnkia jákaitme.

<sup>2</sup> Shintiarta. Kajinia nu umpuim ekeemakta. Kame Yusjai ísam penker túrichuitme.

<sup>3</sup> Yus-Chicham ti shiir enentáijjai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumñnkia kasa núnisnak nékatsmin jeartiatjame.

<sup>4</sup> Tura Sártisnum shuar ishichik pushiri wapik máacharu pujuiniawai. Nusha ti penker áiniak pushí pújun entsarar Wíjiai wekasartatui.

<sup>5</sup> Nupetmakuka pushí pújun entsartatui. Tura iwiaaku átinia nu papiniumiā ni naari áarman japirashtajai. Antsu winia Apar tura ashí nayaimpinmaya suntar ímmianum shiir áujmattsattajai.

<sup>6</sup> Kuíshtinia nu shuar Yusa Wakaní ashí Yus-shuaran timian antukti.” Tu aartá,” turutmiai.

*Piratírpianam chícham áatramu*

<sup>7</sup> Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasan tana nu, uunt akupin Tawitia yawiri takaku asa uraimtai chíkich penké epenchamniati. Tura epenmiatai chíkich penké uraichminiaiti. Juna tawai:

<sup>8</sup> “Ashí ame túram nuna nékajai. Kakarmachuitiatmek winia chichamur shiir enentáimtakum Winia initieschaitme. Tuma asakmin wáitin uratjame. Nuna chíkich penké epenchamniati.

<sup>9</sup> Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuarán, nekas ámin aneajna nuna nekaawarat tusan amíini tikishmatkiarartajai.

<sup>10</sup> Katsuntrata tímiaj nu, shiir umirka asakmin Wisha ti wáitsatin ashí nunkanam átatna nuyá uwemtikrattajme. Nu wáitsatniujai ashí nunkanmaya shuar nekapnasartatui.

<sup>11</sup> Wárik winittiajai. Takakmena nu emetata. Akinkiatniuitmena nuna chíkich shuar atantramkiarain.

<sup>12</sup> Nupetmakunka winia Yusru jee tankirin awajsattajai. Tura nuyá penké jíinkichartatui. Tura nin winia Yusru náarin áatrattajai. Tura winia Yusru pépruri náaríncha áatrattajai. Nu pépruka nayaimpinmaya yamaram

Jerusarénka Yúsnumiã tára núiti. Núnisañ winia yamaram náarun nijn áatrattajai.

13 Kuishtinia nu shuar Yusa Wakanj ashí Yus-shuaran timian antukti.” Tu aartá,” turutmiai.

*Rautiséanam chícham áatramu*

14 Nuyá turutmiai ‘Rautiséanmaya Yus-shuaran wáinin ju áatratá: Wáitrutsuk nekasa nunak tiniua nu tura núnisañ ashí Yus najanamun Úuntriya nu, tawai:

15 “Ashí ame túram nuna nékajai. Tura michaash míchachuitme. Núnisañ tsuërsha tsuërchaitme. Míchaitkiumsha tura tsuéraitkiumsha maak.

16 Kame míchachu tsuërcha antsu aya tsuétsetak asakmin imiutkattajme.

17 Iis, “Kuítrinnuitjai, ti irumpraitjai, warinkisha atsumat-sjai” tame. Túrasha ashí yajauch, wáitnenmai, kuítrincha, kusuru, tura misú iyajme.

18 Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Péñker ímprataj tusam jünium enketai enkeeta.

19 Anejna nuna chichareajai. Nu asamtai kakaram ajasam tunaarum enentáimpram iniaisata.

20 Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijjai yurumáttajai. Tura amesha Wijjai yurumáttame.

21 Nupetmakuka akupin pujutainium Wijjai pujustatui. Wisha núnisnak nupetmaku asan winia Aparjai akupin pujutainium pujusuitjai.

22 Kuishtinia nu shuar Yusa Wakanj ashí Yus-shuaran timian antukti.” Tu áartá,” turutmiai.

## 4

*Nayaimpiniam Yúsan shiir awajenawai*

1 Nu nankaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yakí wakatá. Ukunam átatna nuna iniaktustajme” turutmiai.

2 Nu chichamaik Yusa Wakanj akantukmiai. Túrutamtai nayaimpiniam akupin pujutainium pujan wainkiamjai.

3 Niisha jaspi kayasha tura kurnarínia kayasha nujai métek ti wínchayui. Akupin pujutain tuntiak téntakuyi. Nusha ismirarta kayajai métekeyi.

4 Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju

entsarainian tura kurin etsenkrakainian, nuĭ pujuinian wainkiamjai.

<sup>5</sup> Akuptainiumiã peemsha ipiamtasha untsummasha jĭniarmai. Tura nu pujutainium naka siati shirikip kearmai. Nusha siati Yusa Wakanĭnti.

<sup>6</sup> Núnisañ nu pujutainium naka nayaantsa áanin ti saar amai.

Nu pujutainium wakenmaanĭsha niisháa tañku kuartru téntakar ármiai. Ukurĭnĭsha tura eemsha jĭi irunmiai.

<sup>7</sup> Emka tañku úunt yawã áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi.

<sup>8</sup> Nusha sais nanamtin ármiai. Tura jĭiĭsha ti irunainiak ashĭ wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashĭ nankaamas kakarmaiti.

Tuke yaunchu pujuyayi. Núnisañ yamaisha pujawai. Tura ataksha juke winittiwai” tiniu armai.

<sup>9</sup> Tura uunt pujutainium pujana nu tuke iwiaaku pujú asamtai nu tanku ti shiir awajsar yúmiñkiak pujuriarmai.

<sup>10</sup> Túruiniakui paintikuatru uunt tuke iwiaaku pujun tikishmatainiak ni etsenkrutairĭn naka áepruiniak tuiniawai:

<sup>11</sup> “Úuntá, ii Yúsrĭnme. Tuke shiir awajmainme. Ashĭ nankaamas kakarmaitme. Amek ashĭ írunna nu najanaitme. Tura aya wakerakum najanamame. Ame wakerakmin irunainiawai” tuiniawai.

## 5

### *Murikkia papin urakminiaiti*

<sup>1</sup> Nuyá akupin pujutainium pujuya nuna untsuurĭn papĭ penuarma áanniun wainkiamjai. Nu papisha initiaanĭsha tura páatkesha áarmauyi. Tura urakchamnia atí tusa siati anujtukmajai kaki peekmauyi.

<sup>2</sup> Tura nayaimpinmayã suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?”

<sup>3</sup> Tura nayaimpinmayãsha nunkanmayãsha tura jakamunmayãsha chikichkisha nu papin urakmin atsumiayi. Áujtsuk ístinniasha tujinkiarmai. Tímianu akupin atsumai.

<sup>4</sup> Nu papin uraktincha tura áujtsatniusha, kame ístincha atsakui ti úutmiajai.

<sup>5</sup> Nuyá chikichik uunt turutmiai “Ti úutĭp. Israer-shuarnumiã Úunt-yawã, Jutá weeá awai. Niisha uunt akupin Tawit weeaiti. Nupetmaku asa nu papĭ siati anujtukman jaak urakminiaiti.”

<sup>6</sup> Nuyá uunt pujutaiya nuí tura kuaru tañkunam ajapén tura úuntnum ajapén Murik wajan wainkiamjai. Maamua áintsan\_ketiat iwiaakuyi. Kachur\_isha siátiyi. Ni jii\_isha siátiyi. Nusha Yusa Wakan\_í siati ashí nun\_kanam akupramua nuuyi.

<sup>7</sup> Nu Murik we nekas uunt Akupniun untsuur\_ínian nu papin achikmiayi.

<sup>8</sup> Tura papin achikmatai kuaru tañkusha tura paintiku-atru uunt arma nusha Murikiun tikishmatrarmiayi. Ashí uunt arpa tuntuitiain takaku armai. Tura ashí kun\_kuin en\_ketain kuri najanamun takaku armai. Nu kun\_kuin Yus-shuar áujsamuiti.

<sup>9</sup> Ju yamaram kantancha kantampriarmai:

“Amek imiá nan\_kaamas akupniuitme. Amek papí achikiam anujtukmar\_í já\_kminiaitme. Yus-sutai naman\_kea áinis mantamna asam túramniaitme. Ashí nun\_kanmaya shuarnumiasha Yusna árat tusam ame numpem\_jai in sumakmiame.

<sup>10</sup> Turam akupin awajkartusuitme tura nú\_nisañ ii Yús\_riniun pujurin awajkartusuitme. Tuma asakmin akupin ajasar ju nun\_kanam akupkattaji.” Tu kantamainiawai.

<sup>11</sup> Tura untsur\_í nayaimpinmaya suntar uunt pujutaincha tañkuncha tura úuntnasha én\_kekawarun wainkiamjai. Nusha nekapmarchamnia ti untsur\_í armia nu

<sup>12</sup> kakantar tiarmai:

“Murik mantamnania nu akupin ajas ashí kakarmancha, kuítniasha, nekaatniuncha Niñki achikminiaiti. Tura nupetmaku asamtai yum\_ınsar Nin ti shiir awajsatın ániawai.” Tu tiarmai.

<sup>13</sup> Nú\_nisañ ashí Yus najanamu, nayaimpiniam írunna nusha, nun\_kanam írunna nusha, nun\_ká inıt írunna nusha, nayaantsanam írunna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

<sup>14</sup> Tura kuaru tañkusha “Tuke nú\_nisañ atí” tiarmai. Tura paintikuatru uuntká nekas tuke iwiaaku pujá nuna tikish-matar shiir awajсарmai.

## 6

### *Murikkia siati anujtukman jaakmai*

<sup>1</sup> Wi iyakui Murikkia chikichík anujtukman jaakmai. Túramtai chikichík tañku ipiamtajai métek kakantar untsunun antukmajai. “Winim iitiá” turutmiiai.

<sup>2</sup> Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

<sup>3</sup> Nuyá Murik anujtukma jímiarán jáakmatai taṅku jímiara nu “Winim iitiá” turutmiai.

<sup>4</sup> Túrutkui chíkich kawai kapaakun wainkiamjai. Nui ekeemia nuna puniá úntan susamuyi. Nusha shiir pujuscharat tusa ashí jú nuṅkanmaya shuaran máanaimtikiatniun akupkamuyi.

<sup>5</sup> Nuyá Murik anujtukma menaintiun jáakmatai taṅku menaintiua nu “Winim iitiá” turutmiai. Túrutkui kaway mukusan wainkiamjai. Nui ekeemia nusha kijin nekap-matain takakuyi.

<sup>6</sup> Tura kuaru taṅku ajapéniá chichaamun antukmajai. “Tsawant takamsuk takaakmesha apatkuka penké ishichik sumakmin átatme. Tura núnisan machasha nijiamchisha amuukacharat tusam penker wáinkiata.” Tu timiai.

<sup>7</sup> Nuyá Murik anujtukma kuátrun jáakmatai taṅku kuarua nu “Winim iitiá” turutmiai.

<sup>8</sup> Túrutkui kaway yanṅkun wainkiamjai. Nui ekeemia nusha Jákatín náartiniuyi. Tura nuna úkurin Jatai nemarak winimiai. Nusha ashí nuṅkanmaya shuar kuaru akankamunmaya chikichkin máatniun akupkarmauyi. Nusha mesetjaisha tsukajaisha suṅkurjaisha tura yajasmajai máawarmai.

<sup>9</sup> Nuyá Murik anujtukma séṅkun jáakmatai Yus-sutai kunṅkuin ekemtai wakenmaanĭ íismajai. Túran Yus-Chichaman etserainiakui máawarma wakanĭn wainkiamjai.

<sup>10</sup> Nusha kakantar unsumainiak tiarmai “Uuntá, ti penker asam támena nu umiátsmek. ¿Urutiak nuṅká pujuinia nú shuar ii mantamnamunam yapajmĭátruktam?” tiarmai.

<sup>11</sup> Tuíniakui pushí pújun susar tiarmai “Chikichcha Krístunun etserainiakui mantamnatin ániawai. Nu nákakrum ishichik ayampratarum” tiarmai.

<sup>12</sup> Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsan mukusa ajasmai. Kashí-nantusha numpá áintsan ajasmai.

<sup>13</sup> Tura yaasha wampú nere nase umpuim ti majuwa áintsan kákekarmai.

<sup>14</sup> Nayaimpisha papí penuara júamua áintsan menkakamai. Tura naintcha yajá apujnasarmai. Tura nuṅkasha nayaantsanam ajapén atentrainia nusha yajá apujnasarmai.

<sup>15</sup> Tura jú nuṅkanam akupin ainia nusha náinnium wear kayá wáanam uumkarmai. Niijjaisha ashí shuar, uuntcha, kuítriniusha, suntara kapitíantrisha, ashí kakaram ainia nusha, tura takarniusha aṅkant ainia nujai náinnium wearmai.

<sup>16-17</sup> Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asantai saanakim

in yutokratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

## 7

### *Israer-shuarnumiá anujturma armia nu*

<sup>1</sup> Nu nankaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajatiarmai.

<sup>2</sup> Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaaniá winian wainkiamjai. Tuke iwiaaku Yusa anujtutairin takakauyi. Nusha kuaru suntaran kakantar untsuak tímiai,

<sup>3</sup> “Íi Yusrj takarjñ ainia nu nijiajñium áarar anujtatsrinjñ kukarsha, nayaantsasha, tura kampunniusha nasejaj ya-jauch awajsairap” timiai.

<sup>4</sup> Tura tímiajñi untsurj aara anujtukman antukmajai. Ashí Israer-shuar tuse (12) shuar weeá ainia nuyá chikichik siañtu kuarenta kuaru mir (144.000) armai.

<sup>5</sup> Jutá weeanmaya tuse mir (12.000) anujtukma armai. Rupjñ weeanmayasha tuse mir anujtukma armai. Kat weeanmayasha tuse mir anujtukma armai.

<sup>6</sup> Aser weeanmayasha tuse mir anujtukma armai. Niptari weeanmayasha tuse mir anujtukma armai. Manasés weeanmayasha tuse mir anujtukma armai.

<sup>7</sup> Semeun weeanmayasha tuse mir anujtukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai.

<sup>8</sup> Sapurún weeanmayasha tuse mir anujtukma armai. Jusé weeanmayasha tuse mir anujtukma armai. Pinjamjñ weeanmayasha tuse mir anujtukma armai.

### *Ti untsurj shuar pújñ entsararu*

<sup>9</sup> Nuyá ti untsurj shuaran wainkiamjai. Ashí nunkanmaya nusháa shuaraim iruntraruru ásar nekapmarchamnia armai. Tura nusha uunt akupin pujutainium tura Murikñium naka wajaarmai. Tintiuki nukéa áaniun takaku armai. Tura ashí pújñ entsaru armai.

<sup>10</sup> Ashí kakantar untsumainiak tiarmai: “Íi Yusrj uunt akupin pujutainium eketna au tura Muriksha imia Niñki Uwemtikin áiniawai” tiarmai.

<sup>11</sup> Tura nayaimpinmaya suntarsha uunt akupin pujutaincha, kuaru tanñkuncha, tura úuntnasha téntatkar armia nu piniakum nunká tepersar Yúsan shiir awajsar

<sup>12</sup> tiarmai



“Nekasaiti. Tuke iniaitsuk ii Yusrj ti shiir awajsatniuiti. Nínki ti neka, ti kakaram, ti akupin, tura ti penker asamtai tuke yuminsatniuiti. Núnisañ atí.”

<sup>13</sup> Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

<sup>14</sup> Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushirj nijiamawar puju awajsaru áiniawai.

<sup>15</sup> Nuna túrawaru ásar yamaikia Yusaj naka pujusar tsawaisha káshisha Yúsnan ni Jeen takainiawai. Tura akupin pujutainium eketna au tuke wainkiartatui.

<sup>16</sup> Yamaikia tsukajajsha kitiakjajsha wáitsachartatui. Tura etsasha sukuiniak yajauch awajsachartatui.

<sup>17</sup> Murik, akupin pujutainium naka wajana au, ni murikrin wáiniuk áyureak ti penker púkuni entsa waana nuj apujstataui. Tura Yus ni neajkincha ukujturartatui.” Tu túrutmiai.

## 8

*Anujtukma siatia nu jaakma tura kunkuin ekeemataijiai túrunamu*

<sup>1</sup> Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai.

<sup>2</sup> Nuyá siati suntar Yusaj naka wajainia nuna wainkiamjai. Nusha siati kachun susamu armai.

<sup>3</sup> Nuyá chikich suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áujsamujaj métek kunkuin ekeematainimum ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai.

<sup>4</sup> Tura suntar ekeemakmatai kunkuinia mukuintiurj Yus-shuar áujsamujaj métek Yúsán amainkiamai.

<sup>5</sup> Nuyá nu kunkuin enketain suntar achik ekeematainimaya ji kapaan káirin áimiak ju nunkanam ukaamai. Túramtai ipiamtasha unsummasha, peemsha, tura uusha armai.

*Kachu umpuarma*

<sup>6</sup> Nuyá siati suntar kachun takakainia nu umpuartaí tusar iwiarnararmai.

<sup>7</sup> Emka suntar kachun umpuarmatai micha kákekamai. Nunasha ji numpajaj pachimpramuncha nunkanam ajapawarmai. Túmakui menaintiu nakakma jeeán numincha tura ashí írúnna nuj ekeemakmai. Tura ashí nunkanam chírichrin takamtsuk ekeemakmai.

<sup>8</sup> Nuyá suntar jímiara nu kachun umpuarmatai uunt nain-tia áanin kean nayaantsanam ajunmai. Túramtai menaintiu nakakma jeeá nayaants numpa ajasmai.

<sup>9</sup> Núnisan̄ menaint jeeá nayaantsanam matsatainia jákarmai. Tura menaint jeeá uunt kanua nu emesnarmamai.

<sup>10</sup> Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkununmasha menaint nakakam jeeánum kákekamai.

<sup>11</sup> Nu yaasha Yapá-numi náartiniuyi. Tura menaintiu nakakam jeeá entsa yapá ajasarmamai. Túrunamtai ti untsurí shuar nu entsa yapá ajasmájai jákarmai.

<sup>12</sup> Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnara ajapén tee ajasarmamai. Túrunawar tsawaisha káshisha menaintiu nakakam jeeánum tsáapnircharmai.

<sup>13</sup> Nuyá chíkich suntar nayaimpiniam nanamun wainkiamjai. Nusha kakantar untsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

## 9

<sup>1</sup> Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi.

<sup>2</sup> Tura uraimtai nu nánkatkachu wáanmaya ti mukuint jínmiiai uunt jiniumiá áintsan̄. Tura etsancha tee awajsamai, yuranmincha tee awajsamai.

<sup>3</sup> Nuyá nu mukuintiunmaya manchi jíintrar nunká ti yujaarmai. Tura ju nunkanmaya titinkia áinis najamin ajastinian susamu armai.

<sup>4</sup> Chíríchrincha ashí arakmancha ashí numincha yajauch awajsatin suritkiamuyi. Antsu áyatik shuar nijiaínium Yusa naari áarar anujtukchamunak yajauch awajsatin armai.

<sup>5</sup> Túrasha ajaktsuk senku (5) nántutin wáitkiastin susamu armai. Kame titin̄, shuaran ijiú, najaweá núnis najaweatin susamu armai.

<sup>6</sup> Nui shuar wari jakataj tuíniayatan̄ jákachartatui. Ti wakeruiniayatan̄ jákatniun tujinkiartatui.

<sup>7</sup> Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapisha shuarna áinis armai.

<sup>8</sup> Intiashisha nuwanua núnis armai. Naisha úunt yawa najya núnis armai.

<sup>9</sup> Netsepén namaka saepea áinis jiru péeramuyi. Tura nanamenaksha kaway karu japiiniak mesetnum tsékeena núnisan̄ téter ajarmamai.

10 Ujukésha titin̄ki ujukēa áinis asa jan̄ki ajakin armai. Nujaj̄i tuke sen̄ku nantu yujarsar shuaran íjiuar wáitkias̄tin armai.

11 Ni uuntrīsha nán̄katakachu wāa uraimia nuyaiti. Nusha Israer-chichamjaj̄i Apatún̄ tutainti. Tura Kriaku-chichamjain̄kia Apuriún̄ tutainti. Nuka Yajauch Awajkartin tawai.

12 Jujaj̄i emka wáitsatin nan̄kaamasai. Túrasha tuke jímiar taasai.

13 Nuyá suntar saisa nu kachun umpuarmatai chichaman antukmajai. Yusaj̄i naka kun̄kuin ekeemaka Yus-sutai kurim-pramu amai. Tura ni kuaru yantamē kachu jijn̄miai. Tura nuyá chichaak

14 suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.”

15 Túramtai nu kuaru suntar wear menaintiu nakakam untsurí shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atíatin ikiusma armai.

16 Tura suntarnasha kawainium eketainian wainkiamjai. Tura timiá untsurí nekapmarchamnia asamtai aya númirur̄in antukmajaj̄i. Nusha jimiará siañtu miyun̄ (200.000.000) armai.

17 Tura íimiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapāaku wiñkia tura yan̄kú armai. Tura kawaisha úunt yawáa muukē áinin armai. Tura ni wenēyasha jisha, mukuintiusha, asuprīsha ti tsūer keá nu jíniarmai.

18 Nu menaintiu ti yajauch wáitsamujaj̄i menaintiu nakakam shuar untsurí jákarmai. Jijiaisha, mukuintiujaisha, asuprījiaisha jákarmai.

19 Nujaj̄i nu kaway ni wenējaj̄i shuáran wáitkiasarmai. Tura niujuké napí múukēya áinin áрмаi. Nújaisha shuaran wáitkiasarmai.

20 Tura nujaj̄isha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijiaisha, kuítjaisha, jiru yan̄kutakujaisha, kayajaj̄isha, numijjaisha najanamu ásar wainmaktinniasha, antuktinniasha, tura wekasatniuncha tujintiainiawai.

21 Núnisan̄ man̄kartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

## 10

### *Papichin suntar takusmia nu*

1 Nuyá chíkich kakaram suntar nayaimpinmaya táarun wainkiamjai. Nusha yuran̄kim amúamu tura múuknum

tuntíak téntakmauyi. Yapísha etsajaj métek wínchauyi. Tura kujapésha ji keá áintsankeyi.

<sup>2</sup> Nusha papin urak takakauyi. Tura imiá uunt asamtai ni nawé untsuurnumaní nayaantsanam tura menaríní kukar tarimias wajasmai.

<sup>3</sup> Tura úunt yawá kakar shiniak chicháa áinis ti kakaram untsumkamai. Nujaj siati (7) ipiamtasha chichasarmai.

<sup>4</sup> Nii chichasarmatai ni chichamen áartiniujai tura nayaimpinmaya chichartak “Áaráip, túrutmiai. Juka nekanashti” túrutmiai.

<sup>5</sup> Tura nuyá, suntar nayaantsanmasha tura kukarsha tarimias wajama nu ni uweje untsuurín nayaimpinmaani takuimiai.

<sup>6-7</sup> Tura timiai “Penké ishichik ajasai. Suntar siatia nu umpúakuinkia Yus ashí yaunchu enentáimpramia nu uminki-attawai. Emka ujatsuk ukunam ni shuarín Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nu írunna nunasha najanaiti” timiai.

<sup>8</sup> Nayaimpinmaya “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuuríní papin urak takakna nu achiktá” turutmiai.

<sup>9</sup> Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai.

<sup>10</sup> Nuyá papichin suntarnumiá jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

<sup>11</sup> Tura nuyá turutiarmai “Waketkim ataksha ashí nunkanmaya shuaran tura ni kapitíántríncha Yus tana nu ujakartiniaitme.” Tu túrutmiai.

## 11

### *Jimiará shuar Yusaiya akupkamu*

<sup>1</sup> Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram naman-maa-Yus-sutaisha nekapmartá. Tura nu Yúsán shiir awajeena nusha nekapmartá.

<sup>2</sup> Antsu jea áarínkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaréñkan kuar-entitús (42) nantu nu akupeenak mash yajauch awajsartatui.

<sup>3</sup> Túruiniakui Wikia Wii-shuaran jimiaran akatran akupkat-tajai. Nusha chikichik mir jimiará siañtu sesenta (1.260)

tsawant pujasar Winian etserkartatui. Nuka menaintiu uwí nan̄kaamasaiti. Útkur-entsatai pushin entsaru ártatui.” Tu turutiarmai.

<sup>4</sup> Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nuṅká Uuntri Yusai wa-jainiak, jímiar akatramua nú shuaran nakumainiawai.

<sup>5</sup> Shuar nin yajauch awajsataj tutai ni weneniá jinia jiki nemasri ashí áesatniuiti. Núnisan nin yajauch awajsatniun wakera nuka jákartatui.

<sup>6</sup> Nu aentska Yúsnan áujmatainiak yumi yutukaip títinian kakarman takakainiawai. Núnisan entsancha numpa awajsatniun kakarman takakainiawai. Tura ashí yajauchia nujai aentsun wáitkistinian takakainiawai. Nuna ashí ni wakeru-inia nu páchitsuk túramin áiniawai.

<sup>7</sup> Tura ni takatrin umikiarmatai Ti Kajen Yajasma nan̄katkachu waanmaya jinia nu mesetan najata nupetak máawartatui.

<sup>8</sup> Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntri Jesukristuncha máawarmiayi. Nu péprunmaya shuar tuke tunaan túrin áarmatai Ejiptu tuiniak tura núnisan Sutuma tuiniak nu péprun páchiiniawai.

<sup>9</sup> Tura menaintiu tsawant nuyá nan̄kaamas ashí nuṅkanmaya shuar jaka tepan ísar iwiarnascharti tiártatui.

<sup>10</sup> Nu jákarmatai ashí nuṅkanam pujuinia nú shuar ni jakamun ti wararainiak mai sunai ajartatui. Kame nu jimiará aents Yúsnan áujmatenak ashí shuaran wáitkiasaru áarmatai ti warasarmai.

<sup>11</sup> Nuyá menaintiú tsawant nuyá nan̄kaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

<sup>12</sup> Nuyá nu nantakiaru nayaimpinmaya kakaram untsuman antukarmai: “Juí yakí wakatarum.” Tu untsumiai. Tutai ashí ni nemasri ímiainiain yuran̄kim amuam nayaimpiniam wákarmai.

<sup>13</sup> Túmainiai ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajsarmai.

<sup>14</sup> Jímiar wáitsatin nan̄kaamasai. Chikichik ajasua nu túrunatin ishichik ajasai.

*Suntar siatia nu kachun umpuarmai*

15 Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntrj Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

16 Nuyá paintikuatru uuntka akupin pujutainium Yusaj naka pujuarmia nu piniakum tepersar Yúsan shiir awajenak tiarmai:

17 “Uunt Yusá, ti kakaram asam Ámijiaj tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijiaj nekas akupkatin juarme yamaikia. Tuma asakmin yumiñsajme, tiarmai.

18 Ashí shuar kajertamkaru ajñ yamaikia amesha kajerkatin tsawant jeayi. Jákarusha iniantkim ni túramurj íisartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nuñkan emesniuka ashí emesratniunam akupkattame.” Tu tiarmai.

19 Tuíniakui Yusa Uunt Jee nayaimpiniam ana nu uranmiatai wakenmaanj Chícham Aarma Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

## 12

### *Nuwasha tura Ti Kajen Yajasmasha*

1 Nuyá nakumkamu ti enentáimpramnia nayaimpiniam wantinkiamai. Nuwá etsajaj penuarma wantinkiamai. Nawesha nantunam ekeemai. Tura múuknum tuse yaan etsenkrakuyi.

2 Nu nuwá ajamtin asa jurertaj tusa wáitiak ti kakantar uutmiai.

3 Tumaj ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukesha siati asa siati akuptai tawaspan etsenkraku áрмаi. Tura kachurjsha tiásauyi.

4 Menaintiu nakakam jeeán yaan ni ujukéjaj japiki akakermai. Tura nuñká utsamai. Nu Ti Kajen Yajasma nu nuwá jatema nuj wajasmai. Júermataik yuruataj tusa wajattsamai.

5 Tura nuwasha áishmankan jurermai. Nu uchi uunt ajas ashí nuñkanam ti kakaram akupkatin asa, nu uchi akupin pujutainium Yus pujana nuj junakmiai.

6 Tura núwaka atsamunam pisarmai. Nu j pujustinian Yus iwiarturmai. Tura chikichik mir jimiará sian tu sesenta

(1.260) tsawant ayurnat tusa akupkamai. Nuka menaintiu uwí nan̄kaamasaiti.

<sup>7</sup> Nuyá nayaimpiniam meset amai. Nayaimpinmaya suntara kapitíántr̄i Mikiar ni suntarij̄j̄ai Ti Kajen Yajasmaj̄ai máanaikiarmai. Ti Kajen Yajasmasha ni suntarij̄j̄ai ti máanaikiarsha

<sup>8</sup> nupetmakcharmai. Túramtai nayaimpinmaya j̄iki akupkamuyi.

<sup>9</sup> Núnisan Ti Kajen Yajasma ashí ni suntarij̄j̄ai nun̄ká akupnakmai. Nu Yajasmasha iwianchi kapitíántr̄i Satanás tuinti. Yáunchuyá-napiiti niisha. Ashí nun̄kanmaya shuáran anan̄niuiti.

<sup>10</sup> Nuyá nayaimpinmaya kakaram unsumman antukmajai. Tura timiai:

“Uunt iwianch ii yach̄in yajauch áujmatin j̄iki akupkamu asamtai yamaikia ii Yusr̄i uwemtikratniusha tura ni kakarmar̄in iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yach̄in tsawaish̄a káshisha iniaitsuk Yusaj̄ yajauch áujmatniua nuna

<sup>11</sup> íksan̄ ii yachi nupetmakarai. Yus-susamu murikiu numpea áinis Jesukrístu numpej̄ai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nuj̄aish̄a uunt iwianchin nupetkarmai.

<sup>12</sup> Tuma asamtai nayaimpiniam pujarmena nusha warastarum. Antsu nun̄ká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantr̄i ishichik ajatesman nekáa ti kajekuiti.” Tu timiai.

<sup>13</sup> Nuyá Ti Kajen Yajasma nun̄ká ajapna nuwá áishman̄kan jurerma nuna áinramai.

<sup>14</sup> Turakui nuwan̄ uunt nanapen churuwia nanapea áinis sunasmai. Nuj̄ai nanamuk yáunchuyá-napiya p̄isar atsamunam wemai. Tura ni ayuratniunam menaintiu uwí nuyá sais nantu pujusmai.

<sup>15</sup> Nuyá nu napi ni weneyá entsá j̄iki nujan̄krumamai nuwan̄ ajekrataj tusa.

<sup>16</sup> Túrasha nun̄ka nuwan̄ yayak nakaak nu entsan mash ukuyámai.

<sup>17-18</sup> Túramtai nuwan̄ ti kajerak ni weeá chíkich írunna nuj̄ai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niij̄j̄ai máaniaktaj tawai.

## 13

*Nuyá Yajasma jímiara nu*

<sup>1</sup> Nuyá nayaantsa káanmatkar<sub>i</sub>n wajasan nayaantsanmaya Yajasman jiiniun wainkiamjai. Muukēsha siátitiat kachur<sub>i</sub> tias tura akuptai tawaspasha tias armai. Ashí muukēn Yúsan yajauch chicharin tu áarmauyi.

<sup>2</sup> Nu<sub>i</sub> wáinkiamaj nu Yajasma nekas uunt yawáa áinniuitiat nawēnka chaj nawēa áinniuyi. Wenēsha nekas kajen yawáa áinniuyi. Tura Ti Kajen Yajasma Entsaya Yajasman ni kakarmar<sub>i</sub>ncha tura ni akupkatniur<sub>i</sub>ncha susamai nujai ti kakaram akupkati tusa.

<sup>3</sup> Entsaya Yajasma muuké chikichkin jakamnia awatmian wainkiamjai. Túrasha pé<sub>n</sub>ker awajnasmai. Túramtai ashí nun<sub>kan</sub>maya shuar nuna ísar ti enentáimturar nemarsarmai.

<sup>4</sup> Túrawar nin tikishmatrar shiir awajsar “¿Yaki jujajsha jeá. Imiá kakaram asamtai yaki niijiai máanaikminiait?” tiarmai. Tura Ti Kajen Yajasma ni kakarmar<sub>i</sub>n Entsaya Yajasman susa asamtai ashí shuar nincha tikishmatrarmai.

<sup>5</sup> Núnisan<sub>n</sub> nu Entsaya Yajasma waantu enentáimtumak Yúsan yajauch chicharkatniusha tsan<sub>kat</sub>nakmai. Tura kuarentitús (42) nantutin kakaram akupkatniun sunasmai.

<sup>6</sup> Núnisan<sub>n</sub> túrak Yúsan yajauch áujmatuk ni náar<sub>i</sub>ncha ni Jēncha tura ashí ni shuar<sub>i</sub> nayaimpiniam pujuinia nunasha katsekkarmai.

<sup>7</sup> Tura Yusna ainia nujai mesetan najana nupetkatniun tsan<sub>kat</sub>nakmai. Tura ashí nun<sub>kan</sub>maya shuaran akupkatniun tsan<sub>kat</sub>nakmai.

<sup>8</sup> Túramtai ashí shuar tuke iwiaaku átinia nu papinium ni naar<sub>i</sub> yámankamtaiknumiá anujkamu atsúarma nuka nu Yajasman tikishmatrarmai. Nu papincha Murik jaka nantakmia nu takakui.

<sup>9</sup> Shuar juna ántakka enentáimprati:

<sup>10</sup> “Shuaran emetá juinia nusha emetnattawai.

Núnisan<sub>n</sub> shuaran nan<sub>kij</sub>iai mainia nusha nan<sub>kij</sub>iai mantam-nattawai.”

Tuma asamtai Yajasma mesetan najanamtai Yus-shuar Yus iísti tusar tuke enentáimtusar katsuntsar pujustin áiniawai.

<sup>11</sup> Nuyá chíkich Yajasman kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi.

<sup>12</sup> Niisha Entsaya Yajasma kakarmar<sub>i</sub>n súam akupniuyi. Tura ashí nun<sub>kan</sub>maya shuaran “Entsaya Yajasma pé<sub>n</sub>ké jaa tsuarma nu, shiir awajnasti” tímiai.

<sup>13</sup> Núnisan<sub>n</sub> shuarti túrachminian ti turin asa ashí shuar íimiainai<sub>n</sub> nayaimpinmaya jinia nun<sub>ka</sub> ajuarmai.

<sup>14</sup> Tura Entsaya Yajasma súam aents túrachminian ti turak ashí nun<sub>kan</sub>maya shuaran anan<sub>ka</sub>warmai. Túrak



Entsayá Yajasma nakumkamurin najanawarat tusa akupkamai. Túramtai puniajai penké jakamnia awatmia péñker ajsma nuna nakumkamurin najanawarmai.

<sup>15</sup> Kukariá Yajasma kakaram sunasmai. Nujai Entsayá Yajasma najanamun iwiaaku awajsatniua áintsan ichachkiaimai. Túram ashí níniak shiir awajeacham máatniun susamai.

<sup>16</sup> Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha ankantcha ankantchasha ashí ni nijiaíncha tura wakerakka untsuríncha anujtuktiniuyi.

<sup>17</sup> Entsayá Yajasma náarin tura wakerakka ni náarin númerurín anujtuktiniuyi. Túrachuka sumatnasha sumakchamniuyi, surutnasha surukchamniuyi.

<sup>18</sup> Wats, wi tájana ju nekaatniuka ti nekas enentáimtustiniaiti: Entsayá Yajasma númeruri áishmañka númeruri asa sais sian্তু seséntisáisaiti (666). Ashí ti neka ainia nú shuar Entsayá Yajasma númerurín nekapmar nin nekaati.

## 14

### *144.000 shuar Yúsan kantampruawarma*

<sup>1</sup> Nuyá Murikiun Seun náinnium wajan wainkiamjai. Níjiaisha sian্তু kuaréntikuátru mir (144.000) shuar wajaarmai. Nusha nijiaí Murikiu náarincha tura ni Aparí náarincha anujtukma aarmai.

<sup>2</sup> Ti untsurí árpan nayaimpiniam túntuiniak teer awajenak kanusa uuntri nujan Krak téter ajá núnisan antukmajai. Ti kakaram ipiamta núnis amai.

<sup>3</sup> Nu tuntuiyamujai sian্তু kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuatru tan kunmasha tura paintikuatru uuntnumsha naka wajasar kantamáwarmai. Nu kántanka chíchka nekaachmin armai. Aya nu sian্তু kuaréntikuátru mir shuarka jú nun kanmaya shuarnumiá uwempraru ásar nu kántan kantamiarmai.

<sup>4</sup> Nu shuarsha nuwajai yajauch ajascharu ásar ti shiir áiniawai. Túrawar Murik weana nuí nemarainiawai. Ju nun kanmaya shuarnumiá uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan armai.

<sup>5</sup> Nu shuar penké wáitruachu ásar Yúsai sha ti shiir tunáa máatrachu armai.

### *Menaintiu suntar chichaman etserainiawai*

<sup>6</sup> Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nun kanam pujuinia nú shuaran ujakartiniuyi.

<sup>7</sup> Nusha ti kakantar untsumuk timiai: “Yus ashamkatarum. Niñki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunñkancha nayaantsancha ashí entsancha najana asamtai shiir awajsatarum.”

<sup>8</sup> Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjaj nupetnak tuke emesnarai.”

<sup>9</sup> Nuyá chíkich suntar, menaintiua nu, taa timiai: “Shuar Entsayá Yajasmancha tura ni nakumkamuríncha shiir awajeakuñkia tura nijiañinumsha uwejnumsha ni naari anujtuk-maitkuñkia

<sup>10</sup> Yus nin kajerak ti asutiáttawai. Yapá pachimprachman áartinia áintsan ti kajerkattawai. Túramtai asupri ti tsúer keá nujaj jinium wáitsartatui. Yusa suntari tura Murik íimmianum apenáwar jinium wáitsartatui.

<sup>11</sup> Ni wáitsatniuri ji esaak kajintsuk tuke mukuintia nuniskete. Entsayá yajasman tura ni nakumkamurin shiir awajeenak ni naari anujmamainia nuka tsawaisha káshisha ayamtsuk wáitsartatui.

<sup>12</sup> Nu asamtai ni chichamen umirainiak Yusna ainia nuka Krístun ti shiir nemarainia ásar nu tsawantaj itiurchatnum pujuiniak katsuntratin áiniawai.”

<sup>13</sup> Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

“Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiar-tatui” tawai” turutmiai.

### *Jú nunkanam arakma juukma*

<sup>14</sup> Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijijaj najanam etsenkrakuyi. Tura machitian éren takakuyi.

<sup>15</sup> Tura chíkich suntar Yusa Uunt Jeeñia jünki yurañminiam eketun kakantar chicharuk tímiai “Árak júuktin tsawant jeayi. Machitrumjaj tsupiram juuktá.”

<sup>16</sup> Tutai yurañminiam eketu ni machitrijijaj nunká arakman tsupir juukmai.

<sup>17</sup> Nuyá chíkich suntar Yusa Uunt Jee nayaimpiniam ana nuyá jünkimiai. Niisha ni machitri éren takakuyi.

<sup>18</sup> Tura chíkich suntar namañ maar Yus-sútainmaya jünkimiai. Niisha jinia wáinniuyi. Tura máchit ti éren takakun

kakantar chicharuk timiai “Machitrum ti érea nujai uwa nunká arakma nu tsupiram juuktá. Mash tsamakarai.”

<sup>19</sup>Tutai suntar ni machitrijjai ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiátta nuna nakumeawai.

<sup>20</sup>Tura uunt péprunmaya arantach ijiurarmai. Tura neketainmaya numpa jínkimiai. Nu numpa tres siañtu (300) kiru-mitrua nu pajamar kawayu nujjjiai métek ajasmai.

## 15

*Nayaimpinmaya suntar amúamunam wáitkiastinia nuna piniñnumian ukainiawai*

<sup>1</sup>Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

<sup>2</sup>Nuyá antumianka áiv 20 Tura uunt péprunmaya aranntsañ ti saar jijjai pachimpramun wainkiamjai. Ni káanmatkarincha Entsayá Yajasman tura ni nakumkamurincha nupetkarma nu nu wajaarmai. Tura nin arpa tuntuítaiin Yus súsarmai.

<sup>3</sup>Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai: “Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme.

<sup>4</sup>Uuntá, ¿yaki ashampramkachatí. Tura yaki ti shiir awajtamsachatí? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

<sup>5</sup>Nuyá atak Yusa Uunt Jeen ísan, Ti Shiir Tesaamun uran-niun wainkiamjai.

<sup>6</sup>Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepsnumsha kurin emenmama armai.

<sup>7</sup>Nuyá kuaru tañkunmaya chikichik kurí piniñkian súsarmai. Nu piniñ tuke iwiaaku Yusa kajetairijjai piaku armai.

<sup>8</sup>Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsain Yusa Jeen wayachminiuyi.

## 16

*Wáitkiastin piniñ ukararma*

1 Nuyá Imiá Shiir Tesaamunmayá ti kakaram chichaamun antukmajai. Nusha siati suntaran tiarmai “Nuṅká werum Yusa kajetairi siati pininnum ana nu ashí ukartarum.”

2 Tutai emka suntar we, pininnumiá kukar ukarmai. Túramtai ashí shuar Entsaya Yajasma náarin anujmamprar ni nakumkamurin shiir awajiarma nuna ti najamin kuchap jiiintiarmai.

3 Nuyá chíkich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuṅ pujuinia nu kajinṅkiarmai.

4 Nuyá suntar menaintiua nu, entsanam tura púkununmasha ukarmai. Túramtai ashí numpa ajasarmai.

5 Nuyá suntar entsá wáinniuua nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme.

6 Iis, nu shuar amée shuárumincha tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

7 Tutai naman-maa-Yus-sútainmayá chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

8 Nuyá suntar kuatrua nu, tsawai nantunam ukarmai. Túramtai jijjai shuáran esaamujai wáitkiastin kakaram sunasmai.

9 Tura shuar ti sukuám wáitarmia nu, nu wáitkiastinian nérenniun Yusan yajauch chicharkarmai. Tura ni tunaarin enentáimtsuk Nin shiir awajsatniuncha penké nakitrarmai.

10 Nuyá suntar senkua nu, Entsaya Yajasma akupin puju-tairin ukarmai. Túramtai ni nunkeen ashí kashi ajasmai. Tura shuar ti najaimiainiak iniajncha esamiarmai.

11 Tura nújaisha yajauch túratniuncha iniaisacharmai. Antsu kuchaprijjaisha tura ti najaimiainiak wáitiainiak nayaimpinmayá Yusan ti yajauch chicharkarmai.

12 Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnamai.

13 Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsnan etserniua nuna weneyasha puachia núnin yajauch wakan menaint jíiniarmai.

14 Íwianch áiniak aents tujintiamun túruiniak ashí nuṅkanmayá akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai.

15 (Yamáí Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín péñker wáinia nú shuar ti shiir átatui. Misuchu asa natsaarchattawai.” Tu tawai.)

16 Tura yajauch wakan uunt akupin áinian Armajetún nunkanam irurarmai. Israer-chichamnum nu nunka tu anaikiamuiti.

17 Nuyá suntar siatia nu, nasenam ukarmai. Túramtai nayaimpinmayá Yusa Uunt Jeeniá ti kakaram chicham Yus akupin pujutainmayá chichaak “Mash uminkiai” timiai.

18 Tura nuyanka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti.

19 Ti Uunt Péprusha menaint nakantramai. Ashí nunkanmayá péprusha saanakiarmai. Nuisha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai.

20 Entsá ajapén atentrasha tura murasha menkaramai.

21 Núnisan nayaimpinmayá uunt kaya núnisan micha kakeramai. Ti uunt áiniak kintiarjají métek kijin armai. Shuarsha nujají ti wáitiainiyatan áyatik Yúsan yajauch chicharkarmai.

## 17

### *Tsanirmatai nuwá asutiámu*

1 Nuyá siati suntarnumiá chikichik taruti turutmiai “Wini-tiá. Tsanirmatai nuwá ti asutiátniun iniaktustatjame. Nu nuwá nayaantsanam uku eketui.

2 Ashí jú nunkanmayá akupin níjjiai tsanirmawaru áiniawai. Núnisan ashí jú nunkanmayá shuar, nu nuwá tsanirmatniun tsankateam, nijiamanch umartinia áintsar níjjiai ti yajauch túrawar nampekarmai.” Nuna taku Yusnumiá kanaktinian nakumkamai.

3 Nuyá mesekranam kampuntin atsamunam jurukmiai. Tura nuí Yajasma kapaakunam nuwá eketun wainkiam-jai. Nu Yajasma masha ashí Yúsan yajauch chichareamu áatramuyi. Muuke siátitiat kachurí tiásauyi.

4 Nu nuwasha tarachin yamakai kapaakujajisha ti shiir iwiarmamar entsaruyi. Kurijjajisha, shírmach kayajajisha, ti shiir sháukjajisha iwiarmamprauyi. Kurí pinínkian mujmiainniasha tura ashí ni tsanirmatairí imiá yajauch armia nunasha piakun ajaamak takakauyi.

<sup>5</sup> Nijjainiumsha ni naaria áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nunkanam Mujjmiainian Túrinia Nunasha Nukurinti.

<sup>6</sup> Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai.

<sup>7</sup> Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukasha siátichukait tura kachurisha tiáschak áinia.

<sup>8</sup> Nu yajasma wáinkiam nuka yaunchu pjuwiti tura yamaikia jui pujachiat amúamunam tuke játsuk nánkatkachu wáanmaya jinkíttiwai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiattawai’ turutmiai.

<sup>9</sup> ‘Nekas neka ainia nu júna enentáimturarti: Siat muukenka siati náintian nakumui. Nu nuwá nuj eketui.

<sup>10</sup> Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui.

<sup>11</sup> Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chikich siati akupniujai iruram métek enentáimpramniaiti. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

<sup>12</sup> ‘Tias kachuri wáinkiam nuka tias akupin tuke akupeenat-sna núiti. Niisha nu yajasmajai métek penké ishichik tsawant akupin ajastatui.

<sup>13</sup> Ju tias akupniusha métekrak enentáimiainiak ni kakarmarin yajasma sústastatui nújajisha akupkat tusar.

<sup>14</sup> Murikjajisha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Nijjajai írutraa nu, Yus Winia atí tusa achikma ásar tura Nin tuke umirin ásar Nijjajai nupetmakartatui.’

<sup>15</sup> Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuáran nakumeawai.

<sup>16</sup> Tura tias káchuka yajasma wáinkiam nu, tsanirmatai nuwan nakitrar ajapawar misú ikiukiartatui. Ni ayashincha yuawartatui tura áesawartatui.

17 Nu akupniu enentáin Yuska ni wakeramurin apujsaiti. Nii timia nu umintsain akupniusha métekrak enentáimprar ni kakarmarin takamtsuk yajasman súsatniun enentáimtikramai.

18 Nuwa wáinkiam nuka ashí nunkanmaya akupniun akupeana nu pépruiti.”

## 18

### *Papirúnia emesramuiti*

1 Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai.

2 Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairisha ajasai. Mujjmai nanamtincha tura ashí yajauch nanamtin ainia nusha nuj pasunmainiawai.

3 Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar nijjai tsanirmawarua áinis áiniawai. Tura shuarsha ni yajauch wararmajai ti kuútrintin ajasaruiti.” Tu timiai.

4 Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkitiarum. Túrachkurmeka ni tunaarí jumamkirum ni wáitsatniurincha pachiinkiatarme.

5 Ni tunaarisha ti piak nayaimpiniam jeastatuk ajasai. Tuma asamtai Yus ni tunaarin kajinmatkichuiti.

6 Ni tunáa túramujai métek akikiam ataksha nuna nankaamas métek patattsata. Ni yajauch túramu nijjamchin ashí áararma núnisan nuna nankaamas ti wáitsatin nijjamanch pachimpruram susata.

7 Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniatiat ni enentáinkia enentáimias “Uunt Akupniuitjai. Wajechu asan penké wáitsashiniatjai” tu enentáimtumawai.

8 Tuma asamtai ti wárik chikichik tsawantai ni wáitsatniurí tarittiwai. Jákatniusha ti wáitsatniusha tura tsukasha tarí ashí jijjai ekeemankattawai. Uunt Yus ashí Tujincha nu kajerkamu asa nujai asutniáttawai.” Tu timiai.

9 Ashí nunkanmaya akupin nijjai tsanirmawaru ainia nu ashí yajauchin nijjai wararsaru ásar nu pepru esaak múkuint ajakui eararmai.

10 Ti esaak wáitiakui nují pachiinkiar wáitsatniun ashamainiak arant wajasar tiartatuí “Maa, Papirúnia ti uunt

pépruitiat nekas wáitnenmai ajawai. Imiá wárik ni wáitsatniuri tarini.”

11 Núnisaṅ ashí nunkanam súrin ainia nusha nu péprun ti kuntuts enentáimturar eḡartatui. Ni surutain itiamun ḡyaki sumarkat?

12 Kame juna itiaru áiniawai: kurincha, kuítniasha, kaya shíirmachincha, ti shiir sháuknasha, ti péṅker tarachniasha, akupin entsatai shiirmachin yamakaincha kapaḡaniuncha, sétancha, itiaru áiniawai. Núnisaṅ ashí kuṅkuin numincha, ti shiir awara najanamuncha, ti shíiram numincha, yaṅkú jiruncha, peṅké jiruncha, mármur kayancha itiaru áiniawai.

13 Núnisaṅ ishpiṅnasha, nusháa kuṅkuinniasha, mira kuṅkuinniasha, umutaincha, asuitincha, trikiu nerencha, tura trikiu ti péṅker nekenmancha itiaru áiniawai. Núnisaṅ áintstai taṅkuncha, murikniasha, kawaincha ni kárujijai, tura nú arantka shuárnasha suruktinian itiaru áiniawai.

14 Tura nu péprun tiarmai “Numí nerēn ti wakeruk súmauya nu yamaikia nuṅ atsawai. Ashí ni kuítriṣha tura ashí ni péṅkeriṣha tuke peṅké amuukai.” Tu tiarmai.

15 Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eḡartatui.

16 Túrawar tiartatui “Maa, uunt pépruitiat ti wáitnenmai ajakai. Nuwá ti peṅker iwiarmampra áinis nuyá shuar akup-tai tarachin yamakaijiai kapaḡaku entsarmai. Kurijiaisha kaya ti shíirmachijiaisha tura ti peṅker sháukjaisha ti shiir iwiarmampraruyi.

17 Ti wárik ashí ju kuit amukaiti.” Tu tiarmai.

Ashí uunt kanú kapitiantriṣha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai.

18 Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.”

19 Tiar ti kuntuts pujuuniak awatmamar kakantar úutainiak tiarmai “Maa, ti uunt pépruitiat ti wáitnenmai ajakai. Ashí uunt kanu nérentin nayaantsanam niijiai takasar kuítrintin ajasarmai. Tura ti wárik mash emesnari.” Tu tiarmai.

20 Antsu nayaimpiniam pujarumna nu, ashí Yus akatramu-tirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

21 Nuyá ti kakaram nayaimpinmaya suntar ti uunt neketai kayan jukí nayaantsanam ajuṅ timiai “Júnisaṅ uunt pepru Papirúnia emesnar atakka wainniakchatin tuke meṅkakattawai.



22 Tura atakka jantsemma pin̄kiuisha tampursha shakapsha antunkashtatui. Nu arantcha nuñkia shuar pen̄ké takakmaschartatui. Túramtai nekeamusha antunkashtatui. Ashí mitia átatui.

23 Shiripkincha ekeemakchartatui. Nuatma nampersha antunkashtatui. Nuikkia ni shuari súrín arma nu ashí nuñkanam nañkaamantu armai. Tura ashí nuñkanmaya shuaran waweatniua áintsan níya núnis ajasarat tusa anañkawarmai. Túrasha núnisan ti kakarmaitiat ju mash túrunayi.” Tu timiai.

24 Kame ni akupkamujai pen̄ker shuar ti mantamnewaru asamtai nu péprunam ashí yaunchu Yusna etserniu numpesha, ashí Yus-shuara numpesha tura pen̄ker shuar ashí nuñkanam maamu ainia nuna numpesha nuñ paant wáinkiamniaiti.

## 19

1 Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nañkaamaku átinniasha, tura ashí kakarmancha nekas nérenniuiti.

2 Niisha aya nekas pen̄ker túratniua nuna túrin asa ti nukap tsanirmaun ashí shuaran tsanirijjai utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

3 Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

4 Tuíniakui paintikuatru uunta nu tura kuaru tañkusha nuñká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai.

5 Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitiánitkiurmesha péechachitkiurmesha, ii Yusri tuke shiir awajsatarum.” Tu timiai.

### *Murik nuatnaikiatin namperi*

6 Nuyá ti untsurí aents chichainiak kanusa uuntri nu-jan̄krak téter ajá núnisan antukmajai. Ti kakaram ipiamta núnis amai.

“Tí shíiraiti, tiarmai. Ii Uuntri Yus ashí tujincha asa ashí akupkatniun nañkaamayi.

7 Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai.

<sup>8</sup> Murikiu anajmarmarinkia iwiarnarti tusa ti shiir pushi sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar pénker túramun nakumeawai.

<sup>9</sup> Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juka Yus timia asa imiá nekasaiti.”

<sup>10</sup> Takui nu suntaran shiir awajsataj tusan tikishmatramjai. Túramtai turutmiai “Penke áinkiaip. Wisha Yusa yáintrintjai ámijiai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

### *Kaway pújunam eketna nu*

<sup>11</sup> Nuyá nayaimp uranniun wainkiamjai. Nui kaway puju wantinkiamai. Nu kawaynium ekeema nuna naarii Ti Penker Umin tutaiyi. Núnisan Ti Nekas Turin tutaiyi. Ti penker Akupin asa aya nekas pénker túrak mesetan najanaiti.

<sup>12-13</sup> Ni jisha jijiai métek keeármai. Múuknumsha akuptai tawaspan untsuri etsenkrakuyi. Nui ni naarii Yus Chicham áarmauyi. Túrasha tana nuna Ninki takamtsuk nekaamai. Numpajai enkerman entsaruyi.

<sup>14</sup> Ti untsuri nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai.

<sup>15</sup> Nu suntara Uuntri weneeya, ashí nunkanmaya yajauch shuaran máatin, puniá mai ere tsakatskatin jiinmiai. Tura jirujai asutiátnua áintsan ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekenkar ijiuratnua áitkiasan wáitkiasartatui.

<sup>16</sup> Ni pushirincha makuincha ni naarii áarmauyi: Ashí Akupniun Akupin tura Ashí Uunta Uuntri.

<sup>17</sup> Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitiarum.

<sup>18</sup> Akupniu namankésha yuítiarum. Suntara kapitánri namankésha, kakaram suntara namankésha, kaway namankésha tura eketainia nuna namankésha, kame ashí shuara namankésha nankaamantu ainia núnasha tura penké shuar ainia núnasha yuítiarum.” Tu untsukmai.

<sup>19</sup> Tura nuyá Entsaya Yajasmancha tura ji nunkanam akupin ainia nunasha ashí ni suntarijiai wainkiamjai. Niisha kawainium eketka nujai tura nuna suntarijiai mesetan najanatai tusar iruntrarmai.

<sup>20</sup> Tura nu mesetnum Yajasmasha tura Kukariã Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarín súam nu Kukariã Yajasmaka aents tujintiamun ti turak shuáran anañkawarmai. Túramtai nu shuar Entsaya Yajasma náarín apujmamsar ni nakumkamurín shiir awajsarmai. Tuma asamtai Entsaya Yajasmacha tura Kukariã Yajasmacha íwiakuk asuprijjái ti kea nu ji-antumiañnum apeáwarmai.

<sup>21</sup> Chíkichka kawainium eketkanumiã puniá tsakatskatin weneyã jijnmia nujái mantamnawarmai. Túramtai nanamtin ni ayashín yuawar ejemakarmai.

## 20

### *Kristu mir uwí jú nuñkanam akupkattawai*

<sup>1</sup> Nuyá nayaimpinmaya suntar táarun wainkiamjai. Nusha nánkatkachu wãã yawirín tura jinñkiatai jirun kampurman takakuyi.

<sup>2</sup> Nu suntarsha Ti Kajen Yajasma jiru kampurmajái jinñkiamai. Nu Yajasma iwianchi kapitiántri Satanas tutainti. Yáunchuya-ñapiti niisha. Tura nu iwianchin jinñkiá mir uwí pujusat tusa

<sup>3</sup> nánkatkachu wããnam epenñmiais. Tura waiti uraichminian anujtukmai. Mir uwí nañkaamatsain ashí nuñkanmaya shuaran anañkawarain tusa túramai. Antsu mir uwí nañkaasmatai ishichik tsawant añkant akupnaktiniaiti.

<sup>4-5</sup> Nuyá akupin pujutainium pujuinian wainkiamjai. Tura shuara túramurín írsarat tusa kakaram sunasarmai. Tura núnisañ muuke tsupirka maamu wakanincha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmacha ni nakumkamuríncha tikishmatracharu armai. Núnisañ náaríncha nijiañinumsha tura uwejnnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujái métek mir uwí akupeamun wainkiamjai. Antsu chíkich jákaruka mir uwí nañkaamatsain nantakcharmai.

<sup>6</sup> Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimiara jákatniunam pachiintsuk Yusna tuke takarin tura núnisañ Krístunu tuke takarin ártatui. Tura Krístujái métek mir uwí akupkartatui.

<sup>7</sup> Tura mir uwí nañkaasmatai uunt iwianch urani akupnaktatui.

<sup>8</sup> Túram ashí nunkanmaya shuáran anan̄kawartaj tusa jínkittiwai. Kuk nunkanmasha tura Makuk nunkanmasha ashí pujuinia nuna anan̄kawartatui. Tura mesetan najanataj tusa ni suntarín nekapmarchamnia ti untsurí irurtatui.

<sup>9</sup> Tura ashí nunkan enetak Yus-shuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai.

<sup>10</sup> Tura iwianchi kapitiántri, nin anan̄kawarmia nu, asuprijiái keá ji-antumian̄num apenámai. Nu yaunchusha Entsaya Yajasmasha tura Kukariá Yajasmasha, penké ántar yusnan etserniua nu, nuí apenáwarmai. Nuísha tsawaísha káshisha iniannatsuk ti wáitsartatui.

*Ashí amúamunam súmamtikiatin tsawant*

<sup>11</sup> Nuyá akupin pujutain úuntan tura ti pújun wainkiamjai. Tura nuí pujancha wainkiamjai. Niisha ti kakaram asamtai nunkasha nayaimpisha aya menkarar tuke atsúarmai.

<sup>12-13</sup> Tura túrunatsain̄ nayaantsanam jákarua nusha jínkiarmai. Núnisan̄ iwiarsamunam jaka pujuinia nusha jínkiarmai. Tura jákaruncha, nan̄kaamantu arma nunasha tura penké shuar arma nunasha, ashí wainkiamjai. Tura Yusai naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurí paant nékaneakui súmamtiknawarmai. Tura chíkich papisha tuke iwiaaku pujustin papí urankamai.

<sup>14</sup> Nuyá jákatin amuukati tusa ji-antumian̄num apenámai. Nu ji-antumian̄num wétin jimiará jákatin tútainti.

<sup>15</sup> Tura ashí shuar ni naari tuke iwiaaku pujustin papinium atsúarma nusha nuí apenáwarmai.

## 21

*Nayaim yamaram tura yamá nunka*

<sup>1</sup> Nuyá nayaimpisha tura nunkasha menkaramtai nayaim yamarman tura yamá nunkancha wainkiamjai. Tura nayaantsasha atsumai.

<sup>2</sup> Wi, Juan, ti shiir péprun, Yusnumiá yamaram Jerusaréñkan nayaimpinmaya táarun, wainkiamjai. Anajmarma ni áishrin̄ in̄kiuntaj tusa ti shiir iwiarmampra áintsan̄ ti penker iwiaramuyi.

<sup>3</sup> Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijjai pujaku ashí ni shuari ártatui. Tura niijjai tuke pujak nekas tuke ni Yusri átatui.

<sup>4</sup> Yus ni neajkin ujujturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

<sup>5</sup> Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniati.”

<sup>6</sup> Ataksha turutmiai “Yamaikia mash uminkiyai. Wiitjai. Yámankamtaiknumiá amúanmasha tuke pujuwitjai. Wisha A rétranmaya Y rétranam ashí retra áintsaitjai. Ashí kitiamo núnaka tuke iwiaaku pujutai entsan penké kuítchajai áartatjai.

<sup>7</sup> Nupetmakunka ashí yamarma juna mash susattajai. Wisha ni Yusri átatjai. Núnisan niisha winia uchir átatui.

<sup>8</sup> Antsu sápijka, Yúsan enentáimtichusha, yajauchin máatrasha, mañkartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijjai keá ji-antumiannum apenáwartatui. Nuka jimiará jákatin tútainti.”

### *Yamaram Jerusarén*

<sup>9</sup> Nuyá siati suntar piniñ amúamunam wáitkiastinjai piakun takakua nuyá chikichik taruti túrutmiai “Winitia. Murikiu anajmarmarin iniaktustatjame.”

<sup>10</sup> Taku mesekranam naint yakí juruki Yusnumiá ti shiir Jerusarén pepru nayaimpinmaya táarun iniaktursamai.

<sup>11</sup> Nu péprusha Yusa wincharijjai tsáapniniuyi. Nu tsáapnincha kaya ti shíirmachia núnis jaspi kaya nuní saar asa ti tsáapniniuyi.

<sup>12</sup> Pepru yantamesha ti yakí pénkramuyi tura wáitiri tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi.

<sup>13</sup> Nantu tátainmaani menaintiu waiti amai. Nantu akatainmaani sha menaintiu waiti amai. Nunkaanisha menaintiu waiti amai. Arakaanisha menaintiu waiti amai.

<sup>14</sup> Ti uunt kaya tuse apujsamu armai. Tura nu j ekenir pénkramuyi. Nu tuse kayanam Murikiu akatramuri tuse armia nuna naari áarmauyi.

<sup>15</sup> Suntar wijjai chichaua nu, nekapmatain kurin takakuyi. Nujai pépruncha, wáitirincha, tura pénkramurincha nekapmartiniuyi.

<sup>16</sup> Pepru esantisha wañkantisha yakirisha mash métekrak armai. Suntarsha péprun nekapmataijjai nekapmaram esantisha wañkantisha tura núnisan jeamkamu yakirisha jimiará mir jimiará sianu (2.200) kirúmitru amai.

<sup>17</sup> Nuyá pénkriñcha nekapmarmai. Suntar aents nekapmataijjai nekapmaram sesentikuatru (64) mitru amai.

<sup>18</sup> Nu pénkramusha jaspi kayajai najanamuyi. Péprusha aya kúrikiyi. Nu kuri ti penker sáaraui.

<sup>19</sup> Pen apujtukma kayasha ti shiir kaya ainia nujai najanamu asa ti shiir iwiaramuyi. Emka nu jaspi káyauyi.

Jímiara nusha sapiru káyauyi. Menaintiua nusha ákata káyauyi. Kuatrua nusha ismirártauyi.

<sup>20</sup> Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatísta káyauyi. Ti kayaim apujsamu asamtai ti shíirmachiiyi.

<sup>21</sup> Pepru wáitiri tuse ainia nu, ti shiir nayaantsanmaya shaukjaí chikichik najanamu armai. Pepru jintísha aya kúrikiiyi. Nu kuri ti penker sáarauyi.

<sup>22</sup> Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi.

<sup>23</sup> Nu péprunmasha tsawai-nantusha kashí-nantusha atsumchamai. Antsu Yusa winchari tsáapin awajmiai. Núnisan Muriksha tsáapin awajmiai.

<sup>24</sup> Nu tsáapnijiaisha ashí nunkanmaya shuar wekasartatui. Tura ashí nunkanam akupin ainia nusha nuí yujainiak ni pénkerijiaí nuna shiir awajtuiniawai.

<sup>25</sup> Tura kashi atsá asamtai tuke tsawaiti. Tuma asamtai wáitiri tuke epenchamu ártatui.

<sup>26</sup> Tura ashí nunkanam pénker ana nuna nuí itiaartatui.

<sup>27</sup> Tura yajauchikia penké wayashatatui. Muíjmiainian túrincha tura anankartíncha penké wayachartatui. Antsu áyatik shuar tuke iwiaaku pujutai papinium naari aarma ainia nuke wayawartatui. Nu papincha Murik takakui.

## 22

<sup>1</sup> Nuyá suntar tuke iwiaaku pujutai entsan ti sáaran iniak-tursamai. Nusha uunt akupin pujutainmaya ti saawi jiin-miai. Nu pujutaisha Yusna tura Muriknauyi.

<sup>2</sup> Pepru jintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukeshashí nunkanmaya shuar tsuámatainti.

<sup>3-4</sup> Ashí yajauchia nuka atsuttawai. Uunt akupin pujutai, Yúsnasha Murikniasha, nuín aa asamtai ni shuari ti paant wainiainiak tikishmatrartatui. Tura nijiaíncha ni naari anujmankartatui.

<sup>5</sup> Tura káshisha atsuttawai. Nuí pujuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuari tuke iniañnatsuk akupkartatui.

*Jesukrístu tátintri penké nuntumsai*

<sup>6</sup> Nuyá suntar turutmiai “Ju chicham ti nekas asa nekas enentáimtusminiai. Uunt Yus yaunchu níiniun etserniun ni

chichamen enentáimtikramia núnisan̄ yamaikia ni suntarin̄ akuptuk wárik túrunatta nuna ashí ni shuarin̄ ujakuíti.”

7 “Ti wárik winittiajai” tawai Murikkia.

Shuar jū papinium Yusa Chichamē áarman umirna nuka shiir warasminiaiti.

8 Wi, Juan̄, juna mash íisan mash antukmajai. Tura mash íisan antukan nayaimpinmayā suntar iniaktursama nuna shiir awajsataj tusan tikishmatramjai.

9 Túram turutmiai “Penke áinkiaip. Wisha Yusa yáintrintjai ámijjai métek tura yatsumijjai métek. Yúsnan etserin ásar tura jū papinium áarma nuna umirainiak Yusa yáintrí áiniawai niisha. Yúsak shiir awajsatniuiti.”

10 Nuyá ataksha turutmiai “Jū papínium aarma Yusna asam-tai úukam ikiusaip. Ashí túrunatin tsawant ishichik ajatesai.

11 Nu jeatsain̄kia yajauch shuarka tuke yajauch túruki wetí. Núnisan̄ muj̄miainian túraka tuke túruki wetí. Antsu péñkeran túraka péñkeran túruki wetí. Núnisan̄ esetar enentáimniusha tuke esetar Yusjaī wekasati.”

12 Muriksha tawai “Eta, ti wárik winittiajai. Túran ti shíirmachin ashí péñker túramujaī métek súsatniua nuna takukin winittiajai.

13 Wiitjai. Yámankamtaiknumiā amúanmasha tuke pjujuwitjai. Wisha A rétranmayā Y rétranam ashí retra áintsaitjai.” Tu tawai.

14 Ni pushirī péñker nijiamatniua núnisan̄ péñker túrinia nú shuar shiir warasminiaiti. Nu shuar nu pepru wáitirin̄cha wayamniaiti. Túrar tuke iwiaaku pujutai numinmayā yuamniaiti.

15 Tura antsu Yúsan enentáimtachuka, wawekratniuka, tsanirmatan pujurainia nuka, mañkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aā matsatainiak penké wayachmin áiniawai.

16 “Wi, Jesus, ashí Yus-shuaran ujakarát tusan winia suntarun akupkajai. Wikia Tawit Weeitjai. Túrasha Tawitia Úuntrin̄tjai. Wikia ti tsáapin yaa, yánkuamia áintsan̄ketjai.” Tu tawai.

17 Yusa Shiir Wakan̄sha tura Murik anajmarmasha “Winitiarum” tuiniawai.

Tura juna ántana nusha “Winitiarum” tití. Tura ashí ki-tiama nuka winití. Wakerakka tuke iwiaaku pujutai entsan penké kuítchajai umartí.

18 Ashí shuar jū papinium Yus-Chicham aarma nuna antukarun juna ujaajai: Shuar juī áarman chikichan pataakka Yus nin ti wáitsatin̄ juī aarma nuna patattsattawai.

19 Núnisan̄ shuar juī aarman emeneakuin̄kia Yus ni naarin̄ iwiaaku pujutai papiniumiā japirattawai. Tura ti shiir

péprunam wayatniun suritkiattawai. Nu péprusha tura nu papisha juí paant ujakma áiniawai.

<sup>20</sup>Jú papí áantratniun ujakua nu tawai “Eta, ti wari winittiajai.”

Pai, núnisañ atí. Wari winitia, Uunt Jesusá.

<sup>21</sup>Ii Uuntri Jesukristu atumniasha shiir yainmakarti.

Nuke atí.